

**EIGHTH LEGISLATIVE ASSEMBLY OF MIZORAM
(ELEVENTH SESSION)**

LIST OF BUSINESS

FOR TWELFTH SITTING ON THURSDAY, THE 23rd FEBRUARY, 2023
(Time 10:30 AM to 1:00 PM and 2:00 PM to 4:00 PM)

QUESTIONS

1. **Questions** entered in separate list to be asked and oral answers given.

**FINANCIAL BUSINESS
DISCUSSION AND VOTING ON DEMANDS**

2. **PU TJ. LALNUNTLUANGA**, Minister to submit to the vote of the House various Demands under his charge.
3. **PU R. LALZIRLIANA**, Minister to submit to the vote of the House various Demands under his charge.
4. **DR. R. LALTHANGLIANA**, Minister to submit to the vote of the House various Demands under his charge.

LALHMAHRUAIA ZOTE
Commissioner & Secretary

* Please see Bulletin Part-II No. 288, dated the 15th February 2023 for Demands to be moved by Ministers.

SPEAKER : *Chuvangin, infuih tawnin, intisawt tawn theuh rawh u, in tih reng thin ang hian.* -I Thesolonika 5:11

QUESTIONS & ANSWERS

Zawhna & Chhanna ah kan kal nghal ang a. *Starred Question* No.181 - Zawt turin member zahawm tak Pu Lalrintluanga Sailo ka sawm e.

PU LALRINTLUANGA SAILO: Pu Speaker, ka lawm e.

Transport Minister zahawm tak chhana tan, ka zawhnate chu –

- a) Inland Water Transport lamah hian Mizoram sorkar hian hmalakna a nei em?
- b) Nei ni se, khawiahte nge hmalak tan anih a, he department hmanga hmalakna hi engtik atangin nge Mizoram sorkar hian a kalpui tan?

SPEAKER : Chhang turin a changtu Minister zahawm tak Pu TJ Lalnuntluanga ka sawm e.

PU TJ. LALNUNTLUANGA, MINISTER: Pu Speaker, MLA zahawm tak Pu Lalrintluanga Sailo zawhna chhanna chu –

- a) Nei e.
- b) Transport Department hian IWT subject hi Mizoram PWD hnen atangin 30th August, 2019 ah mawhphurhna a la tan a. Hemi hnu atang hian Mizoram a lui hman tangkai theihthe dap chhuakin, IWT lama hma kan sawn theihna atan theihtawpin hmalak nghal a ni a. A hnuaia lui tarlanah te hian hmalak mek a ni a: -
 - i) Tlawng Lui
 - ii) Khawthlang Tuipui
 - iii) Chhimtuipui.

Tin, Chhimtuipui Lui-a Maurap kaiah Lawngtlai District chhunga inkalpawhna tha zawk a awm theihna atan Lawngtlai East bialtu MLA zahawm tak hmalaknain leh kan Chief Minister zahawm tak duhsaknain marboat leh boatmen te tan *hut* sak a ni a. June 1, 2022 khan Lai Autonomous District Council kutah an enkawlzui tura hlan fel a ni.

SPEAKER : *Zawhbelhna* - Zawhna neitu, Member zahawm tak Pu Lalrintluanga Sailo ka sawm e.

PU LALRINTLUANGA SAILO: Pu Speaker, ka zawhbelhna chu hei hi a ni –

Ka biala Khawthlang Tuipui ina a kual vel chhungah hian Rengkhoa te, Silsuri Village Council East leh West te, Hnahva leh Gudasuri te, Marpara te a awm a. He lui hi border trade kan sawi fo thin te nen pawh inkaihnawih thil a ni a. Tin, Tlabung thlengin he Khawthlang-tuipui hi a luang a; hetah hian Inland Water Transport hi hman tangkai ve theih a ni em? Sorkarin helai bikah hian hmalakna a nei em?

He lua hi kan hriat angin lui dam tak mai a ni a, hma la lutuk lo pawha hman tangkai theih nghal tur niin leh, Bangladesh nena kan insumdawntawwna tura kawng pawimawh tak a ni dawn a. Tin, inkawlpawhna kawng hi tunhma atangin kan la nei tha lova, Pukzing atanga Silsuri te heng Gudasuri, Hnahva, Silsuri kalna kawnga hi PWD hian an la take-up chiah lova. Kumin furpuiah pawh khan ration supply leh engkim mai hi marboat (private-in engine neia an siam) hmanga lak mai mai chu a ni a. Chuvang chuan, heng khaw pangate tan hian a pawimawh leh zual a, heng hi telh a lo nih chiah loh pawhin sorkar hian telh turin hma min lak sak thei ang em?

SPEAKER : *Zawhbelhna* - Member zahawm tak Pu Nihar Kanti Chakma ka sawm e.

PU NIHAR KANTI CHAKMA: He project *Inland Water Transport* hi a lawmawm em em rualin ka zawh duhna chu - Environment te a effect nasa si a, impact nasa takin a nei dawn a. “Sorkar laipui hian environment effect a neih theih te leh social impact assessment te a nei tawh em?” tih kha a hmasa berah chuan a ni a.

Tin, “Inland Water Transport project hna hi physical-a kalpui tan a ni tawh em?” tih te;

Tin, pathumnaah chuan – “He project-ah hian kawng sial ngawr ngawr bakah thil dang a ken tel a awm em?” tih te kha ka zawt a ni e.

SPEAKER : A theih ang ang chhang turin a changtu Minister zahawm tak, Pu TJ Lalnuntluanga ka sawm e.

PU T.J. LALNUNTLUANGA, MINISTER: Pu Speaker, kan MLA zahawm tak Pu Rintluanga Sailo in a biala tlangdung khung – “Marpara te, Silsuri tlangdung te, Rajiv Nagar thleng khuan hman tangkai ve theih a ni ang em?” tih a zawhna kha, kei pawh a hmunah lawngin ka zu kal kual tawh a, he lai hi han sawi zau hlek ka duh a.

He Inland Water Transport hi kan mi-hmasa te chuan a tangkaina an sawi thin a, tin, hmun dang, Khawthlang-tuipui ni kher lo lui dang te pawh tih ve ni se kan ti a. Kan mitthlanaah chuan phai lampang ram rai thaa lui lian ang te khu a ni a. Amaherawhchu a taka han kalpui tur hian tlang kara zuk luh thukna a ni a, a hman tangkai dan tur nena han chhut hian, hmun thenkhat hi chu beisei a sang lutuk lova. Chutih rual erawh chuan a area-a awmte ina an hman tangkai theih dan tur kha ngaihtuahpui a ngai a. Nichinah kan MLA zahawm tak khan a bialah ration lak nan te an hman tangkai zia te a rawn sawi tawh a. Chuvang chuan, thil tha tam tak hmalakna turah hei hi kan thlang chhunzawm a, chutah chuan Marpara tlangdung pawh lawngin kan zuk kal kual a.

Chutih lai chuan, Mizoram-ah tui tam leh tlem lai a lo awm a, tui tlem lai chuan beisei hi a sang lutuk lo thin a. Amaherawhchu fur lai hi chuan ‘lui tui hi a hman tangkai theih viau dawn hi’ tihna lian tak a awm bawk a. Chutiang avang chuan Khawthlang-tuipui, Tlabung atanga Rajiv Nagar thlengin techno-feasibility survey neih turin central-ah kan thlen a, Minister te leh Secretary te pawh kan zu hmu tawh a. Tichuan, an niin hma an rawn lak tur thu min rawn hrilh a, tunah hian a taka kalpui turin kan ngaichang mek a ni.

Tichuan MLA zahawm tak, Pu Nihar Kanti Chakma zawhna - “Environmental effect te a awm ngei dawn a, hei hi a taka kalpui a ni thei dawn em?” tih kha; Ni e, environmental effect te a awm theih dawn avangin forest clearance kan dil a, tunah hian stage 1 atan approval min rawn pe tawh a, Khawthlang-tuipui bik atan sawn. Tichuan, “tunah a taka kalpui a ni tawh em?” tih chhanna atan chuan - E-tender kan chhuah a, chu chu a tirah mi pahnihin an chhang a. Central lam duh dan ala fulfill loh deuh avangin kha tender khan awmzia a nei ta lova. Tunhnaiah khan tender hi kan chhuah nawn leh a Tunah hian e-tender bawkin mipuite leh contractor a fit zawkte leh a criteria zawm thei turte kha kan ngaichang mek a ni.

SPEAKER : *Starred Question* No. 182 - Zawt turin Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Speaker, ka zawhna hi kar hmasa lam khan kan chai nasa tawh a, ka rawn zawt tho ang a.

Chhungtin tana SEDP-Healthcare awm anga Assembly House-a Chief Minister-in a sawi chhuah hi, a takin mipui tan ‘SEDP-Healthcare’ hi a awm reng em?

SPEAKER : Chhang turin Chief Minister zahawm tak, a department changtu ni bawk Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, Member zahawm tak Pu Zodintluanga Ralte zawhna chhanna chu -

Mizoram Sorkar flagship programme SEDP hnuaiah hian healthcare hi ngaih pawimawh ber zinga mi a ni a. Mizoram State Healthcare Scheme (MSHCS) kalpui nan SEDP fund atangin sum thahnem tak a hnuaia tarlan ang hian dah a ni -

2020-2021 - ₹10 crore;

2021-2022 - ₹10 crore;

2022-2023 - ₹20 crore.

Hei bakah hian 2019-ah khan ₹50 crore kan dah bawk a. Tun Financial Year-a hian kan hriat theuh angin ₹60 crore dah a ni bawk a. Tuna kan budget pass meka kan

dah nen belhkhawm chuan, SEDP fund atanga Healthcare-a pawisa kan tih hi ₹150 crore lai a nih chu, tun term-a kan dah belh pawh. Heng sum te hi MSHCS hnuaia inziak lut damlote inenkawina senso, an MR bill ba rulhna atan sorkarin a hmang a ni.

SPEAKER : *Zawhbelhna* - Member zahawm tak Dr. Vanlalhlana.

DR. VANLALHLANA : Pu Speaker, ka lawm e.

Planning & Programme Implementation Department changtu Minister zahawm tak chhana tan –

SEDP Policy kan nei a, 2019-ah kan tichhuak a. He policy ang hian SEDP-family oriented programme kan kalpuia hi tih a ni em? Tun hnaia an kalpui dan hi nikum lama UQ zawhnaah te pawh chhan a ni tawh a. “Tuna kan kalpui dan leh a thu inziak dan hi a inmil em?” tih ka zawt belh a ni e.

SPEAKER : *Zawhbelhna* - Zawt turin Member zahawm tak Pu Vanlalhlana ka sawm e.

PU VANLALHLANA : Pu Speaker, tuna kan han ngaihthlakah khan, SEDP-Healthcare atan hian 150 crore a tling der mai a. Asian Development Bank atang khan pawisa kha a awm dawn bawh a. Mipuite, bill submit tawh la hmulo te hian engtikah nge a takin an hmuh ang? Engtikah nge sem tan tum a nih?

SPEAKER : Chhang turin Chief Minister zahawm tak, Planning changtu Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, Member zahawm tak Pu Mathlantea zawhna kha ‘Family Oriented Programme-a SEDP kalpui dan’ tih kha a ni a. Family pakhat, in pakhatah ₹50,000/- angin kumkhatah kalpui a ni a. Installment hmasa-ah ₹25,000/- a ni a, installment hnuhnung-ah ₹25,000/- sanction tih vek tawh, sem chhuah tep a ni a, kan sem chhuak mai ang a.

Kumin 2022-2023 inkar hi han tih tan theih a ni a, 2019-2020-ah khan eng emaw zat chu kan ti tawh a, *family-oriented* tho in. Mahse, family-oriented zau zawka kan tih chu, Covid a han reh tan ta a, 2022-2023-ah hian kan dah tam thei ta deuh a. Family Oriented-in chhungkaw 60,000 hnenah chhungkaw pakhat tan ₹50,000/- kumkhat atan kan han ti tan phawt a ni. Vawikhata nuai 3 kha chu kan thei lova, la chhunzawm zel tur a ni a, a hmasa-ah ₹50,000/- in kan han tan phawt a. ₹25,000/- chhungkhatah pek tawh a ni a, sanction tihfel diam tawh, draw tura tih tawh, tunah sem dawn mek a ni. Kha kha SEDP - Family Oriented Programme kan kalpui dan chu a ni a.

Hei bakah tanpuina hi a chi dang dang pawhin a awm thei a. A chhan chu, a hming angin ‘Socio-Economic Development’ atana kan flagship programme fund pui kan dahkhawmna a nih avangin, Healthcare pawh kan ‘Socio’ tel a, kan ngaih pawimawh anih avangin kha tah khan kan dah a. Covid vanglai leh kan tih theih ngang loh lai pawhin chuta tan chuan fund pawh tlem tal chu kan ti a, kan ti chho zel a. Covid lo thlen hma 2019-20 ah phei kha chuan crore 50 kan dah tawp a. Hei, kumin chu a ziaawm ta baw k a, 2023-24 lo awm tur ah hian crore 50+10=60 kan dah leh a. Kan sorkar hnu ah hian Covid harsatna karah SEDP fund atangin Healthcare-a kan dah hi crore 150 a lo tling ta hial a ni.

Engpawh nisela, a mipuite expenditure hi a tam tham ve a, kan rul hleitheh lova; kan hre theuh a, a hrehawm khawp a. Amaherawh chu, tunah chuan kan theih ang taw k kan rul a, tun financial year thara kan dah tur crore 60 hian kan han rul leh ang a. Tin, tun financial year tharah hi chuan Asian Development Bank atanga kan tih pawh kan hmuh hman kan inbeisei a. India sorkarin a harsa lai bera min rulhsaktu tur leh min peksaktu turin a rem ti tawh a. Amaherawh chu, tunah chuan official procedure-in a kal mek a, kan um char char a. Asian Development Bank-a a thawktute pawh an phur khawp a. Hei hi, kan sawi ang khan a thlawn a India sorkarin min rulhsak tur chu crore 720 a ni a, a bak crore 280 bawr vel kha keimahniin kan tum ve ang a. Tichuan, crore 1000-in healthcare hi kan kal chhohpui chuan, chu chu a dahna turah kan dah ang a, a pungte a lo awm ang a, mipui contribution nen; tin, keimahni state-in kan tih theih ang ang ti bawkin he Healthcare hi chu harsa lutuk lova kalpui hram kan tum a. Tichuan, kan fund dah kan rawn materialized-ah hian rulh chhohsak zel kan tum e.

DR. VANLALTHLANA : Pu Speaker, ka zawhna kha – “Policy lehkhabu angin kalpui a ni em?” tih leh, 2022-ah khan a kalpui dan tura kha Planning Department-in an rawn siam leh a. “Tuna kan kalpui dan hi khami thu inziak ang kha a ni em?” tih kha a ni a. Kan CM zahawm tak phei chuan, ‘kan thei sem dawn lova, a project ang tein an rawn ti ang a, chutiang chuan kan kalpui ang’ tih kha a sawi thin dan a ni a. Tuna kan kalpui dan ka han en hi chuan, ‘a ni em; ni lo em’ tih chu ka sawi lo ang a. Policy bu leh nikuma Planning lamin kalpui dan tur an tih khan ‘₹25,000/- kan pe leh ang’ tih te; hemi, ‘kan inpe leh ang’ tih ang hian kalpui a ni em? Ka zawhna kha min chhang tlat lo.

SPEAKER : A fiah viau emaw ka ti a, han chhang leh mai se.

PU ZORAMTHANGA, CHIEF MINISTER: A bua kan tih angin kalpui ni e. Amaherawh chu, a bu ah khan a policy a guideline puiin an ti a, Planning mil khan a sem dan tur pawh an rawn identify a. Tuna kan kalpui pawh hi a trade-wise in selection pawh tih vek a ni e.

SPEAKER : *Starred Question* No. 183 - Zawt turin Member zahawm tak Pu C. Lalsawivunga ka sawm e.

PU C. LALSAWIVUNGA: Pu Speaker, ka lawm e. Ka zawhna hi hun hmasa lamah khan kan Member te atangin a lo lut nual tawh a, kan Minister pawhin a chhanna min pe fiah viau tawh a. Mahse, ka zawt tho ang a, a supplement erawh chu ka nei lo vang. Ka zawhna chu -

- a) JJM hnuaia tui connection pekna atan hian plastic pipe hman phal a ni em?
- b) Tui connection siam fel tawhte hian a takin tui an dawng vek em?

SPEAKER : Chhang turin Dy. Chief Minister zahawm tak Pu Tawnluia, PHE changtu ka sawm e.

PU TAWNLUIA, DEPUTY CHIEF MINISTER: Pu Speaker, Member zahawm tak Pu Lalsawivunga zawhna chhanna chu -

- a) JJM hnuaia tui connection pekna atan hian (hei hi house connection a ni a) Plastic pipe (UPVC) hman phal a ni. Hei hi central - JJM Ministry ina an minute thlap tawh an rawn thawna copy a ni a, duh chuan a en theih a. Tin, hei hi State a departmental purchase board in approval an tihna a ni a, dan ang thlapin phal a ni a. Chutiang chuan procurement pawh tih a ni e.
- b) Tui connection siam fel tawh te hian a takin an dawng tawh a, amaherawh chu hmun thenkhatah design LPCD kan ti a, nitina an tui hmuh tur zat, nikhata tui litre 55 mitinin an hmuh theihna tura kan hisap ang erawh chu tunah chuan an la hmu chiah lova. Khaw thenkhatah chuan an hmu a, thenkhatah an hmu lova. Hei hi a chhan dik tak chu - kan hna kal lai mekah hian kan tuilakna - a hnar atanga kan dawh leh kan pekchhuahna inkara hna thenkhat kha kan duh angin kan la zo tawh lova, chumi kan zawhfel hunah chuan 55 LPCD chu mitin dawn theih tura ruahman a ni a. Tun dinhmunah an vai erawh chuan an hmu lo nain, an hmu dawn e.

SPEAKER : Awle, Member zahawm tak Pu Lalrindika Ralte ka sawm e.

PU LALRINDIKA RALTE: Pu Speaker, ka lawm e. Ka zawhbelhna chu –
 “Zawlnuam town ina tui harsatna an neih khu sorkarin a hriatpui em? A hriatpui anih chuan, an harsatna khu chin fel sak engtikah nge sorkar hian a tum?” tih a ni e.

SPEAKER : Chhang turin a changtu, Dy. Chief Minister zahawm tak ka sawm e.

PU TAWNLUIA, DEPUTY CHIEF MINISTER: Pu Speaker, Member zahawm tak Hachhek bialtu ina a rawn zawhbelhna kha –

Zawlnuam town-in tui an mamawh dan leh tuna an dinhmun khu sorkarin a hria a, department-in tunah hian ‘engangin nge kan pek belh theih ang?’ tih hi hmachhawpah a nei mek a, kan lo enzui lai a ni e.

SPEAKER : *Starred Question* No. 184 - Zawt turin Member zahawm tak Pu C. Lalsawivunga ka sawm e.

PU C. LALSAWIVUNGA : Pu Speaker, kalawm e. Higher & Technical Education Department changtu Minister zahawm tak chhan atana ka zawhna chu -

- a) Engvangin nge MZU Southern Campus-ah tun thlenga class tan a la nih loh?
- b) Temporary Campus atana hman tur Lunglei Engineering College chei leh buatsaih hna peih fel a ni tawh em?
- c) MZU Southern Campus dinna tur DPR approval central atangin dawn a ni tawh em?

SPEAKER : Chhang turin a changtu Minister zahawm tak Dr. R. Lalthangliana ka sawm e.

DR. R. LATHANGLIANA, MINISTER: Pu Speaker, Member zahawm tak Pu C. Lalsawivunga zawhna chhanna chu:

- a) Mizoram University Southern Campus-ah tun thlenga class tan a la nih lohna chhan chu - Southern Campus hi a taka kalpuina turin Campus sakna tur DPR approval central sorkar atangin hmuh a la nih loh vang a ni.
- b) Temporary Campus atana hman tur Mizoram Engineering College Lunglei chei leh buatsaih hna hi peihfel a la ni lo.
- c) MZU Southern Campus dinna tur DPR approval hi Central atanga dawn a la ni lo.

SPEAKER : *Zawhbelhna* - Zawhna neitu Member zahawm tak Pu C. Lalsawivunga ka sawm e.

PU C. LALSAWIVUNGA: Pu Speaker, chanchinbu-a kan lo hmuh thin dan leh vawiina chhanna kan hmuh kha chu a inpersan hlein ka hria a. Mipui hmaah kan sawi a, mahse kan sawi anga thil a kal lo thin hi a paw ka ti em em thin a. Vawinah pawh hian a paw ka ti a, class te pawh tan tum anih thu he kan House-ah ngei hian a changtu Minister-in a lo sawi tawh a, mahse tan anih loh chhan kan ngaithla a. ‘A taka chantir turin kan Minister hian engtinngge hma a lak theih ang?’ tih ka zawbelhna pakhatna a ni a.

Tin, Lunglei Engineering College chei that leh buatsaih hna te pawh peihfel loh a la ni a, kan Chief Minister zahawm tak pawh a hmunah a kal a, kalkawng te, electric te, tui connection te siam turin thuchhuah a siam a. Lunglei DC pawhin thuchhuah a

siam a, tin, DIPR-ah pawh ziahlan a ni. Mahse, vawiin thlenga peihfel a la nilo hi engnge ni a chhan? Tih tak tak tumna a awmlo em ni zawk? Politics thil te hi a ni ang tih a hlauhawmin ka hria a. Chuvang chuan, tun thlenga peihfel a la nilo hi a mak hlein ka hria a, politics hmanrua atan nilovin, heng hi ramin a mamawh, kan infrastructure anih angin rang taka class tan thei turin thil tih tur tulte peihfel thuai theih beisei a ni ang em?

SPEAKER : *Zawbelhna* - Zawt turin Member zahawm tak Er. H. Lalzirliana ka sawm e.

ER. H. LALZIRLIANA : Pu Speaker, ka zawhbelhna chu hei hi a ni. –
Starred Question No. 193-ah khan a awm tho a. NIT Campus Lengpui hi hmalak lohin a awm reng mai a. “Lengpui NIT Campus chungchangah tun dinhmunah hian eng harsatna chiah nge kan tawh? Engtikah nge hma lak tan theih anih ang?” tih kha ka zawbelhna a ni e.

SPEAKER : *Zawhbelna* - Dr. K. Pachhunga.

DR. K. PACHHUNGA : Pu Speaker ka lawm e. MZU Southern Campus class tan chungchang hi he House-ah hian kan sawi leh sawi loh kei chuan ka hre lova. Kan lo sawi tawh reng em le? Nichin khan Member zahawm tak khan a sawi si a.

SPEAKER : Chhang turin a changtu Minister zahawm tak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, a hnunng ber, Dr. K. Pachhunga *Zawhbelhna* kha –

Ni e, class tan tumna phei chu a awm a, amaherawhchu, ‘chumi hunah’ tih kha a sawi theih lova. A chhan chu - University Campus din dawn reng reng hian tunhmain Mizoram-a NEHU Campus din dawn pawhin state sorkar kan mawh thin hi a ni lutuk lova. Hei hi chu University liau liau a ni a, tunah pawh hian hma latu tak chu Mizoram University a ni a, a peng tur a ni a. Chuvang chuan, thahnemngaihna avangin keipawhin DO letter vawi 4-5 ka ziaak tawh a bakah a hmunah vawi tam tak ka zuk kal a, tiang chuan kan innawr kha a ni a; thil kan hriat chian thain ka hria a. Mizoram Engineering College tur Pukpui-ah sak a ni a, sorkar hmasa hun lai khan cheng vaibelchhe 26-in hostel te pawh a awm a, class kalna tur leh cafetaria te pawh. Amaherawhchu, building awm si, approach road km 3 siam a ngai a, motor lut hleithei lovin a awm a ni, a pakhatnaah chuan.

A pahnihna-ah chuan - Electric pawh-luh a ni lova. In tenau ni lo, campus-a electric pawt-lut tur chuan cheng vaibelchhe tel pawisa a ngai a ni. Tin, chu mai bakah

tui connection a thleng lova, khang zawng zawng nen han hisap khan vaibelchhe 10 ai tlem lo a ngaihrim hrim a, chuvang chuan, state sorkar tan han tih thu kha a harsa a. Chutianga mombati emaw, khawnvar chhia campus class kal ngawt kha a ni tawh lova.

A pathumna-ah chuan - class tan tur hian, Pu Speaker, a tak takah chuan central sorkar hian post a rawn create ang a, MZU-in proposal fel tak a nei vek a, DPR-ah hian a awm vek a ni. Academic-a professor mamawh tur te, teaching leh non-teaching zawng zawng fel takin a awm a, an thehluhna pawh a rei tawh a, state sorkar-in kan nawr bawk a.

Tin, phalna a principle-a min pekna hi Ni 17 January, 2000 kha a ni a, hei a copy pawh a awm a. He tah hian chiang deuhin a rawn ziaak a. Amaherawhchu, ‘a ram erawh hi chu state sorkar-in min pek ve a ngai ang’ an rawn ti a, chupawh chu Pukpui VC ten thahnem ngai takin an ram an rawn donate a, ram pekna tak tak erawh chu Land Revenue & Settlement tih tur anih avangin kan Revenue pawhin Land Lease hi Mizoram University hmingin an rawn pe a, chung zawng zawngte nen chuan kan thawn thla vek a, a rei tawh mai a. Amaherawhchu, thu hnuhnung ber hi House pawhin kan hriat a tha a. January Ni 20, 2023 thla hmasa mai khan kei pawh Delhi-ah ka zuk kal a, he thil buapui biktu Economic Adviser te nen pawh kan inhmu a, “engatinge campus kan neihna tur atana thawktu tur hi min pek theih loh?” tiin ka zawt rawt a, chuta an sawi chu - Govt. of India pawh hian post creation hi tun angah hi chuan a harsat khawp mai a, tihngaihna a awm lova, Mizoram University, Tanhril-a kan neih atanga va hmui tur khan tih theih dan kawng te a awm a nih si loh chuan a harsa khawp mai. Amaherawhchu, DPR in siam, a building sakna tura campus thar bik, engineering college nilo laia hi chu Nefa loan atang emaw, university funding kan tih atang pawh hian tih theih dan a awm ang tih kha min hrilh dan a ni. Chu chu thu hnuhnung a ni.

Chuvang chuan, ramhnuaiia class va pawngpaw tih ngawt kha a ni lova, University kut liau liau a nihna piah lamah University Grant Commission leh Govt. of India, MHRD Ministry te ina thil an rawn tih fel har vang hi a ni. Kan vanduai ve deuh hlek a ni. Ministry of HRD hi ministry kan dawr tawh zawng zawngah chuan thil tih a harsa khawp mai, thil dang tam takah pawh. Chuvang chuan, he harsatna hi kan tawh a ni. State sorkar din ngawt chi pawh ni lova, ‘helaia MZU kan neih kaltlanga DPR leh engkim mai correspondent pawh kal a ni’ tih kha Pu Speaker, kan hriat a tha a.

Pu Zira zawhna kha - National Institute of Technology (NIT) Mizoram hi, Govt. of India, Ministry of Education-in a din tura tih a ni a, a rei tawh khawp mai a, Lengpui-ah khuan a ni a. Amaherawhchu harsatna lian tak an tawh a, keini pawhin theih tawp kan chhuahpui a. Tlawng Lui kam nen khuan a lo inngheng hnai deuh nge ni, Forest clearance hi ministry lampangah dil a ni thin a, min comply tha lo deuh a ni. NIT helama thawktute pawh an buai khawp mai a, vawi tam tak keini pawhin kan zuk thlen tawh a, an la chingfel hlei thei lova; sum pawh tam tak an seng tawh a, la sen zelna tur thil

ruahmanna a awm mek laiin, *Ministry of Environment & Forest Climate Change* te hian online-a helam pawhin an zuk dil chamchi Parivesh portal hmanga clearance an dil kha an la hmu thei lova, chuv chu tunhnaiah an hna a thuanawpna chhan dik tak chu a ni.

SPEAKER : *Starred Question* No. 185 - zawt turin Member zahawm tak Pu Lalduhoma ka sawm e.

PU LALDUHOMA : Pu Speaker, tuna zawhna chhonzawmna deuh tho kha a ni a. Higher & Technical Education Department changtu minister zahawm tak chhan atan -

- a) MZU Southern Campus, Lunglei atana Pukpui Village Council-in ram acre 100 a zau a pekah hian, Southern Campus din phalna hi MHRD-ah engtikah nge dilna thehluk a nih? A copy min pe thei em?
- b) Tun thlengin MHRD hian Southern Campus din phalna hi a la pe thei lo em ni? A nih chuan, eng vang nge?
- c) Phalna nei tur hian engtinngge bawhzui a nih?

SPEAKER : Chhang turin a changtu Minister zahawm tak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, hemi chungchang hi ka chhanna hmasa nen a inkaihhnawih deuh hlek a, ka chhiar chhuak tawh lo mai ang. Pu Duha zawhna bik chhanna kha chu -

Pakhatna - MZU Southern Campus, Lunglei-a din a nih theihna atana dilna hi kum 2013 November thla khan MHRD-ah lehkha No. 1-24/13/MZU(VC)/12523 Dt. 6.11.2013 chu thehluk a ni a, lehkha copy pawh chilh tel a ni e.

Pahnihna - MHRD hian Southern Campus din phalna hi a thuphung (in principle) in Ni 17.1.2020-ah a pe tawh a, chu chu a copy pawh hi member-te hnenah an duh chuan kan pe theiin ka ring a, Delhi-a ka awm lai ngeiin min pe fel a, VC a rawn address a, hei hi a copy din phalna *in principle*-a min phalsakna a ni a. Chuta thil chiang deuha an sawi chu – ‘State sorkar hian a ram erawh chu free of cost-in pe se’ tih te kha a inziak a, chu chu ka chhanna a ni a.

Tin, ‘Phalna nei tur hian engtin nge bawhzui anih?’ tih kha chu, nichina ka sawi khan a chhang thoin ka hria.

SPEAKER : Aw le, *Zawhbelhna* zawt turin Member zahawm tak Pu Lalduhoma, a zawhna neitu ka sawm e.

PU LALDUHOMA : Pu Speaker, Lunglei-Southern Campus atan hian Village Council Pukupui ten ram acre 100 lai min pe a, a lawmawm khawp mai a, Land Lease pawh peih fel a ni tawh a. Dilna MHRD ah thehluh a ni a, *in principle*-a remtihna pawh lak a ni tawh a. Chuti ni si tun thleng mai pawha hmalak theih a ni ta miah lo mai hi kan beidawng ti ti tawh em? “Beiseina a la awm em?” tih kha ka hre duh a. Ram te engkim mai kan nei tawh a, ‘class tan’ tih te phe chu a building awm hawt hma leh, a sum pawh hmuh chhuah hma hi chuan sawi rik loh hi a tha khawp mai a. Southern Campus building hi sawi phawt ila, chumi hnuah a staff-te kha chu a la ni ang a, hemi tura hi MZU nena tangruah hian theihtawp han chhuah leh ta ila, ‘political forcep’ te pawh kha a hman chi lawm ni, Pu Speaker? Tih hram dan ngaihtuah a va tha em! ‘Kan beidawng tawh nge, kan la beidawng lo’ tih kha kan chiang duh viau a.

Pahnihna-ah chuan - Southern Campus chu ‘thu lo’ a la nih avangin, a bula Engineering college sak a building hi hmang mai riha, class te pawh tan mai theih tur angin kan ti a, mipui pawhin an hria a sawi a awm a ni. Amaherawhchu, a Engineering College ber pawh chu kan peih leh hleithei ta lo em ni? Central lamin recurring expenditure tam takte kha ‘kan rawn tum leh thei dawn lo an ti’ tih te kan lo hria a. Chuti anih chuan, keini state tan chuan han tih chi rual kha a ni dawn lova. Chuvang chuan, Engineering College pawh hi engnge kan dinhmun chiah? Tin, tunah hian a building thui tak tih a ni tawh a, approach road leh eng eng emaw hmabak a la ni mai a. State sum te nen pawha saw tal saw chu han tihpuitlina, Southern Campus atan pawh phalna kan neih chuan hman mai theih a ni ta a. Hei tal hi engtikah nge peih a nih theih ang? Bialtu MLA zahawm takte pawh a inrawlh a, supervisor tur te kha ziakin, ‘hei hi lo hmang rawh’ tih te kha kan lo hmu ve a, a zialo ka ti khawp mai a.

Member-te zingah hian la naupang deuh leh politics tuinu nghawng thlenga la dai lo te hi chu, mithiamte an nih bawh hi chuan kan lo beisei sang viau a. *That theihlohna Bawm* a awm pawha an lo danglam chuang miah lo te hi a pawh khawp mai a. Chuvang chuan, Engineering College tal kha engtikah nge peihfel theih a nih ang?

SPEAKER : *Zawhbelhna* - Member zahawm tak Dr. L. Thangmawia.

PU L. THANGMAWIA : Pu Speaker, ka lawm e.

Ka zawhbelhna chu - Zirna in pawimawh tak mai, anmahni tel loa zirtirtu pawh dil theih loh ‘IASE - Institute of Advance Studies and Education’ ah hian thawktu indaihlohna a nasa em em a. Official loin ka va tlawh a, hman kum khan. Hengte hi sorkar hian an mamawh zualpui – “Assistant Professor’ kan ti dawn nge ni, ‘Lecturer’ kan tih thin ang kha tihbelh theih turin a ti em?” tih kha.

A pahnihna-ah chuan - India sorkar hian college ho quality control nan hian ‘NAAC a ti a, NAAC accredited neilo tan chuan fund tam tak hmuh theih a ni tawh lova. Ka zawhna chu - Mizoram sorkar hnuaiia college-ah hian NAAC accreditation neilo an la awm em?

Tin, Pu Speaker, NAAC accreditation-ah hian kan hniam hauh lova kan college ho hi, lawmthu pawh kan sawi tel duh a. Tin, accreditation neilo an la awm a nih chuan, chu chu karawn zawt a ni e. Ka lawm e.

SPEAKER : Chhang turin a changtu Minister zahawm tak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, tlemin a inkar kik deuh hlek a, zawhna kha. A hnuhnung ber a ni naa, chhan a har lovin ka hria a.

Dr. L. Thangmawia zawhna – ‘IASE’ kan tih hi a pawimawh khawp mai a, Republic Veng-a awm a ni a. Hetah hian Ph. D leh M. Phil te, B. Ed leh M. Ed zawng zawng a zir theih tawh a. Kohhran school-a thawk tam tak leh pawn lam mite pawh tam fe kan dah thei a. Tlem lai deuh pheih kha chuan India ramah hetiang ang chiah hian pakhatna, tun kan sorkar chhung khan a ni ve zawk nghe nghe a, kan lawm ve khawp mai.

Chutih mek lai chuan, tuna Member zahawm tak zawhna hi a dik a. Tunhmain CSS hnuaiia an lo thawk a, Assistant Professor-te kha. Amaherawhchu a scheme a lo tawp ta si a, an buai khawp mai a, De-recognition lam thleng khan min rawn vau a. Amaherawhchu, hemi chungchangah hian theihtawpin sorkarin hma a la a, kan Chief Minister te nen. DP & AR leh Finance Department te’n phalna min pe ta a. ‘Reiloteah post 20 kan la dawn’ tih kha House ka han hriattir a ni. A lawmawm hle mai a, sum harsatna karah.

Tin, Dr. L. Thangmawia zawhna kha chhan nghal mai ila. College zawng zawng hi ‘NAAC’ kan ti mai a, assessment fel tak tih niin Peer team te college tlawhin an rawn kal thin a. Tunhnai takah pawh Govt. Aizawl West College an rawn tlawh a, an ti tha ve khawp mai a, B+ an hmu a ni, a hmaa C thin kha. Tikhan achievement ropui tak kan hmu a. College thenkhat khati lama la tang deuh kan nei a, a pawih khawp a. Amaherawhchu a chhan leh avang te pawh hi kan hriat a tha a. A bik takin chhim lampanga college lam hla tak te hi internet facilities leh khatiang lam kha a la that loh avangin duh angin an kal thui thei lo thin a. Tunah erawh chuan tan an la khawp mai a, hun reilote ah NAAC hi kan hmachhawn vek theih kan beisei a, tin, paltlang tur pawhin beiseina sang tak kan nei a ni.

Pu Speaker, college pathumah PG zirna kan nei tawh a, chungte chu - Govt. Aizawl West College - History Department; Govt. Aizawl College-- Education Department leh Govt. Hrangbana Collge - Commerce te an ni a. Hengte avang hian nasa takin kan hming a that phah a. Tichuan NAAC hnuaiia accredited college te zingah a hmu sang bik an awm a, hei hi a ropuin ka ti khawp mai a. Tun hnaiah Zirtiri Science Residential College hian Grade A+ a hmu a, a ropui ka ti khawp mai; Govt. college direct a A+ hmu kan neih chhun a ni. Tin, Govt. Serchhip College hian nikumah A Grade hmuin, Aizawl khawpui pawn college A Grade hmu hmasa ber a ni bawk a ni. B+ hmu pahnih - Govt. Hrangbana College leh Govt. Aizawl West College anni a. B hmu hi Govt. Aizawl College leh Govt. Mamit College an ni bawk a ni. B hi eng emaw zat an awm bawk a, a bak pawh kan la nei tih kha ka chhanna ni mai se la. Tunah hian India ramah a sang ber kan ni. Tin, nichina ka sawi A+ hmu kha Govt. J. Thankima College zawk a ni e. A tawi zawngin college hming hi an dah a, ka lo tisual palh a ni. Chutih mek lai chuan Govt. Zirtiri Residential Science College, Pu Vanlalhlana bial a mi khan A Grade an hmu bawk a ni. Tunlai chu kan 'A' tawp tawp mai. Ahma chuan Pachhunga University College deuh chiah hi A Grade nei kha an ni thin a, tunah chuan kan nei ve ta fur a, kan lawm khawp mai. India ramah a sang ber, tuna Mizorama kan government college-te hi Pu Speaker, kan ni a, 83% kan ni a, hei hi a lawmawm ka ti a, House ka han hriattir a ni.

Tichuan, Lunglei-Southern Campus bawkah ka han lut leh ta ila. Pu Duha han sawi kha thahnemngaihna a ni a. Keipawh a ni tho a, ka bial hlui, kum 25 lai ka lo bial tawh a ni a, ka hrechiang a, hlawhtlin hi chu kan duh khawp mai. Beidawn ngawt hi chu a dik ka ti lova. Kumin January thlaah ka zuk kal a, nichina HRD adviser-te leh official, a khawihtu takte nena kan han titi naah pawh, 'engtin nge maw ni dawn le? Nangni pawhin commitment in nei tawh a, ram kan pe che u a; hei hi chu a diklo' ka ti a. Kan han ti deuh dat dat a. Anni chuan, 'a bul tanna chu Mizoram University in lo neih tawh sa atang hian engtin emaw tih dan ngaihtuah a ngai a ni' an ti a, mahse State sorkar tan hian MZU zuk tih ngawt dan kha a vang viau mai a. A enga pawh ni se, India sorkarin post min pek theih lohna chhan chu, tlang deuhin, Covid avang hian Finance Ministry, Govt. of India hian post create leh fill-up te hi a remti lova. Kan han tum thin a, an turn-down zel mai a. Amaherawhchu, 'hei, Covid pawh a zia tawh a lawm' kan ti a, kan inhnial kan inhnial a. Chuvang chuan, khawvelah tihtheih loh a awm lova, a tihran theih loh a nih pawhin kei chu beidawn turah ka ngai lova. Kan tuma, kan bei a nih chuan, engtik niah emaw chuan, India sorkar pawhin a la ti thei turah ngai ila. DPR leh engkim mai Mizoram University hian a buaipui a, an fakawm a, amaherawhchu, kan la sutlang lo mai a ni.

Chutih mek laia 'Engineering College tal hi; MZU Southern Campus anih loh pawhin' tih lai kha, nichina ka sawi thil pathum lian tak tak, a panna kawng siamna tur cheng vaibelchhe 10 ngai te, tui leh electricity te kha chu kawng dang ni se la. Khami piah lamah khan thil buaithlak deuh chu, a in saknaah hi Govt. of India hian vaibelchhe

26 sorkar hmasaah khan a pe a. Hetiang chi bawk (House-ah pawh kan sawi fo) Nursing School - Serchhip, Siaha leh Champhai-ah te a sak chiah an sa zova, a bak post chungchang state sorkar tih tur kha ruahmanna a awm lova. Chutiang bawkin Mizoram Polytechnic hmun hrang hranga sak mek leh sak zawh tawh te pawh khatiang kha a ni zel mai a; hei hi a pawl khawp mai a. Sorkar kal chhoh zelna tur, nakin zelah a in sak ringawt lo, a function theihna tur atana mamawh zawng zawng chhuta heng project hi kan kalpui loh chuan a pawiin ka hria a. Tumah indem thu a awm lova, a sorkar leh zel tan khan hetah hian harsatna lian tak kan tawk a, kan la function theilo a. Amaherawhchu theihtawp chhuahin heng hi kan la indawr zel turah ngai ila, kan khamkhawp loh deuh pawhin, (kei pawhin ka khamkhawp chuang lova) central sorkar hmalakna hi. A har ve a ni; kan kuta awm a ni si lo. Pu Speaker, ka lawm e

SPEAKER : *Starred Question* No. 186 - Zawt turin Member zahawm tak Pu Lalduhawma ka sawm e.

PU LALDUHOMA : Pu Speaker, Land Revenue & Settlement Department changtu Minister zahawm tak chhan atan zawhna -

“Four lane kawngpui, Vairengte to Sarang atan hian -

- a) Zangnadawmna engzat nge pek a nih tawh?
- b) Mi engzat hnenah nge pek a nih?
- c) Eng package chhunga mite nge an nih?” tih a ni e.

SPEAKER : Chhang turin a changtu Minister zahawm tak Pu Lalruakima ka sawm e

PU LALRUATKIMA, MINISTER : Pu Speaker, Member zahawm tak Pu Lalduhoma zawhna chhanna chu –

- a) Zangnadawmna hi Revenue Department atanga pekchhuah a ni ngai lova, Ministry of Road Transport & Highways - CALA atana ruatin a pek tawhte chu hetiang hi a ni -
Package 3 ah ₹144,86,013.13;
Package 4 ah ₹121,32,18,196.49 te a ni.
- b) Package 3 hnuai ram pass neitu mi 234 hnenah pekchhuah tawh niin, Package 4 hnuai ram pass neitu mi 200 hnenah pekchhuah a ni tawh bawk.
- c) Package 3 leh Package 4 chhunga mi te an ni.

SPEAKER : *Zawhbelhna* - Zawhna neitu member zahawm tak Pu Lalduhoma ka sawm e.

PU LALDUHOMA : Pu Speaker, NHIDCL hnenah hian kan sorkar hian (Forest Department ani turah kan ngai a); ‘Mizoram Forest Department hian package thumna chin hi a enkawl a ni’ tiin ziakin an thlen em tih kha ka zawt a. An lo thlen a nih

chuan, a copy min pe thei se ka duh a. Tichuan package 2 hi Assam lam chan a ni a, hetah hian Vairengte-a mizo chhungkaw 15 ram nei an awm bawk si a. Chu chu Assam ram chana a luha, an ni kaltlanga NHIDCL hian compensation a pek chuan, nakinah ‘heti chin hi kan ram a ni’ tihna, tanfungah, document-ah an rawn hmang ang tih kha a hlauhawm bawk si a. Chuvang chuan, package 2 pawh ni se, khami kan ram chin kha chu keini kaltlanga pek tur khan a tih theih lawm ni? Ramri issue nen a inkaihhawih tlat mai a, chu chu engtinngge sorkar hian hma a lo lak tawh? Tin, khami tihtheihlohna chhan ber chu, ‘*Package 3 atang hian Mizoram-in a enkawl a ni* tih te kha a awm vang a ni’ tih hi a dik em?

SPEAKER : *Zawhbelhna* - Member zahawm tak Pu Lalrindika Ralte hnen atangin.

PU LALRINDIKA RALTE: Pu Speaker, ka lawm e.

Ka Zawhbelhna chu – “Ram tehfel chungchangah hian department hi a indaihlo hle a. Hemi ram tehfel hi mimal hnenah emaw, company hnenah emaw department hian pek (out-source) tumna a nei em?” tih a ni e.

SPEAKER : *Zawhbelhna* - Member zahawm tak Pu Lalrinsanga Ralte hnen atangin kan la leh ang.

PU LALRINSANGA RALTE: Pu Speaker, ka lawm e.

Ka Zawhbelhna *pakhatna* - Kan Opposition Group Leader zahawm tak rawn zawhna kha ka rawn tawm dawn a.

Ka bial chhung package 3 leh 4 hnuiaia compensation late ka lawmpui khawp mai a. Chutih rual chuan Vairengte Police Checkgate thlanglamah khuan pass nei mi 15 an awm a, chu chu package 2 ah NHIDCL hian a dah avangin, compensation an la ve lova, an buai khawp mai a. Hemi chungchangah hian nasa takin a bialtu ka nihna ang pawhin hma kan lakpui a. Kolasib DC-ah a ram neitu aiawhte kan kokhawm a, kan hon. Minister Pu Rintea, Kolasib bialtu MLA te nen Kolasib DC hoin meeting kan neihpui a. Tin, kan Chief Minister zahawm tak te pawh meeting kan neihpui bawk a. Chulayah chuan engnge harsatna awm? Vawiin niah hian package 2 chhunga awm an nih avanga Assam rama document dah ngai anga boruak awm te hi a dik reng em? ‘Engti kawng zawng pawhin package 2 bik te hian Mizoram sorkarah compensation an lak a ngai a, an document te pawh Assam lamah an theh thla tur a ni lo’ tih hi kan ngaihda a ni bur mai a. Chutiang tur chuan kan minister te, kan sorkar te hian engnge hmalakna an neih? Package 2 chhunga miten Mizoram Sorkar - Kolasib DC CALA hnuiaia an lak ngei theihna tur hian engtinngge hma kan lak tawh? tih hi ka zawhna pakhatna a ni a.

Tin, Bilkhawthlir - town extension tura hmalakna a kal mek niin ka hria a, “hei hi engnge kan thlen chin?” tih kha ka zawhna a ni bawk e.

SPEAKER : *Zawhbelhna* - Member zahawm tak Dr. F. Lalnunmawia ka sawm e

DR. F. LALNUNMAWIA : Pu Speaker, ka Zawhbelhna chu –

“Mizoram sorkar hian Aizawl West-by pass Road lo kal turah hian ram pass pek belh tumna a awm em?” tih leh, “Henga ram nei sa VC pass nei hote hi engtia chin fel sak tur nge? An ramte hi sut-buai leh a sut-hek tur a awm nual dawn a, hengte hi sorkarin engtia chin fel sak nge a tum? Compensation te a pe thei dawn em?” tih te a ni e.

SPEAKER : Awle, zawhnate a inkarkik viau nain, a theih ang ang chhang turin, a changtu Minister zahawm tak Pu Lalruatkima ka sawm e.

PU LALRUATKIMA, MINISTER: Pu Speaker, kan hriat angin Silchar - Aizawl kawng hi ‘National Highway-306’ leh ‘National Highway-06’ tea then a ni a, 306 hi Bilkhawthlir thleng a lo kal ang a, 06 hian khithah Zokhawthar lam a pan chho dawn a ni. Chutah chuan Four-Lane lai turin package 1 - 8 thleng tunah hian ruahmanna a awm mek a, chutianganng chuan theihtawp chhuahin hma lak a ni a. Chumi hna thawk tur chuan Ministry of Road Transport & Highway...

SPEAKER : Ngawi lawk rawh aw. Official gallery-ah hian telephone hmang an awm a, kha kha chhuak nghal rawh se. House chhungah phal a ni lo a ni.

Awle, chhonzawm rawh le.

PU LALRUATKIMA, MINISTER: NHIDCL-in hma lain, *The National Highways Act, 1965* angin ruahmanna, mawhphurna a rawn pe a. Chutah chuan Kolasib Addl. DC kha CALA mawhphurna pein, *Gazette of India*-ah a rawn gazette thlap a. Chutianganng chuan tuna package 3 leh 4 chhunga compensation mi eng emaw zat dawng an awm lai khan, package 3 huam chhungah hian pass la surrender lo leh dispute avang te in ram pass mi 14 hnenah pek tur nuai ₹177,96,274.41/- pek a la ni lova. Tichuan, package 4 ah hian original pass surrender lo leh dispute vang vekin ram pass 19 neitute hnenah nuai ₹697,72,225.17/- pek a la nilo bawk a. Chutianganng chuan, package 3 hi Environment & Forest lamin ‘kan ram a ni’ an tih kan hre lova, chuvang chuan, lehkha NHIDCL lamah an pek leh pek loh revenue department chuan a hriatpui lo a ni.

Chutih lai chuan Member zahawm tak Pu Lalduhoma leh Pu Lalrinsanga Ralte tena an rawn zawhna... (**Speaker:** Ngawi rawh aw. *Zawhna & Chhanna* hun a tawp a, kan chhan zawh tir law law dawn em? *House-in a remti a*. Awle, chhangzo law law rawh le)... package 1 leh 2 hi Assam lamah a awm si a, chutih lai chuan package 2 huam chhungah hian chhungkua 15 dawn lai mai Vairengte mite an awm bawk si a. Heng mite

hian Assam lama CALA hnen atanga pawisa compensation an dawn chuan, ramri kan inchuh buai bawk nen, “nakin atan kan tan a thalo palh thei e” tih kha a ni a.

Sorkar chuan hemi chungchang hi a hranpain hriattirna a hmu lawk lova, NHIDCL hian an mahni package tura kha a remchan dan angin a kilometre laklawh lo ang khan an rawn teh chho mai a. Chutah chuan Vairengte ram nei mi 15 zet mai kha package 2 huam chhungah khan a awm a ni. Chung chu anih avangin mi tam takin hlauhthawna an nei a. Amaherawhchu, package 3 hnuaiah hian Vairengte khua package 2 a bet chhungkaw eng emaw zat awmte ram hi Kolasib CALA in Gazette of India, Kolasib CALA hnena documents zawng zawng submit vek tur leh assessment pawh a tih a nih vek avangin, Kolasib CALA hnen atangin engkim a la dawn a ni. Amaherawhchu, package 1 leh package 2 hi CALA dang anni a, chuvang chuan General Manager - Project Management Unit, Silchar in helam hi a khawih dawn thung avangin, package 1 leh package 2 chhungah khan an awm leh lawi bawk si a. Amaherawhchu, Gazette of India, Kolasib CALA in a chhuah fel vek tawh si avangin document engkima kha Silchar lam changtu hnenah khan thehluh a ngai ta lova, keimahni lam Kolasib CALA hnenah khan a kal dawn ta a ni. Chutiang chu kan dinhmun a ni.

Hlauhthawn tur a awm lova, a tul ang ang te pawh tunah hian Kolasib DC leh CALA ten hma lain NHIDCL hnena transfer tur thil te a awm anih chuan, “rawn transfer vek rawh u”, tiin lehkha kan pe fel tawh a, a tul ang chu tihfel a ni. Chutih lai chuan package 1 leh 2 te hi compensation sum an la pek-chhuah ve loh avangin, khang mi 15 te khan Pu Speaker, an la dawng ve thei ta rih lova. An dawn velah Kolasib CALA hnenah an rawn transfer ang a, anni hnen atangin an dawng dawn a ni.

Tin, hei bakah hian, package 3 leh 4 zawnga kha Mizoram chan a ni a, package 5 leh 6 hi tunah hian NHIDCL lamah te thehluh a ni a, Package-V hi pawm tawh a nih laiin Court lama zualko an awm avangin harsatna kan tawk hret a, chuvangchuan duh angin hna a kal chak theilo thung a ni.

Tin, Member zahawmtak Pu Lalrindika Ralte zawhna - “Ram teh chungchangah hian Surveyor indaihlohna a nasa si a, chuvang chuan out-sourcing a theih ang em?”, a ti a, a dik khawp mai a. Tunah hian kan dinhmun hi a thalo khawp mai a, Surveyor post ruak 15 fill up turin Recruitment Board-ah ka thawn tawh a, hun reilote ah a fel theih kan ring a ni.

Chutih karah chuan mamawhna a sang a, chhungkaw tinin kan damchhunga kan tu leh fate thlenga kan hnutchhiah tur ram neih kan duh theuh si a. Chungah te chuan kan ram tehfel anih theihna turin ngaihtuahna kan hmang lo thei si lova, chuvang chuan, “out-sourcing kalpui mai ni se”, tih ngaihtuahna kan hmang a. Chutah chuan a bik takin SEDP sum atangin tunah hian Saitual Town chu out-source niin hma kan la a, an tifel khat tawh a. Tunah hian District thar dang - Khawzawl hi sanction kan hmu tawh a, out-

sourcing turin quotation te kan khawn a. Tin, Hnahtial pawh ti turin kan inruahman bawk a ni. Chuvang chuan, empanelled fund nei turin theihtawp chhuahin sorkar chuan hma a la ni.

Tin, Member zahawmtak Pu Lalrinsanga Ralte khan mi 15 te an dinhmuna harsatna chungchang a sawi kha chu, nichina ka chhannaah khan a fiah maiah ka ngai a. Tin, “Bilkhawthlir - town extension chungchanga hmalakna kha engnge a thlen chin?” tih a rawn zawh kha - Bilkhawthlir hi mihring kan lo pung ta deuh deuh a, chutah chuan inhmun lo ram nei si, in saa pass la nei silo eng emaw zat an la awm a. Bialtu MLA zahawmtak hian thahnem a ngai em em a, “pass kan neih ve chuan bank loan te kan la thei ang a; theihtawp min lo chhuahpui rawh u,” tiin thahnem ngai takin vawi duailo ka office-ah pawh a lo kal a. Chutiang chuan hma la turin kan official te kan hriattir a. Tunah hianin Govt. approve turin a tul ang ang te tifelin an rawn thawn chhoh tawh thu kan hre bawk a ni.

Tin, Member zahawm tak Prof. F. Lalnunmawia zawhna - “Aizawl West by-pass road ah pass pek tumna a awm em?” tih kha, hei hi kan nghakhlel tlang vek mai a, kan Chief Minister zahawmtak remhriatna leh thahnemngaihna India ram budget-a la chuang ngailo - PM-DeVINE atanga kan hmu hi Zoram mipuite pawh kan lawm hlein ka hria. Aizawl khawpui motor tawt lutuk, a bik takin Bawngkawn lama motor lian rawn lut thin te pawh ‘by-pass road-ah chuan an kal theih tawh ang,’ tih te hi kan hmawthlir a ni lo thei lova. Chutah chuan, hemi rama hi keimahni atang chuan pass thar pek tumna a la awm lova, kan freeze vek tawh a, freezing order pawh nikum, Ni 13 June, 2022 khan kan pe tawh bawk a ni. Chuvang chuan, helai alignment chhungah hi chuan tumah pass thar pek theih a ni tawh dawn lo a ni.

Chutiang bawk chuan, package 8-ah khan ‘Aizawl Tunnel’ tih a awm a, lei verh turin NHIDCL a inbuatsaih a, chu chu anih dawn avangin khami ina a paltlang tur leh a tihbuai theih turah kha chuan ram pawh pek theih loh turin sorkarin a freeze vek tawh bawk a ni. Chuvang chuan, lei verh pawm leh pawm lo pawh hi awm a ni a, ‘an verh hmel hle mai’ tih kha chu tunah hian a lang ta a ni.

Tin, VC-pass nei mimal a paltlang turah an awm a nih chuan, sorkarin a ngaihtuah zel a, a ram hlutna (land value) erawh kha chu an la thei lo ang a, an thlai man erawh kha chu lak theih a ni ang a. Infrastructure te a lo awm tawh anih pawhin, kha kha chu sorkarin a tul angin a ngaihtuah zel tur zinga mi a ni dawn a ni. Chungte chu memberte zawhna tlangpui ka chhan theih te chu a ni e. Pu Speaker, ka lawm e.

FINANCIAL BUSINESS

SPEAKER : Awle, tunah chuan kan tihtur dang - *Financial Business*-ah kan kal ang a.

Vawiinah hian kan Minister zahawm tak tak - Pu TJ Lalnuntluanga, Pu R. Lalzirliana leh Dr. R. Lalthangliana te demand kan sawiho dawn a, hun kal tawh a kan tih than angin, a pathumin in kan la kawp ang a, pass kan tum nghal bawk dawn a ni.

Awle, tunah kan Minister zahawmtak Pu TJ Lalnuntluanga kan sawm ang a, House dawhkanah hian a demand te –

- Demand No. 4 - Law & Judicial Department;
- Demand No. 12 - Parliamentary Affairs Department;
- Demand No. 36 - Environment, Forests & Climate Change Department;
- Demand No. 42 - Transport Department

te rawn submit turin ka sawm e.

PU TJ. LALNUNTLUANGA, MINISTER: Pu Speaker, ka lawm e. Governor of Mizoram recommend na leh i phalnain, he House zahawmtak ah hian heng ka demand te –

Demand No.	Purpose	Amount (in ₹)
4	Law & Judicial	29,58,51,000.00
12	Parliamentary Affairs	101,86,000.00
36	Environment, Forests & Climate Change	1,616,513,000.00
42	State Transport	56,61,22,000.00
TOTAL		2,48,86,72,000.00

hi kum 2023 – 2024 chhunga hman atan ka rawn move e.

SPEAKER : Awle, tunah Minister zahawm tak Pu R. Lalzirliana, House dawhkanah heng a demand te submit turin ka sawm e –

Demand No.	Purpose	Amount (in ₹)
23	Art & Culture	11,95,63,000.00
27	District Council & Minority Affairs	5,05,76,29,000.00
33	Land Resources, Soil & Water Conservation	18,94,00,000.00
39	Power & Electricity	8,31,85,91,000.00
TOTAL		13,68,51,83,000.00

PU R. LALZIRLIANA, MINISTER: Mr. Speaker, Sir, on the recommendation of the Governor of Mizoram, and with your permission, Sir, I moved the Demand Nos. 23, 27, 33 and 39 for ₹13,68,51,83,000 only for meeting expenses during 2023-2024 in respect of the following Departments –

Demand No.	Purpose	Amount (in ₹)
23	Art & Culture	11,95,63,000.00
27	District Council & Minority Affairs	5,05,76,29,000.00
33	Land Resources, Soil & Water Conservation	18,94,00,000.00
39	Power & Electricity	8,31,85,91,000.00
TOTAL		13,68,51,83,000.00

SPEAKER : Awle, tunah Minister zahawm tak Dr. R. Lalthangliana, House dawhkanah hian a demand te rawn lay turin kan sawm e.

DR. R. LALTHANGLIANA, MINISTER: Hon. Speaker Sir, on the recommendation of the Governor of Mizoram and with your permission, I moved the Demand Nos. 21, 24 and 40 for ₹10,84,56,36,000 only for meeting expenses during 2023-2024 in respect of the following Departments –

Demand No.	Purpose	Amount (in ₹)
21	Higher & Technical Education	2,71,49,16,000.00
24	Health & Family Welfare	7,51,06,54,000.00
40	Commerce & Industries	62,00,66,000.00
TOTAL		10,84,56,36,000.00

SPEAKER : Awle, kan Minister zahawm tak tak ten an demand-te House ah an rawn submit ta a. Sawihona kan nei ang a, mi pakhatin minute 10 kha kan kalpui leh mai dawn em ni? (*House-in a remti a*) Awle, nimina kan sawi ang khan, minute 2 in la neihah bell kan rawn hmet ang.

Tunge sawi hmasa ang le? Awle, Dr. BD Chakma, member zahawm tak ka sawm e.

PU B.D. CHAKMA : Pu Speaker, ka lawm e. A hmasa berah Demand No. 44 - Transport Department hi sawi ta ila.

Pu Speaker, Chawngte leh Longpuighat te hi ka bial chhungah chuan khaw lian tak an ni a. Auto-rickshaw chungchangah hian sawiselna a tam a, Auto-rickshaw nei si, permit neilote an buai khawp mai a. Permit neilo thenkhat te phei chu local police-in an man thin a ni. A chang changin Lawngtlai atangin District Transport - MVI te an lo kal thin a, *Surprise checking* neih laia an man ho kha chuan pawisa an chawi te a ngai thin a ni. Khatiang harsatna sutkianna turin khawngaihin Pu Speaker, Auto-rickshaw nei tawh ho tal hi chu permit ka ngen sak a.

Tin, chumi bakah tunlai chu Mizoram-a sum harsat lai tak a ni a, India ram pumah, khawvel pumah pawh unemployment problem a nasa a a. Chutiang karah

pawisa nei ten driving license an lei theih chuan, heng a leina tur nei ve lote hi taxi permit emaw auto-rickshaw permit emaw pek theih dan hi a awm lo em ni? Hei hi sorkar sum tuak nan, tax lak nan te pawh a thain ka hria. Chuvangin, Chawngte leh Longpuighat khaw pahniha auto-rickshaw nei si, permit la nei lote hi khawngaihin special permit pek ni se a lawm ngawt ang.

Tin, Demand No. 27 - District Council & Minority Affairs Department-ah hian thil tam tak sawi tur a awm a. Pu Speaker, Chakma District Council budget 65 crore vel deficit a awm nia sawi a ni a, sum a harsa em em a. Chutiang dinhmuna kan ding chung leh Governor Rules hnuai a awm chungin a ruka sorkar hna lak a la awm tho zel a hi a paw ka ti a. Hei, documentary proof pawh ka nei a, Proceedings of the Meeting of Executive Secretary with all Heads of the Departments of CADC on 10th February, 2023 in CADC Conference Hall, Kamalanagar at 12:30 PM - *Resolution No. 5*-ah hian chiang takin a inziak a. Chanchinbu-ah pawh, “who has not joined and reported for duly ... duty till that self is strike out from the A-Roll from the month of January, 2023” tia chiang taka tihlan a ni. Pu Speaker, hetiang budget deficit kan neih avanga sum kan harsat e mem lain sorkar hna a ruka pek a ni hi paw ka ti khawp mai.

Chu bakah hei, *Resolution No. 7*-ah pawh hian, ‘who’s services were restored and join services, but salary has not been received till date shall be reported to Finance & Accounts Deptt. including the date of joining’ tiin a ziak baw ka ni. Hetah court thutlukna pakhat a awm a, employee thenkhat te chu court-ah an kal a, mahse khami court judgement hmang khan sorkar hna an thun leh zel a. Pu Speaker, hei hi chu thil serious a ni a, *internal enquiry* emaw, *departmental enquiry* emaw kan mamawh khawp mai. Chutiang anih loha CADC sum harsatna hetiang a kal chho zel a nih chuan, 2023-2024 budget ah chuan kan deficit hi cheng vaibelchhe 100 a la ni thei dawn a ni. Chuvangin, financial management hi kan control loh chuan harsatna hi a awm zui zel a hlauthawnawm a ni. He thil hi CADC tan bikin hian serious tak a ni.

Tichuan, hei, Governor Speech, 2021-2022 ah pawh - “Without permission of the Governor, no service should be restored and no new recruitment should be done” tih, Ni 29th March, 2022-ah chiang takin DC & MA Department atangin chhuah a ni a, hei hi thil serious tak a ni.

Tin, Vety Minister-in bawng damlo phurhna turin RD Block tinah ambulance tha tak a dah a, a lawmawm ka tiin, Vety Department te an fakawm ka ti a. Chutih rualin, kan Union Minister for Veterianry lo kal lai khan a sample atan Selesih-ah ambulance dah a ni a, atha khawp mai a, mi pawh phur theihna tur a ni. Oxygen leh emergency service bungrua zawng zawng kha ambulance-ah khan a kim vek a ni. Ran tana khatiang thil tha kan neih theih chuan, mihring damlote hman turin PHC tinah hian ambulance nei ve ila a va han tha dawn em ka ti a ni.

Chawngte block bikah pawh hian National Ambulance Service hnuaiah hmanah khan ambulance pakhat min pe a, mahse tunah chuan a hlu tawh a, a hmantlak tawh lova, kawr sirah off road-a dah mai mai a ni. Tunah hian he ambulance hi mi-anglo pakhatin riah nan a hmang thin nghe nghe a ni. Chuvangin, Pu speaker, khawngaih takin PHC tin a theih loh pawhin Community Health Centre, Chawngte-ah tal chuan ambulance hi min dah sak thei se kan lawm ngawt ang.

Tin, Medical Officer chungchang hi nimin khan recess room-ah kan Minister zahawm tak nen privately-in kan sawiho a. Medical Officer thar ngen hi chuan awmzia a nei lova, a thawktu tur MBBS hmuh a har zia kei pawhin ka hrethiam a; mahse, kan tan chuan a buaithlak a ni. Zing tin mai hian phone call kan dawng a, tele-medicine emaw, tele-prescription emaw hi kan pe lo thei lo a ni. 'Thin-na; luakchhuak etc' tiin zing tin phone ka dawng thin a, kan tan han tih vak ngaihna a awm lo a ni. Tunah hian Longpuighat leh Borapansury PHC-ah hian Medical Officer kan nei lova, kan Minister chak tak hian khawngaihhi he hi min lo enfiah sak se ka duh khawp mai.

Tichuan, Higher & Technical Education demand-ah lut ila. Govt. Kamlanagar College-ah hian NAAC Peer Team te vawi 3 vawi 4 lai chu an lo kal tawh a, mobile signal thatloh vangin required data te upload theih a ni thin lova. Tunah tak hi chuan Airtel leh Jio signal hi Chawngte bialah hi chuan a tha lutuk tawh a. Chuvangin, NAAC Peer Team te an lo kal leh hun nghakin beiseina sang nen tunah hian kan awm a ni tih kha ka sawi lang duh a. Pu Speaker, tun thlengin Govt. Kamlanagar College hian NAAC Accreditation a la nei lo hi a paw kan ti a. Khawngaih takin he hi Higher & Technical Education Minister-in min hriat sak se.

Tin, Art & Culture Department chungchangah hmanah kan Chief Minister zahawm tak, Finance Minister ni bawh hian kan Kutpui (Community Festival) lawmna tur nuai eng engaw zat kan budget-ah dah a nih thu kha a sawi a. Mahse, minorities - Lai, Mara, Chakma leh Bru te hian kan dawng ve ngai lova. Keini bik pawh hian kan social festival 'Biju' kum tin kan hmang ve thin a. Chuvangin, Pu Speaker, heng minorities - Lai, Mara, Chakma leh Bru te tan hian allotment hi min siam sak ve thei se kan hlawkpui ngawt ang a. Hetiang fund hi Tripura-ah chuan tam tham tak an pe thin a, Pu Speaker. Chutiang bawkin Assam-ah pawh minority ten an hmu bawh a, an social festival hmanna tur khan. Chuvangin, Mizoram-ah pawh minority unaute'n an social festival hman vena tur sum min earmark sak se kan lawm ngawt ang, Pu Speaker.

SPEAKER : Hun i hmang dik e. Tiang khan ti ang aw. Dr. L. Thangmawia ka sawm e.

PU L. THANGMAWIA : Pu Speaker, ka lawm e.

Vawiin hi i office atanga sawiho dan tur an rawn rem danah hian ka rilru lo la zawk a awm a. An record, khum har tak tur leh khum theih tawh loh tur te vawiinah hian rawn rem tlar a ni a. Kan Law Minister zahawm tak Pu TJ Lalnuntluanga hi KTP kum over hmaa minister a niin ka hria a, a khum thei chu an awm maithei a, thil har tak a nih tho ka ring a. Tichuan, kan Power Minister, Pu R. Lalzirliana hi Mizoram pian tawh hnuia Cabinet Minister a zawna term 3 awm thei kan neihchhun a ni a, khum a har ve viau maithei bawk a. Tin, Dr. R. Lalthangliana hi India ram University hnuiaia MLA tlin vanga leave la rei ber a nih ka ring a, tunah phei chuan MZU hian kum 10 bak a phal tawh lova. A record hi Mizoram-ah chuan kan khum tawh dawn lo a ni.

Eng pawh ni se la, Pu Speaker, Demand pawimawh tak tak an nih avangin, ‘ka thlawp vek’ tih kha ka han sawi sa ni se, a tawp lam kan hmanhmawh deuh thin a.

Transport-ah hian hmel thar kan hmu niin ka hria a. ‘Inland waterways’ hi tun ang em ema sawi zin leh hmalak hi a la awm lovin ka hria a, sorkar kal taah pawh. Tin, hnam inpumkhatna tura hmalakna Transport kaltlanga a nasat ber tum a ni a. Tunah phei chuan Tripura Service hi tan a lo ni tawh a; Manipur hi tihfel tep a ni tawhin ka hria a. Myanmar lam erawh chu an ram buai avangin nghah deuh hlek a la ngai awm e.

Tin, mipuite awlsawm zawk nan online-a fee pek theihna hi 31.8.2021 atang khan tan a ni a, lirthei neitute kan awlsam phah viau a ni. Tin, November, 2021 atang khan Learner’s License phei chu office-a kal kher ngai lovin online-a dil theih a ni tawh a, kan chhungkua ngei pawhin kan hmang tangkai tawh nghe nghe a. Chhungkaw tam tak pawhin an hmang tangkai tawhin ka ring a.

Tin, Online Trade Certificate te pawh ‘nikum April atang khan tan a ni’ tih kha kan hre theuhin ka ring a. MNF sorkarin manifesto-a a lo neih tawh, a hma chuan kum 15 lawih mai kha lirthei neite tan chhiah pek a ngai thin a. Khang te pawh kha tunah chuan kum 5, kum 10, kum 15 tih vel niin ka hria a, mipuite tana awlsam zawk tura pek theih a lo ni ta hi a lawmawm khawp mai a.

Tin, Forest Department-ah hian nakuma KTP General Conference thleng tur kan nih avangin ‘Ngopa Forest Rest House te min chei that sak rawh’ te ka ti a, min chei that sak dawn niin ka hria a lawmthu ka sawi ni bawk se.

Tichuan, Power & Electricity-ah hian, ka biala megawatt 4 pechhuak thei tur Kawlbem - *Small Hydel Project* kha Power Minister zahawm tak hovin kan han hawng a; min sawm ve hlauh mai a, ka lawm khawp mai a. Hei hi sorkar hmasa in bul a lo tan kha a ni a, kan sorkar tirh atangin kan han chhunzawm ve ngar ngar a. Kei pawhin vawi 2-3 vel ka tlawh a, DO Letter te pawh kan Minister te leh a thawktu Nortech Company te pawh ka thawn hial a, an hna a muan avangin. Hawn theih a ni ta te pawh hi a

lawmawm khawp mai a. He lai pawh hi sawi vak chu a chakawm a; khati chin kha ni ta se la.

Tin, Vankal - *Solar Park* phei chu Zoram mipuite'n kan tangkaipui tur megawatt 20 pechhuak thei tur a ni a. Chhuna khawl hmang mamawh leh thil dang tam takah he megawatt 20 hi Zoram pumin kan la hmang tangkai dawn a ni. Hmanni khan kan Minister zahawm tak hian 'han tlawh dun ang' a ti a. mahse programme dang pawimawh avangin kan thulh ta a. Mahse, min la sawm duh a nih chuan, kan la kal dun turah ka ngai a. He mi kaihhnawihah hian Kawlkulh-ah pawh Power & Electricity Sub-Division hawn hi a tul hle tawh a. Tin, he mi kaihhnawih lovah pawh hian Ngopa lama tihfel ngai leh electric connection an duh avanga va kal hi a lehlina chin a awm a, Kawlkulh area tan hian. Hei hi 'kan nghakhlel em em a ni' tih kha ka han sawi tel ni se.

Tin, tun budget-ah hian thil thar kan hmu a, hman atanga ka lo vei tawh a ni a. Art & Culture-ah hian NGO te tan nuai 50 dah a ni a, hei hi a bul tanna a ni a. Ka rilrua tun hnaia ka vei a ni lova. Mizo te chu NGO anga hna thawk thiam kan ni a, mahni ina chhuat nawt tura tirh kal theih mang lo pawh hi, YMA hnatlangah te hi chuan kawr bawlhhlawh thenfaiah te hian a tangkai ber ber an ni thin a ni. Chuvangin, NGO tam tak a awm a, (a lian zual te hi chu sawi ngai lovah dah ta i la,) tum neiin an awm thin a. Kei pawh hi NGO 4-5 ah ka lo tel thin a; kan thil tih tum theihtawp chhuah ngai baw, sum tlem sen ngaia kha dil kual ngai baw, kan thawh khawmin a lo daih lova. Chungte chu a lo nih thin avang hian, he scheme hi tih len chhoh zela, NGO te pawhin anmahni area zawnah zirlaite tana thawk tur NGO te, ruihhlo tana thawk tur NGO te, khatiang hrang hrang ho kha sorkar pawhin *approved-scheme* anmahni kaltlangin nei i la. 'A tira vei ve lo' NGO te pawhin an tih theih hial turin. Tin, NGO kan va funding si, ti thalo kha chu a kum leh atanga black-list theih mai a ni a. Hei pawh hi budget-ah a bul min tan sak hi ka lawm em em a. Minister te'n an duhzawng an tih ve tur chin chu a awm ang; amaherawhchu, tam tak erawh chu scheme awm sa ang, Mizo mipuiten kan mamawh *scheme*, faina lam a ni emaw, ruihhlo lam a ni emaw, khatiangin ti i la. Hei hi crore tel a tlin chhoh hun pawh hi ka nghakhlel viau a.

Tin, he mi kaihhnawihah hian, Demand nen chuan a inkaihhnawih tho ang a, Higher & Technical nen Heh mi ruala ka han sawi duh chu - kan thalaite hian hunawl hi an nei a ni. Exam result nghah lai te, civil service exam an tlin hnua interview result an nghah lai te, henga kar khat hun nei, thlakhat hun nei, kum chanve dawn hun neite pawh an awm a ni, kan lekhathiamte zingah hian; hengho tha awl hman tangkai hi. Hmanlai chuan lo neih te a ni a, nu leh pa te exam chawlh lai chuan an va pui mai thin a. Vawiinniah erawh chuan a ni tawh lova. Nileng deuhthawa phone khal ringawt leh, nasa taka hna an thawh tawh hnua exam tura an inbuatsaih tawh hnua intih engthawl duh si kha, heng hi sorkar ang hian kawng tam takah survey-ah te leh thildangah kan hmang tangkai theiin ka ring thin a, khawi ber nge tih tur chu ka hrethiam lova; vawiinniah hian a hlawmpuiin kan thet a ni. Chuvangin, hetia kan tih phawt chuan, education sector

ah te pawh kan tangkaipui ka ring a, kar khat chhung class va lak tir kan duhlo anih pawhin, school ban hnua a thiamlo ho tuition lo pe tur tal pawhin, a thlawnin, hlawh nei lovin. Chutianga ram tana karkhat ti thei, thlakhat hun pe thei hi Mizo thalai zingah tam tak an awm ka ring tlat a. Hei hi ngaihtuahna kan hotute pawhin lo seng chho se thil tangkai tak anih ka ring; NGO kaltlanga tih te pawh a tha maithei e.

Tin, a tawpna lamah chuan, Pu Speaker, Pu Thangtea, kan Minister zahawm tak Higher changtu demand-ah hian lut ta ila.

Health Clinic Centre te hi ka bialah pawh pali ngawt mai min rawn dahsak a, ‘a in tur hi kan sa zo vek tawh a ni’ tih kha ka report duh a. ‘Sorkar atanga sanction awm hun kher hi i nghak lovang u; hei chu kan khawtlang tan a ni’ kan ti a, hlep nei lovin khawtlang tangrual nen kan sa zo vek tawh a, tunah hian. ‘Hmanraw ngai zual pawh hi rawn tithla ula sorkar nghak kher lovin, hei hi chu mipui tangrual leh MLA fund pawhin a tul zual hi kan ti dawn nia’ ka ti a, tunah hian kan tichho mek a. Raipuar km km 5-10 dawn lai lai vaccine la tura an kal thin chu a bo dawn ta a, ka bial khua zawng zawngah Health Department-in hmun a nei ta a ni. A lawmawm hle mai. Amaherawhchu khawlian zual - Ngopa Chhim Veng leh Kawlkuh North angah te hian, a khua a len avangin Health Clinic Centre kha kan dil mek bawk a, hei hi min puan sak theih chuan khawtlang tangrualin a in te kan lo sa leh ang a, tiang khanin kan sawilawk ni ta sela.

Tin, Health & Wellness Centre-a hlankai Sub-Centre a awm te hi a lawmawm khawp mai a. Tin, District thar pathum hi hlamchhiah miah lova covid laia kan han ti hi a lawmawm bawk a. Tunah pawh hian CMO office hi sak mek a ni a, Saitual, Khawzawl leh Hnahthial ah te Chief Medical Officer tur. Tin, District Hospital khum 50 awm theihna tur buaipui mek a ni te hian min tilawm hle bawk a.

Tichuan, a tawp ber atan chuan Pu Speaker, Higher & Technical-ah pawh sawi tur chu ka ngah naa, ka vei zawng deuh mai thil pakhat han sawi ka duh a. College kan kal ve laia civil service-a luh tum ho chu chhungkaw hausa vek an ni lova, chhungkaw hausa tam takin an zir tha peih lo bawk a, churang chuan, *Competition Success Review* te pahnih pathumin an inlak tawm thin a ni. Aizawl khawpui te, Lunglei te leh district capital-ah chuan college zirlai competitive neite tana zan pawha va kal theihna tur, inhlawh chawp te pawhin zana an zir theihna tur *24 hrs- service*, a material erawh chu anni tana lei ngai lovin, competition-a chanchinbu lei ngai lovin subscribe sak ila, online a lei theih online-in computer nen tihsak ila. Tin, lehkhabu tharlam ber ber dah sak ila, Mizo thalaite hi tam tak, tuna kan hmalakna bakah hian civil service-ah an tlin theih ka ring a ni. Ka lawm e, Pu Speaker.

SPEAKER : Hun in hmanng tha chat chat hle mai. A ropui e. Member zahawm tak Pu Lalchhuanthanga ka sawm e.

PU LALCHHUANTHANGA: Pu Speaker, ka lawm e. Minister zahawm tak Environment, Forest & Climate Change Department atang hian tan ila. Demand No. 36.

Hei, sahan enkawl nan hian kumtin cheng nuai za chuang hman a ngai thin a. Amaherawhchu, sahan enkawl nan hian sum dah a ni ngai lova. Nikum 2022 chhung khan dan lova ramsa a ruka tawlh lut 261 lai man a ni a, heng ramsa man khawmte han dahkhawmna tur ‘*Animal Rescue and Rehabilitation Centre*’ pawh a awm lova, heng te hi an mamawh khawp mai a. Tin, ramsa enkawl na tur hianin vety doctor an neilo bawk a, AH & Vety atangin kar khatah vawi 2 te an zuk tlawh thei chauh a ni a. Chuvangin, Vety doctor hi kan mamawh khawp mai. Central atangin sahan enkawl nan hian puihna an hmuh mumal loh avangin tunah khuan an tla bal chho mek niin a lang a. Sahan ramsa awmna siam belh leh chei that te pawh a ngai a, kan Forest Minister hian beng lo chhi deuh sela a tha ang e.

ZMC lampang hi han sawi ka duh a. Kan zirna sang, kan ro. ZMC hi sorkar hmasa Congress hunlai khan hmanhmawh leh duhthusam loh tak khan MBBS zirna an han hawng kha a ni a, hei, tunah hian an kal chho mek a. Amaherawhchu, hmasawmna a chak lo hle mai a, tunah hian saw Medical College saw recognized a la ni lo a ni. A first batch hian thla thar maiah final an exam dawn ta a, heng first batch te hi lo pass chhuak ta sela, engtianga awm tur nge ni ang? Recognised an nih loh chuan zirna sang zawk ‘Specialist’ kan tih ang te, PG zir turin khawiah nge zirna seat an hmuh theih ang? Tin, recognised an la nih loh chuan, medical practice pawh tihtheih a ni dawn lova, chuvang chuan, an recognition hi a hmanhmawh thlakin, a pawimawh hle mai a. “ZMC hi engtikah nge recognize a nih ang?” tih kha ka zawt a.

Tin, “A faculty strength hian minimal criteria a phak em?” tih te, “Heng faculty kan neih te hi National Medical Commission norms angin an qualify chiah em?” tih te ka zawt duh bawk a. National Medical Commission danah chuan Medical College Hospital te hi teaching faculty te hnuai a awm tur a ni a, amaherawhchu, tunah hi chuan Directorate Health & Medical Education hnuai a an la awm tlat a ni. Heng te pawh hi tihfel a ngai a. Tin, National Medical Commission hnuai a chuan Medical Supdt. te, Director te, Dy. Medical Spdt. te pawh hi dan ang tak, norms fel taka (*Hon. Dy. Speaker-in chair a la a..*)

DEPUTY SPEAKER : Sawi chhunzawm rawh le.

PU LALCHHUANTHANGA: Ka lawm e, Dy. Speaker. Hengte ah hian National Medical norms hi a duh khirh khawp mai a, “kan neih mek ang te hi National Medical Commission Norms nen hian a inmil em?” tih te ka zawt a. Hei hi a pawimawh khawp mai a, Medical College kan han nei ve a, hei vang hian kumdanga State danga kan quota ang kha kan nei tawh mumal lova. Chuvang chuan, kan Medical College hi recognize anih vat loh chuan doctor indaihlohnaah te harsatna kan tawh dawn a ni.

Nikum lamah khan kan Chief Minister zahawmtak khan Central-ah ZMC hi Central University hnuai a dah tur khan an zuk sawi niin kan hria a. Khangte kha ‘engnge a thlen tawh?’ tih te pawh ka zawhna a ni. Tin, tun kum ZMC batch, 2022-23-a MBBS zir tur thlanah hian seat ruak 3, category I - Zohnahthlak te puala mi tur kha Guwahati High Court-in Assam- merit list a mi mi 3 a thun niin kan hria a. Heng te hi a dik chiah em? A lo dik a nih chuan. kan Minister zahawm tak hian min enzui sak se la a lawmawm khawp ang.

Tin, ka bial chhunga health clinic te, health sub-centre te pawh kan tlawh kual a, ka rin aiin an lo tlabal em em mai a. Furniture-ah te, hmanrua BP check-na te, naupang lungphu enna chi te khatiang neuh neuh te pawh kha an lo nei mumal lova. Theih ang angin MLA fund atangin kan han phuhruk a. A thenah phei chuan lapua te, bandage te pawh an lo tlachham a ni. Hengte hi kan Minister hian min hriatpui se la. Kan health sub-centre te, kan health clinic te, hmundang a mi te pawh an ni ve tho ang, heng te hi thuam that deuh theih se la. Tin, furniture te pawh an nei mumal lo khawp mai a, hengte pawh hi a pawimawh khawp mai a, kan Minister hian min lo hriatpui se la.

Tin, Demand No. 39 - Power chungchangah hian, ka bial chhung -Kulikawn West-a an transformer te khu a tha lo khawp mai a, a chawm zo lo a ni. Hei hi kan Minister hian min hriatpui se la. Tlangnuam-a kan transformer a accessories te pawh khi a hlui lutuk a, kan buai kan thin a. Hei pawh hi ‘a thara thlak theih a ni em?’ tih te pawh kha kan zawt duh a.

Kan sorkar kal mekah hian hydel project, intodelhna lampang hi kan kalpui lo hle mai a. Potential kan nei tha kan tih reng si laia hetiang anga power kan indaih lo hi engnge a chhan ni ang? Engvangin nge hma kan lak loh? “Tuirial Hydel Project compensation avang khan hma thar hi kan la ngam lo em ni?” tih hi Power Minister hian min chhang thei se la, a lawmawm khawp ang. Kan power mamawh te kan in phuhruk lo em em a, potential nei sia hetiang dinhmuna kan ding reng mai hi engnge a chhan? “Power lama intodelh tur hian eng anga hmalak zel nge a nih?” tih te a ni e. Pu Dy. Speaker, ka lawm e.

DEPUTY SPEAKER : Member zahawm tak Pu Lalrinsanga Ralte ka sawm e.

PU LALRINSANGA RALTE: Pu Dy. Speaker, kan sawi nghal zung zung ang e.

Demand No. 36 - Forest Department hi, kan Forest Minister chungah hian a bik takin lawmthu kan sawi duh a. Kan bial hi hmunphiah tamna hmun a ni a, sorkar leh Forest Department ten ruahmanna siamin *mahal* an han ti a, mahal rate hi kg-ah ₹25/- a ni a. Amaherawhchu, mipui ten a aia to zawk a hralh theihna an hriat avangin kan Minister hmalakna a zarah *mahal order* kha cancel a ni a, mahal rate ₹25-a hralh thin

kha, a tuk lawkah ₹40/- in an han hralh nghal thei a, kan lawm tak zet a, hmunphiah hralhna chungchanga hma min lak saknaah. Kan area, a bik takin kan bialkhu 'hmunphiah area' a nih avangin, 'kan lawm tak zet a ni' tih kha ka sawi hmasa duh a ni.

Tin, Saiphai-ah Forest IB min sak sak dawn a, kan lawm khawp mai a. Engkim pawisa ruahmanna tihfel a ni vek tawh a, tan a ni mai dawn a. Saiphai khu ramri hmun pawimawh tak, riahbuk pakhatmah awmlohna a nih avangin Forest Deptt. in hma min lak sak avangin kan lawm tak zet a. Tin, *Pualreng - Wildlife Sanctuary* cheithat leh thawmthat an ni chho zel a, North Hlimen-ah khuan a awm a. Khung te khu a hma aia nasa zawk a hma kan lak theihna turin minister leh department lam ten ruahmanna min neih sak zel turin ka ngen bawk a ni.

Tin, Pu Dy. Speaker, Serlui-balu hi tunah hian lakchhuah theih a ni tawh a, Phainuam leh Saiphai inkarah khuan kawng tha zet maiin tunah hian siam a ni tawh a. Khumi Serlui balu kan lak chhuahna kaw 4-5 thlang lawkah khuan Bagha-balu angin an lo lachhuak a, khumi kan lui luang balu tho khu. Chuvangin, 'Bagha-balu a tha' kan ti a, kan duh em em a, man to zawkin kan lei a; a aia tha, a chhak kaw 4-5 leka awm Serlui-balu hi lachhuak ila, hengte hi Forest Department enkawl na hnuai a awm niin ka hria a. Royalty mumal zawk leh pangngai taka siama lak chhuah zung zung a nih theihna turin tan han la thar deuh se thain kan ring a ni.

Demand No. 42 - Transport chungchangah hian han sawi duh ka nei a. Vairengte-ah commercial vehicle check-gate, 'terminal check-gate' kan tih bawk kha hawn a ni ta a, kan lawm tak zet a. Four-lane kawng laih thar a ni a, four-lane a rawn chhuah chuan a thlang lamah hian check-gate sawn tho a ngai dawn a. Chuvang chuan, tuna building tha takah khuan ADTO min dah sak ta ro ro bawk a; ADTO hi Kolasib-ah hnathawh tur mumal nei lovin an thu mai mai tho a, Vairengte-ah khuan ADTO hi pangngai takin function se revenue pawh tam tak kan hmuhchhuah belh ka ring a. ADTO a function theih ngeina turin ruahmanna min neih sak theih chuan kan lawm ngawt ang.

Tin, Demand No. 33 - Soil Department hi tlem han sawi tel ka duh a. Department pawimawh tak ni si, a pawimawhna sorkar pawhin kan hriatpui tawk lo hi a paw hle a, kan hmang thiam tawk lo viauin ka hria. Soil Department hi directorate hran nei, directorate-a awm ni si hi an hmalaknaa mithiam tak tak kan neih te kan hmang tangkai lo hi a paw ka ti tak zet a. Lei tha luangral mai turte leh thil chi hrang hrang an kuta an thawh theih tur thil tam tak hi a awm a. hengte hi kan hmang tangkai theihna tur hian Soil Department hi ngaihven thar deuh hlek ila thain ka hria a. District tinah an office pawh hmuh tlak a awm mang tawh lova, district tina an office te hi district danga officer leh office-te nen hian a inthlau khawp mai a. Tin, a thawktute tan pawh hian phur awm lo rawih khawp ni hian ka hria a. Sorkar hian kan enkawl that deuh a ngai mang e ka ti a ni.

Tin, Demand No. 39 - P&E Department demand hi han sawi ve ka duh a. North Chawnpui-ah khuan line-extension kan dil a, kan dilna te kan minister-in ruahmanna min han siam sak a, a hlawhtling dawn niin kan hria a, kan lawm tak zet a. Tin, ramri buai avanga ramri kawng kan laih, sipai duty post kan siamna atanga hla tak Aitlang-ah te, Buarchep-ah te current min pawh luh sak a, kan lawm tak zet a. Tunah chuan kan police duty post te pawh in nuam tak tak leh current hnuaiah an awm tawh a, lawmthu kan sawi nghal a ni. Tin, session hmasaah pawh khan ka sawi tawh a, Mizoram chhunga current line upa ber pawl chu Vairengte - Bilkhawthlir - Bawktlang line khu a ni a. He line hi a pawimawh khawp mai a kan sawi tawh a. Tin, official lam pawh hian ruahmana siam in hma la chho in proposal siam a ni tawhin ka hria a Hengah te hi kan Minister hian chak takin hma min lak sak thei se. SASCI rawn chhuak leh tur emaw, DoNER atang pawhin sum hmuh theih theihna kan zawn a tulin ka hria a. He kan line upa tak hi kan ngaihven vat loh chuan Mizoram pum hian kan tuar tel thei a ni. A bik takin Vairengte leh Bilkhawthlir tlangdungah te chuan thli a thawt hlekin line-fault a awm thin a, current a awmlo nghal mai thin a. Chuvang chuan, he line han check thata, a thar hlak kan ti thei lo a nih pawhin a tul ang ang ruahmanna siampui a ngaiin ka hria.

Tin, North Hlimen leh Thingthelh hi Sentlang atang hian a line hi siamthat a ni tawh a, Bukpui thlengin an rawn zo phei tawh a. North Hlimen leh Thingthelh hi ala thleng phei ve lova, session apiang mai hian ka sawi a, hei hi kan ngaihven a ngai khawpin ka hria a. A ban te pawh a tuiekin, a tlu ti tih tawh a, khawtlangin buaipuinin cement te an han chhung kual a, thing tein an do a. Tin, a line a hlui tawh em avangin thli thaw leh eng emaw hlekah a chah a hlauhawm a, current off te a ni a. Khawtlangin hnatlangin kan bei mup mup thin a, saw mi khaw hnih saw; a thui lo bawk a. Hei hi thawh vat anih theihna turin ruahmanna min siam sak theih chuan a lawmawm hle ang.

Pu Dy. Speaker, Demand No. 24 - Health & Family Welfare Department hi a lawmawm hle in ka hria. Zoram puma an hmalaknate kan hmu a, health-clinic centre thar tam tak kan han nei a kan lawm takzet a. Kan bialah pawh hian clinic centre 10 chuang kan nei thar a. Tin, health clinic centre-a thawktu tur health-worker te, helper te kan han nei a, lawmawm kan ti takzet a. Session-ah kan sawi fo a, 2019-20 khan health clinic mamawh ngawih ngawih, khaw te tak te ni si, khaw eng emaw zat kal kana sub-centre hla tak va pan kha raipuarte tan a buaithlak zia te kan sawi a. Chughah chuan health clinic centre kan han nei thar a, thawktu tha tak tak kan han dah thei te hi a lawmawm hlein ka hria a. Chu mai ni lovin, kan minister zahawm takin a rawn sawi tawh a, health clinic centre, a building khawtlang te nen tang hova sakna tur pawisa kan han nei tur leh, a hmanraw tul pawimawh zual kan han nei vat tur te hi a lawmawm hlein ka hria. Hei hi chak leh zuala kan kalpuia, health clinic centre a awm vat theihna turin kan minister zahawm tak hian hma han la chak se ka duh a ni.

Tin, Bilkhawthlir PHC building min sak thar sak a, kan lawm takzet a. X-Ray khawl thar min pe a, a dahna tur In min pek pawh hawn a ni tawh a kan lawm tak zet a.

Tin, Vairengte CHC ruahhmana min neihsak a min chei chhoh sak a; isolation ward leh laboratory room te tunah hian sak a ni chho hi kan lawm takzet a. Kan mamawh tak tak zawka chu - 'hei hi kan mamawh lo e' tihna ni lovin, doctor leh nurse quarter hi kan mamawh hle a, hei hi min hriatsak thei se ka duh bawk a.

Ka sawi nawn leh duh chu – he House ah hian ka sawi ngun tawh viau a, kan session leh hmaa kan neilo a nih chuan kan in-au ve viau tawh maithei a. vairengte-ah hian X-Ray khawl dah ngei ngei a ngai a. Kan official lam te pawh ka sawipui ngun tawh a, vawiin ni thleng hian 'dawn nia; dawn nia' tiha a ral hi a tha lovin ka hria. Kan minister hian hei hi kan neih thei ngeina turin hma a lak a tulin ka hria a.

Tin, tunah hian health-worker awmlohna khua kan nei nual mai a, hei pawh hi SEDP atanga kan dah theih chuan, health-worker pangngai kan neih lohna hmunah te thihna avanga health worker post ruak kan neihte hnawhkah zung zung a ngai hle a mai.

Tichuan, Pu Dy. Speaker, heng kan Minister zahawm tak tak pathumte demand hi tha ka ti a, ka rawn support a ni e. Ka lawm e.

DEPUTY SPEAKER : Member zahawm tak Pu Nihar Kanti Chakma ka sawm e.

PU NIHAR KANTI CHAKMA: Pu Dy. Speaker, ka lawm e. Vawiinah minister pathumte demand kan sawiho a ni a, a bikin senior minister Pu R. Lalzirliana hi, a zawnin minister vawi thum a ni thei hi a lawmawm ka ti a, keini hi 1989 khan Assembly-ah kan lut hova, ka lawmpui hle a ni.

Awle, Pu Dy. Speaker, a hmasa bera chuan, Demand No. 42 – Transport, Land Resources, Soil & Water Conservation chungchang ka sawi duh a.

Pu Dy. Speaker, *Tlabung 35* - West Tuipui Constituency hi niminah pawh ka sawi tawh a, Tlabung-ah hian infrastructure lama hmalakna a la awmluh thu hi. Keini hi lui kama awm kan ni a, soil erosion kan tuar nasa hle a, ka bial pumpuia khaw hrang hrangte lui kama awm deuh vek an ni. Kan khua hi 'Nursuri' a ni a, Nursuri-a chhungkaw zahve deuhthaw chu soil erosion avangin an pem darh vek tawh a ni. Chuvangin, kan tan chuan he department hi a pawimawh khawp mai a, rin aiin an budget-ah sum dah a tam lo hi pawh ka ti khawp mai a. Tin, chuti ruala ka sawi duh chu - Ministry of Shipping, Govt. of India chuan Tlawng Lui chu *National Waterways 102* atan a puang a, a lawmawm ka ti khawp mai a. Inland-water Transport Authority of India economic survey-ah pawh hei hi a lang a ni. Tlawng Lui dunga Khamrang leh Garmura, Assam inkar inkalpawhna hi siam theih ni awmin survey a lang a, a tak takin hei hi puiltling se a duhawm khawp mai a.

Tin, thil lawmawm ka tih deuh pakhat chu - Economic Survey of Mizoram, 2022-23-a a lan danah chuan, Khawthlang Tuipui tan hian MS Right Consultancy Firm-in detailed project report a buatsaih a, a lawmawm ka ti khawp mai a, he project atan hian Ministry of Shipping chuan ₹2,294.94 lakhs a phal sak a ni. Keini hi lui kama awm kan nih vangin waterways (lui kawng) hi tun thlengin kan la hmang tangkai mek zel a. Chutih laiin tuna problem kan neih chu - siltation, soil deposit nasat avangin Khawthlang Tuipui hi a kam chak khawp mai a, chuvangin tuna kan sawi project hi anih dan tur dik taka hman ni se, kan bial tan bik chuan a lawmawm hle dawn a ni. Tin, zawhnaah pawh ka zawt a, he project hi a tak taka hna an thawk a nih chuan, social impact assessment leh environmental effect assessment te hi sorkar hian a tilo hi a pawl ka ti a, hei hi tih ngei a ngai a ni. Indo-Bangladesh border fencing project hi a lian a, crore tam tak senga tih a ni a, mahse sawrkar hian kan han sawi assessment te a ti lo kha pawl tak zet a. Chutiang tho chuan tuna kan sawi project pawh hi a tak taka an tih a nih dawn chuan, social impact leh environmental assessment hi nei ngei se ka duh khawp mai.

Demand No. 40 - Commerce & Industries Department demand-ah pawh hian chutiang tho chuan border haat hi economic survey-ah a lang a ni a, a lawmawm ka ti khawp mai a. Hemi *border haat* concept hi a tha a, tih puitlin anih chuan a hnaivaia awm farmer te tan eizawna a tling dawn a. Hetah hian - Silsuri, Marpara, Tuipuibari leh kan khua Nunsuri hming te pawh a lang a, a lawmawm ka ti a. Kam minister hnena ka ngen duh chu, helamah hian engchen nge hmalak anih tawh tih hi min hrilh thei se a lawmawm khawp ang a.

Hospital chungchangah hian ka sawi duh chu, Pu Dy. Speaker, kan area hi backward anih mai bakah malaria prone area a ni a, chuvangin Tlabung Sub-Division Hospital hi tuamthat a ngai a ni. Tin, Borapansuri leh Longpughat hospital te hi sak zawh tawh a ni na a, a la function lova. Ka bialah hospital pakhat chiah Tlabung-ah a awm a, chuvang chuan damlo ten an pan nasa hle thin a. Chuti chung chuan X-Ray khawl te kan la nei lova, ultrasound kan neih te pawh a chhiat avangin repair a ngai tawh a. Heng medical equipment kan neih loh avangin Lunglei-ah damlote refer chho zel anni a, mirethei tan chuan a harsa khawp mai a, Lunglei-a inentir tura va kal ziah ngai kha. Chuvang chuan, 'ngaihtuah kan ngai hle a ni' tih kha ka sawi duh a. Kan Minister zahawm takin hei hi min chhinchhiah sak se ka lawm hle ang.

Pu Dy. Speaker, a tawpna atan Demand No. 39 - Power & Electricity Department-ah hian thil pakhat ka hriatthiam loh a awm a. Kan transformer englai pawha chhe reng hi engnge maw a awmzia le? A thlakna lah hi kan harsat e mem bawk si a, hei hi awlsam deuha thlak dan te hi awm thei se kan duh khawp mai a. Tunah pawh hmun hrang hrang atangin phone call, transformer a chhiat avangin an dawng thin a, a eng thei lova, tunlai exam hunlai te a ni bawk nen. Hei hi a rang lama min thlak sak thei se kan duh khawp mai a.

Pu Dy. Speaker, Power & Electricity Department hian hma a sawn chho zel a, kan bialah te pawh eng emaw chen chu a ni a, lawmawm ka ti khawp mai. Ka lawm e.

DEPUTY SPEAKER : Member zahawm tak Pu C. Lalmuanpuia ka sawm e.

PU C. LALMUANPUIA : Pu Dy. Speaker, ka lawm e.

Vawiinah kan Minister zahawm tak tak pathumte Demand kan sawi thei hi a lawmawm ka ti a. Hetianga hun tha min petu Pathian hnenah a hmasain lawmthu ka sawi a ni. Demand kan sawi turte hi chipchiar takin kan luhchilh hman dawn lo va minute 10 chhung a nih avangin tawite tein kan han sawi ang a. A hmasa berah chuan, Demand No. 4 - Law & Judicial ah hian ka lut ang a.

He department hi department pawimawh tak a ni a, a tangkai em em a, ‘department zawng zawngin kan intawm’ te pawh a tih theih awm e. Engkimah dan leh dun siam angai a, tin, he House zahawm takah pawh hian dan te kan han siam thin a, chungah te pawh chuan he department tel lo chuan a famkim lo thin a ni. Chuvang chuan, he department hi thuam chak a ngaiin ka hria a, staff an indaih lo em em a, engkim law-vetting tih te a ngai a, chuvang chuan he department hi thuam chak a tulin ka hria a ni.

A pahnihaah chuan, Demand No. 42 - Transport Department hi a pawimawh khawp mai a. Hetah hian sawitur tam tak a awm a, chung zingah chuan ka han tuipui ve em em pakhat chu – ‘Inland Waterways Transport’ hi a ni a. Ka hmaa kan Member zahawm tak pawh khan arawn sawi a, he Inland Waterways chungchangah hian hmalakna kan hmu a, a lawmawm ka ti a. Hemi Tlawng Lui te pawh hi Mizoram chhunga National Waterway kan neih chhun a ni a, National Waterway 102-na a ni a. Kan ngaihthlak tawh ang khan Khamrang atanga intanin Garmura, Hailakandi District, Assam thlenga ruahmanna kal tur a ni a. He ruahmanna, Ministry of Ports, Shipping & Waterways, Govt. of India in a arawn tih anga Minister zahawm tak leh he department changtuten ruahmanna an kalpui hi a lawmawm ka ti a, a tha ka ti a, a hlu ka ti khawp mai. Chu mai a ni lova, Khawthlang Tuipui Bangladesh nena kan insumdawnna tawwna tur atana ruahmanna awm mek te, tin, Khawthlang Tuipui Rajivnagar – Tuichawng-a hmalakna awm te hi a phurawm ka ti tak zet a, he project kal mek hi hlawhtling takin kal thei se mipuite hian kan chhawr tangkai dawnin ka hria a ni.

Tin, kan sawi leh duh chu - Transport Department hmasawwna kan hmu a, *online payment* kan kalpui thei te hi a hluin ka hria a. Mipuite hun tam tak sen ngaia a hmuna kal lova, keimahni inchhung lum atanga online payment kan han kal tir thei te hi a lawmawm hlein ka hre bawk a ni. Tin, Transport Department hian public transport a ngai pawimawh hlein ka hria a, chuta lo lang ta chu - ZMC, MZU, Lengpui Airport te mipui tan an pawimawh em em a. Aizawl khawpuia awmte tan chuan heng ruahmanna

Aizawl City Bus Association te nena inbe rawnin hengah te pawh bus kaltir a ni hi a lawmawm hlein ka hre bawk a ni.

Pu Dy. Speaker, ka bial chhungah ka han lut ve zawk ang a. Transport Department hian kan bial chhung - Govt. Mizo High School hmunah sawn *multi-level parking & multi-level purpose* hall min sak sak a, kumin hian zoh hman kan tum a. Covid-in min tibuai lo sela chuan kan zoh hman ngei pawh kan beisei a. Sawlai saw hmun pawimawh tak mai a ni a, parking kan mamawhna a sang em em a, Zarkawt leh Chanmari ten tangkai takin saw parking saw kan hmang thei dawn a ni a, a changtu Minister leh Transport Department te chungah pawh lawmthu kan sawi a ni. Tin, commercial vehicle te ngaipawimawhin *terminal* sak a ni te hi lawmawm ka ti a. Tlabung, Vairengte leh Serchhip-ah te heng ruahmanna an nei hi a lawmawm ka ti tak zet zet a ni.

Tin, Demand No.36 - Environment, Forests & Climate Change Deptt-ah hian sawi duh ka neih chu, 'Aizawl sahan' hi a ni a. Tun hnaiah Aizawl sahanah sakei a lar khawp mai a, '*Keipui*' kan tih ang chi hmuh tur a awm khu hmasawna ropui tak niin ka hria a. Tin, dahbelhna tur ruahmanna an siam mek tih te ka lo hria a. Hmanni lawk pawh khan kan Minister zahawm tak hnung zui hian ka zuk tlawh ve a, tlawhtu pawh an thahnem khawp mai a, naupang zirlai te pawhin an hlut hlein ka hria a. Tin, *Sakeibaknei*, 'lion' kan tih ang te pawh dah belh tuma hmalakna a awm hi a lawmawm ka ti a, hemi kawngah hian hma la zel tur pawhin kan chah duh a. Tin, ka rilru khawih deuh chu - ransa dan lo anga an man te an dah-khawmna ka zuk hmu a, duat tak maia kan sahana an lo enkawl khu a lawmawm ka ti a, a hlu ka ti khawp mai. Rannungte hi an lainatawm hma em em mai a, duat tak maia an man khawm sahana an dah khu a lawmawm ka ti a, an chungah pawh lawmthu ka sawi a ni.

Demand No. 23 - Art & Culture Deptt-ah hian hmasawna kan hmu bawk a. NGO te tan pawisa nuai 50 lai mai ruahman a ni hi a lawmawm hlein ka hria a Cchu chu ka han tarlang zawk duh bawk a ni.

Demand No. 39 - Power & Electricity-ah pawh hian hmasawna thar kan hmu a. Tlawva-*Small Hydrel Project* (5 mw) commission a ni hi a hlu hlein ka hria a. Power kan intodelh loh dan kan hria a, hetiang thil thar hawn theiha a han awm hi power lamah hmasawna step khat chu a ni a. Tin, Kawlbem-*Small Hydrel Project* (4 mw) ruahmanna pawh hi a hlu hlein ka hria a.

Tin, Solar lamah pawh hmalakna tam tak a awm a. Vankal-*Solar Park* leh hmun hrang hrangah power hmanga intodelhna tur ruahmanna kalpui mek a ni hi Pu Dy. Speaker, a lawmawm hlein ka hre bawk a ni.

Electric Department hi an hah hle a, power supply semkual leh ruahmanna siam ringawt pawh hi a buaithlak tham hle dawn a. Tun kan dinhmunah Mizoram chhungah pawh power an semruah thain ka hria a, an fakawm khawp mai. Mitin mamawhna a sang a, power hi. Zingah pawh badminton khel dawn ila, power tel lovin kan khel thei tawh lova. Chutiang khawpa mamawhna sang a ni a, a department staff-te an chhuanawm tak zet a.

Tin, ka bial chhungah hian electric ban mamawhna Hunthar leh Edenthar Veng-ah a awm a. Kan Minister khan min lo chhinchhiah sak sela. Khungte khu min ngaihtuhsak theih chuan kan lawm ngawt ang a. Tin, in pakhat power-line hian a delh tel ve a, sawn kan duh khawp mai a. Ruahmanna min siamsak theih chuan kan lawm ngawt ang

Pu Dy. Speaker, a tawp berah chuan Demand No. 24 - Health Department hi, an hmalakna a ropui khawp mai a. Hei, Aizawl khawpui bialtu ka nihna angin Aizawl Civil Hospital hi kan ngai pawimawh em em a. ICU kha a tlem thin em em a, he House-ah pawh hian kan sorkar tirh khan ka sawi thin a. A hmaa ICU khum 5-6 vel lek awm thin kha tunah chuan 10-a ruahmanna an siam chho ta leh, tunah hian 10 dang ruahmanna thar a awm niin ka hria a, kan lawm em em a ni. A chhan chu - ICU awm ngai mi tam tak kan awm a, private hospital-ah te kan han indah a; sum leh pai a hautak si a, a luhai thlak em em thin a. Tin, ICU awm ngai kan nih tawh chuan mihring hi mamawhna a lo sang a, Mizoram mipuite'n Aizawl hi kan pan khawmna a ni a, natnaah pawh. Hei hi a lawmawm ka ti khawp mai.

Tin, heart problem kan nei nasa tawh a, cardiologist-ah super specialist kan han nei thar te hi a lawmawm ka ti khawp mai. Chu mai a ni lova, *kal* lamah chutiang bawkin super specialist kan han dah thar thei te hi a lawmawm ka ti a, lawmthu ka sawi bawk a.

Tin, Civil Hospital kawtah *trauma centre* sak a ni te hi a hlu hlein ka hria. Civil Hospital hi kan indaih tawh lo em em a, mipui kan thahnem tawh a, kan doctor te pawh hi an khawngaihthlak a. A chhan chu - pressure a na em em a, thil kan indaih lova, civil hospital hian min zo tawh lova. doctor te thil tihsual vawi hnih khat lek te hi a lar hma em em a, an tihthat erawh hi chu kan sawi mang lo a ni. Va thlir chiang ula, kan doctor te inpekna leh thawh nasat zia kan hmu ang. Chuvang chuan, thawmthatna tura hetiang ruahmanna a awm hi vawiinah hian lawmthu ka sawi duh bawk a ni.

Tichuan, Pu Dy. Speaker, kan Minister zahawm tak pathumte demand hi a tha ka ti a, ka rawn thlawp a; 'pass ngei ni se' tiin ka rawn thlawp e. Ka lawm e.

DEPUTY SPEAKER : Member zahawm tak Pu Lawmawma Tohhawng ka sawm e.

PU LAWMAWMA TOCHHAWNG: Pu Dy. Speaker, bung nghal chawt i la, Demand No. 36 - Environment, Forests & Climate Change Deptt-ah hian.

Anni enkawlna hnuaia awm ramhmul damdawi - anchiri te, kaihtluang te, sumbul, hlonuar te hi ngaihven thara humhalh a tul hle mai a. Hei hi chak zawka kan enkawla kan humhalh loh chuan a rem mai dawn a; kan ram thil hlute zing a mi anni si a.

Tin, thing leh mau humhalhna kawnga department te hmalakna hrang hrangte a fakawm a. Sum leh pai, tha leh zung leh hun hlutak an senso te nena chhutin chhenfakawm leh zuala thiltih dan erawh chu ruahman thiam a tul viauin a lang. Thingphun tam tawh dan leh a nung zel ta te, phun tur thing leh a hmun te pawh hi, kanin senso leh kan hlawhtlinna teh hian tihdanglam hret hret a hunin ka hria. *Duh* leh *tum* inang reng siin heng department dang - PHE, Soil, PWD leh LAD te nen hian hmalakna tur inngaichang tawna ke pen a tul viauin a lang tan a, harsatna insiam sak tawn lo zawnga hnathawh thiam pawh a ngai khawp mai. Inkaihhruaina *Dan leh Hrai* kan neihte inzah sak erawh chu a pawimawh hlein ka hria. Anni hi thilsiam dang thing leh mau, lui tui leh nungcha dangte nena ram leilung boruak thianghlim kan neih zel theihna tur atan leh kan khawsak ho zel theihna tur atana pawimawh tak an ni.

Demand No. 42 - Transport-ah hian Zoram chhung leh pawn thlenga zin mi leh mipuite chet velna ti-awlsama man tlawm zawka zin theihna, mipui chhawk zangkhaitu a ni. Sorkar sumbawma revenue chhungluttu department pakhat a ni a, a pawimawh khawp mai. Kumin financial year kal mekah pawh hian November thla thleng khan revenue cheng nuai 2,738.15 a chhunglut tawh a, sorkar kumthar a lo nih meuh chuan, cheng nuai 4000 chuang zet hmuh beisei a ni. Sorkar tan department hlu tak a ni awm e.

Rampum tana a hmalaknaah sawi tur, hriattur tam tak a awm a. Two-wheeler taxi permit pechhuakin mi sang chuang tan eizawna siamsak an ni a. Motor vehicle tax kan ngaihthlak tak ang khan zangkhai zawka pek theihna siam a ni bawk a. Tin, boruak thianghlim kan neih theihna tur leh kan lo hriselna zawkna tur atan pollution control buatsaih a ni te hi thil lawmawm tak a ni.

Keini Lunglei lam tana bus lian chi service nitina pahnih kan han nei te hi vanneihna a ni a. Inland Water Transport atana Khawthlang-tuipui km 23 thlan a ni hi chhimlam mipui tan a tangkai takzet dawn a, rampum tan pawh chhenfakawm tak a nih kan beisei tlat a ni. Indo-Bangla border trade hmahruaitu a ni berin kan hria. Chhimtuipui - Inland-water Transport km 138.26, Myanmar nena kan insumdawn tawna tur ruahman a ni te hi a nghahhlelh awm takzet tawh a ni.

Khawpui thangzelah Lunglei-a kan DTO office saw a te lam deuh a ni ta a, min dawl zo lo tan a. Kan Minister zahawm tak hian khawngaih taka min lo hriatsak theih chuan a lawmawm ngawt ang.

Law & Judicial hi ‘*lungthu-pathum* ram kaihruaitute zingah an ni e’ an ti thin a. *Legislature, Executive* leh *Judiciary* te hi an pawimawh tawp a, mihring pung zelah an pawimawh telh telh dawn tih pawh a lang reng mai a. Sawi tur dang tam tak karah an hnathawhna, *dan leh hrai* lekkawhna kawnga mipui kan zalen zelna kawngah te pawh hian Lunglei-a Court building sak tura ruahmanna kal mek hi a rei ta viau mai a. ‘Harsatna kan nei em? Hmasawna kan nei em? Engnge kan thlen chin tawh?’ tih hi Lunglei mipui pawhin hriat kan chak khawp mai a. Khawngaih takin kan Minister in min lo hriattir theih chuan a lawmawm khawp ang.

Demand No. 33 - Land Resources, Soil & Water Conservation Deptt. pawh hi Bible thu anga ram leilung leh a chungga awm te enkawla, vawnghima, leilung tharchhuah tipung deuh deuh tur leh malsawm van ruahtui luangliam hum hum thin lo khuapa, tuihna kang zel veng tipungtu *department* a ni. Chutiang tak chuan ‘Pathian leh mipui rawngbawlna a ni’ tih hriaa an beih fat fatna hi a fakawmin ka hria a. Chhuan lo awm leh zel tura tan Pathianin luah atana ram min pek hi luah tlak ni zel tura cheibawltu leh vawnghimtu a ni. Department hmalakna avangin Lunglei lamin heng - gabion wall, contour trench, farm ponds, dug-out ponds, changkham te leh rubber sawngbawlna khawl leh smoke-house eng emaw zat kan dawng hi kan lawm a, ‘kan lawm e’ tih ringawta tawp lova, awmze nei zawka lawmthu kan sawi zel pawh kan ringin kan beisei a ni. Lunglei tuitlan pialthleng lui lamah sawn hetiang hi uar zawka min kalpui theih chuan Lunglei khawpui tuichawmtu a kang zel tur te eng emaw chen chu kan veng theiin a rinawm a ni.

Hmunphiah SEDP trade hnuaiia kalpui Lunglei khawthlang lamah sawn an seng mek a, hmuhnawm tham a ni. An hmunphiah sengkawm te a mualin an dah a, a khawlna tur *Chhek-In*, ‘warehouse’ kan tih ang chi hi an mamawh khawp mai a, kan Minister-in hei hi min hriat sak theih chuan a lawmawm ngawt ang.

Demand 39 - Power & Electricity Deptt-ah hian, kan khawsak sang zelin a ken tel *kawlphepha* hi hriat theihin mipuiin kan chhawr nasa ta a. ‘Leitu’ ni ngawt lova, ‘hralhtu’ nih tel a tul ta khawpin ka hria; mamawhna a sang zel si a. Minister zahawm tak leh department te thahnem ngaihna azarah Lunglei lam pawhin lawmthu sawina tur kan nei nual mai. 132 kV alternate-line kan sawi thin kha tihpuitlin a ni ta a, Kawmzawl-a transformer lian 2 hun belh a ni ta hian power supply-ah Lunglei min chawm thain, ‘in-en-chhawk’ tih te pawh kan nei ta mang lova. Tin, Khawivah panna kawng siam mek saw nasa taka lawmthu sawina tur a ni. Nikum budget session, March Ni 3 zana kan CM leh Dy. CM zahawm takina assurance min pekte zinga mi kha an ni nghe nghe a, min tiam thlawn lo tawp mai.

A dang lelah chuan, Lungsen lamah pawh PGCI-in 132 kV sub-station hna an thawk mek a, Lunglei western belt tan chuan a tangkai khawp a ni. Thawktute mawlh saw an fakawm ka ti thin, zan thim leh vawt, ruah sur hnuaiah pawh complain a awm phawt chuan nunna thap tak meuhin an thawkchhuak mai thin a; harsatna leh bahlahna a awmin, mobile phone hmangin information pein an dawng zung zung a, harsatna sutkian a ni vat vat thin a, a lawmawm thlawt a ni.

Lungsen - Chawngte 132 kV tower thlun hna tunhnai mai khan PGCI-in an thawk zo a. Fur a lo thlen hma hian hman phalna pek hman ni thei sela, kan Minister zahawm takin min lo hriat sak sela a lawmawm khawp ang. Tin, Mamawh lam - Power & Electricity-ah Lunglei khawpui chhung 11 kV line hnawk zualpui saw sawn emaw, siam rem theih dan awm se kan duh khawp mai a.

Pahnihna-ah chuan, thawktu lam indaihlohna nasa hi chu inthlahrunawm teh mahse, han tarlang ve hram hram ila. Lunglei khawpui thang zelah distribution transformer dah belh leh LT line thlun belh kan mamawh nasa hle mai. Khawpui chhung electric ban te saw a hmanlai ta deuh a, a hniam bawk a, ban lian leh sang zawk a tul ta hle a ni. Hmun thenkhatah chuan chenna in chunga electric wire kal te a awm a, a hlauhawm khawp mai a, tihsual palh a hlauhawm a, a bik takin mihring tan a hlauhawm a; Chandmari Veng-a SP office bul hnaia mi saw siamfel sak theih ni se kan duh khawp mai.

Pu Dy. Speaker, Demand No. 21 - Higher & Technical Education hi, department hmalaknaah hian Lunglei-a JB College leh Lunglei Govt. College ten lawmthu sawina tur kan nei nual a ni. SPF fund atanga Lunglei Govt. College auditorium sak zawh a ni ta te, regular teacher pek belh an ni ta te saw kan tangkaipuiin, a lawmawm kan ti. Chuti laiin Librarian mamawhna a sang khawp mai a, college-in bus an nei ta lova, an neih sa kha hluihlawn a lo ni ta a, min ngaihtuah sak thei ang em le?

JB College-a RUSA funding kaltlanga multipurpose hall sak leh classroom sak te saw an hmangtangkai khawp mai a, a lawmawm hle. Tunhnaiah zirtirtu eng emaw zat *regularized* an ni a, college mamawh hria a, teaching faculty hrang hrang min puhruksak avangin lawmthu kan sawi a ni. JB College-ah hian non-teaching staff indaih lohna - library staff, Grade-IV leh driver posts te hi min hnawhkhah sak thei ang em aw?

Pu Dy. Speaker, a laklawh riau bawk a tlem min pek belh leh theih chuan. Kan chawl mai dawn tho si a, ka han zo hram ang e.

Khawpui daifema zirilaite'n bus an mamawh a ni, JB college sawn; hmun hrang hrang atangin an rawn pankhawm a ni si a. Tin, Govt. J. Buana college permanent site Melte ramah sawn project kalpui mek a ni a, chak zawka kalpui theih ni se a lawmawm

ngawt ang. (**Dy. Speaker:** a zawh theih hram kha chuan zawh kha kan duh deuh dan kha a ni tawh a. I laklawh viau em ni?)

Pu Dy. Speaker, kan chawl mai dawn si a (**Dy. Speaker:** Midang kan la leh thei turah ka han ngai a.) Anih chuan, Pu Dy. Speaker, khati zawng kha ni mai sela. Ka lawm e.

DEPUTY SPEAKER : Tunge sawi leh ang le, Sawi leh tur kan awm tawh lo a nih hmel riau mai a; dar 1 a la ri lo deuh hlek a, chawlh a ngai leh tawh tihna a ni a. Hun tlem a la awm hian han din a han sawi mai pawh hi a pawl lohna lai a awm a, hun tlemte chu a ei hek ve thei tho a ni.

Awle, Member zahawm tak Dr. F Lalnunmawia kha a phar niin ka hria a; ka sawm e.

DR. F. LALNUNMAWIA : Tawi tea sawi ka tum ang a, Pu Dy. Speaker. Nakin tlai lamah hun a inhnawh tawt dawn si a, chumi han khek nan chuan tawi fel deuhin minute 10 tling lo a sawi te pawh ka tum ang a, ka han sawihram ang e.

Pu Dy. Speaker, a hmasain kan Minister-te zingah kan Minister zahawm tak Pu TJ Lalnunluanga chan Transport atang hian ka han sawi ang a.

He department hi sorkar revenue hmuhna pawimawh tak a ni a, sorkarin lirthei chhiah leh road-tax atangin sum tam tak a hmu a. Anniin nasa taka hma an lakna azarah sorkar pawhin tangkai takin sumte an hmuh phah a ni. Tax pek dan awlsam zawk *online application* an han tichhuak hi a lawmawmin ka hria a, two-wheeler taxi permit thahnem tak an pek chhuah avanga mi tam takin eizawna an nei hi a lawmawm ka ti hle bawka ni. Auto-rickshaw chungchanga ka sawi duh chu - ka bialah sawn traffic jam a tibuai miah lova, chhim-pei tlangdungah te hian a then chuan feh nan leh chawhmeh phurh nan te an hmang a ni. Hmanni pawh Hlimen-a ka va kalin chawhmeh Aizawl-a rawn supply-na turin an hmang a, an tangkai khawp mai a, min pek belh thei hlauh chuan kan lawm hle ang.

Environment, Forests & Climate Change-ah hian, he department kaihhruainain ramngaw leh nungcha humhalhna lamah nasa takin hma lak a ni a, mipuite pawh kan thangharh zel a ni. Chutih rual chuan, sa kah leh sava veh ching an la awm a, tunhnaiah pawh kan bial lamah air-gun tha chi, en-hlatna awma sava vehte YMA-te pawhin man an nei a ni. Helamah hian sorkar hian YMA-te thawhpuaia, nasa leh zuala hma lak a tul hlein ka hria a ni. Hlimen-ah hian 'Lalsavunga Park' kan nei a, Aizawl khawpui thalaite pan ngun ber pakhat a ni a. Hetah hian ram a kang thin a, amaherawhchu, tunhnaiah sorkar hmalakna avangin leh Chhim-pei YMA tangrualte hmalakna avang tein ram kang eng emaw chen a awm ta lova, a ngaw leh tan tawh a. Tunah hian ram a lo ro leh

tan a, chuang chuan, ram a kan loh nana lo invenna turah hian hmalak a tul hlein ka hria a ni. Tin, Hlimen tlang, Lalsavunga park-ah hian rest house siam tur khan Minister zahawm tak hi kan ngen ve a, min tihhlawhtlin sak ngei ka beisei.

Tin, a piah lawk, Hranga Veng tlangah sawn tlang nuam em em a awm a. sawtah sawn waiting-shed emaw, rest house emaw min dah sak ve theih chuan kan lawm hle ang.

Kan Minister zahawm tak, Dr. R. Lalthangliana department chan - Higher & Technical Education-ah hian

DEPUTY SPEAKER : Ngawi rawh aw. Kan chawlh hun dar 1 a lo thleng ta a. Kan sawi chhonzawm tir dawn nge? (*House-in a remti a*) Awle, sawi chhonzawm rawh le.

DR. F. LALNUNMAWIA : Pu Dy. Speaker, college lamah hmasawna tam tak kan hmu a, RUSA Scheme hi college te pawhin hma nasa takin an sawnpui a ni. Tin, NAAC Accreditation – assessment ah pawh grade tha tak tak an hmu chho a, Grade A te, B+ te college eng emaw zahin an hmu a, kan lawmpui hle a ni. Tin, college zarlaite fee pawh college hmasawna tur atan dah a ni ta hi a lawmawm ka ti a. Cheng vaibelchhe 1.5 zet mai an fee atangin college hmasawna tura dah a ni hi lawmthu ka sawi a ni.

Chutih rual chuan, hemi Job-oriented Education leh training lam hi kan uar a tul hlein ka hria a. College atangin lekhathiam, hna neilo tam tak an chhuak a, heng ho tan hian Job-oriented training hi neih tul riauin ka hria a. A bik takin kan neih chhun - Govt. Polytechnic te, Women Polytechnic te hi changtlung leh zuala siama, mahni kut kea ding thei tura kan zirlai thalaite kan chher chhoh a pawimawh hlein ka hria a ni.

Commerce & Industry Deptt. hi han sawi nghal ta ila. Industry lama mi-tui college zir chhuak te, college zir chhuak kher lo te pawh anni ang, hengho chhawmdawl tura hmalak hi a tul hlein ka hre bawk a ni.

Tin, Health & Family Welfare-ah hian sorkar hmalakna nasa tak kan hmu a. Kan hriat angin health clinic 235 lai hawn thar a ni a, a lawmawm hlein ka hria. Chubakah chuan, health sub-centre building leh quarter sak a ni tawh a, sak chhoh mek zel a ni te hi a lawmawm hle.

Pu Dy. Speaker, sorkar hmalakna lian tham deuh zinga ka han tarlan duh chu - ka bial chhunga awm ‘ZMC’ hi a ni a, nasa takin kan sorkar chhung hian tihchangtlun a ni. Referral Hospital building hi vertical extension-a zauh niin, ward tam tak siam belh a ni a. Tin, cabin building, (VIP tan ni bawk) sak zawh a ni tawh bawk. Tunah hian khum 400 chuang awmin, ICU pawh thahnem tak a lo awm ta a ni. ZMC Academic

building nalh em em mai, India ram huap pawha zahpui awm lo kan sa zo tawh a, hawn hmabakin a awm a, Boys and Girls hostel sak a ni bawk.

Tin, Pu Dy. Speaker, thil lawmawm em em chu - tun hnaiah social media leh chanchintharah te kan hmuh angin ZMC-ah phir - conjoined twins chu hlawhtling taka zai phel an ni a, doctor-te hlawhtlinnaah lawmthu ka sawi a, a ropui tak zet a ni. Heng zawng zawng ni thei tura sorkarin ZMC a lo ti changtlung hi ka lawm a. Phai pan ngai tawh lovin natna tam tak helai hmun leh hmunah an tidam thei ta hi a lawmawm a, 'kan Health Minister leh kan CM zahawm tak te thahnemngaihna vang a ni' tih vawiinah hian ka sawi duh a ni.

Pu Dy. Speaker, hengah hian tu tute emawin sorkar hi 'sum hmang hnem' an ti thin a; hmasawn tur chuan sum hman hnem te pawh a ngai ve a ni tih ka sawi duh a. Kan hmasawna hi a lawmawm hlein ka hria a. I veilama thute pawh hian ZMC te saw minrawn hmuhpui ve se, an lawm ve ngawtin ka ring a, heng kan hlawhtlinnaah te hian. Tute emaw sawi anga social media-ah chauh inngat lovin a tak ngeia minrawn hmuhpui turin ka sawm a ni, Pu Dy. Speaker. Rawn hmu ve se chuan, 'sum hmang hnem' tih te pawh hi, sorkar hian a thlawnin a hmang lova, mipuite tan a hmang a, hlimhlawp leh tul lovah sum a hmang lo a ni. Chuvangin, heng hmasawna tak tak kan hmuh hian mipuite tan rah tha a chhuah a. Tunah phei chuan ZMC-ah hian mi tam tak an lo kal a, thingtlang mi phai panna nei lo te Zoram hmun hrang hrang atangin an lo kal a. Pu Dy. Speaker, kan Minister zahawm tak Er. Lalrinawma pawh hi a taima khawp mai a, Sunday tin deuh thaw hian ZMC-ah a lo kal a, a hre hneh viauin ka ring a, a fakawm ka ti a. Hetiangah hi chuan ani pawhin hmasawna tam tak hmuh tur leh sawi tur a neiin ka ring a ni.

Tin, P&E lamah hian hmasawna tam tak kan hmu chho mek a. A bik takin ka bialah sawn electric hrui hlui leh a dish hlui a tam em em tawh a. Thli a han tleh deuha, ruah a han sur deuh hian a chhe mai thin a, current a tawp mai thin a. Chung chu min tih thar sak turin kan Minister zahawm tak hi ka ngen duh a, ka bial khawdung eng emaw zat atan proposal leh kan mamawh thu te pawh kan thlen a ni. Chungte chu min tih hlawhtlin sak theih chuan kan lawm hle ang.

Kan Minister zahawm tak tak pathumte demandrawn siam hi lawmawm ka ti a, lawm takin karawn thlawp ve a ni e. Ka lawm e.

DEPUTY SPEAKER : Awle, tunah kan chawl ang a, chawhnu dar 2:00-ah Sitting kan chhonzawm leh dawn nia.

(Recess till 2:00 PM)

2:00 PM

DEPUTY SPEAKER : Member zahawm tak Pu Lalsawivunga ka sawm e.

PU C. LALSAWIVUNGA: Pu Dy. Speaker, ka lawm e. Hun a chep deuh avangin Demand No. 4 - Law & Judicial-ah hian lut nghal mai ila.

Kan ram kan kalphung han en hian corrouption case nuaibo tumna hi, ‘chhim leh hmar anga inpersan’ tiin a sawi theih a. Special Court, Prevention of Corruption Act, 1988 hnuaiia sorkar tana Ukil ding te hi ruling party ukil te an ni thin a. Tuna kan kalphungah hi chuan heng sorkar ukil te hian an mahni pute jail-a han khung kha chu an hreh khawpin a rinawm a. Hemi atana pawimawh deuh chu - Special Court - *Prevention of Corruption*-ah tal hi chuan Standing Council, a ngheta thawk tur hi kan mamawh a. Tuna ruling party te pawh hian chu chu an mamawh vek a, an hre vek thova.

SEDP Bu kan en chuan - directorate of prosecution, directorate of establish an tum thu kan hmu a. Amaherawhchu, hemi kawngah hian vawiin ni thlenga hmalakna a la awm lo hi a pawh hlein ka hria. Chuvang chuan, “Prosecution Directorate SEDP Bu a zia ang hian din tura hmalak dan kawng zawn dan a awm em?” tih hi tawitein ka sawi duh a.

Tin, Demand No. 42 Transport department bikah hian ka sawi duh chu - Inland Waterways-a hmalakna kha a lawmawm ka ti a. Khawvela bungraw thiar velna (transport system) man tlawm ber chu lawng hmanga bungrua thiar velna hi a ni a, hei hi a thlakhlehawm em em a ni. Chuvang chuan, kan ram economy siamthatna tur pawha kan sum hnar tur anih avangin, hemi kawngah hian tun aia chak zawka hmalak theih nisela a duhawm hle ang.

Tin, vehicle replacement chungchanga han tarlan kan duh chu - a bikin taxi te, two-wheeler taxi-a eizawngtute hi an khawngaihthlak a, an tlan danah hian; a kawng-chhawng kan siam hleithei bawkw silova. Taxi lamah hian a kawng-chhawng siam ta mai zawkah ngai ila. Nitina an eizawnnah hian an khawngaihthlak a, loan la te an ni hlawm a, an tan a harsa em em mai a. Chutih rual chuan vehicle replacement chungchangah “tuna *Dan* kan hman mek hi ennawna, tihdanglam sak te pawh a tha awm mang e” tih hi tawite-in ka tarlang duh bawkw a ni.

Tin, Demand No. 33 chungah hian, ka bial - Bethlehem Vengthlang te, Bethlehem Veng te, College Veng te, Republic Vengthlang te; tin, ka bial pawnlam - ITI, Salem, Mualpui leh Chite ralah te huan nghet neia eizawng chungkua eng emaw zat an awm a, an riahchilh thin a. Thlai an ching a, thei an ching a, vawkw leh arte an vulh bawkw a. Chuta harsatna an tawh lian ber chu *tui* anih avangin, heng mite tan hian tui

dahkhawlna tanky lian dah sak theih ni sela a lawmawm hlein ka ring a, chu chu kan Minister ka ngen a.

Tin, Demand No. 39-ah hian, Joint Electricity Commission, Manipur leh Mizoram hian Mizoram leh Manipur hi electric bill chungchangah JERC kaihhraina hnuaiah kan awm a. Bill tihsan pawh JERC thuneihna anih avangin, Mizoram sorkar pawh hian bill tihsan a nih dawn chuan JERC hnenah petition a theh lut thin a. Chutah chuan kan sorkar hian 2016 atang khan kum tin deuthaw mai electric bill tihsanna tur petition hi JERC-ah a theh lut thin a, kuminah pawh hian theh luh a ni. Nikumah khan ZPM ten chu chu duh lovin, an complain a, sorkar ina bill tihsan a rawtna ang khan tihsan a ni ta lova. Hei, kuminah pawh hian Consumers Union te'n objection an theh lut ve leh a, engangin nge a kal ang tih ngaihtuahna ah a lo lut a. Manipur chuan petition an theh lut ngai miah lova, 'keini hian engatinge petition hi kan theh luh bik fo mai' tih te hi ngaihtuahnaah a awm a. A chhan chu - kan ramah hian Pathian-in lui khuah tur potential tha min pe a, kawlphehtha-a kan intodelhna tur atana tha lutuk, lui khuah tur remchang tak tak Pathian-in min pe a ni. Tunah hian lui tereuh te te pawisa tam tak sengin kan khuap a, kawlphehtha tharchhuah kan beisei zat hi megawatt 34 bawr vel niin zawhna-chhannaah min hrilh a, mahse a tak takah chuan a ni miah lo. Tlawva, nikuma hawn te pawh kha tunah a hman theih tawh loh. Khitah pawh khian megawatt 5 peak hour-ah pechhuak thei tura ngaih a ni. Mahse, August thlaa hawn kha tunah a pechhuak thei tawh lo; chutiang chu kan dinhmun a ni a.

Kawlphehtha lama kan budget han en hian, kan intodelh theihna tura sum dah hmuh tur a awm lova, a beidawn thlak ka ti a, a pawl pawh ka ti. Kawlphehtha a awm loh chuan, Vety-ah a intodelh theih loh; industry leh factory lian pawh a din theih loh; Damdawi in pawh kawlphehtha tel lovin doctor te thiamna a chhawr tak tak theih loh; industry ah chu tho chu a ni. Chuvang chuan, kan thalai lekhathiamte leh lekhathiamlo lo pung chho zel ten eizawna, thawh tur leh tih tur an neih theihna turin, kawlphehtha hmanga leilung hausakna Pathian-in min pek kan haichhuaha, chung atanga thawh tur leh tih tur kan thalaite tana siam hi sorkar kan nih chuan kan mawhphurhna a ni a, a pawimawh em em a ni. Chuvang chuan, 'kan sorkar kal tawhte' ka han ti teh ang, state kan nih hnu kum 36 kan kal chhoh tawhnaah hian, chulam hawi zawnga ke penna hi hmuh tur vawiin ni thleng hian a la awm lova, a pawl hlein ka hria a. Lui kan khuap a nih rau rau chuan kawlphehtha lian tham, 'mw 50 chin chung lam tal siam chhuak thei hi i buaipui ang u' tih te ka rawt duh a ni.

Tichuan, Demand No. 40-ah hian, SEDP Bu-ah hian kut hnathawktute dinhmun siamthatna tur leh chawikanna tur chi hrang hrang - 'A rate hre sain thlai/thei kan chin tir ang' tih te, 'price support kan pe ang' tih te pawh a inziak a ni. Mahse vawiin niah he SEDP bu hi Pu Dy. Speaker, i ding lama thute khan an hre tawh lo a nih ka ring; an theihngilh tawh a ni ang; pakhatmah hemi bu atanga hmalakna hi sawi tur leh hmuh tur vawiin thleng hian a awm lo. Kut hnathawk tuten sawhthing, hmarcha, zikhlum leh

thil chi hrang hrang an ching a, a hralhna lamah harsatna tawkin vawiin niah chuan an mittui titlatu a ni. Kuminah sawhthing kg 1-ah ₹20/- in an han hralh thei a, an lawm hle mai. Chu chu kan dinhmun mek hi a ni. Chuvangin, SEDP Bu han keu hian a tha em em mai si a, mahse, kan bawhzui lo hi a pawh hlein ka hria. Mipuih tih tur kan intiam leh kan inzawrhna hi kan tih tur a ni a, tih hlawhtlin hi kan bat a ni. Chuvangin, SEDP bu ringawt atang pawh hian hlawhtlinna hmel hmuh tur awm lo hi a beidawn thlak ka ti a, pawh ka ti.

Health & Family Welfare Department-ah pawh hian sawi tur tam tak a awm a. Niminah zawhna ka zawt a, Kulikawn damdawi-in saw a building a bikin Psychiatrist building te hi a chhe lutuk, sak a ngai ka ti a ni. Pu Dy. Speaker, ka lawm e.

DEPUTY SPEAKER : Member zahawm tak Pu Zothantluanga ka sawm e.

PU ZOTHANTLUANGA : Pu Dy. Speaker, ka lawm e. Vawiinah kan Minister zahawm tak tak pathumte demand - department 11 te minute 10 chhunga han sawi chu a huphurh awm leh hle mai a. Chuvang chuan, kan duh lai lai kan chuk mai ang a -

A hmasa berah chuan, Demand No. 36 - Environment, Forest & Climate Change Deptt. hi a ni a. Ka bialah sahan a awm a, rannung chi hrang hrangte an dah a, a entu mipui pawh kan nei tha thin viau a. A bik takin mizote hian sakei hi 'kan lo ngai ropui hle a ni' tih a hriat a; sakei a awm hnuah zoo tlawhtu an pung nasa em em a, a bulah khuan kal hlei theih loh khawpin traffic-te a jam a. Kan Forest Minister-in a sawi ang khan, tunah khuan tiger-nu kan nei a, (a dang te chu kan sawi lo ang a) tiger-nupa dang dah leh tumna a awm a ni tih han hriat hian a tha leh zual hle dawnin ka hria. Chuvang chuan, kan forest department hma lakna tam tak zingah hei hi kan sawi duh a.

Tin, a dawt leh ah chuan Demand No. 42 - Transport Deptt-ah hian, kan hriat angin kan sorkar hma khan vehicle - life time tax kan pe a, kum 15 a tan; tam tak chuan kum 15 kan nei zo lova, khami a pumpui kum 15 atana chhiah pek kha a hautak em em a ni. Tin, mihausa chauhin motor an nei lova, sumdawng leh mi harsate pawhin loan hmangin transport vehicle-te an lei a, chutiang chuan chhiah pe chungin tuna kan sorkarin kan remchan dan ang - kum 5 te, kum 10 atan tea pek theihin a siam hi, 'he sorkar hi miretheite tan a va hlu em' tih kan sawi duh a.

Tin, khawpuia mi tam zawk ten vei vahna atan lirthei - taxi te, two-wheeler te, auto-rickshaw te kan hmang a, a *main-spine* a han kal hian 'traffic a ti jam; a tam tawh' kan ti a, kan thalai tam tak te hian chungte hmang chuan ei an zawng mek reng bawk a. Amaherawhchu, keini bial - Sakawrtuichhun-ah lo kal ula, hawna tur two-wheeler han zawng ula, kan hmu lovang. Chutiang chuan - Zonuam leh Chawlhmun-ah te stand pawh kan la nei lo a ni. Chuvang chuan, a tam tawh viau lai hian, kan thalaite eizawnaa an hman zel theihna turin 'permit pek belh a la tha lawm ni' tih te kan ngaihtuah a.

Tin, taxi pangngai permit hi, ka hriat sual loh chuan tuna kan sorkar hian pakhatmah Aizawl khawpui bik atan a la pe lo niin ka hria a, lawmawm ka ti a. Replacement te a lo tih theih bawk si avang hian, permit pe zel ila hei ai hian traffic hi a buai zual dawn a. Hemi kawnga party-workers te, thalaite'n an it ngawih ngawih kan pe lo thei hi ropui ka ti a.

Keini bial ang khawpui chhung a *main-spine* lut lo hian kan thalaite eizawna tur kan sorkar chak takin auto-rickshaw permit a pe te hi a lawmawm khawp mai a, kan la indaih lo viau zawk a. Taxi ai hian auto-rickshaw te, two-wheeler service te hi a tlawm zawk a, mahni chauha han kal duh te hian taxi hire ai chuan a lo tlawm zawk a, kan bial mipui rethei leh harsa te te lo neia eizawng tam tak tan chuan a hlu hlein ka hria a. A mamawh ang zela pekchhuah te hi han ti thei se la kan minister hian, a lawmawm hle ang a.

Tin, hnam party sorkar-ah chuan – “*ramin 'ri' a nei a, hnamin 'ri' a nei lo*” tih a ni a. Chuvang chuan, kan unaute state dang dangah an awm a, international boundary pawnah an awm a, khang kha chu kan khawih theih a ni lova. Amaherawhchu, inter-state ah chuan kan minister chak takin hma a la a, Tripura - Zampui tlangdung te nena kan inpawh leh zualna tura tan bus-service an lo awm ta te hi a lawmawm em emin ka hria a. Tin, Manipur - Imphal, Churachandpur lam panga kan unaute nena kan intlawh pawh theihna tur atan ‘bus-service tih tumin hmalak mek a ni’ tih te han hriat hian, minister la naupang tak, rilru leh taksa pawh la zang tak kaihhruainah hian hma kan sawnin ka hria a, lawmthu sawi tur kan bain ka hria.

Tin, Demand No. 33 - Land Resources, Soil & Water Conservation Deptt. hi tun sorkar bikah hian a pawimawh khawp mai a. Kan minister hian he department a chan tirh khan, ‘dying department’ a ti a ni; ‘department thi tur’ ti hian a sawi a, ka la hre reng a. Amaherawhchu, tuna kan sorkar hnuai ah chuan kuhva chingtute tanpuitu leh, an harsatnaa support-tu department-ah a tang a. Tin, rubber ching tam tak kan awm tawh a, chungte chuan he department hi kan hmang tangkai em em a. Rubber chingtute hian mipuite tan rubber man tlawm zawka a process-na tur khawl min han pe te, kuhva te pawh mirethei harsa zawk ten tlawm tea an lei theihna turin SEDP hnuai ah kuhva chi miretheite hnenah an han sem te hi a ropui ka ti a. Kan ramah hian thil chin tur tam tak kan nei a, a ram geographical dinhmun a inang lova, hmun hniamah chuan rubber a tha duh em em a, khawthlangah khuan thla khatah nuai 4 - 5 lalut tawh tam tak an awm a ni. Chutiang chuan, tunah rubber hnai la theih chiah si lo chhungkaw tam takin rubber china eizawn tumin hma an la a, kuhva te pawh a ni a, Hachhek tlangdungah khuan kuhva atangin nuai tam tak kan lalut mek a ni, Pu Deputy Speaker. Heng kan huan neitute hamthatna tura hma kan lakna hi a ropui ka ti a ni.

Demand No. 21 - Higher & Technical Education chungchangah hian kan minister chak takin contract basis-a Asst. Professor dah ngheh eng emaw zat a lo nei te hi

lawmawm ka ti a, college-in hma a sawn zel a. Aizawl West College pawh hmanna ka zawhna ang khan, khawpui chhung traffic ti jam tu anihna hmun atangin Luangmual - Handloom & Handicraft ramah college sawnna tur ram min pe a. Nichina zawhna-chhanna an grade 'B+' ti khan ka hria a, amaherawh chu NAAC assesment hnuhnung nimin emaw, niminpiah emawa chhuakah khan B++ an ni tih kha ka han sawi duh a. Tichuan, kan college ten hma an sawn chho zel a, amaherawh chu college hmun sawn tur a nih avangin a building construction chungchangah te hma min lakpui turin ka ngen duh bawk a ni.

Tin, Demand No.24 - Health & Family Welfare chungchangah hian han sawi leh zawk kan duh chu, thil tam tak bakah hmasawna atana kan mamawh berte zinga mi chu he department hi a ni a. Tin, mihringte hmun hrang, khaw hrang hrangah awm mah ila, kan mamawh leh em em chu 'kan hriselna' hi a ni. Sum leh pai nei mah ila, kan hriselna a that chuan loh chuan awmzia a nei lova. (Pu Dy. Speaker, he point chiah hi kan complete ang e.) Ka bial chhung khaw 6-ah health sub-centre kan nei lo a ni. Tichuan, tunah hian health clinic hmun 6-ah kan sorkarin min pe thar a, kan lawm hle mai a. Hetiangah hian sorkarin min equipt vek hman lova. A hmun tur te kan thlang a, tichuan, MLA fund atang tein equipment te kan lo ti ve a ni tih te kha ka sawi duh a. Hmun hla tak taka tanga sub-centre kan pan thin, mahni veng theuha kan pan theih ta te hi kan lawm em em a, he department-ah hian lawmthu kan sawi a ni.

A tawp berah chuan, he kan Minister zahawm tak tak pathumte demand hi pass turin ka karawn support a ni e. Ka lawm e.

DEPUTY SPEAKER : Member zahawm tak Pu VL Zaithanzama.

PU V.L. ZAITHANZAMA: Pu Dy. Speaker ka lawm e.

Demand No. 39 – Power Supply Deptt. ah hian ka han lut nghal mai ang a. General Discussion-ah ka sawi nual tawh nanging han sawi leh hram ka duh a ni. Mipui ten hnianghnar taka power supply kan hmuh theih nan 'cheng vaibelchhe 400' tih kha kan hmu a, khami chungchang kha eng emaw chen karawn sawi tawh a, khalam kha chu ka sawi tawh lo ang a, 'engtin nge kan intodelh ve theih ang?' tih ngaihtuahna nei chungin kan sawi dawn a ni.

Tuna Mizoram-in kan enkawl power project tereuh te te hmang hi chuan kan intodelh dawn lovin a lang a ni. Mw 2, mw 5 tih veh eng emaw zat kan nei ve a, hmanni lawkah Thlawva mw 5, August Ni 11, 2022 a commission te kha lawmthu kanrawn sawi a. Khang te kha December thlaa power generate lo nghal ringawt leh, khatiang tereuh te tea sum tam tak sengin power tlemte kan pechhuak ve a, intodelh kan la hlat hle a ni. Nimin khan ka zawhna-chhanna arawn chhuak a, Mizoram Hydrel Power Station kan neih 15 zet mai arawn ziak thla a, amaherawh heng 15 zingah hian ka han

en vang vang a, 9 vel bak hi awmze nei a ni tawh lova. Serlui 'A' phei hi chu ziah tel chi a ni tawh lova, engmah awmzia a nei tawh lo tih kan hretlang vek awm e. Lamsial te pawh hi awmzia a neih tawh loh dan tichiang tur chuan, hemi zinga tlema tha deuh 9 hi ka han thlangchhuak a, chung te chuan kum 2020 a power an pekchhuah loh dan leh a tlem dan atang hian kan dinhmun Chiang takin a lang thei awm e. Power supply pechhuak tam bera kan sawi Serlui-B khu hmanna ka sawi tak ang khan, 2022 kum khan thla 5 chhung power a pechhuak lova, Kau-Tlabung-in thlakhat a pechhuak lova, Teirei-in thlahnih, Khawiva-in thlahnih a pechhuak lo baw a, Maicham-in thlathum a pechhuak lova, Tuipui leh Tuirivang phei chu an 'nil' tluan zak a ni. Kan sawi ang khan Thlawva erawh chu thlakhat a pechhuak lova, a reilo teh hlawm em mai a, han lawman tur a vang hle. Kawlbem erawh hi chu Ni 15.12.2022 a commission kha a ni a, 2022 chhung chuan 'a la nung ve' tih ang vel a ni.

Chumi ka sawi duhna chu Pu Deputy Speaker, tuna kan dinhmun hi a chhe em em mai a. Nimin veka Dr. K. Pachhunga zawhna-chhanna ah khan - thlatina kan power kum kal ta atanga enin thlatin power tharchhuah dan tlangpui 'hetiang hi a ni' tih chhanna kan hmu baw a. Khangah khan fur lai June thlaah pawh mw 7.5 kan pechhuak a, a that lai ber October thlaah mw 17, khang vel kha kan dinhmun a ni a. Tun hma deuh khan Mizoram khawpui hrang hrang - Aizawl leh District capital ten tui kan mamawh pump chhuak turin mw 15 vel kan mamawh niin ka hria a. Kan tui in tur min pump chhuahsak daih pawh power supply pawh kan neilo a ni. Chuvang chuan, hun kal leh zel turah chuan hetiang chhe te te, awmze nei manglo pawisa tam tak senga hma la tawh lo hian, awmze nei tham 'Koladyne Phase-II' kan tih te leh eng emaw hi kan hotuten hmalak nan hmang tawh se tih hi ka rilruah a awm a, ka han sawi a ni.

Kum 2022-a record nei tha ber chu Tlungvel Solar Project - mw 2 hi a ni a, kumtluan khan vawikhat mah 'nil' a nei lova, a tlema tlemin power chu a pechhuak tluan parh a ni. Chuvang chuan, cheng tam tak senga mini-hydel project kan siam thin ai hian, 'solar lama hmalak hi a tha zawk mah em aw' tih ka lo ngaihtuah a. Tin, Solar Park - Vankal kha March, 2021 a zawh tur vawiin thlengin zawh a la ni lova, 'engtikah nge zawh a nih dawn?' tih kha ka han zawt pah a ni e.

Demand No. 24 - Health & Family Welfare-ah hian healthcare scheme chungchang kha an rawn sawi deuh zel a, tawitein han tihrik ve ka duh a. Tun hma kha chuan healthcare scheme-ah in register-na tlingkawm leh corpus fund pung nen kalpui a ni thin a. Kan tlintawk ang turin natna thlan bikte tan he healthcare scheme hi tha taka kalpui a ni. Pu Dy. Speaker, I ding lama mite khan healthcare scheme tha-mi an rawn zuar ta a, natna thlan bikte chauhin an chhawr theih scheme kha, natna tam zawk a vai deuhthawin he 'scheme tha-mi' hi an rawn hmang thei ta a ni.

Kan Chief Minister zahawm takin damlo apiang hman tur ₹2,00,000/- SEDP a dah thu te kan ngaithla a, kut kan beng a ni. Mahse, hun a lo kal a, he scheme thar hi a

tha lutuk a, kan enkawl zo ta lo a ni. Kan tlin ta lo a ni. Thil tha lutuk kan tlinloh kan zuar a ni. Nuai ₹3,00,000/- sem ang mai khan engmah pek tur kan nei ta lova, vaibelchhe 65 zet ba chungin vawiinah hian kan awm ta a ni. Damlo thenkhat phei chu sorkar leibat an dawn hmaa thi hmante pawh an awm hial a ni. Ka han sawi uar duh lai chu - mipui an mangang em em a, khawtlang hruaitute an mangang a, keini thlengin minrawn zentu an tam ta hle a, mipuite damlo mangang tan sum thawhkhawmin khaw tam takah chuan mi harsate an dawmkang a ni. Vawiinah hian hetiang khawbil tana healthcare scheme siam te pawh hi kan mangan takah chuan an lo piang ta zel a, Leng te, Lungdai te, Tualbung te, Khanpui te chuan an mahni khaw bilin sorkar a an beidawn avangin healthcare scheme an kalpui ta a ni. Henghote hnen atang hian kan sorkar pawh hian zir tur a nei a, a tul phei chuan tanpuite pawh an ngai hlein ka hria a. Mahni phurh zawh loh zuar tawh lo turin kan inngen a ni e.

Demand No. 36 – Forest Dept hi, NHIDCL hian National Highway-06, Seling - Champhai kawng laihna atan hian environmental clearance an nei lova, an nei lo mai ni lovin an dil lo hrim hrim tih ka han sawi duh a. A pahnihna-ah chuan hmana ka sawi tawh Chalfilh reserve forest chhunga tourist lodge leh construction dangte chu thiat vek tur leh, a thiahna hnawkte chu senghawi vek turin Ni 19.1.2022 khan order khauh tak mai *National Green Tribunal* chuan arawn siam a. Mizoram sorkar chuan Supreme Court-ah a appeal mek thu kan hria a ni. Ka sawi tum tak chu, Pu Dy. Speaker, kan ramah reserve forest tichhe zawnga sorkar hmalakna central atangin National Green Tribunal ten minrawn hau a ni. Kan ramah Mizoram pawn lam Company NHIDCL ten kan forest tam tak tichhiain environmental clearance pawh nei lovin hma anrawn la a, “kan ngawi reng dawn em ni?” tih ka in zawt a ni. Keini aiin central lam te khuan kan ram hi anrawn hmangaih ta zawk em ni aw tih ka ngaihtuah a ni, Pu Deputy Speaker. Chalfilh tlang te khi a lo pawimawh hle mai a, khi ngawpui atang khian, khi lai a behbawm khuate ka han zawt kual a, khaw 15 zet chu Chalfilh tlang ngawpui khian tui in tur a pe mek a ni.

Pakhat chiah, Pu Dy. Speaker, minute khat a tling lo ang. Demand No. 23 - Art & Culture hi, Zokhua - Cultural Centre, Falkawn-a awm saw enkawl uluk loh, inthiarna toilet mumal pawh awm lo; hnamdang terawn kalin anrawn en ve a, kan thalai lo awmte an zak thin a. Hei hi, ‘uluk deuh a enkawl a va tha em’ tih kha ka sawi theih tawk ni mai rawh se. Pu Dy. Speaker, ka lawm e

DEPUTY SPEAKER : Member zahawm tak Pu K. Laldawngliana kan sawm ang a, hun hmandik hram hram tum ta ila a tha ang e.

PU K. LALDAWNGLIANA: Pu Dy. Speaker, ka lawm e.

Kan Minister zahawm tak tak pathumte – Pu TJ Lalnuntluanga Demand No. 36 - Environment, Forest & Climate Change, Eden huan ang maia ransa leh rannung, thing

leh mau, mihring zawng zawng enkawltu, sik leh sa buaipuitu Mizoram chhungah harsatna tam tak kan neih ang chite pawh Central YMA te nen tangkawp a, boruak tha kan neihna tur te, nungcha humhalh te, tui lam humhalh tea a thawktute an hnathawhna a ropui ka ti a. Chumi hmalakna zel turah *Nagar Van* scheme liamtham tak, Khawpui lian - Aizawl leh Champhai tea pilot project liantham tak tih tur awm mek te hi a ropuiin, a tha ka ti hle a ni.

Demand No. 42 - Mihringte kein kan kal vek theihloh chin a awm a, a bak hma latu Transport Department hi a ropui ka ti a. Kan sawi ang khan hnam inpumkhatna turah Tripura bus service te, tunah Manipur bus service tura hma lak mek te hi a ropui ka ti hle a ni. Mizoram State Transport hi 'an loss nasa' tih mipuiin kan sawi fo thin hi, sorkar anih avangin leh bus-fare concession a tam em avangin hlawka kal theih a ni lo tih hi kan sawi lang ve duh hrim hrim a. Chuti chung chung chuan sum hlauh tam lutuk lo tur hian department-in engti zawngin nge hma an lak tih hi ka sawi lang tel duh bawk a ni.

Hei ka bial Hortoki-ah vanneihthlak takin eizawna Auto-rickshaw service te min siam sak a, an chungah lawmthu ka sawi a. Kan hriat angin rampuma thalai rual tan two-wheeler taxi hmang te leh zokhaw lamah auto-rickshaw hmang tea eizawna tha tak mai an siamna hi a tha ka ti a, a ropui ka ti hle a ni.

Pu R. Lalzirliana, Minister zahawm tak Demand No. 23 - Art & Culture Department kaltlanga Zonun-zemawi leh Mizo nihphung leh intihlimna kut - Chapchar Kut, Pawl Kut leh Mim Kut te, Central YMA leh NGO hrang hrangte nena tangkawpin hun kan han hmang thin a. Hemi puala budget an han dah te pawh hi a lawmawm hlein ka hria a. Kar leh maiah Chapchar Kut hlimawm tak kan hmang dawn a, Zoram mipui zawng zawng advance in Chapchar Kut chibai ka buk nghal bawk che u a ni.

Demand No. 33 - Land Resources, Soil & Water Conservation Deptt hi kum kal ta 2022 - 2023 chhung khan RKVY leh NABARD kaltlangin rubber chingtute tan rubber smoke-house unit 50 lai mai Mizoram hmun hrang hrangah siam a ni te kha a ropui ka ti a. Kan bial chhung - Mualkhang leh Hortoki-ah te pawh malsawmna kan lo dawng ve a, a lawmawm kan ti hle a ni.

Demand No. 39 - Power & Electricity Department hi kan sawi tam tawkhawp mai a, kan intodelh lo tih chu kan hria a ni. Amaherawhchu, chuti chung chung chuan current kan nei tha te hi a lawmawm ka ti a. Kan sawi ang khan project mw 5 leh mw 4 han tihhlawhtlin te, project lian 8 kalpui mek a ni te hi a lawmawm ka ti a. Mipuiin electric bill sang taka kan pek lohna turin kan budget-ah subsidy atan cheng vaibelchhe 157.90 dah a ni te hi a lawmawm ka ti hle a ni. A changtu minister-in min hriatsak se la, Zuantui 132 kV - Lungdai sub-station survey vek tawh hi eng tikah nge hma minrawn lak sak ang? Tin, Bawktlang - Kawnpui, Kawnpui - Lungdai, hmanlaia tanga ban leh a hrui awm tawh hi engtin nge hma min laksak ang? Tin, hnathawktu an indaih lo

nasa khawp mai a, SEDP atang te hian, keipawh hi kum khat leh thla hnih he House zahawm takah hian ka thu ve chauh a ni a, kan hlawh atangin linesman indaih lohna avangin kan ruai reng mai a, 'hengte hi tihdan kawng a awm em?' tih te ka han sawi lang tel duh bawka a ni.

Kan Minister zahawm tak Dr. R. Lalthangliana Demand No. 21 - Higher & Technical Department hi kan hriat angin, tun hnai khan college Asst. Professor contract-a thawkte mi 64 lai mai dahngheh an ni hi a lawmawm ka ti hle a ni. Kan hriat angin, Tuirial bialah khuan khawtlangin mipui college an din ve a, mipuiin kan tawhkhawm a, village vouncil-in an thawhkhawm a, MLA fund atangin kan thawhkhawm bawka a. Kum 5-6 a kal ve ta a. Heng te hi 'min rawn hre ve reng u la, hma min rawn lakpui ve raw u' tiin kan rawn sawi lang ve bawka a ni.

Demand No. 24 - Health & Family Welfare Department chuungchang hi sawi tur a tam hle mai a. Malsawmna tam tak kan dawng a, keini bial chhungah pawh kan nghahhle em em mai Kawnpui PHC hi CHC-a hlankai a nih hun tur hi bial mipui te'n kan thlir thap mai a. Hei hi min lo chhinchhiah sak se la, a hma lamin min hlankai sak se kan han ti a ni. Chumi piah lamah chuan National Highway bul a nih angin motor accident a tam thin a. Kumthar chibai buk pahin ka zuk kal a, chutah chuan x-ray a chhiat avangin khawl dang kan mamawh em em a, hei pawh hi kan lo nghakhlel em em mai a ni. Department hotute bulah pawh kan sawi tam tawh a, a thei loh chuan MLA fund atang pawha kan tih mai loh chuan mipuiin harsatna kan tawka nasa hle a ni.

Tichuan, Health Department-ah hian malsawmna kan dawng nasa hle a. PHC Bukpui building tha tak min sak sak mup mup mai a, kei pawhin wawi 4 ka va en tawh a ni. An sa zo tep tawh a, department hotute chungah lawmthu kan sawi a ni. Tin, Health Sub-Centre hi Nisapui, Serkhan leh Zanlawn-ah te min sak sak bawka a, kan lawm hle a ni. Tin, thingtlang khua health clinic kan neih miah lohna hmun - North Chaltlang leh Khamrang bakah khawvel MLA zawng zawngin an la hmuh lohna hmun Dilzau-ah te pawh min dahsak a, Rajdali-ah te pawh; an chungah lawmthu kan sawi bawka a ni. Mualvum - sipai awmkhawmna hmun khu a pawimawh khawp mai a. Ramri buai chungchangah pawh khu laia mite khu kan koh ber an ni a. Chuta kan doctor chu lakchhuah a ni a, doctor hi kan mamawh khawp mai a. A remchang hmasa berah, ngaih pawimawh hmasak berah min lo neihsak turin kan sawi lang duh bawka a ni.

Demand No. 40 - Commerce & Industry-ah hian, hei Vice-Chairman ka ni ve a, theih ang tawkin, quarterly tein Committee te ka han neihpui ve a, kei pawhin. Kan hriat angin Mizoram-ah sorkar hnathawk 10% bak hi lak tur a awm tawh lova, 90% vel hi chu thangthar lekhathiamte zawng zawngin sumdawmna, Commerce & Industry kaltlanga hma la tur an nih avangin ngaih pawimawh a ni a. Amaherawhchu, tun ai hian kan sorkar kal leh zel tur te pawhin kan ngaihpawimawh thar a pawimawh hle a ni. Handloom project atan hian mi 438 lai Mizoram tan hma kan la tawh a, *family oriented-*

ah pawh hian mi 13,266 tunah hian SEDP kaltlangin pek mek a ni bawk a ni. Chutiang chuan theih ang tawkin hmalakna a kal mek a ni. Ram hmasawna kal zelna tur chuan capitalist, sumdawng lian awmna hmun a nih ve theihna turin leh, kan ram hi Commerce & Industry kaltlanga hma kan sawn theihna atan lehkha thiam zawng zawngte rawn inngahna tur a nih avangin, helamah hian hma laa, thang zel turin sorkar ni mek leh sorkar kal zel tur pawhin kan ngaih pawimawh a tul hle mai.

Tichuan, heng kan Minister zahawm tak tak pathumte demand hi ka rawn support a, pass ngei turin ka rawn dilpui a ni e. Pu Dy. Speaker, ka lawm e.

DEPUTY SPEAKER : Member zahawm tak Pu Lalrindika Ralte kan sawm e.

PU LALRINDIKA RALTE: Pu Dy. Speaker, ka lawm e.

Ka sawi hmasak ber duh chu, Demand No. 21 - Higher & Technical Education Department chungchangah hian a ni a. Kan bial Zawlnuam-ah khuan college a awm a, Political Science faculty hi kan nei limited deuh hlek a, min lo enchiansak se thain ka hria a, kan Minister hian. Tin, nimin *Unstarred Question*-ah kha URSA hnuai building sak khu 90% leh 70% zo tawh anga chhanna kha a awm tawh a, hei hi min enchiansak deuh se ka duh bawk a ni.

Tin, Demand No. 24 - Health Department-ah hian, building te a ngaih pawimawh awm rual rualin, a pawimawh ber chu - thawktu hi a ni. Tin, khawl a lo pawimawh bawk a. Chuvang chuan, thawktu doctor leh nurse-te hi kan lakbelh thei em? Thawktu hi kan ngaih pawimawh a tulin ka hria a ni.

Tin, Demand No. 23 - Art & Culture Department-ah hian ka lut ang a, ka sawi tawh thin a, a hma lam pawh khan. Hei, *Pu Buanga Dictionary* bawk kha ka sawi leh duh a, hei hi a thain ka hre si a. Tin, mizo-tawng zirnan a thain ka hria a. A bu hi tunlai deuh hlek, changkang deuh, a ziate pawh hraw deuh hlek hian siam ni se, hralh leh tur a nih avangin sorkar tan loss a awm dawn em ni? A copy tam vak lo pawh quality tha zawk hian siam thei se ka duh khawp mai.

Tin, Demand No. 33 - Land Resources, Soil & Water Conservation Deptt-ah hian, hei kan sawi a, ram leilung fate humhalh hi kan ngaipawimawh a, a dik a. Chutiang chiah chuan ram leilung, kan ram chhunga kan tharchhuah hi kan humhalh a ngai ta hlein ka hria a. Ka bialah pawh harsatna nasa tak kan tawk a. Kuhva kan tharchhuak a, amaherawhchu, kan rama kan tharchhuah ni lo hi kan rama tharchhuah hian a buan hneh lo a ni. Hei hi a pawi hlein ka hria a, a changtu Minister pawh hian hei hi a ngaih pawimawh ka ring a. Ram leilung tharchhuah hi kan ngaih pawimawha, a thlang

kan hauh pawh hi a ngaiin ka hria a. Heti zawng hian ngaihtuahna min sen sak se, chak thei ang bera hma min lak sak turin ka ngen duh bawka a ni.

Tin, Demand No. 36 - Environment, Forests & Climate Change Deptt-ah hian, hei kan hria a, sorkarin plantation-ah teak tam tak a nei a. 'Soil erosion' kha kan sawi a, teak kal ral pawh hi kan ngaihpawimawh a thain ka hria a ni. Teak luangral hi a tam em em a, hei hi sorkar sum bawma a luh theih dan kan ngaihtuah ran hi a thain ka hria a; heti zawng hian ngaihtuahna kan neih ngei a tul bawkin ka hria a ni.

Tin, Demand No. 42 - Transport-ah hian ka han sawi leh duh chu – A changtu minister hi, sum hi in thawhchhuah tam tehreng nen hian, a vur letna hi a pe chau angreng khawp mai a. Engpawh ni se la, thahnemngai tak chuan thawkzui zel turin ka han ngen duh bawka che u a.

Tin, ka ngaihpawimawh pakhat chu - motor hi kan uar a, motor khalhtu kan tam a, amaherawhchu harsatna tam tak kan tawhna hi kan kawng a chep bawka si a, kan inpel tur vel duh anga kawng zau bawka si lo velah hian patling pawh hi kan inhnial nasa a ni. Helaia hi motor khalhtu te hian kan hriat tura ka duh chu - kan kawng te a zim bawka si a, kan dinhmun hetiang a nih avangin 'tlemin polite deuh hlek teh ang u, motor khalhtu te hi' tih hi ka sawi duh a. Tin, motor inpelh that theihloh avanga patling han intin vel hi kei a ho angreng hian ka hre khawp a. Chuvang chuan, heng te hi ching lo i la a thain ka hria a. Kan kawng a zim bawka si a, inhrethiam tlang takin. Tin, hlam 2-1 han back te hi tlawm riauah kan inngai nge, heng te pawh hi kan inenchian a thain ka hria a. *Chapo* hi a hman tlak vak loh khawp mai; hman hi tum lo ila a thain kha hria. Chu chu motor khalhtute ka han ngen a ni. Tin, a department pawh hian heti zawng hian tan la se, zirtirna hi kan uar lehzuah a pawimawhin ka hria a ni.

Tin, a tawp berah chuan ka ngaihpawimawh em em, Demand No. 4 - Law & Judicial Deptt. hi, Peace Accord-ah khan High Court hi a hranpaa neih te kha a awm a, kha kha kan sorkar hian a bawhzui em ka hre lova, tin, a la bawhzui theih zel turah ka ngai a, 'heti zawng hian sorkar hian hma a la em?' tih ka zawt duh bawka a. Tin, '*Dan* hi tute emaw tan a ni lova, kan zavaia tan a ni' tih hi kan hriat nawn a thain ka hria a. Tin, *Dan* hnuaiia nunho pawh hi kan zir tlan a pawimawh hlein ka hria a ni. Ka han sawi duhna chhan chu - vawiinah hian dan hi palzutin a awm nasa lutuk, kan ramah hian. Thuneitu milian zawk ten, thil ti thei zawk ten *Dan* kan palzut nasa lutuk hi a dik lovin, a ngaihmawhawmin ka hria a. Tin, thil diklo tih hi vawiinah chuan a inthlahrunawmluh riau hian a hriat tawh. Thil diklo tam tak tihin a awm a, kan hria a. Kuhva tawlh chungchangah te pawh hian thil tam tak a awm. Amaherawhchu dan bawhchhiaa kan ngaih te hi an huangtau em em a ni. Chuvang chuan cowboy hunlai anga, 'a phawi rang rang' tih kha tun lai khawvelah chuan a ni lo. Dan fel tak a awm a, '*Dan* hnuaiiah kan zavai hian kan awm a ni' tih hi kan hriat nawn a thain ka hria a. A bik takin thuneitu sangte hian hei hi kan hriatchian lehzuah a thain ka hria a ni. Dan bawhchhia mi-tenau

deuh chu kan man mai, kan hrem mai. Amawherawhchu, ka ngaihpaawimawha chu - chung ni lo, milian pui pui, an thuneihna leh an thil tihtheihna hmanga dan an bawhchhiatna hi ka ngaihpaawimawh chu a ni. Hei hi kan titawp tur a ni a. Mahni thil tihtheihna leh mahni thuneihna *Dan* bawhchhiatnaa hman hi a fel lovin ka hria a. Hetiang mite hi ‘chhungril nun tlabal, ngaihtuahawm tak an ni’ tih hi ka sawi duh bawh a ni. Ka lawm e.

DEPUTY SPEAKER : Member zahawm tak Dr. K. Pachhunga ka sawm e.

DR. K. PACHHUNGA : Pu Dy. Speaker, ka lawm e.

Minister zahawm tak tak pathumte - kan senior minister Pu Thangtea, Pu R. Lalzirliana leh Pu TJ Lalnuntluanga demand te kan sawi a. Pu Dy. Speaker, kuhva tawlh te kan sawi a. Term hmasa kha ‘Golden period of kuhva tawlh a ni’ tih kha ka han sawi ve leh hrim hrim duh a ni. Congress period kha, ‘golden period of kuhva tawlh’ a ni.

Pu Dy. Speaker, vawiinah hian medical a thawkte he House atangin ka salute duh a. Mihring nunna enkawltu te an ni a, chhun leh zan pwh sawi lovin kan thawktute an hah em em a. Bial kan nei theuh a, kan tibuai a, zan dar 2-4 ah te pawh kan bia a, chutiang chuan kan nunna enkawltu medical-a thawk zawng zawngte ‘ka salute e’ tih ka sawi duh a.

Chutiang bawkin Electric Deptt - eng min petu te an hah em em a, *24 hrs. service* an ni a, anni pawh ka salute a. Midang pawh an pawimawh lo a ni chuang lo ve; lo thik lo se la.

Hei, medical hi tun term-ah hian bung thar a kaiin ka hria a. Kan hriat angin kan hmelhriat ngai miah loh pandemic-in min rawn bawh a. Kan medical facility hi eng hospital-ah pawh hian a chhe tlang a, a bikin government-ah. Tichuan kan hotute’n tehiltawpa tan khawhin khawl kan neih ngai loh, sap rama an neih ang te kan nei ve a. Hmanrua kan lamna leh laknaah duh angin thil a kal fuh thei lova, chu chu tu ten emaw remchangah lain sorkar min vaw vak vak a. Mahsela, kan *overall achievement* hi chu a chik mite leh thil hriate tan chuan an fakawm a, ‘theiltawp an chhuah a ni’ tih pawh kan hria a.

Tin, ‘covid-ah sorkarin cheng khat mah a seng lo’ tih zirtirna te pawh a awm a. Mahse, kan neih bak bak kan seng a, MLA fund te pawh kan pe nasa a, VLTF leh thil hrang hrangah. ‘MLA fund hi sorkar sum tho a ni’ tih kan sawi ve leh duh hrim hrim a.

A bikin ka bialah han lut ta ila. Kan neih ngai loh PHC te, clinic building te kan sa mek a, a thente pheih chu kan hawng tan dawn a. Chutiangin SEDP leh State sorkar

sum atangin sub-centre, health-worker leh helper te kan neih tena thingtlang rethei te te medical facility an pe thei hi, 'sorkar tha a ni' tih hi kan sawi nawn leh duh a.

Tin, cancer vei kan tam em em a, kan hria a, 'cancer hi chumi vang a ni ang' tih te a awm a ni. Nimahsela, genetic inthlahchhawn anih a rinawm deuh zawkin ka hria a. Phaiah kan kal a, sorkar pawhin medical reimbursement-ah nasa takin sum a seng a, nunna pawh kan chan a. Chu chu hriaiin kan sorkarin thapui a thawh a, JICA nen tunah cheng vaibelchhe 700 ngawtin Zemabawk-ah a in kan sa mup mup te hi a ropui a, mipui tan a ni a. Tin, infrastructure, (a ruhrel lian) heng - building lian emaw, power generation emaw, hydel project emaw, border trade emaw te hi a hun a duh rei a, naktuka hlawhtling zung zung hi thil a tha lem lova; hengte pawh hi kan hriatthiam a ngai a. Tutu emaw ten social media-ah an han ti vak vak a, an hmanhmawh lutuk thin hi kan insawiselna pawh niin ka hria a ni.

Medical-ah sawi tur tam tak a awm a, Lunglei-ah te pawh kan neih ngai miah loh kan nei dawn a, Inrinni khan kan Minister zahawmtakin a hawng dawn niin ka hria a. Tin, hmasawna chitinreng mai, oxygen plan te hi kan dam chuan kan mamawh miah lova; han damloh tak tak chuan oxygen plan te hi district hospital-ah kan nei ngai lova, vawiin niah chuan kan nei vek a ni. Hengte hi achievement ropui lutuk a ni. Mahse, kan dam chuan kan ngaihsak lova; 'Mi-bawrhsawm ten doctor an ngai' an tih ang deuh khan, lawmna chang mi thenkhat ten an hre lo hi a dik lova, medical-ah thil tam tak achievement a awm a, lawmawm ka ti a ni.

Tin, Higher & Technical Deptt. ah han lut leh ta ila. Kan hria a, zing lama kan ngaihthlak angin Mizoram college te improvement nasa tak a awm a, India-ah te pawh kan mark a tha a, kan che chhe lova, zirtirtu 64 ngawt mai kan han la thei te hi a ropui ka ti a. Chutiingin, Trade & Commerce-ah hian, Myanmar nena *Act East Policy* hmalakna te hi ruhrel lian a ni a, ni 2-3 leka zo thei a ni lova, hengte hi kan ram tan rohlu a ni a. Tin, 'Tlabung - border trade' kan tih Kawrpuichhuah te pawh rohlu a ni a, he sorkar hian bul a tan a, a ti mek zel bawk a ni.

Tin, Forest-ah, ka han sawi pawlh nawk nawk ang a. Kan hriat angin "Zoo" keipawh ka kal ngai lova mahse hmanni kan kal chu mak ka ti a, traffic jam khawpin kan lo ngaihlu a ni a. He sorkara Forest Deptt. hmalakna hi a hlawhtling takzetin ka hria a, ka lawmpui bawk a ni. Thingtlang bial te kan ni a, kan mipuite ei zawna hi ramngaw ah a inngat lo thei lova, Forest Deptt. hi hma an lak lutuk chuan kan chep angreng a, kan mipuite, mipui rilrem zawnga hma kan lak te hi a pawimawh ka ti a.

Tin, Transport Deptt-ah pawh hian sawi tur tam tak a awm a. Zofate inpumkhatna Manipur leh Tripura te nen pawh hma kan la a, a lawmawm a ni. Tin, 'Inland Waterways' kan tih leh 'National Highway' kan tih ang deuha central pawhin a rawn

puan - Tlawng leh Khawthlang Tuipui, Tlabung kan nei te hi a lawmawm takzet a ni.

Tin, Pu Dy. Speaker, electric power chungchangah hian lawmthu sawi ka duh a. Ka bial thingtlang chengker tak tak sorkar kal ta ina eng an pek ve miah loh khaw 6 lai mai kan sorkarin eng min pe a, lawmthu ka sawi a ni. Hmunthar bik hi a la problem deuh a, Mautlang hi PMGSY kawng an laih avangin a ban hi sawn a ngai a, an eng hleithe i lova, hengte hi min chhinchhiah sak ula. Tin, thawktute kan indaih lo em em tih kan hria a, naichina member hmasa ten an sawi ang khan, thawktu - a ban lawn tur kan nei lo lutuk hi a buaithlak hle mai a, transformer a lo chhe lo thei lova. Nichin khan kan hotute'n an sawi a "A chhe lo thei lo em ni?" an ti a, khawl a ni a, a chhe thei a. transformer problem-a min ngaihsak zel te hi lawmawm ka ti a.

Tin, ka bial khawpui chhung bik - Lunglawn hi eng kan nei tha lo thin a, 'hei hi engnge a chhan ni ang aw?' kan ti a, a ngaihna tak kan hre lova. 'A line emaw, a transformer sizing emaw te hi a ngai ang em aw?' tih te hi kan ngaihtuah a, min lo chhinchhiah sak ula.

Tichuan, Pu Dy. Speaker, kan Minister pathumte demand hi pass ila, kan ram leh hnam tan hmasawna pawh a nih ngei ka beisei a, ka rawn support a ni e.

DEPUTY SPEAKER : Member zahawm tak Dr. Vanlalhlana ka sawm e.

DR. VANLALHLANA : Pu Dy. Speaker, kan Minister pathumte - Pu TJ Lalnuntluanga, Dr. R. Lalthangliana leh Pu R. Lalzirliana te demand kan han sawiho a ni a, department zawng zawng ka lut thei dawn lova, ka han kal nghal zung zung ang a.

Hei, Pu TJ Lalnuntluanga, Minister zahawmtak demand thenkhatah hian han lut ila. India ramah 'forest cover area kan ngah ber' kan ti a, 38% chuang kan ram chhung zau zawng atanga teh chuan '84% bawr vel a ni e' kan ti a. Amaherawhchu, hei, kan CM zahawmtak 'leiba tarmit' ka han vuah a, kan lo nei tam reng reng lova, Odisha te khu kan lo pha lo nasa khawp mai a. Andhra Pradesh, India rama forest cover area nei chhe ber pawla kan lo ngaih pawh kha kan lo pha lova; kan minister-te hian kan CM zahawmtak tarmit hi lo vuahpui ve sela ka han ti ve a.

Tin, Dr. Thangtea, kan Minister zahawmtak te pawh khan 'HIV/AIDS vei kan tam e' a han ti thin a; a leiba tarmit kha lo vuahpui ve sela; kan lo tam reng reng lo a ni; 'keini aia tam State dangah vei an lova tam ve' tih kha kan han hmu chhuak ve a. Amaherawhchu, tehna tur dik lo a thil teh talh hi chuan thil tamtak rawn lang a awm nghal a, chu chu 'mipui te hian an hre si a ni' tih ka rawn sawi a ni.

Hei, kan Minister Pu TJ Lalnuntluanga chan hi Legislator-te Law & Judicial Deptt. a ni a, a pawimawh khawp mai a, ani pawhin theihtawp a chhuahin ka hria a. Tin,

Forest lampangah hian ‘Forest Deptt’ ti ila a chiang ber awm mang e. NHIDCL-in hma an laknaah hian kan ram leilung an suasa a, a dal thei bertu chu kan Minister hi a ni a, “hma nasa takin lo la leh teh se”, tih kha ka han ngen duh a ni. Mi feh kawng, mi dil, mi huan, kan luidung, kan nungchate, kan tu leh fa te hmalam hun thlengin tihchhiat ani tih hi ka han tarlang tel duh a. Kum 50 kan thlir chhoh tel a ngai a, chumi ngaihtuah chuan tuna NHIDCL ina ram/kawng an laihnaah hian hmasawna a awm tur chu a ni a, tlema zawng chu kan tuar ve ang. Amaherawhchu, “Awmze neiin hma la rawh se”, tih kha kan Minister zahawmtak ka han ngen tel duh a ni.

Tikhan a dang, Dr. R. Lalthangliana, Minister zahawmtak department chanah hian ka han lut ve leh duh a. Mizoram State Healthcare Scheme ah hian vaibelchhe 60 dahbelh a ni a, a lawmawm khawp mai a. Ngenna ka siam duh chu - tunah hian vaibelchhe 60 chuang ba kan nei a, “Corpus Fund-a dah lo hian tuna kan ba neihsa ho rulh nan hian hman mai a tha lo maw?” tiin ka han ngen duh a ni. Mipuite phaia kal tum leh a hmaa kan lo bill tawh sa te beiseiin an awm a, hospital lut leh turin an han inbuatsaih a, pawisa an nei tawh si lova; helamah kan lo intiam tingtang tawh si a, sum te kan inpe ve tingtang tawh si a, kan CM zahawmtak pawhin min rawh tawng thlamuan a ni. Chutiang anih avang chuan vaibelchhe 1000 loan lak tur kan nei tho bawk a, kha kha Corpus Fund-a lut turin ti ta ila, vaibelchhe 60 hian a za vai hian ala pha lo maithei a, mahse “ i hman ang u”, tih rawtna ka han siam duh a. Subscriber-te te hi an thinrim lo zawk hi ka ti a; leiba he ti khawpa healthcare scheme ba kan pe hlei thei lo hi chu *Consumer Protection Act, 2019* ngaihtuah phei chuan ‘*deficiency in service*’ te pawh a ni leh lek lek mai lo maw tih rilru ah a awm a ni. Court thenkhatte inkhinna te kan han en ve a, insurance-ah ‘*default in payments*’ te a lo awm a, ‘chungte chu a ni tel em?’ tih te rilru ah a awm a ni. Kan dawng lo chu a ni lo. Amaherawhchu, *deferred payment*, pawisa dawn har lutuk te hi service tih khawtlaina; mipuite tana harsatna thlenna a ni tlat.

‘SEDP-Healthcare, scheme tha mi’ kan ti a, helaiah awm kan chum dum dum a, dawhkan kan beng ri a, chutah chuan a tawp ta kha paw ka ti hle mai. Fund flow statement - Cash flow statement tih a ngai a, ‘financials’, a saptawng tak pawhin; buaipui a ngai a ni. Program vaibelchhe 200 chuang kan kalpuina turah chuan ruahmanna felfai kan nei a ngai; ‘interest engzat nge lo lut dawn?’ tih te; ‘Chutah chuan mi engzat nge rawnin ziah belh ang a, engtin nge kan pekchhuah leh ang? tih te. A hma a an lo pekchhuah dan atangin, ‘trend’ an ti a, a kal chhoh dan tur te kan zir ve thin a, ‘chutiang chuan mumal takin hmalakna a awm lo em ni?’ tih kha rilruah a awm a. Harsa tak tak, mangang tak tak kan hnena rawn kal an tam ta khawp mai. Awm chum ringawt lo hian rilru te hi seng ve deuh ang u ka han ti a nih chu, Pu Deputy Speaker.

Tin, Higher & Technical Education-ah hian, hei, kan Minister leh zirtirtute hmalakna te pawh a ni a, kan Minister zahawm tak hi college zirtirtu thin a ni a, kan senior lo ni tawh thin a ni a. Tin, ani hnuaiiah Zirtiri Residential Science College-in

‘Grade-A’ a hmu a, Serchhip College-in Grade-A; chutiang chuan J. Thankima College-n A+ a hmu a. ‘Ka lawmpui khawp mai’ tih kha ka han sawi duh a.

‘Min lo ngaihven sak se’ ka han tih chu - Zirtiri College-in Ramthar Veng-a hmun a kalsan tak thenkhatah sawn ‘Common Facility Centre for Home Trades’ kan ti a, college zirlaite pawh an rawn tel theihna turin, niminah pawh ka sawi tawh - plumbing te, electric wiring te, steel fabrication te, aluminium fabrication te college kal paha an zir theihna din turin ngenna ka siam a. College lampangin department-ah an theh lut a, file a tang ta char char mai a, kan engto viau mai a. Hei hi a rawn chhuah chuan, zirlaite pawhin lehkha an zir pahin hman tlaka anmahni intodelh theihna turin hma lak kan tum a. Hei hi, ‘a file kha min enpui deuh se’ tiin ka han ngen duh a.

Tin, react leh tura ka ngen duh chu - Govt. Aizawl North Colege zirlaite leh zirtirtute nen kan CM zahawm tak kan hmu a, chuta a lo sawiah chuan, “DIET Principal quarters te pawh North College tan buaipui a ni; ngaihven mek a ni. Sawtah sawn in sang tak kan sa dawn a, a chhakah, DIET Campus-a Transit Building te pawh saw college hman theih turin hma lak a ni ang” tiin min lo tawng thlamuan a. Chu te pawh chu engtin nge hmalak zel a ni dawn?

Tin, North College saw Ramhlun Veng pangngain kan intawm tih theih ‘Ramhlun Market’ atan luah a ngai a. Saw mi te saw, zirlaite pawh an khawngaihthlak a. Chu bakah Commerce & Industries minister a nihnaah pawh, saw market chhawng thumah sawn, a hnuai ber chauh saw mipuiin market-ah kan hmang a, a kaw huau a. Sawi mawi lo pawh ni lo ta se la, thenkhat an lo inthiar a, zingkarah; tikhan hrehawm takin an lo thian thin a ni, saw laiah sawn. Tichuan, a chungah anthurium zawrh a ni a, a hmaa enkawl that loh vang te pawh a lo ni ang a. A chung leh college a lo ni a, kawng sirah, motor khu karah chawhmeh kan zuar leh si a. Hei hi chu ngaihven a ngai a ni.

Tin, college hian kumin budget receipt side-ah khan nuai 300 vel sum dawng ve thei tura beisei an ni a. Aizawl Civil Hospital-ah hian ‘RKS’ tih scheme hi a awm a, member kan ni ve a. Civil Hospital hian a sum dawn hi ama inenkawl nan a hmang leh a. Modular OT te kan nei a, Dialysis te kan han ti chho leh a; Pace-maker te pawh vuah theih a ni tawh a ni. Tangkai takin kan hmang a. College hian 50% vel emaw hi chu Library atan emaw, zirtirtu rawih belhna emaw ‘khatieng atan te khan hmang ve thei ta se la’ tih kha rawtna ka han thlen duh a ni.

Tin, ‘Aizawl pawn’ han ti i la, Aizawl sir lampangah college kan han sawn chhuak chum chum a, bus service-in kan um zui leh si lova. Hei hi kan Minister zahawm tak, Transport Minister demand sawi ni te pawh a ni bawk a, khatieng kan um zui tel kha a ngaiin ka hria a. Zirlai harsa tak tak te an ni ve a, chung hote tan chuan helaiyah scheme kan tih chuan, a dang nen kan um zui ngaiin ka hria a, chu chu ka han tarlang tel ve duh a.

Tin, Commerce & Industries Deptt budget-ah khan GIA-*Non-Salary* ah nuai 20 a awm a, *Other Charges* kha eng atan nge kan hman dawn chu a hriat loh naa, nuai 60 leh tih a lo awm a. Kha chauh kha hma lakna tur a ni a, a bak chu inenlkawlina tur vek. Entrepreneurs te, industry lama tuite, mahni kea ding duh te'n he budget hi an lo enin eng nge an hmuh? Kal ngaihna an hre lo a ni; lo hlin tur an nei lo. “Engtin nge kan kal ve ang? Budget atang hian engtin nge kan lo in buatsaih ve ang?” tiin mi chuan budget an lo thlir ve thin a ni. Keini chuan ti hian kan nei lova, kan minister leh kan officials te pawh hi an khawngaihthlak tak zetin ka hria a.

Power & Electricity Department-ah ka han lut ang a. Whatsapps Group an siam a, P&E hian; MLA te min telh a, khawtlang hruaitute min telh a; current awm loh ve leh a chhan an rawn sawi thin a, a ropui ka tiin lawmawm ka ti. Phone call te kan han dawng a, tha takin kan han chhang thei a; an hmalakna a tha ka ti takzet a, ‘department dang pawhin entawn se’ tiin ngenna ka siam ve duh a.

Inthlan kum te a ni a, power tariff rawtna lehkha thehluh hun te pawh nimin piah khan a tawp a. A punna kha a tlem angreng riau a, loneitute power tariff erawh khan chu tlem chuan a han pung ve deuh a. Khalamah chuan ka lut thui lo vang a. (Pu Dy. Speaker, minute khat pawh ka hman belh lo ang.)

Power budget-ah hian kan BE, RE leh *Actual* inthlau leh lutuk hi a manganthlak a. Kum kan hman lai mek 2022-23-ah hian BE-ah chuan, thla tin khan ‘vaibelchhe 14 chuang kha kan hlep ang’ tih a ni. Amaherawhchu, RE a rawn kal a, vaibelchhe 9 leh tih (vaibelchhe 10 dawn) kha kan hloh leh si a ni. Chuvang chuan, budget-ah hian kan tan a ngai a, kan inzir a ngai hle a ni. Ka lawm e.

DEPUTY SPEAKER : Member zahawm tak Er. H. Lalzirliana ka sawm e.

ER. H. LALZIRLIANA : Pu Dy. Speaker, vawiinah hian kan Minister zahawm tak tak - Pu TJ Lalnuntluanga, Pu R. Lalzirliana leh Dr. R. Lalthangliana te demand kan han sawiho a ni a, an zavai chungah hian lawmthu sawi tur a awmin ka hria a, a wholesale-in ka han sawi mai ang a.

Kan ram, kan bial leh district tan te pawh bungthar heng department-ah te hian min kaipui a ni. A mal mala sawi tur te pawh a awm awm e. Mahse, hun a tawi avangin chutah chuan ka han duhtawk mai ang a.

Environment, Forests & Climate Change Deptt. chana ka han sawi lawk duh chu - Dampa Sanctuary-a tiger tihbo kha hmuh leh tawh a ni a; ‘lo ti bo tawh suh u’ tih kha ka han chah duh che u a ni. Tunah Tiger Reserve-ah khuan tiger a awm leh tawh a, a nihna tur angin a function leh thei tawh turah ngai ila.

Hei, Transport hi, hman budget session hmasa bera ka sawi baw kha a ni a. Kan Transport Department te hi hna an thawk nasa hle a, a thawktute, a minister changtute pawh an zahawm a. Chutih mek lai chuan, ‘revenue earner’ ni thei hi ‘loss-making’-ah kan la siam tlat lai hi ‘engtin nge ni ang’ tih hi a sorkar ang te, a department ang te leh a mipuite pawhin ngaihtuahna sen ngaiin ka hria a. State dang tam tak chuan Transport Department hi Corporation-ah an thlak deuh vek tawh a. North East ah te pawh - Assam Transport Corporation te, Meghalaya te pawh a ni a. Tin, South India leh mainland-ah chuan ‘Transport Corporation’ angin an kalpui vek a ni. Chu chuan revenue kha ‘loss-making’ ni lovin, ‘revenue-earner’-ah a chan phah ta a. Chutah chuan, suggestion te pawh a ni ang a, department lam te pawhin min lo ngaihthlak that sak se langin, kan MST te district tinah hian a kal deuh vek a. Tin, inter-state ah te, tunah phei chuan foreign - Burma lam te pawh kan hawi a nih kha. Chuvang chuan, he kan transport hi corporation-ah leh dan ngaihtuah i la. Chutah chuan hmun tinah, district tinah hmunhna mumal tak neiin office emaw, godown type emaw, station ang type emaw siam ni se; a thawktute’n a chhiat emaw pawha an han repair theihna tur ang chi ruahmanna te siam ila.

Tin, *fuel station* hi a pawimawh em em baw kha a ni. Tuna kan han neih hi chu ‘consumers petrol pump’ tih a ni a, hei hi chu mahni consumption tur a ni a. Tichuan, *retail outlet* petrol pump-ah chuan kha kha sumdawna chi khat a ni a. *PSU - State run* angah te leh corporate angah chuan oil industry atang hian advertisement through pawh nilovin *direct dealership* a hmuh theih a ni. Tichuan, district tinah ram lian tha taw k neiin, khatiang zawng zawng facilities awm theihna kha ni se; ‘khatiang zawng khan ngaihtuahna han hmang ta ila’ tih kha ka sawi duh a ni a.

Transport Department-ah hian bungthar kan kai a. Hei Inland Waterways-ah te ka bial chhung Khawthlang Tuipui - ‘Rajivnagar to Tuichang’ tih te pawh a awm a, henge te hi *Thumtea-thlira kan thlir* a ni. Tin, thil pakhat kan sawi duh chu - Transport lam tih tur nge, Home Deptt. lam tih tur ka hre chiah lova. Saturday-ah hian kan bazaar thin a kei chu; ka walk thin a, ka bazaar pawh ni chiah lovin. Kawngpui dungah hian chawhmeh-zuar kan thu deuh fur mai a, intihpalh a hlauhawm thei em em mai a ni. A bik takin heti lai Agri-office atanga Zodin lai hi, *two-ways* anih hian a hlauhawm tak tak a, bus te a lo kal a, a lehlam zawng atangin motor dang a lo kal baw kha a, a sir tawn tawnah bazaar ho an thu baw kha si a. Hei hi ka ngaimawh khawp mai a, ‘Saturday chauh hi chu helam Vaivakawn lam atanga lo kal hi *one-way* in kal nileng ve ta se la a tha lawm ni’ tih hi, a sawina hun leh hmun a ni em ka hre chiah lova, ngaihpawimawh zawng kan sawi ve tawp a nih chu. Accident leh intihpalh te a awm hmian fimkhur nan kan ti a ni.

Hei, power sawi rual hian Forest pawh sawi tel tho ka duh a. P&E Department-a kan mutan chu - 132 kV, Bairabi - West Phaileng via Mamit a ni. Hei hi Forest leh P&E Department a ni ber mai a. Ngunthluk takin min lo ngaihtuah sak ula, pa-hausa

deuh chu ni ila chuan, he kan forest clearance tur pawh hi, 'kha, hei hi' ka ti duh tawh maiin ka ring a. Chutiang khawp chuan mut-mawh, hnar-mawhah kan nei tawh a ni. Hei hi khawngaih takin department lam ten theihtawp min chhuahpuia, rang taka he kan mutan hi min solve-pui turin kan ngen che u a. Tuna 33 kV Phaileng atanga kan lak phei hi ngaw kar kal a ni a. Tin, hemi kan Assembly House kaltlang hian Mamit Division hnuai P&E Department hnuai hnathawk zawng zawngte chungah lawmthu kan sawi duh a. An thawkrim em em a, ruah a sur hlek chuan an buai nghal a, zankhaw tairek in chutiang chuan mipuite'n harsatna kan tawh loh theih dan ber turin hrehawm pawisa lovin hna an thawk a ni. Chuvang chuan, hemi 132 kV hi kan nghakhlel em em a ni. Tuna kan mutan 'forest clearance' kan tih ang chi te kan hriat vek kha, a sawi pawh kan sawi nasa, sawi tam pawh a ngai awm lo e; heng hi min ngaihtuahpui turin ka han duh che u a.

Tin, Hmunpui-line hi a hmian Rawpuichhip atangin kawng a kal a, helai kawng hi a awm mumal tawh lova, kawngpui thar Lengpui lam atanga kal hi an kawng ber a ni tawh zawk a. Hetah hian he line hi shift theih ni sela kan duh khawp mai a. Kan sawi thin a, hei hi department leh kan Minister zahawm takin min lo hriatsak sela ka duh a. Tin, tunah khuan 'Mamit - ring road' kan ti a, tlak lam leh chhuah lam kan bei a, khutah khuan mi tam tak an cheng tawh a, kawng te kan siamthat phei chuan an tam lehzual dawn a. Khungah khuan power supply a rang thei anga min pe turin kan han ngen che u a ni.

Tin, Land Resource, Soil Water Conservation Deptt hi, khu lam khu rubber leh kuhva tamna a ni a, tunah hian District Officer, Mamit a mi hian Aizawl-ah Dy. Director, Planning nen a chelh kawp a, a buai hle ang tih ka ring a. Hei hi dedicated DO min pek dan a awm em khulaiah khuan? District hnufual te pawh kan ni a, tih tur leh thawh turte a tam a ni. Chuvang chuan, min lo hriatpui turin ka duh a.

Tin, Health & Family Welfare Deptt-ah phei chuan Mizoram State ah leh a bik takin kan bialah pawh malsawmna tam tak kan dawng tih kha sawiloh theih a ni lova. Health-ah hian India ram hian 1% GDP hi kan spent a ni a; Thailand te hian an lo hmang hnem khawp mai a, 4% GDP an hmang a ni. Tin, India ramah hian guidelines leh min beiseinaah 6.3% of budget (ka hriatsual loh chuan) health-sector a hmang tur kan nih lain, state tam ber hian kan hmang pha lo vek a, Mizoram chu a hmang tha pawl tak kan ni zawk a; hetah hian nasa takin improve chu a la ngai a. Tin, health clinic 15 ngawt mai te min han pe a, tin, health-worker te sub-centre upgrade-ah te, health & wellness-ah te, ANM school-ah te, 'mi panga ngawt MLA fund-in kan la ruai' kan tih kha, khangte kha min hriatsak ka duh a.

Tin, Lengpui PHC-ah khuan x-ray an neih lohna hi a rei tawh a, kan sawi thin a, Minister-ah pawh. Amarawhchu, department leh Minister pawhin min lo hriat sak atan - hei hi chu kan lo chhawk thei dawn che u niin a lang a; tunah hian company CSR kan

dil a, min approve sak tawhin kan hria a. Lengpui PHC-ah khuan oil industry CSR atangin x-ray kan beisei a ni.

Hei Commerce & Industries Deptt-ah te pawn ka sawi duh hram chu - MSME hi nasa lehzuala kan kalpui a ngaiin ka hria, Mizoramah hian. Hei hi central sorkar pawhin min target-pui te a ni a, ‘eizawna thalaite leh a tithei ten an neihna tur a nih avangin’ tih te kan sawi anih chu. Chuvang chuan vawiin nia kan Minister zahawm tak takte demand hi a pawmawm ka ti a, ka support a ni e. ka lawm e.

(*Chairman, Pu K. Laldawngliana’n Chair a la a.*)

CHAIRMAN : Pu Lalrintluanga Sailo i lo sawm ang.

PU LALRINTLUANGA SAILO : Pu Chairman, ka lawm e.

Zawhna pakhat Pu Chairman, ka zawt duh a - Nikum lamah ka sawi tawh a, hemi Assembly bulletin-ah hian Geology & Mineral Resources Department hi a lang lo ziah mai a, ‘Commerce & Industry’ han tih mai hian kan hrefiah tawk lo deuhin ka hria a, helai hi ‘ka ngaipawimawh khawp mai’ tih ka sawi hmasa duh a. Chutihruah chuan he department hi Demand No. 40 khan a huam turah ka ngai a, hei hi a pawimawh khawp mai a. A thawktu an tlem nachungin, State’s *revenue-earning department* tak tak a ni a.

Tin, an pawimawh zia hi kan sawi lo hian ka hre thin a. Lei a che a, lei a min a, indaihlo chung chungin anni mithiam kan ko a. Lir a nghing a, kan ko a, hetah building lian synod-in a sak dawn pawhin kan ko zel a. sorkar a ni emaw, corporation a ni emaw khatiang chi khaah khan an pawimawh hlein ka hria a ni.

Ka question-ah khan a lo chhuak lova, mahse vawiina *Unstarred*-ah khan a lo chhuak a. Ka biala Bungmual ram, West Phaileng-ah lung tha tak tak lakchhuah tur volume lian em em mai a awm a, ‘min lo survey sak vek tawh a ni’ tih te chhannaah ka hmu a, ka lawm hle mai a. Chutih rual chuan hmannah Bangladesh - Border Trade chungchangah Bangladesh-ah a changtu Minister zahawm tak Dr. R. Lalthangliana te nen kan zu kal pawhin, Bangladesh lamin an demand chu - lung (stone) kha a ni a. Chuvang chuan, hemi kawngah hian, ‘tan han la thar leh deuh se’ tih kha ka ngaihtuahnaah a awm a, kan tarlang hmasa duh a ni.

A dawt lehah chuan Member zahawm tak Dr. K. Pachhunga khan ka tawngkam hman tum tak mai kha a hmang a, kan hmang lui tho ang a. Health Department Demand No. 24 hi vawiin hian fak tlak a niin ka hria a. Kan Bible in a sawi ang deuhin, “*Thihna a ta a chhuak a, nunnaah a lut ta zawk a*” a tih ang deuh khan Pu Chairman, kan ram thihna a ta kan chhuak a, nunnaah min senglut hlahu tu department a ni a. Chuvangin, vawiinniah hian tih tak zetin ka salute a ni.

Ka han fakna em ema chu - indaih lo chungin midang volunteer tur te pawh awareness pein an incho-phur a, khalama mithiam hlawh pawh nei lova inpe tura an han tichhuak thiam te kha a ropui ka ti a. Chutih rual chuan, kha ti khawpa 24 hrs Covid donaa hna an thawk chung khan, an thawhna a dal chuang miah lo kha thil mak tak a ni a, an inpekna a ropui thlawt ka ti a. A chhan chu, ka bialah te pawh PHC building lian pui pui pahnih min sak sak rualin khawtinah health clinic centre min din sak a. Tin, health-worker awmna hmunah min rawn upgrade a, khatiang khan min han tih chhoh sak a, department-a an hnathawh thulh miah lovin. Tin, hripui leng karah hna an thawk chungin tiang khan an kal a, ropui ka ti takzet a ni.

Chutih rual erawh chuan vawiin niah hian ka biala health clinic centre dahna tur khaw 4 - Bawngthah, Chhippui, West Phulpui leh Bawlte te henga thawktu tur pawh information kan lo pe vek a, order ah khan a lo tel hauh lo mai a. Hei hi a changtu Minister zahawm tak hian min hriat sak se, action min lak sak ngei se ka duh a.

Tin, sorkar hmasa lam daih tawhah khan West Phaileng PHC-ah x-ray khawl an dah reng mai a, vawiin niah ka bialah pawh hian PHC-5 kan nei a, pakhatmah a function lova, thawktu technician kan nei lova. Heta damlo cent percent deuh thaw hi kut-hnathawktu an ni a, ruh tliak leh thidang han x-ray ngai thin hi a buaithlak khawp mai a. Chuvang chuan, helai hi min ngaihtuah sak sela ka duh a ni. A khawl min dahsak theih chuan, a thawktu chu ka fund atang a nih loh pawhin ka hlawh atangin ka chawm mai ang tih kha ka tarlang tel duh bawk a ni.

Chutih rual chuan Pu Chairman, Demand No. 39 leh 36 - Power & Electricity Department leh Environment, Forests & Climate Change Department te hi sawi kawp loh theih niin ka hre lova a. A chhan chu - ka bialah hian power grid hovin 132 kV sub-station dinin, power & electricity tha tak kan neih ve theih nan kum tam tak an thawk tawh a. Nichina Mamit bialtu zahawm takin a sawi ang khan, harsatna hi namen lovin kan tawk a, amaherawhchu tunah chuan forest clearance te kan nei fel tawh a. Nizan maiah khan power-grid hotute ka inah an lo leng a, kan session zawh kha min nghak a ni, Pu Chairman. Chutiang chuan harsatna lian tak an lo nei a ni tih ka hria a. Chu chu thil dang ni lovin, forest-ah hian power grid ho hian April, 2021 khan compensation ₹16,81,22,451 an lo pe tawh a. ‘Compensatory afforestation’ tihah te, ‘net present value’ tihah te, ‘cost of raising medicinal plant’ tihah te, ‘felling of trees in such location’ tihah te, ‘felling of trees in corridor’ tihah te, ‘demarcation of diverted land with RCC pillars’ tihah te, tin, ‘fund for reducing public dependence & forest & traditional livelihood support’ tihah hian compensation ₹16,81,22,451 lai mai power hian a lo pe a.

Tichuan, tluang taka an thawk thei dawn emaw kan tih lain, mimal ram a bikin Lallen, Saithah, Phuldungsei leh Pukzing-ah te a lo awmah khan compensation crops-ah chuan an pe tel thova. Amaherawhchu, kha mite ram chhunga thing leh teak dingte kha an demand ta a, heng khaw li hian harsatna an siam a. Chu chu power-grid lam hian

‘kan tih tur a ni lo e’ an ti a, Forest Deptt. lamah an pe a. Forest Deptt. lamin pe tura kan ngaih lain, an lo pe chiah si lo laia hi kan Minister te pahnih Demand-ah khan ka han sawi kawp a. Khawngaihmin min enzui sak ula ka duh khawp mai. A nih loh chuan, khu laia khaw tam tak kms 182 vel (khawvela line thui ber anih ka ring a,) khu engtikah mah kan solve dawn lovin a lang tlat. Court-a an kal chuan kum tam tak min delay leh dawn a ni. Chuvang chuan, helaiah hian in negotiate-a, tlawm deuh pawhin, kei ni a bialtu pawh kan tangkai theih chuan ka lo pui ang che u, a tul angin tih te kan tarlang duh a. Border boundary te kan ni a, khu laiah khuan power tha tak nei hi kan state security tan a that rualin, development kawng hrang hrangah hma kan lak ve theihna a ni dawn a ni.

Chutih rual chuan, forest hi kan ram leh kan hnam tan a pawimawh a, kan climate chungchangah te boruak thianghlim min petu, tui in tur tha min petu a nihna chen a awm a. Amaherawhchu, keini ang bial khutiang backward takah khuan, he House ah hian Pu Chairman, ka sawi duh chu - awareness nei lo hian a thawktu turte a khaw hmuna mite han la nawk nawk te kan nei a, thiamna bik nei lo te an ni a. Amaherawhchu, khatianga appointment kan neih khan a latu ten awareness pe chhonzawm lem lovin an thawk mai a, ‘mautuai laru an awm chuan man tur; chakai manru an a awm chuan, man tur’ tih kha a ni mai a. Chakai manruk case avangin kum nga te Aizawl-ah an court thin a, a hahthlak em em mai a ni. Chuvang chuan, awareness an neih ka duh a. Kan Bru unaute phei chuan, ‘police lau lauah chuan forest an sual bel’ an ti a nih chu. chuvang chuan, helai hi a changtute pawhin min ensak se ka duh khawp mai.

Tin, silai hi Mizote hian kan lawm hle a, pi pute atangin; *Dan* ang taka silai nei ten Forest Deptt. ram chhung ni lova sa an kap lai leh, khatiang pawh ni lova fehnaa an ak te kanin mansak mai mai thin a. Hmanniah an man lai ka hmu a kei pawhin, ‘ngawi rawh u; nitin helaia BSF kal te in man sak anih loh chuan, lo pe leh mai teh u’ te ka ti a ni. Dan ang taka nei tho, State sorkarin license a pek thlap te, a kap lai pawh ni lo, an ak mai mai hanin mansak kha buaithlak lai te kha a awm a, a thawktute hi tlema kanin aware deuh chu a thain ka hria a ni. Chu chu he House zahawm takah hian, heng Demand sawi pah hian Pu Chairman, ka han tarlang tel duh a ni tih ka sawi duh a.

Tin, Demand No. 27 - District Council & Minority Affairs hi in sawi tam lova, kan sawi duh tlat a. Khu lai keini *aspirant district* - Mamit leh Lawngtlai lam tan a pawimawh leh zual a ni. 2019-20-ah khan central funding-in tuna PMJVK namen lova ka bula miina development fund a hui chhuahna sports-lover zawng-zawngin an buaipui, keini pawhina kan buaipui vek hi, ‘PMJVK’ a nih hma khan ‘MSDP’ a ni a. 2019-20 chhovah khan central-in khami hming khan works a khawih a, department hrang hrang - health sector, education leh forest te, chutiingin Anganwadi leh Social Welfare thlengin a khawih a ni. First instalment an la a, second instalment pek awm tawh lovin kum li a liam tawh a ni. A thawktute’n an chawi thlawn ringawt mai a. Secretary level ah te pawh kan zawt thin a, tih vak ngaihna an hre lova. Hei hi ministry

level atanga buaipui chi niin ka hria a. A nih loh chuan sum tam tak bial rethei taka kan mipuite in duhsak a, in hmangaihna avanga kan lo pek ve te'n vawiin thleng hian an leiba in a delh rit ta riau mai a. Hei hi 'MSDP' a nih laia mi kha a ni a. A dik tak chuan, '*utilization certificate* te kan lo inpe mumal lo deuh kha kan tuar ta a ni' tih he House-ah hian, demand sawi pahin ka ha tarlang tel duh a ni.

Aw le, Pu Chairman, ka sawi tawp chu a ni deuh mai a. Amaherawchu thil pakhat lek; Demand No. 42 - Transport hi a pawimawh hle, a thenin 'earning department a ni e, loss in kal suh se' an ti a, keini bial chuan vawiin niah hian, 'development department a ni' kan ti a ni. A chhan chu - Aizawl atanga Marpara, Silsuri thleng tur chuan tumahin bus fare kan nei lo; tlawm zawka Transport Department-in min pe hi 'rawngbawl na a ni' tih hi kan pawm dan a ni a. Chuvangin, a hlep ringawt um zawnga kal tur a nih chuan, taxi lo kal mai rawh se; department khan rawn tir mai rawh se. 'Bus service hi titawp lul suh u' kan ti a ni. Chuvang chuan, mipui tan rawngbawl na sang tak min hawn saktu a ni a, vawiin niah hian thinlung leh tih tak zetin an chungah lawmthu ka sawi duh a.

Tin, a bik takin inland-water transport, inland-waterway chungchangah, 'ka bialah hma, kan Minister zahawm takin a lo la a ni' tih vawiinah zawhna-chhanna atangin ka lo hria a, ka lawm hle a. Heng hi kan ram tan a pawimawh hle ang tih ka ring a, lawmthu ka sawi a. Chutih rual chuan, (Pu Chairman, minute khat pawh ni lo, eng emaw hlek ka han tarlang leh duh a) Demand No. 40 – Trade & Commerce-ah khan, hei border trade kan buaipui a, a lawmawm hle a, 'vawiin niah hian engnge kan thlen chin?' tih te pawh hriat a chakawm a, nakinah kan minister zahawm takin a wind-up hunah lo hre ta se la. Khu laia *border-haath* siamna hmun tur pawh a village neituten min earmark fel thlap tawh a ni tih te ka han tarlang a. Chuvang chuan, he ram tana kan thawh chhoh zelnaah hian heng department pawimawh tak tak, minister pathum demand han han sawi hi Pu Chairman, thinlung takin ka support a, pass ngei turin he House-ah hian ka rawn thlawp a ni e. Ka lawm e.

CHAIRMAN : Tunah chuan MLA zahawm tak Pu Vanlalhlana i lo sawm ang.

PU VANLALHLANA : Pu Chairman, kan lawm e. Bawng-insi ang deuhin, warm-up pawh awm lovin i han tan chawt mai teh ang aw.

Kan Parliamentary Affairs Minister zahawm tak kaihhraina hnuai ah Mizoram Legislative Assembly kum 50-na kan lawm a, a tihzia khawp mai a, kan hlim tlang pawhin ka hria e. Amaherawhchu Pu Chiarman, hei hi chu a hnawk deuhin ka hre thin a, a la work si lova, a inhung reng mai bawk si a. Amaherawhchu tun hnaiah khan ngaihtuahna thar ka nei a, a tha hi ka ti leh hnahnawh a. Ruling party lampang ka va en

thin a, tihian an ti a, an muthlu hmiah mai a; a lang der tawh si lova, a tangkaina tak kha a lo awm ve reng mai a, a tha khawp mai.

Demand No. 21-a *one-time replacement* public service vehicle hote permit a thi hma lutuk hi kan buai a nih hi! Eizawna kumhlun te kan sawi a ni si a, chuvangin *one-time replacement* mai ni lo hian, ‘rei deuh teh se’ tih kha ka han ngenpui a ni.

A dawt lehah chuan, Demand No. 36-ah hian, NHIDCL kawng lai tute chungchang a ni. Mizoram-ah kawng tha tak min laih sak turah ngai i la, a lawmawm khawp mai. Amaherawhchu, heng sorkar company te hian hna an *Dan* an zawm ve tur a ni. *Dan* a awm a, heng Seling - Champhai kawng lai tute NHIDCL hian mud-disposal plan an nei lova, environment-management plan an nei lova, environment-impact assessment pawh an nei lo a ni. Chutiang chu an nihphung a ni a, chungte chu an neih ngei tur, an neih si loh a ni a, hna an thawk reng bawk si a, chu chu kan minister hian lo hria se ka duh a. Tin, hetia kawng an laih hian Mizo mipuite’n kan tawrhna nasa tak a awm a ni. Kan kawng ve te an leivungin a chhilh a, kan huan te, kan lo te, kan dil te, kan lui te thlengin kan tuar nasa em em a ni. Chuvangin, fimkhur deuh turin ka han chah duh a ni. Tin, nidanga kan la hriat ngailoh ‘inland waterways’ kan sawi kan sawi a, a lawmawm ka ti a, Mizoram, tlang ram hetiangah tun hmain kan sawi thin a, mahse ‘a takin a thleng ang’ tih pawh kan ngaihtuah phak vak lo a ni. Tunah chuan a takin a thleng dawn niin a lang a, a lawmawm ka ti khawp mai.

Demand No. 21 - Higher & Technical Education hnuaiah hian sawi ve duh ka nei a, ‘Higher Education’ han tih mai tur J. Thankima College te, Zirtiri Residential Science College te, Women Polytechnic te, Hindi Training College te, Trade Institute of Rural Development te, IGFAI te leh ATC te kan nei a ni. Keini constituency-a IGFAI leh ATC hi chu sorkar enkawl a ni lova, a dangho kha sorkar enkawl te an ni a. Problem kan neih taka chu - Women Polytechnic panna kawng khi a chhe em em mai a, tin internal road pawh km chanve vel awm hi a ni a, a chhe em em mai bawk a, kum tam tak kal taa siam kha a ni a. Tunah hian Silchar Highway atanga penguin Women Polytechnic pan chuan PWD-in kawng a sial mek a, an gate bulah khuan an siam tawp chiah mai a. Women Polytechnic chhunga km chan ve emaw lek siam hmabaka khi min han siam sak thei se kan duh hle mai a; kan minister hian min hriatpui se. Tin, kan PWD minister pawh a awm a, khawngaih takin chu chu kan han ngen tak meuh a ni.

Tin, Zirtiri Residential Science College khian college building thar an luah a, 8th grade, NAAC assessment atangin an hmu bawk a, an hlim khawp mai a. Khi pawh khi bul tan, luah thar a nih avangin hmabak khi a la tam khawp mai a, a tul zual - a parking area leh pavement vel te a diak dawn a, a khu bawk a, tunah khian, khingte khi siam theih ni se kan duh khawp mai. Tin, J. Thankima College pawhin A+, NAAC assessment atangin a hmu te hi kan lawmpui a, midang te pawh hian A+ an hmuh ve pawh kan beisei a ni.

A dawt leh ah chuan, Demand No. 24 - Healthcare hi Mizoram a policy lo piang tawhah chuan a tha ber pawl, Mizo mipui ten kan hlawkpui be pawl tur nia ka ngaih a ni a, Minister pawh a phurin ka hria a, hemi bul tan dawn khan MLA te lehkha a rawn thawn vek a, “I bial chhung chhungkua Mizoram Healthcare Society hnuai a inziak lut thei zawng zawngte kim taka inziah luh theih nan hunbi tuk ral hmian inziak lut turin hma min lakpui turin ka ngen a che”, tiin, kei pawhin he lekha hi ka dawng a, MLA ten kan dawng vek a ni. Chutiang khawpa tha chu a ni a, minister pawh a tang a, keini pawh kan tang khawp mai, keimahni bial chhungah. VC te NGO te pawh kan bia a, sub-centre ah te pawh kan kal a, “engzat nge enrollment ni tawh; in enroll lo an awm em; engvang nge an in enroll loh; harsatna an nei em; ₹1,000/- an nei lo em ni; BPL in ₹100 registration-ah harsatna an nei a mi; a tul a nih chuan ka tum sak vek ang” tiin keini pawhin tan kan lakpui a, a registration china kha chu a hlawhtling khawp mai. Starred Question chhanna kan en pawhin a registration fee ringawt pawh ₹7 crores a tling a ni. Chuvangin, hei hi policy tha a ni a, mipui pawhin kan bawh a ni. Tin, a booklet-ah te pawh hian, ‘Sorkar hnathawk ten sorkara an bill sak theihloh chhungkaw member zawng zawng an inziak lut thei ang a, healthcare hamthatna an hmang thei ang; Mizoram Healthcare Society hnuai a inziak lutte hian damdawiin a an inenkawlna senso chhungkaw khatin kum khat atan cheng nuai 2 thleng an bill thei ang’ tih a ni. Sorkar hnathawkte chuan medical reimbursement an nei a, an bill mai a, sorkar hnathawk lo tena kan bill ve theih tur hetiang policy lo chhuak hi a tha em em a, support pawh kan support a ni. Amaherawhchu tun hnuah hian an duh vanga damlo pawh ni lovin, damlohna, harsatna ten a tlakbuak a, an neih zawng zawng khawngin an seng a, pawisa te an puk a. Reimbursement claim an han theihlut a, an hmu leh thei tawh si lova, manganna a thleng ta a ni.

Tunah hian chutianga mangang chu mi 23,000 chuang an awm a ni. Tukin zingah khan kan House Leader chhanna te kha a ngaihnawm viau mai a; ‘healthcare-ah pawisa a awm lo’ kan ti a, mi sing tam tak hnena kan bat sak lai khan crore 150 ang kha ka chhiar thei tlat a ni. SEDP hnuai, 2019-ah 50 crore, 2020-21 ah 10 crore, 2021-22-ah 10 crore, 2023-24 ah 20 crore. Tichuan, 60 crore, hei bakah hian Asian Development Bank atangin crore sangbi sawi a ni leh bawk a. Chuvangin sorkar hi ka ngen duh chu - damlohna avanga mi mangang tak takte hi i tanpui ang u. Kan tanpui theih dan hnai ber chu - an healthcare bill tang hi i pe ang u. Pawisa pawh a awma lawm, corpus fund pawh hman ngai lovin kan pe thei niin a lang a. Chuvangin, ‘hei hi i ngaipawimawh hram teh ang u’ tih kha vawiinah hian ka tarlang duh a ni.

A dawtlehah chuan National Health Mission a awm a. Chutah chuan thawktu tam tak - doctor, nurse, pharmacist, technician, driver leh grade-IV senior tak tak an ni. ‘Seniority angin sorkarah an hna hi absorb hram ni thei se’ tih kha ka ngen sak duh a. Hlawh te pawh hi, ‘thla thara hlawh la thinin ni 10-ah an la’ kan ti a, kan phun kan phun a. Anni hi chuan December atang khan hlawh pawh hi an la la lo a ni. Chuvangin, ‘hengte hi sorkar hian ngaipawimawh se’ tih kha ka han ngen duh a.

A tawp bera ka sawi duh chu power chungchang hi a ni a. Mizoram-ah hian hydel project lian kan nei ta lova, ‘kan nei dawn lo mai ang’ tih te hi ka hlau a. Bairabi hydel project khuah theih reng kan nei a, chu chuan mw 120 pechhuakin 1984 lamah khan DPR pawh peih a ni tawh a. Amaherawhchu, congress sorkar khan a ennawn a, Brahmaputra Board-in investigation leh estimate te siamtharin mw 80 thawk chhuak thei turin estimate an rawn pe a, kum 2001 khan Mizoram sorkarah Brahmaputra Board pawhin a hlan fel tawh a ni. Chu chu, ka hriatsual loh chuan, *environment* leh *forest clearance* te pawh a awm vek a, pawisa awm loh avanga khuah loh mai niin a lang a. Tunah hian sorkar hian ‘ngaihtuahna te hmang thar leh se’ tiin ka ngen duh a.

Hei, kan Minister chak tak Pu Zira a awm a, (ani nen hian bialnu intawm nei ang deuh kan ni ta awma sin le). Electric hrui a thlung zung zung a, kan tluk lo ang tih pawh ka hlau ta khawp mai. Pu Chairman, chu chu ka sawi theih tawh ni rawh se. Ka lawm e.

CHAIRMAN : Member zahawm tak Dr. ZR. Thiamsanga i lo sawm ang.

DR. ZR. THIAM SANGA : Pu Speaker, ka lawm e.

Vawiinah demand pawimawh tak, kan Minister pathumte demand kan sawiho a. Hun a tlem si a, Pu Chairman, darkar khat vel han nei ila sawi ka chak khawp mai a, healthcare chungchang ringawt pawh hi. Amaherawhchu, ka sawi thei dawn lova.

Hei, vawiinah hian ka kawr ka rawn hak pawh hi, Indian Medical Association blazer a ni a. A chhan chu - vawiinah hian thil chhinchhiah tlak tak kan Mizo doctor te hian an ti a ni. Covid dona atan nasa takin kan ram leh hnam him nan an thawk a ni. Vawiinah hian ka chhuang a ni.

Northeast-ah pawh a la awm mang lo ang, tuna conjoined twins an zai te hi. Nuai khatah pakhat te an awm thin a, Northeast-ah pawh hian an zai tlem khawp ang. Mizoram-ah a vawikhat nan kan doctor ten an han zai thei hi a lawmawm khawp a. Ni 9.2.2023-ah Lawngtlai-ah an zai a, ni 18.2.2023-ah hetah an rawn refer pheih a, an zai ta a. Pakhat erawh chu vanduaithlak takin a tira tang khan a tha lo sa a, an thin a inzawm avangin pakhat kha chu thisen supply theih a ni lova, vanduaithlak takin nizan dar 6:20 khan a boral a, a pawh hle mai a. Amaherawhchu, pakhat zawk erawh chu tunah hian a condition a tha viau a, a dam chhuah ngei pawh kan beisei a ni. Hetiang achievement ropui tak kan doctor ten an ti hi an va chhuanawm tak em! Pu Chairman, a lawmawm hle a ni.

Kan member zahawm tak Aizawl South-II MLA khan “ZMC hmasawna hi a chak lo a ni” a tih kha han sawi ve ka duh a. ZMC hi covid hma khan khum 120-150

vel a awm a, tunah erawh chuan khum 315 tha tak tak a awm a. Cabin pawh March thla velah chuan a hawn theihin ka ring a, cabin 52 lai kan nei a ni.

Tin, covid thlen hma khan oxygen plant hi 200 litres/minute tichhuak thei kan ni a, chu pawh chu a hmantlak mang lova, a chhe tawh leh nghal a. Tunah erawh chuan 1500 litres/minute tichhuak thei kan nei a ni. ZMC mai ni lo, district hrang hrangah tunah hian oxygen plant hi kan nei tha vek tawh a ni. Tin, MNF sorkar hnuah hian civil hospital-ah te pawh tunhmaa 200 litres/minute tichhuak thei chauh kha, tunah chuan 750 litres/minute tichhuak thei kan nei a ni. A hmunin a zir loh avangin a lian kan dah thei lo mai a ni. (**Pu Lalchhuanthanga:** Pu Chairman, *point of order* - Hma an sawn chak lo ka tihna chhan chu, *recognition* ah a ni. Recognition tun thlengin kan la neilo tlat. Recognition an neihloh chuan kan zirlaite tan hian harsatna a awm dawn tlat a ni.) Khang kha chu ka rawn la sawi dawn.

Tunah hian kum 40 a ni. *Recognition* chungchangah chuan, hmanni lawk khan emergency inspection an rawn nei a, NMC khan, an findings-ah an lungawi viau a ni. Pathian khawngaihna zarah final inspection hi March emaw, April emawah hian an rawn neih ngei kan ring a. Tunah hian faculty-ah tlem eng emaw deficiency kan nei a ni mai a, Pathian khawngaihnaa zarah *full-recognition* hi kan neih ngei kan beisei a ni.

Tichuan, OT phei saw chu keini zirlai mi ang khan ka la hmu ngai reng reng lo. Modular OT neiha hmanna inspection team rawn kal pawh khan a han enkual a, “hetiang OT tha hi India rama sorkar hospital-ah hian pakhatmah a awm lo, a tha ber in ni” a ti a ni. Chutiang khawp chuan ZMC hi he MNF sorkar hnuah hian Covid-in nasa taka min nuai hnuah pawh hma kan sawn a ni tih kha Pu Chairman ka rawn sawi duh a ni.

Civil hospital kha ka sawi tawh a, ICU kha tunhmain khum 5 kan nei thin a. Tunah chuan Civil-ah hian Medical ICU 9, Surgical ICU 6 leh SNCU 12 kan nei a ni. Tunah hian Paediatric HDU leh PICU 10 kan buatsaih leh mek a, Cardiology tan tunah hian hawn theih maiin 10 kan nei a. Chuvang chuan, tunah hian 47 hi rei lo teah neih theih kan inbeisei a ni.

Dialysis Unit pawh tunah hian kan nei tawh a, a hma sawrkar hmasaah khan kan nei lo a ni. Tuna Dialysis unit 14 kan han nei te hi thingtlang mirethei tan chuan a va han ropui tak em! Chu mai bakah chuan, district tinah kan sawi tawh ang khan PHC sak thar te, sub-center sak thar te, quarter sak thar te tam tak kan nei a. A pawimawh ber chu, he sorkar hian primary healthcare hi a ngai pawimawh a ni. Chuvang chuan, thingtlang miten hriselna an neih thatna turin sum harsa tak karah pawh health clinic 235 an siam te hi a va han lawmawm tak em! Mizoram-a sub-center 305 lai tunah hian Health & Wellness Center-ah hlankai a ni te hi thil mak a ni, hetiang karah hian.

Chuvang chuan, Pu Chairman, he sorkar hian miretheite hriselna enkawlina tur hi a ngaipawimawh hle a ni.

Mizroam hi, kan sawi tak ang khan cancer kan tam a, India ramah pawh a tamna ber State kan ni, 'khawvelah pawh kan ni' te kan ti thin. Chuvang chuan, kan Chief Minister te, kan Health Minister te leh kan hotute thahnemngaihna avangin tunah hian Cancer Specialty Hospital din theihna tur JICA nena tangrualin Zemabawk-ah Crore 700, (*Hon. Dy. Speaker-in Chair a la a.*) Ministry of Finance-te nen tunah agreement felfai taka siam a ni te hi a ropui a. Tunah hian hna pawh kan tan thei lek lek tawh niin kan hria a, a lawmawm hle a ni.

Tin, Pu Dy. Speaker, (in va kal tawh em ka hre lova) cancer hemna khawl 'Linear Accelerator' kan neih hi hi India ramah pawh a tha ber chi a ni a, nei an tlem khawp mai a, sorkar hospital angah phei chuan a nei hmasa pawl ber kan ni. Hmanah khan kan Chief Minister hian hawwna a nei a, saw saw khawngaih takin min rawn enpui ve teh u a; kan khawl neih ropuite saw va hmu ve teh u. Chumai bakah cancer hemna khawl tha chite, 'cobalt therapy' te hi kan nei tha tawh a, tunhma ami ang kha ni lova. Tunhmaa channel 2-3 lek kan nei kha tunah chuan channel 20 chuang te a lo ni ta a. Chuvang chuan cancer pawh kha, a cancer lai bik han hem theihna khawl bakah 'Brachytherapy' pawh kan nei tawh a, a ropui a ni. 'Hengte hi hmasawwna ropui tak a ni' tih hi wawiinah hian ka sawi duh a ni.

Mahni bial chhungah tlem ka han lut ve hlak ang a. Tunah hian Champhai-ah Critical Care Hospital sakna tur tunah hian crore 14 chuang kan ICU-te tihchangtlunna tur engkim sanction kan hmu leh te hi a lawmawm ka ti a, sawi loh theih ni hian ka hre lo a ni. Ka bial chhunga Hnahlan-ah erawh chuan x-ray khawl kan la nei lova, han neih ve ka duh khawp a.

Transport-ah hian MST bus ticket *online payment* an tithei hi a ropui ka ti a. Tin, Inland-water transport lama hma nasa tak kan han la chho te, Tlawng Lui - National Waterways, No. 112 a tan puan a ni ta rup mai te hi a lawmawm ka ti a. Tin, kan bialah DDO office tha tak mai min sak sak a, an sa zo tep tawh a, a lawmawm ka ti a. Chutiang chuan miretheite eizawwna tur two-wheeler taxi permit tam tawk kan hmu a, lawmawm ka ti a ni.

Law & Judicial hi tunhma Covid lai khan kan indawr thin a, an fel khawp mai a. Law & Judicial staff-te hi dawr an nuam khawp mai a, anni hi fak ve hrim hrim ka duh a, an thawkrim khawpin ka hria a ni. Tichuan, Aizawl District Court building tha deuh mai kan han luah thei ta a, chu lovah chuan High Court building MINECO-ah tunah hian hawn theih mai turin sak a ni a, a lawmawm ka ti a. A bik takin Champhai District-ah District Session Judge leh Addl. & Session Judge pawh Mizoram Judicial Service-a rintlulh a lo ni te hi lawmawm kan ti, keini Champhai pawh hian.

Tin, Forest Deptt-ah hian tunhmaa DFO luah thin kha tunah chuan CCF thutna hmuna hlankai kan han ni ta a. Mizo ten nuam kan tih, kan thalaite tana pawimawh em em park, Champhai leh a chhehvelah khian chhawkhleih leh nauban te hi a tha lutuk a, chumi atana Ngur Khua-ah 'Nauban Park' min siam sak tur te hi kan lawm khawp mai a. Tin, Murlen National Park pawh hi han en ve ula tha ka ti a. Rabung leh Murlen inkar, khimi kawng pawimawh tak tlawh a nih avang khian kawng khi min sial sak se. Tin, Tualcheng hi park area a nih avangin, heath hian Forest Rest House awm ve se ka duh khawp mai.

Pu Dy. Speaker, a pawimawh berte zinga mi - Power & Electricity Department hi sawiloh theih a ni bawk si lova, Art & Culture pawh sawiloh theih a ni bawk lova. Art & Culture lamah NGO tan cheng nuai 50 lai ruahman a ni te hi a ropui ka ti a. Art & Culture hi kan pi leh pute sakhua thangtharten lo hriat leh zirchianna research an tih theih turin *seminar symposium workshop* leh *visual document* an nei a. Tin, Mizo Publication Board chuan Mizo tawng a thih loh nan lehkhabu an han chhuah te hi a ropui hle a ni.

Tichuan, Power & Electricity Departmentt-ah hian hmalakna tam tak a awm a. Power lama kan indaihlohna phuhrukna tura tan solar plant hmun tam taka buatsaih a ni te hi a lawmawm a. A bik takin Champhai-ah 132 kV line East Lungdar atangin min pe a, kan lawm khawp mai a. Chubakah chuan, Champhai District-in 12.5 mVA kan neih bakah a thar 12.5 mVA min han pe leh a, power-ah hian kan buai tawh dawn lovin kan hria a, kan lawm hle a ni.

A tawpna atan, Trade & Commerce hi vawikhat chiah a pawimawh avangin. Champhai khi tunhmaa sumdawanna hmunpui a. Amaherawhchu, kan sumdawanna zawng zawng khi tunah hian tihchhiatin a awm vek tawh a Myanmar buaina avangin. Kan sumdawng ho lirthei te khi tunah hian a ding thup tawh a. Trade & Commerce lam atang hian Indo-Myanmar Border Trade hi mumal taka kan neih a tulin ka hria a. Myanmar khi buai mahse, eng emaw ti kawngin kan tih a ngai a. Oil a tlawm a, ei leh bar a tlawm a, in sakna bungrua a tlawm a. Chuvang chuan, khilai khi khawngaih takin kan Trade & Commerce Minister khan min lo hriatsak se la. Indo-Myanmar Border Trade, *border haat* pawh kawng pahnih tha deuh mai Hnahlan leh Zote-ah min sial sak tawh, a tlang ruih tawh a ni. Chubakah chuan, Indo-Myanmar Trade khi kan kalpui thei tawh a, khi khi theih ang tawh a hma min lak sak turin leh, mumal taka min lak sak turin ka ngen a, ram buai chung chung khian a tihtheih a ni.

Tichuan, Pu Dy. Speaker, kan Minister zahawm tak tak pathumte demand ka rawn sawi tak te kha, tha ka ti a, ka rawn support a ni e. Ka lawm e.

DEPUTY SPEAKER : Dar 5-a chawlh kan tih thin ang khan, dar 5 a chawl turin kan inruahman tawh a ni. Tunah Member zahawm tak Pu KT Rokhaw ka sawm e.

PU K.T. ROKHAW : Pu Dy. Speaker, a hmasain Demand No. 39 - Power & Electricity Deptt. hi ka han sawi ang a.

Kan Minister hi senior minister a ni bawk a. Nikum budget session-ah khan kan biala kan hriat duhte kan han sawi hlawm a, mahse engmah a rawn react lova. Mahse, a hnuah khan kan biala hriat kan duh te kha *written* in min rawn pe vek a, kan lawm hle a ni. Chuvang chuan, vawiinah pawh hian *written*-a min lo pek leh ngei ka beisei a ni. Tin, Minister dang te pawh hian khatiang khan ti thei hlawm se la a lawmawm viauin ka ring. A chhan chu wind-up naa han react vek kha a theih lova, department head leh department hotute an awm tho a. Chuvang chuan, point kan hriat duh ho kha chu *written*-in, kan Power Minister ang khan min pe zel thei se chuan MLA-te tan hian a lawmawm khawp ang.

Pu Dy. Speaker, ka han sawi hmasak duh chu - Tuipang Lui Hydel Project khawl awmna kha hman a leimin khan a chhill a. Tichuan department hotute'n theihtawp an chhuah a, "vawiinah hian eng chen nge hma an lak tawh? tih leh "he hydel project hi engtikah nge a function dawn?" tih te kha a bialtu ka nihna angin hriat ka duh a ni.

A pahnihnaah chuan, Siaha – "Chakhei power transmission line thar hi siam a ni tawh em?" tih leh "Chakhei 33 kV Sub-station dah tur tih kha vawiin niah hian hmalak a ni em?" tih te ka hre duh bawk a.

Tin, Demand No. 27 - District Council & Minority Affairs hi tlem han sawi lan ka duh a. District Council hruaitute, a bik takin MADC te hlawh chungchangah kan sorkar hi wawi tam an lo hmu tawhin ka hria a. Mahsela, vawiin ni thleng hian an hlawh hi ngaihtuah a la ni lovin ka hria a, an dilna te tih hlawhtlin a la ni lo va. Chuvang chuan sorkar hnena ka rawn ngen duh chu – 'hei hi a rang lama tih hlawhtlin hram ni se' tih leh, dil ang hian an hlawh hi pek ni se' tih ka han sawi duh a. District Area Council area-a piang leh seilian kan ni a, kan MDC te khi an hah khawp mai a, mipuite khian an hlawh hi an eipui tak zet a ni. Mikhual an ngah em em a, damlo zawng zawng khi anni buaipui turah hian an indah a. Chuvang chuan, tuna hlawh an lak mek pawh LDC, UDC te hlawh nen a in ang vel ang a. Chuvang chuan, 'an harsain, an rethei hle a ni' tih hria a, an hlawh hi a rang lama tih hlawhtlin sak hram ni se a lawmawm hle ang.

Pu Dy. Speaker, Demand No. 42 - Transport Deptt-ah hian tlem han sawi ka duh chu – Siaha bus station khi khawpui lailia awm a ni a, a hmun khi a rem em em mai a. Mahse, tunah chuan bus kal tir a ni tawh lova, a hmunah khian engpawh ni se terminal building sak ni se, chutah chuan, maxi-cab te leh transport motor reng reng kan dah thei dawn a ni. Chu chu kan Transport Minister khan min lo hriatsak ka duh a. Tin, district khawpui Siaha hi a tawt tawh hle mai a, nitin mamawh phur - truck, motor liante parking tur a awm tawh lova. Chumi avang chuan Saiha thlen hma, Saiha khawpui tawntirh teah khian truck terminal min ruahman sak thei se a lawmawm ngawt ang.

Tin, Inland Waterways hi Tuipui-D (Hnahtial) atangin ka bial Lawngmasu thlengin lawng kalna tur tunah hian survey mek a niin ka hria a. Hei hi kan Minister hian hlawhtling ngei turin min bawhzui sak se. Tin, Siaha - Lawngtlai via Tuipui Ferry short-cut through hian Lawngtlai leh Siaha inkar a hnai em em a, Kawlchaw lamah chuan darkar 3 vel kan hmang a. Mahse, Ferry lamah hi chuan darkar 1 lekah Siaha kan thleng thei a. Tunah hian he PMGSY kawng hi blacktop vek tawh a ni a, mahse Chhimtuipui saw fur lai chuan leilawn kan neihloh avangin a inkalpwh theih lova. Chuvang chuan, Transport Consultative Committee ina an rel tawh ang khan, kan Minister hian eng pawh nise marboat min leisak se la chuan fur lai pawhin duh duhin kan kal thei tawh dawn a ni tih ka sawi leh duh a.

Tin, Pu Dy. Speaker, kan sawi leh duh chu, Demand No. 24 - Health & Family Welfare hi a ni a. Nimin piaha *Question Hour*-a kan zawh lai kha kan minister zahawm tak awmlah lai kha a ni a, vawiinah hian sawi nawn leh ka duh a. Siaha District - Mara Autonomous Council Area-ah kha PHC pali kan nei a, chungte chu - Tipa PHC, Phurra PHC, Chhaolo PHC leh Chakhei PHC te an ni. Khi PHC pali-ah khian, doctor pakhatmah kan nei tawh lo' tih hi kan Minister hian a hria em?" Tin, chuta ka han sawifiah duh chu - Tipa PHC-ah khian NHM hnuaiah doctor min dahsak a, mahse, January thla khan chhuah a tum a, mahse refugee kan ngah si a, damlo kan ngah bawk si a, doctor lova awm thei kan nihloh avangin Tuipang khawtlang hruaitute'n "engpawmise February thleng tal hi chu min awmpui rawh" an ti a. Tunah hian February thla a tawp tawh dawn a, a chhuah a dawn ta a ni. Chumi avang chuan, doctor pakhatmah he PHC pali ah hian kan nei dawn lo a ni.

Tin, Phura PHC-a doctor kan neihlohna hi kum khat leh a chanve a ni tawh a,. Chhaolo PHC-ah doctor kan neih lohna kum khat a ni tawh bawk a. Tin, Chakhei PHC-ah pawh doctor kan nei a, nimin maiah khan Tlabung a sawn a ni a, a aiah doctor dang min lo dahsak lo bawk a ni. Chuvang chuan, Pu Dy. Speaker, Siaha District hian doctor kan pawimawh em em a. Tunah hian Mizoram district zawng zawngah hian Burma raltlan - refugee kan unaute tam tak kan nei a, Siaha District hi refugee ngah ber kan ni. A bik takin ka bial tlak lam Phura lamah phei chuan refugee an tam lehzuah a.

Tin, tunah khian sik leh sa inthlak dawn vang nge ni, damlo an tam em em mai a. Hmanni chu free clinic nei turin minlo chah nasa mai a. Ka fapa hi doctor a ni a, cancer institute ah sawn a thawk ve a. Tichuan, 'ka bialah free-clinic nei turin kal a ngai a ni' ka ti a. Kar hnih chhung chhuti a la a, damdawi tam tawh kan lei a. Tichuan, a va kal ta a, khaw riat vel a va tlawh a, khaw lian deuhah phei chuan mi 250-300 te inentir an awm a ni. Chu chu tuna kan dinhmun a ni. Tin, free clinic hi tun tum chauh ni lo, a hmain vawi 2-3 ka fapa hian a va nei tawh a ni. Hei hi a chhan chu - doctor kan neihloh vang a ni. Chutiang chu kan dinhmun a ni a. Chuvang chuan, Pu Dy. Speaker, hetiang kan dinhmun anih laia PHC pali kan neiha doctor pakhatmah awm lova MNF sorkar hian minsiam hi mak kan ti a. Congress sorkar lai kha chuan PHC pali ah hian doctor

min pe vek thei a ni. Mahse MNF sorkarah hi chuan vawiiinah chuan doctor pakhatmah nei lovin kan awm a. Chuvang chuan, Siaha District hi chu engkimah duhsak kan hlawh loh avangin ‘Congress sorkar kan ngai hle a ni’ tih, he House-ah hian kan sawi duh a ni.

Kan Minister hian a hma khan ‘CT Scan kan pe ang che u, Siaha tan’ a ti a, vawiin thleng hian pek kan ni lova, Siaha Hospital hian CT scan kan pawimawh takzet a. Vawiiinah stroke te, damlo serious tak tak te, Lunglei leh Aizawl panpui tur hian darkar 10 a ngai a, chumi chhung chuan damlo tam tak an thih phah a ni. District headquarters dangte chu Aizawl an hnaih a, Lunglei an hnaih a, Siaha erawh chu a hla a, khawpui pan tur hian darkar 10 a ngai thin a ni. Chutiang anih avang chuan, ‘khawngaihin CT scan a rang lamin min lo dahsak hram se’ tiin ka lo ngen bawk a ni. Ka lawm e.

DEPUTY SPEAKER : Member zahawm tak Pu Ramthanmawia ka sawm e.

PU RAMTHANMAWIA : Pu Dy. Speaker, ka lawm e.

Kan minister zawhawm tak tak pathumte demand kan sawi mek a ni a. A hmasa bera kan sawi duh chu - Power Minister zahawm tak Pu R. Lalzirliana Demand No. 39 - Power & Electricity hi a ni a.

Hei electric pawimwh zia kan hria a, a tel lovin kan awm thei tawh lo a ni ber a. Aizawl khawpuiah hi chuan electric supply hi kan nei tha fu a, tunhma te ngaihtuah chuan, a lawmawm pawh ka ti a. Amaherawhchu, keini ang bial kilkhawr, khawpui atanga hla East Tuipui ah te hi chuan helaia current kan neih pawh hian kan nei lo fo mai a. A chhan tam tak zingah an han sawi thin chu - tun hma atanga kan eletric ban khi *old-model* kha ni a. Champhai atangin 33 kV line lo kal hi Khuangleng-ah a tawp a, Khuangleng atangin Khawbung, Khawbung atangin Farkawn; tiang chuan electric ban pangngai kha hman a la ni a. Thing tlu leh eng emaw hian a tichhe reng mai a, helam atanga current kan pek chhoh pawh khian khilai bilah khian harsatna kan tawk fo mai a. Chuvangin, electric ban ho khi tower a thlak theih ni se; chutianga project siam theih anih chuan a lawmawm khawp ang.

Tin, nikum pawh khan ka sawi a, sub-station building pawh hi a pawimawh khawp mai a. Chung zingah chuan Khawbung kha, a chung far min rawn siam sak tawh a, khaw hnih - Khuangleng leh Farkawn te hi furah a far a la hlauhawm em em a. Thil hautak lutuk a ni lo pawhin kan ring a. Eng pekna panel-board ber a far thin avangin a hlauhawm hle a, a thawktute pawhin an hlau hle a ni tih te ka han sawi nawn leh duh a. Tin, chubakah Khawbung-a control panel khi a chhe tawh hle mai a, siamthat hleih theih loh in a dinhmun khi a tha tawh lova, a hmui rum rum reng mai a ni. Hei hi a rang thei ang bera ngaihtuah a ngai a, control panel hi a chhiat chuan Khawbung chin zawng

bakah Farkawn lam thlengin a thim vek dawn a ni. Khawngaih takin a chhiat rup hmaa hma min laksak turin kan Minister zahawm tak hi kan ngen duh bawk a ni. Tin, Farkawn, Khuangleng leh Khawbung-ah hian staff quarter kan mamawh khawp mai a. Tin, Farkawn-ah te pawh khian staff quarter a awm loh avangin staff ten bial fan chungchangah harsatna an tawh thin a ni.

Tin, lawmthu kan sawi duh chu - ruah a sur changa power supply amaha in cut-off thei kha kan Minister zahawm tak hian a dish thlak a ngai a ni tih hriain polymer dish min pe a, kan lawm takzet a. Tin, Tlawva-small hydel project, Khuangthing-a mw 5 pechhuak thei nikum hmasa khan min hawn sak a, hei hi kan sawi fo a, a tir atanga design fuh tawh lo a awm a; furah chauh hman theih tura siam a lo ni a. Hei hi a fur leh thal hman theih tura siamna tur taka chu 'vaibelchhe 3 vel a ngai ang' an ti a. Thalah pawh tui han khuaha, 'tuikhuah tling kha thalah pawh hman theih a ni ang' tih kha a department lama an sawi kan hria a. Hengte pawh hi kan Minister zahawm tak hian min tih sak theih chuan, khilai Tlawva-small hydel project khi tangkai takin fur leh thalah kan hmang thei dawn a ni.

Thildang chu kan Minister ho hian kan sawi a, ama ho hian thlathar-ah kan bialah kan zin chho dawn a, a hmunah te min hmuhpui dawn a. Thil tamtak min tihsak a, kan lawm a.

Tin, Soil & Water Conservation Department atang te pawhin kan bial - Khawbung leh Bungzung ah te hma min rawn lak sak a, kan lawm takzet a.

Demand No. 24 - Minister zahawm tak Dr. R. Lalthangliana hi kan sawi thin a, kan hria a. Kan bialah ngei pawh Health Department hian hmasawna ropui tak min thlen a, hei hi kan sawi chhuak ve duh hrim hrim a. Tunah hian Farkawn leh Bungzung-ah PHC building tha tak mai min sak sak mek a, tin, Khawbung leh Sesih PHC te sak mai theih tura a buatsaih mek anni bawh a, kan lawm hle a. Kan bialah hian PHC pali a awm a, a vaiin min sak thar sak dawn a, Health department chungah lawmthu kan sawi a. Tin, chu mai nilovin health clinic kan bialah 5 min hawn sak a, chungah chuan health-worker leh helper te min dah sak bawh a. Tin, chubakah chuan kan bial chhung PHC-ah staff nurse pakhat theuh min pe te, Bungzung leh Farkawn-ah SED-Grade IV min han dah thar sak te kan lawm takzet a. Tin, sub-center zawng zawng Health & Wellness Center ah hlankai niin B. Sc Nursing min dah sak vek bawh a ni. Hengte hi a minister tawngkam han hmang i la, 'tuilet hnuah kan la hmuh ngai loh, kan la hriat ngai loh' a ni. Kan lawm takmeuh meuh a ni.

Chutih rual erawh chuan health sub-center sak that/repair ngai leh staff quarter sak ngai te pawh kan la nei bawh a. Hengte pawh hi min lo hriat sak sela. Tin, health clinic hawn thar 5 te hian clinic building pangngai leh a thawktute chenna tur quarter pawh an la nei lo bawh a ni.

Tin, kan sawi tak ang khan Bungzuang PHC hi PWD in an sa a, an sa tha khawp mai a, a lawmawm pawh ka ti a. Hei hi khua atanga km khat vela hlaah sak a va ngai tlat a, a chhan chu a hlui hmun kha lei a khik avangin khaw pawnah va sak a ngai a. Mual pakhat kha an rawt a, km khat vela hla anih avangin staff-quarter hi bilh telh leh, khilai building khi han zo pawh ni ila, doctor te leh staff te kha km khat vel va kal a ngai dawn a. Chuvangin, staff quarter - doctor quarter leh nurse te awmna tur kha kan mamawh hle dawn a ni. Tin, tui connection leh electric supply te a thara tih a ngai a, tin, khilai km khat dawna hi blacktop ngai, kawng khi siam ngai a ni bawk a, hengte hi kan Minister zahawm takin min hriat sak se kan duh bawk a ni.

A tawp berah chuan, Pu Deputy Speaker, Pu TJ Lalnuntluanga department chan, Demand No. 42 - Transport hi hei keini bial chuan MST bus hi kan hmang tangkai em em a, kan sorkar hlim phat atang khan kan Minister hnenah hian MST bus lo service ngai tawh lo, MST hi a awm tawh lo emaw kan tih hial a, kan bialah te chuan; tichuan kan harsatnate kan thlen a, a niin kan dinhmun te min hriatthiampui a, MST bus service kha min han siam sak leh a. Tunah hian Khawbung, Zawlseih leh Khuangthinah te service mekin, 'mipui pawhin an chhawr tangkai hle' tih kha kan sawi duh a. A hmaa min lo pek thin Farkawn pawh hi, bus indaih deuh sela min pek ve ka han ngen bawk a. Tin, chu mai nilovin, kan hriat tak ang khan mipuite eizawna tha kan neih theihna turin Two-wheeler taxi te, auto-rickshaw permit te min han pe a, hei kan thalaite mi tam takin eizawna an neih phah a, a lawmawm ka ti a; lawmthu kan sawi bawk a ni.

Tin, Demand No. 36 - Forest & Climate Change Department hi, kan bial Khawbung-ah Forest RO a awm a, Forester leh Forest Guard quarter te khi a chhe tawh em em a, hei hi min lo chhinchhiah sak sela, sakthat a ngai a ni. Chubakah Khawbung forest Rest House, IB hi a chhe nasa zual a, hei pawh hi min lo hriat sak sela, Pu Deputy Speaker. Tin, Khawbung Range-ah hian staff pakhat RO chiah awm ang a ni tawh a. Forester awm mek hi tunthla tawpah a pension dawn a, staff RO chiah kan nei tawh dawn a ni. Hengte pawh hi hma min laksak a ngai hle a. Tin, Bungzung leh Vanzau-a Forest department te khi thawktu awmlo ang maiin an ram zo a, hengte hi eng tianga kalpui tur nge tih te pawh Pu Deputy Speaker, ngaihtuah a ngai hle mai. Ka Forest Deptt. hmunhma awm te khi hunrei tak ngaihthah a lo nih tawh avangin ngaihsak a tul tawh khawp mai.

Tichuan, Pu Dy. Speaker, Minister pathumte demand hi pass ngei turin kei pawhin ka rawn thlawp a ni e. Ka lawm e.

DEPUTY SPEAKER : Member zahawm tak Dr Vanlaltanpuia ka sawm e.

DR. VANLALTANPUIA : Pu Deputy Speaker, ka lawm e.

Vawiinah kan Minister zahawm tak tak pathumte te demand pharh a ni a, a lawmawm takzetin ka hria a ni. A hmasa berin Demand No. 21 - Higher & Technical Education Department-ah ka han lut nghal ang a.

Kan Minister zahawm tak hi ‘Academician’ a ni a, department pawh an phur viauin ka hria a, tin, achievement pawh an nei tha hlein ka hria a, a lawmawm takzet a ni. Mizoram-ah tun anga kan college te mark an hmuh that hi a la awm lovin ka hria a, tukin zinga report kan han ngaihthlak ang khan, NAAC Accreditation-ah hianin Serchhip College in Grade-A an hmu a, Govt. J. Thankima College in A+ an hmu bawk a ni. Tin, Government Zirtiri Residential Science College in A, Govt. Aizawl West College in B+, Hrangbana College in B te an hmu a, a lawmawm takzet a ni. Kan hriat angin RUSA project-ah hian NAAC-Accredited college lo chuan project te an dil thei tawh lova. Kan institute te hma an sawn hlein ka hria a, a department pawh an thlamuang viauin ka hria a ni.

Mizoram University Southern Campus din tur chungchang hi zing lamah khan kan han raise a, hei kan Chief Minister zahawm tak zarah kan Minister puitu angin ka awm ve mek a, kan nawr nasa viau mai a. 2020 khan approval for establishing Southern Campus kan hmu tawh a. Amaherawhchu rin aiin thil hi a taka han chantir dawn hian a process te alo la thui a, University lam atanga Human Resources kan neih ang ang te pawh va share a, bul tan nawk nawk tur anga hriattir te kan ni a. Amaherawhchu, post create si lova va tih tawpa kha a lo harsa a, extra burden tam tak a awm thei a. Tin, a la chian chiah loh avang hian han tan rawih hi thil harsa tak a ni a.

Kan Chief Minister hi thawkkhat lai khan a hmunah te lo va kalin, a hmun hmate pawh a va en a, a hnena proposal kan pek te pawh min ngaihtuah pui hle a, a lawmawm ka ti a. Tun dinhmunah hian tui te, electric te, quarter te, kawng te, (kawng hi Kawmzawl helipad atang hian km 2.7 a ni a) chungte chu han siam tur chuan vaibelchhe 11 vel a ngai a. Kan Chief Minister kha a va kal a, kei pawh a hmun atangin mi rawn bia a, Aizawl lama programme eng emaw ka neih lai a nih avangin, ka tawiawm thei lova. Kan Chief Minister zahawm tak hian chungte pawh chu min pek a remti vek a, “lo tan mai rawh u” tiin keima hnenah pawh min hrilh a. Amaherawhchu, khami ai mah khan central lam atanga an commitment-a kha thil pawimawh nia kan hriat avangin kan tan leh ta rih lo deuh hi a ni a. Keimahni State Govt. lam chuan kan tih tur ang ang chu kan in ready viau a ni tih ka sawi duh a.

Nichinah khan kan opposition leader khan ‘a bialtupa’ ti khan min han kap deuh a. Ani hi in thlan a hnai deuh nge, a tan ulh lutuk hian thil hi a hre dik lo deuh thin a. Ram hi acre 100 a ni lova, acre 300 chuang kha kan pe a, land leased thlap tawh a ni a. Chu chu, ‘land, free from all encumbrances’ central govt-in an beisei ang thlap kha kan pe a ni. Tin, kha hmunah khan hnathawh tur kha a la awm lo reng reng a, bialtu ang pawh khan proposal emaw, recommendation emaw pawh ‘ka ziak lo reng reng’ tih kha

kan sawi duh bawk a ni. Hemi chungchang hi chu theihtawpin kan buaipui mek zel a, dam tea kan awm chuan kan tih theih thuai pawh kan beisei fan a ni.

Kei ngei pawh hi, kan CM hriatpuiin Union Minister, Dharmendra Pradhan pawh kha a office-ah ka zuk hmu tawh a. “Ka pu, han ngaihtuah la, Central University kan nei a, fully-funded Central University a ni a. Chu chu a extension campus kan nei dawn a, chu chu self-financing course emawm, a mode dang deuha enkawl kha a rem lova, Central University tur a ni si a,” ka ti a. Kan Minister zahawm tak pawhin, “min convince khawp mai” a ti nghe nghe a ni. Chuvang chuan, rei vak lovah chuan kan la neih nge nge chu ka ring nghet tlat a ni.

Demand No. 39 - Power & Electricity-ah hian ka han kal daih ang a. He department hi a hlu takzetin ka hria a. Vankal-Solar Project mw 20 pechhuak thei tur thlalak te tunlaiin social media-ah te a rawn lang deuh ut ut a, a phur awm hlein ka hria a ni. Khawiva-Mini Hydel Project ka bialah hian a awm a, hun rei tak ngaihtuah tawh loh a ni a. A kawnga hi kum 20-30 lai siam tawh loh a ni a. Tunah hian kan Minister chak tak hmalakna te, kan Chief Minister duhsakna te avangin a kawng siam a lo ni dawn ta a, kan lawm tak zet zet a. Sawng lai vela ram lo neite leh mipuite pawh hian department ta tur ni mah se la, remchanna lo awm tur hi kan lawm em em tih hi ka sawi duh a.

Tin, kan Minister hi he House-ah hian lawmthu han hrilh ka duh a. Thawkkhat lai khan, ka bial Thiltlang-ah inchung hnai te tea grid line kal, hlauhawm pui pui a awm a. Chung avang chuan chetsualna a thleng fo a; An in hliam a, ramtui lei loa awm chhunzawmte pawh an awm a. Chung te chu House-ah hian ka sawi a, re-alignment te kha min tihsak ta vek a ni. Hei hi a khuate pawh hian thil tih theihloh tluk hiala an lo ngaih tawh a ni a. Kan Minister hmalaknain hetiang grid line re-alignment te min han tihsak hi kan lawm takzet a ni.

Hei hi min lo chhinchhiah sak se kan Minister khan ka duh chu - ka bial Mausem khuah hian karthum liam taah khan incident tha lo ang reng deuh mai kan tawk a. Transformer awmna kha hung loh a lo ni a, naupang duhawm deuh mai, hmeltha deuh mai hi a va lut a, current in a man a ni. A lu hi, a chhipah hian a kaw huau mai a, tunah hian ZMC-ah a awm a, an zai mek a. Tun Sunday khan ka va tlawh a, a khawngaih thlak takzet a. Hei te hi zangnadawmna, tanpuina te a awm thei te a nih chuan min pe se kan duh takzet a. Tin, engatinge khatiang transformer hlauhawm em em mai te kha hung loha a awm theih tih kha ka han zawt duh a. Heng te hi Mizoram hmundangah te a awm a nih pawhin serious taka en chi niin ka hria a. Khawngaih takin kan Minister khan min lo hriatpui se.

Tin, NH 54 - widening project NHIDCL ten a an kalpui mekah hian, ka bial Pangzawl tlangdungah khian electric line te tihchhiat a ni nasa a. Company lam chuan,

“Sorkarah kan tihchhiat man te kan chhunglut tawh,” an ti a. Line hlui tak tak tawh a ni hlawm a, khua a han chhiat deuh hlek hian power supply te kan hmu tha hleithe lova. Khawngaih takin hei hi min ensak se. Tin, Chhipphir tlangdung, hei hi ka sawi tawh a, Haulawng atanga power rawn pek luhna lama hi a kawng a thui em em mai a. Tin, Vanva lui ruam - deep gorge a kal kan a, thli leh ruah a chet deuh hian thing tang ten a vua a, current kan nei lo nghal zel a. Hei hi Zote, Thenzawl lam atanga lak hi kan duh em em mai a. Hmanni khan SDO hote pawhin an en a, panel board hi a hma chuan ‘a in daih lo e’ an ti a, mahse, hei pawh hi a awm thei dawn niin ka hria a, khawngaih takin min ensak se kan lawm ngawt ang.

A tawp berah, Pu Dy. Speaker, Demand No. 3 - Environment & Forest Minister hi, minister naupang tak, minister duhawm tak kan nei niin ka hria a, lawmawm ka ti a. Environment, Forest & Climate Change-ah hian ngaih pawimawh hi ka nei thin a. Mizoram-a kan forest tlahniam zela hi a uiawm ka ti a. Amaherawhchu, tunah chuan India ramah a nei tha pawl tak chu kan ni awm e. Ka han sawi duh tak a chu - nungcha hi an tlem em em mai a. Tunlai hian silai tha deuh deuh mai, ‘free-keyhole’ an tih emaw ni chi te; tin, Youtube-ah hian Zupawl (ransa) man ang chi te hi tihlan a tam ta em em mai a. Tin, kawng sira inpho hoah te hian (a pho chu an pholang chiah lova), sarep lei tur ang te hi a tam em em mai a, ‘hetiang khuahkhirh dan hi a awm lo maw’ tih te hi min ensak se ka duh a.

Nakinah min react lawk se ka duh chu – Wildlife Sanctuary te enkawl na fund-flow hi, engtin nge kan hmuh dana hi, central sorkar atanga kan hmuhdan te hi hriat ka duh viau mai a. Ka bialah hian ‘Khawnglung-Wildlife Sanctuary’ a awm a. A mipuiten an sawi thin a chu, thal lai hian fireguard te lak a ni thin a; hetiang te hi a la awm reng em? Tin, minor-work han thawh tur ang chi te hi, ‘sorkar leh bialtu MLA te nena tlema inhnerem deuhin a awm thei em?’ tih hi kan hre duh deuh hlek a. Hei hi min react theih chuan ka lawm ngawt ang.

Tichuan, kan Minister pathumte demand rawn pharh hi a tha ka ti a, kan thlawp a ni e. Ka lawm e.

DEPUTY SPEAKER : Tu nge sawi leh tur? Member zahawm tak Pu C. Ngunlianchnunga ka sawm e.

PU C. NGUNLIANCHUNGA: Pu Speaker, ti nghal char char mai ang aw.

Demand No. 27 - District Council & Minority Affairs-ah hian lut nghal mai ila. A pakhatnaah chuan, District council te State sorkarin kan enkawl dan hi, (tun sorkarah hian a ni leh zual a) nikum session budget-ah pawh khan *General Discussion* ah leh *Demand*-ah te khan ka lo sawi ve nasa tawh a. Hlawh daih lo takin kan siam sak thin a, nikumah khan hlawh an indaih lohna (hlawh ngau ngauah) khan nuai 2,61,197 an dil a,

tichuan, VC hlawh indaih lohna - nuai 40, leave salary - nuai 50.02 leh DCRG- District Council Staff pension hote tunah hian an ba nasa em em a, cheng nuai 3,98,499 an dil lain nuai 2,321.02 pek an ni a. An hlawh pawh an indaih lova, chumai pawh ni lovin leave salary tur te, pension-a chhuak ve district council-ah hian staff 2,000 dawn an awm a, khata tang khan pension chhuak an awm ve reng bawk a, khangho kha pek theih lovin an awm a. Kuminah 2321.02 pek an nih laiin, nikum RE-ah khan nuai 21684.48 a ni a, kumin BE-ah hian sing 19,942.42 a ni. Nikum BE Supplementary Demand-ah hian kan pawisa pekna a lang veng a, an hlawh indaih lo kan pe a, chuti chung chuan nikum BE pawh, RE pawh pha lovin kumin BE pawh kan han dah sak leh a. Zoram-ah hian kan hriat angin Autonomous District Council 3 an awm a, kan enkawl dan hi an khawngaihthlak hle a ni.

Chu mai pawh ni lovin (Pu Dy. Speaker nang pawhin i hriat chian em em kha) 2021-2022 leh vawiin he Budget Session 2023 - 2024 thleng hian *Non-Salary* ah 2021-2022-a mi kha a la ngai reng a ni. Lai Autonomous District Council (LADC) ah hian nuai 1360.50 kum 2021 atang khan, 2022 leh 2023 ah pawh rin tir a ni a. Tunah pawh hian budget-a lan dan chuan 1360.50 a ni. MADC-ah hian 1230.62, chu chu 2021 leh 2022, vawiin ni thlengin a la pung lo reng reng. District council ve riang ruang *non-salary*-a cheng nuai 1360 a kumkhata han kal tur chuan eng hmasawwna mah thawhtur a awm lo hrim hrim; an office inenkawlna tur pawh a daih lo a ni. Chakma Autonomous District Council-ah phei chuan nuai 662.98 chiah a awm a ni. A vanduaithlak hlein ka hria a, district council te hetiang taka ngaihsak loh an nih hi, thuneihna lian neih an chak ve em emna chhan a ni. He State Govt. hian a theih ang angin enkawl tha ila chuan, ‘thuneihna-lian, ‘direct funding’ kan han tih te hi an sawi an sawi pawh ka ring lo. Amaherawhchu, kan enkawl danah hian kan ti khawngaih thlak em em a; zalen an duh ve a, ram tan hmasawwna hnathawh an duh ve a ni.

(*Hon. Speaker-in Chair a la a.*)

Tin, chumi piah lamah chuan, *Salary & Allowances* - pension tih dan an nei ve a, district council-te sawn anmahniin hlawh an insiam ve thei a ni. Tichuan, an insiam theihna hmang chuan, Mizoram-a MLA-te hlawh a lo pun takah chuan district council-a member-te pawhin an hlawh tihpun ve an lo duh a, helaia Tipa bialtu MLA zahawm takin a sawi tak ang khan, vawiina kan CEM te, kan Chairman te, kan EM te, kan MDC-te hlawh sawn UDC junior deuh hlawh vel chiah an hlawh; an hnuaia district council-a thawkte hlawh an UD te hlawh zat pawh hlawh mang lo anni. LADC hian 12.10.2020-ah khan an house-ah an pass tawh a ni. Chutiang chuan MADC hian 20.11.2020 ah; Chakma Autonomous District Council hian 13.7.2020 ah; anmahni house theuhah an pass a, hetah Mizoram-ah an rawn thawn a, vawiina kan sorkar - Council of Ministers te cabinet meeting pawhin a ngaihtuah tawh a, hei hi a awm-ai viau a ni. “Tun dinhmun atan chuan a sang deuh a ni” tiin thutlukna an siam a; a lo sang deuh anih pawhin, district council hotute nen dawhkan khat kila sawi hova, ‘hei hi chu tihnam ve deuh

rawh u; heti chinah hian in rawt-bung teh u,' tih emaw tal ni se, a la ziaawm deuh tur a ni a; ngaihsak-zui a awm ta lo hrim hrim a. Vawiih hian kan Minister zahawm tak DC&MA changtu hi minister senior a ni a, maherawhchu district council a enkawlinaah hi chuan 'a khawngaih thlak hle a ni' tih hi Pu Speaker, ka sawi duh a.

District Council & Minority Affairs Department kaltlangin PMJVK nuai singa sing tel Sports Department-ah an hnuk chhuak a, a lawmawm ka ti. Chutih rual chuan, District Council-ten an thawh ve theih reng tur - volleyball court te, basketball court te, community centre te, Girls' hostel te, cheng tam pawh ni lo, nuai 31 te, nuai 260 te, nuai 102 te hi autonomous district council area-ah a bikin Chakma leh Lai Council area ah cheng nuai 1,880.59 man zet hi a awm a ni. Helai kan sawi tak ang khan, *Non-Salary* ah cheng 1360 leh tih an hmu si a, henga te tham deuh thawk turin Sports Department te an nei ve a; tin, technical mi pawh SE thlengin an nei ve a. Lai leh Chakma area-a awm te hi chu han thawn phei sak ve se la chuan an lawm ve tur a ni a. Sawlaihah party puite tho anni a. Pu Speaker, sawi tur a tam si a, a buaithlak a nih hi. Kha kha district council chungchangah ni se.

P&E chungchangah hian tawitea han sawi ka duh chu - kan bialah kan hriat theuh angin Rulkual YLA ten hnatlangin electric hrui an pawhpui a, vanduaithlak takin mi 3 an boral a. "Khangte kha *ex-gratia* pek an ni ve tawh em?" tih kha khawngaih takin kan minister-in min react thei se la. Chumi piah lamah chuan, lawmthu han sawi ve pawha tha a. Power supply a thain ka hria a, transformer erawh a chhia a; keini bial hi khua a tam a. Kan va sawi hian, Lawngtlai EE leh thawktute, a bikin kan Minister zahawm tak pawhin mi an ngai pawimawh a, min thlak sak zung zung thin. Chutih rual chuan a phurhna a khua mite'n an tum zel erawh hi chu, a buaithlak khawp mai. Khaw tereuh te te, anmahnia electric nei ve anni bawk si a.

Department a tam a, minute tlemte kan nei tawh bawk si a. Pu Speaker, ka han sawi leh duh chu – Transport demand hi. Lawngtlai DTO office, kan Minister zahawm takin nikum lama a hawn taka kha, pawisa an la pe zo lova. Kha kha kan minister hian a hria em? An luah tawh vek leh nghal a, pe turin hmalak sak thei hram se la, pe rang se. An khawngaih thlak khawp mai; leiba nen an awm a ni.

Pu Speaker, a tawp ber atan chuan E&F hi tawitea han sawi ka duh a. Helai House-ah pawh hian zawhna pawh ka lo siam a, a hma pawhin ka lo zawt tawh a. Ni 24.4.2021-ah khan Ngengpui Sanctuary chhunga Hmunnuam, ka biala mi Hniang-hniangi saiin a chil hlum a, kha kha *ex-gratia* pek a ni tawh em? Pek a nih loh chuan, engtikah nge pek a nih theih ang? 'Pek hram dan a awm thei em?' tih te kha ka zawt a.

Tin, Pu Speaker, E&F ah hian keini lam saw Lawngtlai-ah 'Chhimtuipui Wildlife' a awm ve a, an ngaihsak lo khawp mai a. Sum leh pai pek dan hi January Ni 31-a an LOC sem danah te pawh hian, kan Minister bial Champhai lama nuai 105 a

awm laiin, Lawngtlai-ah chuan nuai 20 a awm a, kawngpui, National Park - Lengpui Sanctuary te a awm a. Hemi chungchangah hian, ‘ngaihsak ve deuh ni se, a va tha em’, tih kan zawt duh a.

Pu Speaker, pakhat chia. Kan Minister min re-act atana ka duh, he kan session chhungah ngei hian. Kan Minister Personal Branch atang hian hetiang works department ina an thawh thin hi ‘20% chhunglut turin an dil thin’ tih hi kan Minister-in a hriatpui em? A chhan rualin, chunglama miin min hmu tih hriain, thudikin min chhang se ka duh a. A lo hriatpui lo anih chuan a hriatpui lo a ni mai a. A lo hriatpui em, ‘20% an dil thin hi?’ tih hi. Pu Speaker, kha kha ka sawi theih tawk a ni e. Ka lawm e.

SPEAKER : Minute khatin i pel a, ruling lam an vaiin minute 10-in an pel tawh a, Opposition an ti tha zawk a ni. Awle, Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Speaker, ka lawm e. Hei demand sawi dawn apiangin sorkar minister tena hnathawhna tur an neihloh zia, *Salary and Wages* ringawt kan han chai nileng leh thin hi sawi a ngai leh thin a; a lungchhiatthlak ka ti a. Hei wawiinniah pawh kan Minister zahawm tak tak te - Pu TJ Lalnuntluanga, Pu R. Lalzirliana leh Dr. R. Lalthangliana te demand kan han sawi a ni a, a phurawm vak lova. Mahse, hmalam mamawhte han sawi dawn sela, kan minister te hian, ‘kan chief minister-in a phal chuan..’ tih kha an chhanna tur a ni mai a. Khati lo zawng deuh khan han sawi kan tum ang a.

Demand No. 24 - Health & Family Welfare hi Pu Speaker, tukin zing chanchinbu ka chhiar a, Vanglaini, a front-page ah - Nau pianghlim ZMC ah, taksa inzawm hlawhtling taka an zai thu ka hmu a. Khatiang, India ramah pawh ni lo, sap ramah te an zai thin a ni tih kan hriat, kan ram, kan khawpui ngei maia an zai thei kha kan doctor-te leh hospital tha kan han nei ka hmuh hian ka lung a chhia a, ka hnuk a ulh lek lek a ni.

Ka ngaihtuahna a kalthui khawp mai a, kum 2008 khan Congress kha lo sorkar ta lovin MNF kha la sorkar tlang se, hetiang opportunity hi kan nei dawn lo reng reng a ni. Pu Speaker, kan hria a, Referral Hospital Congress sorkar hmasain a bul a tan kha, kum 10 chhungin ar leh kel vulhna atan chauha hman tlakah kan chhuah a ni. Kum 2008 ah sorkar a lo piang a, Kan Chief Minister zahawm tak Pu Lal Thanhawla leh, Pu Speaker, nangmah ngei health minister i ni a; vision neiin wawiin ni ang hi in hmu thleng a, bul in tan a. Nangmah ngei a hmunah ar in leh kel in te i va phiatfai a, bul in va tan a nih kha. Khatih hun lai khan a sawiseltute, veilam atangin an rawn sawi a, “Aizawl atangin Falkawn saw a hla lutuk; mirethei ten kan thleng pha loving” an ti a ni. Mahse, nangni chuan vision in nei a, wawiinni in thlen a; kel leh ar vulhna kha building tha takah in rawn siam a, mipui tam takin dam nan kan hmang a. Wawiin niah pawh

khawvela an tih tur emaw kan tih kha Aizawl-ah kan tithei a ni. Pu Speaker, ka chhuang khawp mai che, vawiinah hian. Thil dik a ni; vawiina ka sawi hi.

Chu mai a la ni lo; a building atangin bul kan tan a, Medical College kan han nei a, kan kawtkaiyah Mizo nula-tlangval ten phaiah harsa takin doctor ni thei tura zir ngai thin kha, vawiin niah kan nula-tlangval tam tak kumtin an han lut te hi a ropui ka ti a. Heng anih lai hian, party thenkhat ten, ‘kum 30 chhungin sorkar kal tawh ten engmah an ti lo’ an ti te hi chu; Pu Speaker, kan thalaite thudik lo an zirtir hi a pawui ka ti. Vawiin niah Referral Hospital kan sawi, Vanglaini Chanchinbu-a nau pianghlim an zai kan hria te hi thil ropui a ni a, hmasawna tam tak a ni. Chulo pawh chu sawi tur tam tak a awmin ka ring.

Tin, saw hospital saw bul lo tan lovin MNF sorkar hmasain hralh a tum, tihral an tum, kalpui ngaihna an hriatloh te kha lo ti ta ang se chuan, Covid 19 a lo kal khan engtinnghe he sorkar hian a hmachhawn ang le? Falkawn hospital tha tak Congress sorkarin a lo din kha Pu Speaker, awm lo sela chuan, Covid 19-ah khan kan ram chu ‘kan che chhe viau ang’ tih kha ka rawn sawi duh a ni.

Tin, Pu Speaker, Health chungchangah bawka lut ang a. Tukin zingah leh kar hmasa lamah te healthcare chungchang kan sawi a, a that zia ruling member zawng zawngin an rawn sawi a. Vawiin nia ka rawn sawi duh hi chu ‘data’ a ni. Ka data neih hi a dik lo anih chuan, ngaihdam ka dil a, a dik turah ka ngai a ni. October, 2019 leh September Ni 30, 2020 chhung khan healthcare scheme-a inziaklut hi chhungkaw 1,13,720 anni a, 1st October, 2021 - 3rd March, 2022 atana inziaklut chu chhungkaw 87,695 anni. Tunkum kal mek 1st April, 20-22 - 31st March, 20-23 chhunga tana inziaklut chu chhungkaw 39,505 chiah anni, Pu Speaker. Vawiin nia Pu Zoramthanga kaihhruai sorkar, kum li em pawh la sorkar lo hi mipui ten kan rin tawh loh zia he healthcare scheme atang hian a tichiang em em mai a ni. Chhungkua 1,13,720 inziaklut te kha an beidawng tawh a, leiba vaibelchhe 65 chuang, healthcare bill mirethei tak takte an bat sak a, mipui hi an beidawng a ni. He sorkar lakluh ni khan ropui takin *Halleluiah chorus* nen kan tan a, mahse kan tawp dawn kan han chhuak tur kha, *Jana, Gana, Mana*-a kan han tawp khan a hril thui viauin ka hria.

Tin, Pu Speaker, Champhai lam MLA te kan awm bawka a, hei hi kan Minister zahawm takin nakin a wind-up naah min han hrilh sela - UNICEF atanga hmanhmawh taka ICAR kaltlanga Champhai District Hospital tana RTPCR khawl, October Ni 12, 2021, hei kum khat leh thla 6 a ni tawhin ka hria a (*interruption*)

PU LALRUATKIMA, MINISTER: Pu Speaker, sawi bawrhban tumna a va ang ve; kha kha chu House record-ah awm lo se a va tha ve? National Anthem helai House zahawma han tih kha chu a mawi dawn em maw ni le? Kha kha tihdan phung a ni a, Govt. function-ah chuan.

PU ZODINTLUANGA RALTE : Pu Speaker, ‘Jana, Gana, Mana’ a kan tawp kha ka sawi mai a ni. (**Speaker:** A la dai pel lo e.) In lo *Indian* ve ta hle mai. Ka lawm e.

Kum khat leh thla 6-na a lo ni tawh a, kan Minister zahawm tak Pu TJ-a’n Champhai Hospital atan a han hlan kha ‘tun thlenga la bun fel loh a ni’ tih hi kan hriat dan a ni a, kha kha kan minister zahawmtak khan min rawn hrilhfiat se la. An bun tumna Eye-ward repair phawt a ngai a, a repair-na tur sum k-deposit ah a tang a ni awm e. Kha kha sorkarin han release vat se la. He khawl hi tunah chuan hmanna tur pawh a awm tawh lem lo pawh a ni thei a, mahse a rei tawh em a, ka han sawichhuak a ni. Tin, Champhai - Trauma Centre, Congress sorkarin a bul kan tan kha kum 4 chung hian ‘zawh vat vat atan han ti se la’ ti kha ka han ngen bawk a ni e.

Demand No. 39 - Power & Electric Department hi, Pu Speaker, ka rawn sawi ve ang a. Hun hi a kal chak si a, sawi tur a tam si a. A hmasain P&E Minister leh a Staff te chungah hian lawmthu kei pawhin ka sawi a ngai a.

Thingtlang bialtu kan ni a, thingtlangah transformer te a lo kang ve a, department-ah minister hian a lo hrilh tha anih ka ring a. Kan department official-te ka han phone a, an niin motor te hire-in zankhaw tlaivarin an han kal a. Pu Speaker, hei hi department dangte pawhin hreve se ka duh a, nikhat pawh an cham ngai lo. zingah an rawn thleng a, transformer thar tha tak tak an lo ngaihtuah sak a, an tlan haw leh thin a ni. Zankhat pawh Aizawl-a riah ngai lovin P&E Department te hian thingtlang mite harsatna an sutkian sak thin a ni.

Congress sorkar kha P&E lampangah pawh hian a lo thawk nasa khawp mai a. Khi, Vankal-Solar Park te an han hawng thei dawn tawhin ka hria a, an hawng tawh nge ni, Khawzawl leh Champhai inkara 132 kV line kan han tithleng hi, ‘chhim lam tan hmasawanna ropui tak min thlen a ni’ tih kha ka rawn sawi duh a. Chumi piah lamah chuan, MNF sorkar bawk hi sawi leh a ngai thin a. Congress sorkarin Tuirial-Hydel Project bul an tan a, kan lawm em em a; an han sorkar ve a, kum 10 an sorkar chung khan Tuirial-Hydel Project chu, sum duhna te, sum siam tumna avang tein an hluihlawn der a. Hmanni lawkah chanchinbuah phei chuan tute emaw chu court-in rorelna an chungah a siam nghe nghe a. Khangtiang te kha Pu Speaker, Congress a lo sorkar khan bul tan tha leh in, India ram Prime Minister hawn theih turin Tuirial-Hydel Project kha kan siam tha leh a ni. Hengah te hian sorkar hian thil tam tak a ti a ni. Chutih laiin, ‘engmah an ti lo’ tia, kum 30 chunging engmah ti lo, awm mai mai anga kan inchhuahte hi a diklo a ni.

Demand No. 36 - Environment & Forest Department-ah hian tawitein Pu Speaker, ka rawn lut leh duh a.

Kan Minister zahawm takin min lo chhinchhiah sak sela, react pawh ka beisei lova, a taka min tihhlawhtlin sak mai ka ring a. Thenhlum-ah Forest Deptt. hnuaiia thawkte, hlawh la lovin an awm rei tawh em em mai a. Sawng saw khawngaih takin, miharsa te te, an hlawh pawh a tam lova, sawngte saw min rawn tihfel sak turin ka ngen a. Tin, Mizoram hmun hrang hrangah hmasawna avangin kawngpui laih te a ni a, Champhai lamah pheih chuan tunah an lai nasa a. A detailin ka sawi tawhlo mai ang a, an lung lakna leivungin kan lui te a chhilh nasa em em a, khing te khi ‘uluk taka ven a pawimawh a ni’ tih kha a tawi zawngin ka rawn sawi a.

Pu Speaker, warning bell i rawn hmeh hmain, Demand No. 21 - Higher & Technical chungchang hi kan rawn sawi lawk duh a, chutah chuan tawp kan tum ang e.

Nikum July Ni 9 khan kan Chief Minister zahawm tak hi Kawmzawl Helipad-ah a kal a, July Ni 9, 2022 khan MZU-Southern Campus-a hman tur Engineering College, hei hi ka han sawi pawlh deuh thin a. Engineering College kha tlawh a tum a, kawng chhiat avangin a thleng thei lova, a hmun a thlen theihloh avangin, Kawmzawl atangin hmalak dan turte an thlir ho a ni. Pu Speaker, khatah khan kan Chief Minister zahawm tak khan, tui lakna tur te, power lakluhna tur te Engineer ten ruahmanna an lo siam tawh chu hna tan nghal turin leh, a tul anga pawisa sanction nghal mai turin ruahmanna a siam a; heng hnathawk nghal tur hian PWD, PHE leh P&E Department te pawh khatah khan hriattir nghal anni a. Chumi hnuah Kawmzawl atangin Lunglei - Hnam Run ah, vaibelchhe 11 velin a daih tur thu a sawi avangin, “special assistant fund atanga cheng vaibelchhe 11 hmang turin an sanction nghal” tih kha party - press release ah khan kan hmu a ni. Vawiin niah kan Minister zahawm tak hian min react tura ka duh chu - Chief Minister-in verbal-sanction order a sawi hi H&T Department emaw, Finance Department emaw hian ‘thutlingah a pawm em; an hriatpui em; bawhzui a ni em; engnge tunah a thlen chin; PHE, P&E leh PWD te hian hma an la em;’ tih te hi min rawn hrilhfhiah thei se ka duh a. A chhan chu - he kawng siamna tur hi ‘Hnamrunpui sak chhunzawmna atan MNF sub-headquarter hruaitu ten an hauh nghal’ tih kha kan hriat dan a ni e.

Pu Speaker, hun tha tak min pek avangin, i chungah lawmthu ka sawi e.

SPEAKER : Awle, House rawn che u ka duh a. Nimin khan party hrang hrang hotute’n rawtna an rawn siam kha ka han chhut vang vang khan, tunah kan chawl thei chiah chiah-ah ka ngai a. Mahse memberte thahnem in ngai a, minute 16 velin kan pel ta a ni. Chu chu kan leng lo ta hlak a. Tichuan, kan Minister *Zawhna leh Chhanna*-ah khan a rawn pel thui bawk nen.

Tunah hian 25-na tur, Pu Duha a la awm a; hei hi sawi zo leh lawk law law se, tichuan lungmuangin chawl ta ila, kan vai atan a tha mai em? House ka rawn e. (*House-in a remti a*)

Awle, member zahawm tak Pu Lalduhoma ka sawm e.

PU LALDUHOMA : Pu Speaker, ka lawm e.

Demand No. 27 - District Council & Minority Affairs-ah hian ka lut ang a. Starred Question zawhna ka pe a, chu chu Minister hian min chhang a – “PMJVK atanga sum lo kal atang hian Sports Department-in engzatnge a chan?” tih ka zawt a; min chhanna chu – “2018-19 ah 100%; a vaiin hemi kum chung hian Sports-in an chang zo vek a, 2019-20 ah 80%; 2020-21 ah 100% bawk; 2020-23 ah 44.11% a chang” tih a ni a. PMJVK in *thrust area* a tih chu, “he fund atanga 80% hi Education, Health leh Skilled Development-ah a kal tur a ni” tih a ni. He *thrust area* kalh tawp hian Sports hian a nei fai deuh vek a. 80% a kal phawt ang a, ngaih pawimawhah hian a chuang 20% hi chu midangin an insem tur a ni a. Chumi zingah chuan Sport hi tel ve chauh tur a nih lain, major share mai pawh ni lo, kum 2 ngawt 100% a chang fai vek mai te hi a zia lo hle mai a. SAACI atang te pawhin vaibelchhe 18 lai a chang a ni.

Tin, Pu TBC Lalvenchunga RTI chhannaah hian - 208 crore PMJVK atanga an hmuh tawh thu leh, hman zawh tawh pawh 118 crore a nih thu kan hmu a. Member zahawm tak Pu C. Lalsawivunga zawhna, Sports Minister ngeiin a chhannaah hian - 2021-23 inkarah ringawt project 87, vaibelchhe 123 man an thawk a ni.

Tin, Member zahawm tak Pu Ramthanmawia zawhna, hmanni lawka mi Sports Minister-in a chhannaah khan - tun Sorkar chung PMJVK scheme hnuaia Sports Department-in hna a thawh chu project 84 a ni a, a amount hi vaibelchhe 436 a ni. Hei hi chuan an rawn duan dan hi a kalh nasa a, *induhsakna uchuak* ni deuhin a lang a.

Tichuan District Council & Minority Affairs Department leh NECS hian *Deed of Agreement* an sign a. Tahchuan, an inrawihna rate chu hetiang hi a ni – “NECS in project cost nuai 100 chinah - 2% a ei ang; Nuai 100 atanga 500 inkarah 1.5% a ei ang; Nuai 500 chin chunglamah 1% a ei ang” tih a ni a, a tam duh hle awm e. Sumdawanna hlawk tak chu a nih hmel a ni.

Tin, *Request for Proposal* (RFP) atanga an dawn tur hi nuai 100 chinah 0.4%; nuai 100 - 500 inkarah 0.3%; nuai 500 chin chunglamah 0.2% a ni dawn a. Tin, consultation fee hi fund dawn atangin ni 10 chhungin 100% pek zel tur a ni bawk a ni. An induhsak tha hle a ni. Tin, inhriatthiam lohna *arbitrary* tih lo tul ta se la, ‘Aizawl chung Court-ah chauh sawi a ni ang’ tih a ni bawk a. A aia court sanga han appeal te pawh kha a rem dawnlo niawm tak a ni. Tin, *Deeds of Agreement*-ah hian thil inziak pakhat chu - ‘hemi chungchang information reng reng, file te, document te hi tunah leh hun lo la awm zel turah ‘*confidential*’ a ni ang’ tih a ni. Pu Speaker, hei hi mipui sum a ni a, a hmanna leh document zawng zawng confidential-a han dah tlat te hi khawi dan

nge maw an hman reng reng le? Heng atangte hian a rinhleh awm sa a, kan sum hrawmna ber PWD ai pawhin an chang tam daih a ni. Chutiang chu thil awmdan a ni a.

Tichuan, heng an inrawihna hian *Public Procurement Act* leh *Rules* kha a kalh a ni. *Single Source Selection*-in an kalpui a, ‘consultancy firm tha dang an awm em’ tih han zawmna pawh a awm reng reng lova. An intihtir chawt mai a. Hetah hian *single source selection*-a a kal dawn chuan, *Dan*-in a sawi dan chu, ‘*extremely urgent* - a urgent hle tur a ni’ tih a ni a. A urgent lem lo a ni ang, an thawk muang em em a, an thawh sen loh an hmu a, kan hria a. Tin, National Security Interest, ram pum security atana pawh a nihin a pek theih bawk a. Tin, exam question paper ang chi, confidential thil a nihin *single source selection* hi a tih theih leh bawk a. Tin, ‘*exceptional circumstances* – loh theih loh thil bik’ a ti a, chu chu natural disaster, emergency te, requisite expertise (midangin an thawh ve thiam miah loh) nei bik an nih chauhin a ni. Tin, chu pawh chu lo ni se, la a procedure kha Works Advisory Committee-in an recommend phawt tur a ni, Single Source Selection a nih dawn hian. Works Advisory Committee-in an recommend phawt ang a, a minister changtuin a approve leh phawt ang; chumi hnuah Finance Minister-in a approve leh ang. Heng approval hi an la a ni chawk ang a, vawiinah hian a changtu Minister leh kan Chief Minister zahawm tak thleng hian hetah hian an inhnawmawih tih loh theih a ni lo. An tel lovin hei hi a tih theih tlat loh a ni.

Tichuan, ‘NECS hi tu ta nge?’ tih hi ka sawi duh a ni. Supreme Court chuan *power of attorney* pek hi a phal tawh lo a ni; a theih tawh loh a ni. Tichuan, kan Sport Minister zahawm tak hian he House chhung ngeiah NECS neitu hi a fapa a ni tih a puang a. Tichuan, a nomination file, inthlanna a kan thehluh thin ‘*dependent*’ ah khan, ‘amaha inngat a ni’ tih hmun eng emaw zatah a ziak bawk a. Tichuan, a fapa ta; a fapa consultancy firm chu agreement an sign pui a, a pa kaihruai department-in chu chu a execute ta a ni. Hei hi chu a fair tawh lo hrim hrim mai a.

GST website kan en leh chuan, he NECS neitu hi kan Minister hi a la ni reng tlat a ni, tunah hian. An pa-fain NECS neitua an inziaklut ve ve a, trade-name a inang chiah a, an address a inang chiah bawk a ni. Tin, Sports Minister hian NECS hming hian GST pawh a la pe char char a ni. A pek hnuhnun ber chu, December, 2020 kha ni. A fapa hian NECS hming tho hian GST a pe a, a pek hnuhnun ber chu, kumin January kha a ni. Chutiang chu a lo ni ta a. Tichuan, consultancy firm 10 bawr vel an hnuaiyah hian an thawk a. Heng consultancy firm-te hi kan hriat ngai lem loh, lar lo tak tak te, khawiah nge office an neih pawh kan hriat hleihtheih loh te an ni hlawm a. Tin, *empanelled list* kan han en a, a then hi chu kan hmu mang lova, kan lo hmuh hmah te a nih loh chuan. GST registration an neih leh neih loh pawh hi a rinhleh awm a ni, a then hi chu. An zinga pakhat DJ Consultancy hian Reiek-ah hna an thawk a. Hmanniah tute’n emaw an han endik a, DJ Consultancy ni lovin, ‘NECS vekin a lo thawk a ni’ tih pawh a hmunah han finfiah a ni a. Heng a hnuaiyah consultancy firm tete te pawh hi tu emaw ta deuh vek, tu emaw control deuh vek an ni hian a lang deuh tlat mai a. Tichuan, proprietorship-in

an kal a, khing hnate khi an lo thawk ta a. Tichuan, Junior Consultancy hi kum 2022, September, 29-ah khan empanelled an ni chauh a, khami hma khan hnathawh te pawh a nei niin a lang a. Kha kha an hminga an thawh si chuan, tunge thawk ta ang? A nih leh, ‘hengho hian GST pawh pe ve lo hian hna eng emaw zat hi an lo thawk teuh tawh mai tihna em ni ang?’ tih te hi ngaihtuah a ngai ta em em mai a ni.

Chuvang chuan, *Representation of Peoples’ Act* hnuaiiah te pawh hian, ‘MLA a nihna atang te hian disqualify theih a ni mai lo ang a’ tih hi sawi theih a ni ta lova. ‘Conflict of interest’ tih te, ‘office of profit’ tih te, ‘breach of oath’ tih te, Minister-a tana laklulh an niha thutiam bawhchhiatna pawh niin a lang ta a. Chuvang chuan, induhsakna pawh hi a uchuak em em mai a. Heihi ‘crony capitalism’ an tih thin ang tluk hial hi niin a lang ta a ni. Chuvang chuan NECS hming, Minister ni chungin a neitu nihna la nei renga, GST pawh pe reng tho bawk si ina chumi consultancy firm chuan contract hna department pakhat nen *deed of agreement* neiin, chu hna chu ama chan department-in a han khawih ta a. Hei tluka thil fel lo hi engnge awm tawh chuang ang? Chuvangin, kan kal soal lutuk deuh hlek lo maw?

Hetiang chiah hian tunhma khan thil thleng a awm tawh a, Pu Lalthanzara (Patea) chungchangah khan; biscuits supply chungchangah khan sawi a awm a, ani chu ama thuin a bang mai a, inthlan leh a nghak mai a ni. Vawiinah hian kan Minister zahawm tak hi moral responsibility lain, ama thuin a bang ve ngam ang em; nge, ‘tute’n emaw dan hmanga an tih kher a nghak dawn?’ tih zawhna a awm ta a ni.

Awle, chumi baka kan sawi leh duh chu Pu Speaker, kan district council-te hi kan *own-tax* atangin an hman tur sum hi pe kan ni a, kan pe tam thei lova. Engatinge *direct funding* an neih hi kan phal mai loh? Kan Village Council leh Local Council-te pawhin direct funding an nei vek a; AMC pawhin direct funding-a nei a; 15th Finance Commission atangin an dawng mai a. Eng nge a pawina? *Direct funding* an neih chuan Finance Commission atangin an hman tur sum a lo kal ang a, min zangkhai zawk dawn a ni a. Keiniin kan budget, kan own-tax atangin tlemte chauh kan pe thei a; an lungawi lova, chutiang chuan an awm a. Chu chu engatinge kan phal loh tlat? Keini ZPM chuan kan phal. Heihi kan tan pawha zangkhaia tur, min relieve tu tur a ni; khami hnua kan pekbelh thei a nih leh an vannei a ni mai a. Chuvang chuan, a pawina hi a awm reng reng lova. Keini Mizoram pawhin direct-in kan dawng a, direct-in dawng lo ila kan duh dawn bik em ni? Chuvang chuan, direct funding te hian kan insawithaih a; thil awmzia kan hriat loh vang niin ka hria a.

Tin, *Recruitment Rules* te pawh an la nei lova. Recruitment Rules a awmlah na na na chuan, a sorkar apiang khan midang an ban a, a thar an la leh vak a. **(Pu C. Ngunlianchunga:** Pu Speaker, District Council-in fel takin a nei. Hna lak dan tur leh inenkawl dan tur; khang kha chu a nei vek. Hriatsual palh a ni.) CADC-ah chuan a nei lovin ka hria. **(Pu BD Chakma:** CADC-ah chuan a awm lo; Governor pawhin chiang

takin a ziak a.) CADC-ah chuan RR a la nei lova. Chumi avang chuan eng eng emaw harsatna an tawk ta a, Governor-in *suspend*-in a dah a ni. *Dan* a awm loh miau chuan kha kha tih duh mai awl tak a ni a.

Chutiang chu an dinhmun a nih avangin, kan enfel sak hi a tha a. Tha taka an mahni area-a zalen taka an awm a, helaia sorkar apiang tlawn ngaia kan siam leh, inleh tir ngai reng, *stability* awm lova kan Autonomous District Council area kan siam hi a dik ka ti lova. Zalen takin awm rawh se. ‘Tha takin an sum te pawh dawng ve rawh se’ tiin ka duhsakna ka hlan bawk a ni. Ka lawm e.

SPEAKER : Awle, kan chawl ang a. Dar engzatah nge kan luh leh ang le? Darkar chanveah kan inkhung leng thei ang em? Dar 5:45 PM -ah i lut leh ang u aw. Tichuan, chaw eitur kha Banquet Hall, Annexe Building-ah siam a ni e. I chawl lawk ang aw. Dar 5:50 PM-ah kan lut leh dawn ania.

(Recess at 5:17 PM)

5:50 PM

SPEAKER : Quorum an la form lova, ilo nghak ang. Minister an lo lut a, Member te quorum an la form lova, ilo nghak ang aw.

Awle, tunah chuan quorum kan tling tawh a, kan lo tan tawh ang a. Kan Minister zahawm tak Pu TJ Lalnuntluanga kan sawihona te wind-up turin kan sawm ang a, sawifiah ngai a tih te rawn sawifiahin, a demand te House-ah pass rawn dil nghal turin ka sawm e.

PU TJ. LALNUNTLUANGA, MINISTER: Pu Speaker, ka lawm e.

Hei, vawiinah demand tha takin kan sawiho a, kan deptt. demand te pawh kan MLA zahawm tak tak ten min rawn sawipui hlawm a, ka lawm khawp mai a. Hei, department 4 han khaikhawm tur te a ni a, hmalakna han thlir hian sawitur hi a lo awm deuh nual tawh mai a. Amaherawhchu, heng hmalakna zawng zawng hi han sawi dawn vek ila hun a rei viau dawn bawk si a, kan deptt. officer hrang hrangte ina mahni deptt. theuhin a hma an han laka kan thawhhona a that avanga hma an han lakna te han sawiloh chu ka ui viau mai a. Chutihruah chuan vawiinah helaia kan hun neih dan te enin, sawi vek lo ila, a pawimawh leh kan hmalakna thenkhat te han tarlang dawn ila.

A hmasaa ka sawi duh chu, kan officer te, kan deptt. hrang hrang - Law & Judicial; Parliamentary Affairs; Environment & Climate Change leh Transport Deptt. tea thawktute zawng zawng chungah lawmthu ka sawi a ni.

Law & Judicial Deptt-ah hian mi 5 in an sawi a, mimal mala react loh mai tha ka ti a, kan memberte khan lawmpuina te, advise te an rawn sawi hlawm a ni a. Kan officer ten an lo chhinchhiah tho avangin, a zualpui helaia kan sawi tlanglawnah hian rawn tel turah ngai tho ila a tha awm e.

Law & Judicial Deptt. hian Secretariat leh Directorate function te an kawp a, heng hnuaiah hian Mizoram State Law Commission te, Registrar General and Marriages te, Advocate General Office te, Fast track Special Code te, Public Prosecutor Office te leh Supreme Court Council Office te kan enkawl a. Helaiah hian kan office hrang hrangte hnathawh theihna tur hian sorkarin theihtawp a chhuah a, Court lamah pawh hian kan sorkar ukil tha tak tak te an awm a. Case-ah te pawh tunah hian tunhma aiin chakna kan nei tam tawh a, case chakna te pawh a neih tam tawh thu te report kan dawng a. Tin, a bik takin *Prevention of Corruption Act* ah pawh kan sorkar ukilte an tha khawp mai a, chakna percentage pawh a sang tawh viau a ni. Chutihruah chuan decision siamtu chu, kan hriat theuh angin a Court zawk a ni a, khang kha chu tumah va inrawlh theihlohna hmun kha a ni ve thung a ni. Tin, hetih rual hian Law Deptt. hi *Dan* chungchangah enforcement agency anga ngaiin, heng kuhva tawlh te thlenga hma la tura ngaih te pawh hi a awm thei awm e. Tin, Prosecution Directorate chungchang din theih turte a awm thei awm e. Amaherawhchu, khang kha keini lam chan ni lovin Home Deptt. lam chan a ni.

Tin, Guwahati High Court-a Registrar, Joint Registrar leh Dy. Registrar te hi helaia service chungchangah han sawilang leh lawk ila.

Mizoram Judicial Service ah rinluh an ni a. Tin, Champhai Judicial District-a District and Session Judge leh Addl. District and Session Judge te hi Mizoram Judicial Service-a rinluh an ni bawk a ni. Kolasib hmunah Fast track Code building tur 20.9.2022 khan sak tan a ni a, tluang taka sak zawh anih chuan, March-April, 2023 ah hian sak zawh kan beisei a ni.

Tin, Infrastructure lamah vek, Champhai Vengsang-ah Champhai District Court thar sa tura hmalak a ni a. Kan hriat tlan tawh angin Champhai-ah hian Judicial District hawn thar a ni a, full-fledged District Judge a awm tawh a, hei hi tun term chhunga kan tih thar a ni. Tin, infrastructure chungchangah hian district dang dangah hmasawn turin hmalak mek a ni a, district tam zawkah chuan kan han sa chho mek a ni a. Tunah hian district tharah te pawh a hmun turte kan enkual a, kan Central Ministry te pawh fund kum danga kan hmuh aia tam hmu thei turin kan dil a. Hmanni ah Kavadia, Gujarat-ah meeting kan nei a, chutah chuan Law Minister-te, kan Secretary-te, khangtiang khan Central Ministry kan dawr a, anni pawhin kum dang aia fund rawn dah tam tura rawn inbuatsaihin tawngkam tha min rawn hmuh a; Court hmun tur kan nei anih chuan hma chak taka lak kan tum a ni. Tuna district kan neih tharah te pawh hian District Court hmun tur kan hmuh hunah hetiang hian hma lak chhoh kan tum bawk a ni.

Tin, Lunglei District Court chungchangah hian, Lunglei hi kan hriat tlan angin khaw-upa tawh leh lo inbengbel tawh a ni a, chumi avang chuan hmun hi a har tawh em em mai a; District Court hmun tur hi a vang deuh tawh bawk nen Trade & Commerce building thenawm lawka ram kan dil a, Cabinet pawhin hei hi min pawmpui tawh a ni. Chutih rual erawh chuan Trade & Commerce te nena sawifel ngai ala awm avangin, joint-meeting Trade & Commerce minister zahawmtak Pu Thangtea hovin meeting leh turin kan in buatsaih mek a ni. District Court, Aizawl building tur Mizoram Capital Complex - MINECO ah cheng nuai 2,080 senga sak kha December Ni 16, 2022 khan hawn a ni a, tunah luah mek a ni. Tin, High Court building thar tur hi Mizoram New Capital Complex - MINECO ah sak mek a ni bawk a, Civil works leh Structural works te zawhfel a ni tawh a, hun reiloteah hawn theih tura beisei a ni.

The Mizoram Court hi Vol. 11 published a ni tawh a, he lehkhawh hian rules te, ordinance te, regulation te, notification te kum 1994-1995 thlenga Mizoram sorkarin a lo chhuah tawh te a awm a ni. Mizoram State Legal Service Authority awm atanga a vawikhatna atan, *Mizoram Victims of Crime Compensation Scheme, 2011* hnuaiiah crime-victim te tan Mizoram sorkarin corpus fund crore 1 min dah sak a, sum indaihlo chungah kan Finance Minister leh kan Chief Minister zahawm takin min ngaihpaawimawh avangin, victim ten hei hi an tangkaipui ngei kan beisei a ni. Kha kha Law Department ka han khaikhawm theih dan ni se la.

Environment, Forests & Climate Change Department-ah hian han lut leh ta ila Pu Speaker. Helai sawihonaah khan member zahawm tak tak mi 26 ten Forest Deptt. hming lamin an rawn sawi a. Hetah hian advice-te a awm a, tin, react ngai point 2-1 awm kha chu nakinah ka rawn react ang a. Amaherawhchu a tam zawk kha chu *advice* leh, hmasawna kan lo kalpui tawha *lawmpuina* te kha a ni bawk a, khang kha chu ngailo turah ngai ila.

Kan hriat tlan theuh angin Mizoram-ah hian ramngaw leh kan thing leh maut te kan climate avanga humhalh turin theihtawp chhuah a ni a. Helaiah hian kum 1995-ah Forests Department hmalak theihna turin *Mizoram Forests Act* te a lo awm tawh a. Chu chu a tirin '*Lushai Act*' a ni a, tunah hian khami Dan hmang khan Forests Deptt. ram te enkawla humhalh a ni a. Chu mai ni lovin, kha Dan zulzui khan notification te chhuahin, kan luidungte humhalhna leh a bik takin lui 16 humhalhna te bakah kawng humhalhna te a awm a. Kha kha Central Act-ah, *Forests Conservation Act, 1980* in a rawn khung ve leh a. Chutiang chuan theihtawpin Forests Department hian Dan tlawhchhan hmangin ram leh forests humhalhna te, kan boruak inthlakthleng venna chungchangah te hna an lo thawk tawh thin a. Hetah hian tlawmngai-pawl NGO hrang hrangte nen thawk hovin nasa takin theihtawp an lo chhuah a, hma pawh kan sawnin ka hria a. Hetih laia kan sawi tel duh chu – 'kan hlawhtling a ni' tih leh, 'mipuiiah awareness pawh a tha chho tan a ni' tih fiamthua kan sawi thin a awm a. A taka thawktute zawk Forests Department te pawh hian forests activities telna tura ngaiha an dukhawp lohna leh an

mit han tlinlohna te kan lo nei hial tawh zawk te pawh hian, Forests Department ina hma kan lak thatna leh awareness kan neih thatna a tilangin ka hria a. Chungte chu thuhmaah kan sawi a ni.

Tin, helaiiah hian kan hmalaknaah hian central atanga fund lo kal hi kan inngahna a ni deuh ber a. *Green India Mission* leh *National Afforestation Programme* te kan kalpui a. National Afforestation Programme hnuaiah te, GIM hnuaiah te hian kan forest ram humhalhna bakah kan tuihna humhalhna thlengin kalpui a ni a. National Afforestation Programme hnuaiah hian *Village Forests Development Committee* leh *Eco-Development Committee* te pawh khaw 600-ah din a lo ni tawh a ni a. Tin, Green India Mission hi Forests Division 5, a district ang zawng chuan 4 ah neih a ni a. Amaherawhchu, hei hi kan hmalakna pui leh lian, thingphun chungchangah te, nursery thlengin a ni a, churang chuan, ‘hei hi tih len a ngai a ni’ kan ti a; tihlen mai bakah kan kal dan phung pawh hi tihdanglam a ngai, mipui tena an rawn hnek hnaihna tur leh, mipuite nena kan thawhho theihna tur - *people participation* a tam theihna turin kan kalpui dana pawh hi thlak hret hret a ngai a ni.

Tin, Forests Department ina kan thingphunte pawh a chang chuan a lo tlo deuh a, ‘YMA flag te emaw kan han dah hian a lo tlo deuh a ni’ kan tih te pawh hi, mipuite nena kan inhnek hnaihnaah hian ‘hmasawn ngai kan la nei a nih hi’ tih ngaihtuahna kan nei a. Chumi avang chuan tunah hian kan economy lam hawi thei tur - *Agro-forestry* lam kan kalpui dawn a, chutah chuan central ministry-ah kan thlen a. Kan thu thlena chu forest ina chutiang lama hma kan lak theihna tur scheme a kha *Green India Mission* kha a ni a. Chu *Green India Mission* chuan division 5 chauh a huap si a, ‘Zoram pum bakah District Council te thlenga huap turin’ tiin central-ah kan dil a, tunah hian central lampang pawhin a thuphungin min pawmpui tawh a. Hei hi kan hlawhtling anih chuan mimal huan nei - farmers hote, kuthnathawktute an huanah thlai puitling nghet nei thei turin hetah hian tan lakpui kan tum a. Chutiang chuan mipuite an eizawna -economy sawi-danglam thei turin he agro-forestry hi tuna kan tum lian ber te zinga mi a ni.

Pu Speaker, a dawt leha kan sawi duh chu - khawpui chhungah hian khawpui thang zelah mipui hmasawna avangin khawpui eizawna te a lo awlsam zel a, thingtlang atang te pawhin kan pan khawm zel a, mipui kan tam avangin khawpui chhungah boruak tha hip tur hi Forests Department chuan a ngaihtuah pui tak pakhat a ni bawk a. Chumiah chuan *Nagarvan Scheme* - central project hmang tangkaiin tunah hian Aizawl leh Champhai-ah bul kan tan a, central atangin fund pawh an rawn pe tawh a, chu chu tunah hian thawh mek a ni a. Tin, hemi bakah hian town area - *notified town* thlengin central-in min rawn phalsak a. A tirah chuan he Nagarvan Project hi municipal Area-ah chauh tih tur a ni a; Mizoram-ah chuan Municipal Area pakhat chauh kan nei a kan ti a; Lunglei kan neih hma kha a ni a. Chu chu central-a kan thlen avangin leh, khami kan sawi te an lo ngaihpawimawh avangin *notified town* thlenga kalpui min

phalsak a. Chumia khaw 14 te tan tunah hian he Nagravan Scheme, khawpui chhunga boruak tha hipna tur, thing leh maute humhalhna tur hi kan kalpui chho mek a ni.

Tin, a dawt lelah chuan, Pu Speaker, Mizoram zahve hi kan ramri a ni a, a aia tam zawk pawh a ni mai thei e, ramria awm kual kan ni a. Chuvang chuan, ramsa chungchangah pawh dan lova sumdawna a tam em em mai a. 'Exotic animals' kan tih ho hi an man a, court lamin sahuana dah tur te in an han ti thin a. Chutih lai chuan sahuana lamin inkhuahkhirhna dan a lo nei a, sahuana hian wild animals te hi a lo dah nghal ngawt theih loh a; kan hotute'n remchang an han siam mai thin zawk pawh a, harsatna kan tawh fo a ni. Chumi chhawk-zangkhai thei turin leh khang illegal trade chungchanga kan control theihloh thil a awm avangin Aizawl Zoo - Satellite Rescue Centre hi Champhai – 'an manna hmunpui leh boundary hnaihah hian dah ila' kan ti a, tunah hian vaibelchhe tel siamin project central-ah kan theh lut tawh a. Hei hi central lampanga Minster leh Secretary rualte pawhin an ngaihpawimawh thu min lo hrilh tawh bawh a, beiseina sang tak kan nei bawh a. Hemi a nih chuan, ramsa dan lova lo lut te lo chhanchhuahna hmun leh, lo dah-lailawkna tur kha kan nei dawn a ni.

Tin, heng bakah hian ramriah forest reserve area, India ram chhung rau rau ah ram buai kan hre thin a. chutiang lo pawh heng ramsa tuna kan sawi ang chi, dan lova tawh te protection nei thei turin 'protection squad' te pawh hi central-in a bikin minrawn tihsak turin kan dil bawh a, hengte pawh hi an ngaihpawimawh thu min lo hrilh bawh a ni. Heng hi tuna hma kan lak len lai tak mai a ni a, kan sawilang tel a ni.

Tin, a dawt lelah chuan, Mizoram hi khua a thalin a thal na em em mai a, ram kang a nasa a; chutihruah chuan ram kang venna chungchangah hian nichina kan sawi tawh angin fund kan hmuh ho hi (central atanga hmuh a ni bawh thin si a) a bei tham em em thin a; Zoram pum tan nuai 100 tha awrh chauh hi a ni thin a. Hengte hi a aia tam zawk leh awmze nei zawka kan thawh theihna turin leh, awareness te kan tihthat theihna turin kan dil a, central lamin project te siam turin min ti a. A bik takin tunah hian nikum lampang record-a ram kang tamna hmun - Champhai leh Lawngtlai District-ah hian vaibelchhe 20 ve ve kum 5 chhunga hman tur Ministry-ah kan theh lut a, beiseina sang tak kan nei a, hetiang a nih chuan awareness tha tak te kan nei thei dawn a ni. Tin, hetiang hi hmundang atan pawh kan siam bawh a ni.

Tin, a dawt leha ka sawi leh duh chu - Mizoram-ah hian 'Wetland' kan tih hi Tam Dil leh Pala Dil-ah kan nei a, chutah chuan development te kan han kalpui a. Palak Wetland te phei chu 'Ramsar Site' an ti a, Wetland pangngai aia dinhmun sang zawk leh development chungchangah pawh fund keng tam thei zawk a ni a. Chu chu central-in *Ramsar Site*-ah minrawn puansak tawh a. Heta tang hian henglai a chheh vel ho eizawna tur petty-shop tur chungchang te, kut-hnathawka eizawngte puihna tur te, tin, pressure cooker semna tur te, an nitin nuna pawimawh, an livelihood improvement tur te helaiah hian a tel a. Nikum kan Session inkarah khan eng emaw zat hengah hian sem

a ni a, a catchment area kuate tan heng tanpuina hi kan pe a ni. Tin, heng khua ten kan hmun pawimawh te tha taka an lo ven avangin leh, min support avangin vawiinah hian lawmthu ka sawi tel nghal a ni.

Tin, a dawt leha ka sawi leh duh chu - zirlaite, naupangte rilruah ramngaw thing leh mau te, thlai leh pangpar, nungcha tinrengte Pathian siam ho hi ngaihhlutna leh, a tangkai zia an hriat theihna tura inzirtirna tur atan scheme pakhat '*School Nursery Yajona*' chu school hrang hrangah kalpui a ni a, tunah hian school 50-ah kan kalpui mek a ni. Heng hi a lo hlawhtling chho a nih chuan, naupang rawn thanglian tur ten nungcha, thing leh mau hmangaihna chungchangah hma an rawn sawn phah kan ring a, kan ram pawhin hma a sawn phah kan ring a ni.

Tin, a dawt leha ka sawi leh duh chu - Forest ram theihtawp chhuaha kan lo enkawl thinah hian ram mipuite hmasawinna te, sorkar hmasawinna te, mimal hmasawinna te avangin khang ang kha sut-chhiat a ngai thin a, chutiangah chuan *clearance* lak te a ngai thin a; helaiah pawh hian inzirtirna kan neih tam a ngai khawp mai a. Forest Deptt. lam atanga ngaihtuahnaah chuan, hmalak hma hian Deptt. hrang hrangte emaw, mimal emaw te hmalakna tura clearance la tur hian inzirtir tha ila, a hnuah buai leh tawh hnuah hi chuan thil a lo kal thui leh tawh thin a. Chuvang chuan, 'a tirah hian lak hma theih ni se' tiin kan han inzirtir thin a, heng pawh hi hma kan sawn chho zel turah kan ngai a. Chutihruah erawh chuan, Central Ministry-ah pawh *clearance*, mipuite mamawh hmasawinna ruhrel rawn kalna turah pawh *clearance* dil hi tichak tur pawhin kan nawr bawh la ni. Tin, heng chungchangah pawh hian nichina thu bul lama ka sawi ang deuh khan theihtawp lo chhuahtute hi, thawk lutuk lova lo ngaih palhna te pawh la thleng thei a ni. Amaherawhchu, kha kha *awareness* kan neih that avanga hlawhtlinna lo lanna niin a lang bawh si a. Theihtawp chhuahin dan bawhchhiate hnenah action lain notice te kan pe a, a then phe chu *stay order* te kan pe a. Hmun thenkhata an hotu thenkhat te phe chuan 'Forest Deptt. hian hma in la nasa lutuk deuh a ni; tha lo thlahdul thei deuh ula' tih te pawh an rawn sawi hial zawk a. Engpawh ni sela, 'deptt-in theihtawp kan chhuah a ni' tih kha ka sawilang ni sela.

Tin, Forest clearance chungchangah hian, khatianga clearance fee tlingkhawm kha CAMPA scheme-ah a lut ve leh a; khang kha ramngaw te lo that zel theihna tur te leh ramngaw siam thar lehna tur te atan khan hman leh a ni a, mipui nawlpuite lo inhlahwna tura tan pawh heng hi hman thin a ni.

Pu Speaker, project pakhat, '*Mizoram Bio-diversity and Forest Enrichment Project*' kan buatsaih a, chu chu JICA - rolling plan hnuah dil a ni a, kar hmasa khan JICA hotute pawh helai kan Session laiin an lo kal a, Session chhuahsan lawkin meeting te pawh kan zuk neihpui a, office lamah. Kumin February thla laihawl (tun thla chung) hian inbuatsaihna/zirchianna an rawn nei dawn a ni. A tira he kan project dilna kan theluha hi crore 527.68 a ni a, hei hi a hlawhtlin hunah kum 8 chhung hman tur a ni a.

Hetah hian kan ram leilunga thing leh mau chereu tur humhimna tur te, lo awm tawhsa tuaihnumna tur te, kan luidung humhalh te, catchment area treatment plan siama tuihna kang mekte humna tur *rejuvenate* lam te a huam a ni. Tin, mau sawngbawlina (bamboo processing) pawh kalpui tur a ni a, hemi atan hian Bamboo Centre te dina khawl tunlai ber chi ‘*State of the Art Machinery*’ bun tum a ni a, a thawktu te awmna tur quarter zawng zawngte pawh hei hian a keng tel vek a ni. Tin, research te neia, chuta tana FRC-BR nena thawhho tum a ni bawk a ni.

Tin, a dawt lehah chuan Pu Speaker, boruak tha hralh - Carbon Trading Project, hei hi Mizoram tana thil thar a ni a, department hian kalpui a tum mek a, chuchu Zoram leh a ram mipuite tan chhenfak awm tak tura duan a ni a, thu neitute lam nen inbiakna a kal chho mek a. Hemi a nih hi chuan kan ramin revenue tam tak kan chawlut thei dawn a, kan ram hmasawna ruhrel pawimawh takah a chang thei dawn a ni.

Tin, a dawt lehah chuan, Aizawl Zoo chungchang han sawilan leh lawk ka duh a. Kan sahanah hian naupang school chawlte, puitling thleng pawhin ramsa ngainatute an awm a, chungte anih avang chuan zoo hi tihchangtlun chhoh zel a ni a, tunah hian kan exotic animal te leh, tuna awm tawh sa te pawh hmuh tham a awm tawh a. Tin, kan sahanah khuan ramsa dahna (enclosure) te pawh tunah hian kan siam belh bawk a. Tin, kan hriat tlan tawh angin sakei – Mizote’n sapuia kan neih pakhat kan dah a, khu khu tunah hian dah belh leh kan tum a; Bhubaneswar, Orissa atangin sakei pahnih laklul belh turin tunah hian kan inbe fel tawh bawk a ni. Tin, Aizawl Zoo alo hlut belh zelna turin entute tan pawha nuam zawka a awm theihna turin project dang kan siam bawk a ni.

Tin Pu Speaker, helaiiah hian ka sawilan leh duh chu - nikum lama ram kang avanga nunna chan Pi Khupsiamsang chu victim compensation (ex-gratia) cheng nuai hnih, ni 27.10.2022 khan a pasal Suangaihndin hnenah hlan a ni. Tin, Kepran khuaa in kanga kang hlum Pu K. Zamawia pawh, Ni 1.10.2022 khan a fapa K. Lalbiakhluna hnenah sum hi kan hlan bawk a ni. Tin, Lawngtlai ‘W’ bialtu zawhna a chhanna pakhat zawk chu - Pi Hnianshniangi, Hmunnuam khua, Ngengpui Sanctuary a Sai in a chil hlum chungchangah “ex-gratia te a hmu ve thei dawn tawh em, engnge a chanchin?” tih kha, Hnianshniangi kha sanctuary chhungah Sai nena an intawhsualna hmun kha sanctuary chhung a lo ni si a; ex-gratia han pe tur khan a lo harsa a. Ngun takin kan ngaihtuah a, department lampang pawh a lu a hai em em mai a. *Dan* lamah a rem silova, churang chuan, ‘*State Board for Wildlife* ah ngaihtuah turin thawn chho mai ang’ kan ti a. Hei hi Pu Lalthawmliana, kan EM (LADC) pawhin a rawn sawipui nasa thin a. Hetah hian ngaihtuah nawn leh phawt ila; thu thui a sawi ngam lova. Helaiiah ‘*State Board for Wildlife* atangin ngaihndan siam leh phawt a ngai a ni’ tih kha kan in chhanna ni se. Chutihruah chuan helaiiah kan sawilan leh duh chu - Pi Hnianshniangi pasal Pu Ropuia kha wildlife guard ah hna pek a ni a, hei hi hna nghet chu a ni hauh lo na a, amarawhchu, scheme awm chhunga awm tur chi a ni.

Chutihrual chuan zawhna pakhat – ‘20% personal branch atanga lak’ tih kha ka bo khawp mai a; amaherawhchu, nikum lama mi zawttu ngai bawk kha mi zawttu a ni bawk si a. Hei hi ‘kan hre lo reng reng’ tih hi ka chhanna ni teh se; ‘Forest Department-a 20% beisei’ tih kha kan hre lo a ni.

Tichuan, Mizoram Pollution Control Board chungchang kha - Mizoram Pollution Control Board hi boruak bawlhhlawh endik, tui bawlhhlawh endik, industrial pollution control, damdawi-in enfel, plastic waste management, motor khu test leh *Dan-in* a beisei anga pollution hrang hrang endikna hna kalpui reng a ni a. Hna chak zawka kalpui anih theihna turin tunah hian Laboratory tha zawk, khawl tha zawk nei turin hma kan la mek a. Tin, helaiah hian kan luikawrte a thianghlim leh thianghlim loh te pawh en a ni a, a thawktute taimak chhuahna kawngah an fakawm hle a ni.

A tawp lam atan chuan *Forest Research Centre for Bamboo and Ratan* hi Bethlehem Veng-ah khuan kan nei a, mau lam kaihhnawih te zirchianna niin, thawktute’n kan rama maute zirchiangin a hman theih dan te research an nei thin a ni. He centre hi hman-tangkai a nih lehzualna turin leh tihchangtlun dan tur ngaihtuah a ni a, tuna centre hi institute a hlangkai turin tunah hian kan thlen a, anni pawhin an lo ngaihtuah zui tura an tih avangin beiseina sang tak min neih tir a. Tin, exam centre pawh, khulaiah khuan Zofate kan luh tam ve theihna turin central sorkarah kan dil mek bawk a, hei pawh hi ‘beiseina sang tak kan nei a ni’ tih kha Forest Department lam atanga kan sawi theih ni sela.

A dawt lehah chuan Pu Speaker, Transport Department hi - He department hnuaiah hian hmalakna a nasa khawp mai a, nichin khan kan sawi kim vek seng lova, a tlangpui ka han sawi leh ang a.

Transport Department-ah hian MST bus te a lo upat tawh hlawm avangin eng emawzat lei thar a ni a. A hnuaiah hian Zofate inpumkhatna, he MNF ministry leh Zoram mipui leh NGO hrang hrangte pawhin kan ngaih pawimawh - hnam inpumkhatna bus service tir turin kan sorkar tantirh atangin hma kan la nghal a. Amaherawhchu, thil hi a lo tluang lo khawp mai a, kan thenawm state te an lo fimkhur a. Tunah pawh hian hlawhtling nghal mai tura kan ngaih Manipur lampang pawhin rawtna dang te an rawn nei leh a. Chutihrual chuan Manipur chungchangah agreement sign theih mai turin kan inbuatsaih a, Manipur sorkarin ‘keimahni atang pawhin rawn tih ve kan duh e’ an ti a; reciprocal agreement sign turin tunah hian bus te pawh kan lei ve a, bus in service tawn turin thu thar kan nei ta a, tunah hian ‘beiseina sang tak kan nei a ni’ kha ka han report duh a. Tin, tunah hian Zampui-tlangdunga kan unaute tlawhpawh turin Phuldungsei thlengin bus hi tlantir tan tawh a ni. Tin, MST bus ticket chungchangah Pu Speaker, MST bus hi thui tak tak intlara lak te a ni thin a, tunah hian mipuite tana awlsamna anih theih nan *online booking* ti thei turin hmalak mek a ni a, kan la zo lo hret a ni.

Tin, motor chhiah chungchangah *lifetime tax* motor lei thar tena motor man a percent sang tak mai, kum 15 tan vawikhata pek tur kha a harsat deuh avangin, lifetime tax kha ti danglam a ni. Pu Speaker, Transport department hi *Motor Vehicle Wing* leh *MST Wing*-a thenhran a ni a, MST wing audit velah department hi hloh angin kan lang nasa a, department lam pawh hian hreawm kan ti thin a. Chu chu ‘engtin nge a chhawk zang khai theihna tur’ tiin kan han zawng a. Kan officer-te nen theihtawp kan chhuah hnuah; MST lama hlawh la, MST lama thawk ni si lo te kha an lo awm nual a, churang chuan ‘kan pay head siam rem a ngai a ni’ tiin tunah hian kan siam rem tawh a. Audit leh hunah chuan kan loss percent sang tak pawh kha a hniam kan ring viau tawh a. Hei hi hmasawna thar a ni a, Transport Department chu kan lawm khawp a ni.

Pu Speaker, tun financial year kal lai mekah hian Transport Department tana revenue target min tuk sak hi cheng nuai 4,059.21 a ni a. Kum 2022, November thleng khan cheng nuai 2,738.15 hmuh tawh a ni. Tuna a lan danah chuan, target hi khumin cheng nuai 4,070 chuang hmu theih kan inbeisei a ni.

Nichina kan sawi deuh nual tawh - Inland-water transport chungchangah hian tawi tea han sawi lan leh ka duh a. Kan hmalakna hrang hrang - Tlawng te, Chhim-tuipui te, Khawthlangtuipui te a ni a. A bik takin Khawthlang-tuipui chungchangah hian, tunah hian e-tender chhuah tawh a ni. A hma khan kan lo chhuah tawh a, mahse kha kha central lam thlirna (criteria) ah a tling lo deuh a. Central ministry te nen insiam remin tender hi chhuah thar leh a ni a, e-tender (open-tender) hi Ni 16.2.2023 khan kan chhuah thar leh a ni.

Tin, social and environment impact assessment pawh helaiah hian tha taka neih a ni a. Member zahawm tak Pu Nihar-a khan a zawt a. Tlabung leh a chheh vel khaw hrang hrangte social impact chungchang kan sawipui a, anni pawhin tha an ti a, chutiang chuan hmalak a ni a. Tin, environment impact assessment chungchangah pawh environment clearance leh forest clearance pawh kan kalpui mek a, hetah hian stage 1 approval kan hmu tawh a. Hei hi a bik taka kan han ngaih pawimawhna chhan chu - kan hriat theuh angin Silchar ramri kan chaw laknaah harsatna kan tawk thin a ni. Kumtin, hriat lawk si loh hian buaina a chhuak thut thut a, lirnghing nen ka tehkhin thin a. Kan economic route dan-chahin a awm thin a, churang chuan, ‘Bangladesh kawtchhuah lam hi hawi tel a ngai a ni’ tih hriain hma kan la chak zual a, kan nghahhlelhna pawh a ti zual a, Khawthlang-tuipui hi hlawhtling turin theihtawp kan chhuah chhunzawm dawn a ni. Tin, kan sawihonaah khan water-ways chung chang hi memberte’n an rawn nual tawh avangin, khati chinah khan duh tawk phawt ila.

Tin, e-Challan system chungchang han sawi tel leh lawk ka duh a. Ni 3.10.2023 tanga hman tan theihin e-challan application hi kan nei tawh a. Lirthei khalhtuten dan an bawhchhiata an lo man khan, kha system-ah khan an block nghal a ni. Chu chu a neitute a hnuaa buai zui ngei ngeina tur a ni a, e-challan system hian enforcement duty

te kut nasa takin a ti chak dawn a ni. Tin, bank loan hmanga lir thei lei ten bank NOC hmanga DTO office-ah *data base* - 'loan hmanga lei a ni' an tih kha, paih tir ngei kha a ngai thin a. Hei hi mipuite tana a awlsam zawk nan leh, mahnia buai pui zui ngai lovin loan hmanga lirthei lei te chu loan rulh zawh rualin automatic data base-ah a inpaih nghal zel tawh tura siam a ni. Lir thei zuar ten awlsam zawk a trade certificate an lak chhuah tawh theihna turin April 25, 2022 atang khan online trade certificate system hman tan a ni a, online faceless learner license chu November 1, 2022 khan hman tan a ni tawh bawk a. Tin, Aadhar authentication hmanga lir thei leh driving license service chi hrang hrang 58, hming thlak te, driver license thlalak thlak te, renew duplicate, transfer of permit chu kalpui turin testing chu kalpui mek niin tuna tang rei vak loah chuan hman theih tura beisei a ni.

Pu Speaker, thil thar pakhat leh transport department chuan online cab booking system kalpui turin hma a la mek a, tih hlawhtlin a nih hunah chuan lir thei hman tu ten rate dikz awkin public transport, taxi leh a dangte pawh kan hire thei tawh dawn a. He online cab booking system hi uber leh ola te ang a kalpui tur kha a ni.

Pu Speaker, vawiina ka'n sawi lan leh duh chu taxi, two wheeler taxi te leh commercial vehicle dang te replacement chungchangah hian kan lo kalpui tawh dan chhawm chhoh chngchangah kan Chief Minister zahawm tak advice angin ennawn leh mek a ni a. hemi-ah hian commercial vehicle leh mi dang dang eizawna neite tana hmasawna awm turin tunah hian kan inbuatsaih mek a ni.

Pu Speaker, special permit chngchangah zan lamah commercial vehicle te district dang leh state pawna ah te an kal dawnin office tanga special permit lak ngai thin tunah hian online special permit ti thei turin kan kalpui tawh a. Hei pawh hi commercial vehicle nei te tan kan awlsam phah kan ring bawk a ni.

Zirlai awm tamna leh MZU-ah regular taka City bus tlan theihna turin Aizawl city bus owner Association te nen ruahmanna siamin tunah hian tlan tan tir tawh a ni a. Kan damdawi in pawimawh ZMC-ah pawh city bus te nen insiam remin tunah hian service tir a ni tawh bawk a. Kan hmun pawimawh Aizawl Municipal area ni si lo Lengpui-ah taxi leh two wheeler taxi te tan pick up leh drop te a remchang thin lo a. Tunah chuan special permit lak kher ngai loin passenger drop leh pick up te kha kan phalsak tawh a. Chutih rual erawh chuan khunglai stand-ah passenger te la tur a din erawh phalsak a la ni lo thung a ni.

Lir thei neitute tana a sam khai zawkna turin district tinah tunlaia kan mamawh leh test-na lar tak pollution test-na, pollution analyzer hi dah vek tawh a ni a. District thar pathumah pawh dah tura tunah hian hma lak mek a ni.

Transport department chhungah IOC hnuaiiah consumer petrol pump kan nei thin a, tunah chuan revenue tam zawk lalut thei turin vantlang mipuite chhawr theihna tur *retail outlet* a let turin hmalak mek a ni a, hemi tur atan hian agreement sign turin kan inngaichang mek bawk a ni.

A dawt leh ah chuan Pu Speaker, motor fit leh fit loh chungchangah a tehna bik leh hei chu a hlui tawh a, ‘a khu nasa; tlan chi a ni tawh lo’ tih ang chi te tan scrubbing policy emaw te lo chhuak ta ang sela, khatiang kan tih theih thin loha kha tunah chuan hma la turin Automated Vehicle Inspection and Certification Centre, Hlimen-ah, October, 2022 atang khan kan sa tan a. October, 2023 ah zawh fel hman kan beisei a. I&C centre ah hian pollution leh fitness khawl hmanga enfiah a ni tawh dawn a ni. STA chungchang, a bikin commercial vehicle - pick-up te, camper te hi sumdawwna atana hmang ve duh loh te tan private-a register phalsak an ni a, tunah hian kan kalpui tan mek bawk a ni.

Tin, Pu Speaker, Aizawl city bikah Transport Department chuan kum 2019 atanga tun thlengin 2-wheeler taxi permit mamawhte tan kan pechhuak a, hetah hian mi 2995 zet te eizawwna thar siam sak an ni a. Tin, taxi, auto-rickshaw leh maxi-cab te pawh hmundang dangah permit te pawh pein, eizawwna thar siam sak an awm nual bawk a ni. Tin, Pu Speaker, District thar pathum - Khawzawl, Hnahthial leh Saitual ah te DTO office hawng turin DTO leh staff mamawh te post siam a ni tawh a, a hnawhkhahna tur kan dil leh mek a, phalsak kan nih hnuah DTO office hawng turin tunah kan inbuatsaih mek bawk a ni. Tin, commercial vehicle terminal hi Tlabung, Vairengte, Serchhip ah te sak a ni a, Vairengte hi tun December thla krismas hma lawk khan kan zuk hawng a, Tlabung leh Serchhip hi tunah hian hawn theih mai turin peih fel a ni tawh bawk a ni.

Tin, multi-level car parking tur hi Chanmari ah sak mek a ni a, hei pawh hi zawh fel thuai kan beisei bawk a ni. Tin, Kanhmun-ah vehicle enforcement checkgate, motor - Assam leh Tripura atanga rawn lut leh te Mizoram atanga chhuak te pawh lo check-na tur hi Ni 10.12.2022 khan hman theihin hawn a ni tawh bawk a ni. Tunah hian Champhai DTO office hlui chhe tawh tak mai Disaster lam ten, ‘sak that a ngai; thiah a ngai tawh a ni’ an tih chu sak that nghal mek a ni a, kumin chho ah hian luah hman tumin theih tawp chhuahin tan lak mek a ni. Tin, Lawngtlai Transport Office chungchang kha - kan MLA zahawm tak kha, a source kha a fuh lo deuh nge ni, kei hian ka hrethiam lo zawk, ka hre lova. Kha kha Transport Department atanga fund a ni lova, PWD leh Finance lam tih a ni a. Chu chu PWD-in ‘a luah theih e’ an tihah Transport Deptt. min rawn hand-over chauh a, a bak Transport Department atang chuan hriat kan nei lova. A contractor ten PWD emaw, Finance emaw lamah an nawr a ngai zawk ni awm tak a ni a; keini chuan, ‘a luah theih e’ an tih hnu a an rawn hand-over chiah khan kan lo luah ve tawp a ni. Kha bak han chhan thui ngaihna vak pawh ka hre mai lo a ni. **(Pu C. Ngunlianchunga:** Minister zahawm tak kha a sawi dik ang a, amaherawhchu tunah hian

a bill cheng nuai 39 an la pe lova; luah a ni tawh si a, kha kha Transport Minister atangin hma lakpui theih dan awm sela a tha khawp mai. Kei pawhin ka buaipui a, Finance ah te, Planning ah te, PWD te; Transport Minister ber khan a baa luah reng kha a fel lova, umzuipei se a tha khawp mai ka ti a ni e.) Awle, theihtawp kan lo chhuahpui ang e.

Tichuan, Demand No. 12 - Parliamentary Affairs Department hi kum dangah chuan tawi tea sawi thin kha a ni a, kumin kan budget session, tun term atana hnuhnung ber tur a ni baw a, thui deuh hlek ka han sawi ve thung ang a.

Parliamentary Affairs Department hnathawh leh mawhphurhna pawimawh ber pakhat chu - felfai taka dan siam, rorel, legislative business kalpui a ni a. India rama danpui - *Executive, Legislative* leh *Judiciary* te kan awm hrang thliah a, he lungthupathumte hi a hrang theuh, in dip-dal lova thawk tura ruahman a ni a. Parliamentary Affairs Department hi Legislative leh Executive te hnathawhhona leh kan *Nodal Department*, mawhphurhna sang tak nei, inlaichinna tha tak leh thawhhona tha tak a awm theihna tura pawimawh em em 'department' a ni a. Parliamentary Affairs Department-ah hian bill regulation leh a dangte pawh, he Legislative Assembly Secretariat a thlen hmain uluk taka lo endik thin a ni.

Heng bakah hian Parliament Affairs Department hnathawh tlangpui te han tarlang lawk ila. Legislator lo ni tawh te leh an chhungte tan hamthatna awm theite ngaihtuah sak leh enkawl te a ni a, hemi chungchangah hian Ex-MDC te, Ex-MRC te pension leh family pension te a pechhuak thin a. Tun dinhmunah hian pensioner mi 9 leh family pensioner mi 40 ten Parliamentary Affairs Department kaltlangin *pension* leh *family pension* an dawng thin a ni. Tin, MLA hlawh te tihpun a lo nih takah hian, heng kan mi-hmasa te pension leh family pension te pawh tipung turin hmalak mek a ni baw a. *The Mizoram Salaries and Allowances of the Govt. Chief Whip and the Dy. Chief Whip Act, 1999* (As amended upto date) ah chuan, "Govt. Chief Whip means, the Minister of Parliamentary Affairs" tih a ni a. Party hrang hrang leader-te whip leh group dangte inkar thawhhona tha a awm theihna a tana hma latu a ni. Hemi chungchangah hian India Danpui Article 77 (clause 3) in thu neihna a pek anga siam, *Govt. of India Allocation of Business Rules 1961*, India danpui Article 77 (clause 3) in Ministry of Parliamentary Affairs hnenah mawhphurhna a dah a, chutiangin kan state sorkara Allocation of Business ah pawh Govt. Chief Whip hian Parliamentary Affairs hi a chang thin a ni. Govt. Chief Whip chuan mawhphurhna pawimawh bik a nei a, chu mawhphurhna pawimawh tak govt. business chungchanga hun ruahman te, thawhhona-tha siam te, chet velna enzui leh ruahmanna tul siam te a ni a. Govt. Chief Whip-in chanvo a neih dang pawimawh tak chu - House boruak thli-thlaia, a mar deh a ni. Govt. Whip hi House Leader te, ruling party member te leh party dang whip te nena inngheng tawna awm thin tur a ni baw a ni. Tin, Legislative Assembly kaihhnawih zawng zawngte mumal zawka a kal theihna tura ruahmanna siam te; sorkarin committee hrang hrang a duanna tel tur Assembly member lo ruat te; tin, department hrang hrang hnuaia

Consultative Committee hnathawh dan tur lo duan te; Minister-te hnena legislation kalphung chungchang a tul dan anga thurawn lo pek te a ni. Tin, hengte bakah hian Govt. Dy. Chief Whip office leh establishment hi Parliamentary Affairs Department enkawlina hnuai dah a ni. Department lian tak angin lang lo mahse, Parliamentary Affairs Department hi ‘department pawimawh tak’ a ni a, an hna chanpual uluk leh fimkhur taka thawh ngai a ni a, *Legislative* leh *Executive* inkungkaihna ah mawhphurhna thui tak a nei a ni. Chutih rualin, kan Legislative Assembly zahawmna vawnhim kawngah te, dik tak leh felfai taka rorelna kalphung kengkawh chungchangah te mawhphurhna thui tak a nei a. *Parliamentary form of Government*-ah hian he department hian mawhphurhna nasa tak a nei a, chu mawhphurhna chu theihtawp chhuahin hlenchhuah kan tum thin a ni.

Pu Speaker, vawiina ka han sawilan duh chu - Assembly Secretariat a hnathawkte, helai Assembly kan neih chungga hlim tak maia member kalte min lo dawngsawng a, min lo welcome thin hi, vawiinah hian han sawilan hrim hrim ka duh a. Tin, Assembly Session tuna kan neih chungchanga a hlawhtlinna atana kan House Leader te, kan Speaker te, kan Dy. Speaker zahawm tak tak te, kan Commissioner leh thawktu zawng zawngte thawhrimna avangin lawmthu ka sawi a. Tin, kan Commissioner thar Pu Lalhmahruaia Zote pawh hi rilru leh thinlung takin lawmpuina leh duhsakna ka hlan a. Hmalam hun kal leh zel turah pawh duhsakna ka hlan baw k a ni.

Tikhan, ka department chan te ka zo a; Pu Speaker, ka dil nghal mai dawn em ni ang? (**Speaker:** Awle, dil nghal mai rawh.) Ka lawm e.

Pu Speaker, ka Demand-te –

Demand No.	Purpose	Amount (in ₹)
4	Law & Judicial	29,58,51,000.00
12	Parliamentary Affairs	101,86,000.00
36	Environment, Forests & Climate Change	1,616,513,000.00
42	State Transport	56,61,22,000.00
TOTAL		2,48,86,72,000.00

he kum 2023 - 2024 chhunga hman atan ka rawn dil hi, he House zahawm tak hian min pawmpui turin ka rawn ngen e.

SPEAKER : Awle, tunah chuan Minister zahawm tak Pu TJ Lalnuntluanga'n a Demand-te –

Demand No.	Purpose	Amount (in ₹)
4	Law & Judicial	29,58,51,000.00
12	Parliamentary Affairs	101,86,000.00
36	Environment, Forests & Climate Change	1,616,513,000.00
42	State Transport	56,61,22,000.00
TOTAL		2,48,86,72,000.00

House-ah pass a rawn dil a, remti apiangin ‘remti’ ti rawh u le. (**Member:** Remti).
Remti lo kan awm em? Kan awm chuan, ‘remti lo’ ti ula. (*Remtilo an awm lova.*)

Awle, Minister zahawm tak Pu TJ Lalnuntluanga chan - Demand No. 4, 12, 36, leh 42, a vaia belhkhawm 2,48,86,72,000 chu House-in lungrual takin a pass ta a ni. (**Pu TJ. Lalnuntluanga, Minister:** Pu Speaker, ka lawm e).

Awle, tunah chuan a dawt lehah kan kal ang a. Minister zahawm tak Pu R. Lalzirliana’n a department chante – Demand No. 23 - Art & Culture Department; Demand No. 27 - District Council & Minority Affairs Department; Demand No. 33 - Land Resources, Soil & Water Conservation Department leh Demand No. 39 - Power & Electricity Department te hi rawn wind-up se la, sawifiah ngai a tih te rawn sawifiahin House-ah pass rawn dil nghal turin ka sawm e.

PU R. LALZIRLIANA, MINISTER: Pu Speaker, ka lawm e.

A hmasain - waviin chauh pawh a ni lova, tunlai hi ka tawp ang reng riau mai a; ka hrawk te hi, tawng rin leh tawng rei lutuk hi a tuar lova. Doctor ten, ‘zai te phei chu, i zaithiam hle naa, lo in sum rawh’ min ti a. Chuvangin, ka department chana react ngai, MLA zahawm tak tak rawn sawi tam bera kha chu ka react lo ang a. Amaherawhchu, office lamah kan officer fel tak tak ten ngun takin an lo ngaithla a, an record a; kha kha nidanga kan tih ang bawk khan *ziaka* react a thaa hriatna ka nei a. MLA zahawm tak Pu Rokhaw pawh khan, ‘a tha zawk daih’ a tih kha, nichinah. Khatiang khan, tun session chhung hian ka react-na kha rawn peka, rawn sem leh kan tum mai dawn a ni.

Tin, chu mai piah lamah, tunlai hi ka BP a che a; nichin khan ka han check tir a, 150 a hnuaiah 90 a ni a, ka lu a hai lek lek a; a thei chuan min lo tawngtaipui turin kan ngen che u a ni. A hmasain P&E hi a rei ber tur a ni ang a, ti hmasa ila. Han hriat ngai nia ka hriat, mipui nghawng deuh a awm a, chu chu ka han react ang a.

Pu Nihar Kanti Chakma kha 1998 atanga ka MLA nihpui, waviin thlenga chawl lova Pathian hruaina duhawm tak dawnga la thu dun kan ni a. Nichina a thusawi kha ka lo chhinchhiah fel viau a, theih tawpin, ‘a bial phei chu duhsak bik pawh kan rawn tum dawn a ni’ tih kha ka han hrilh duh a.

Tin, Pu Lalsawivunga, MLA zahawm takin nichina a sawi kha han react loh theihloh niin ka hria a. JERC te hian Manipur-ah kum tin electric bill an thehlut ve ngai lo a ni; ‘tariff petition hi an theh lut ngai lo a ni’ an ti a. Hei hi keini chuan dan leh hrai fel tak kan nei a, Manipur pawhin kan dan leh hrai ang chiah hi an nei ve a. Chuvangin, kan danah chuan tariff petition hi JERC - Mizoram and Manipur hian multi-year *Tariff Regulation, 2014* (clause 17) khan tariff petition hi ‘kum tin JERC-ah an thehlut tur a ni’ a ti a. Chuvang chuan, keini hian ti hian kan thehlut a. “*Thil thalo titute avangin in ti lungngai duh suh*” tih kha keini chu ka rilruah a lo awm hlauh mai a. Hetianga miin thil thalo an tih dan, an palzut thin ang te hi, palzut loh hram hram a tha ka ti a. Tin, kan hriat dan chuan Manipur sorkar pawh hian tariff petition hi kumtin an thehlut thin a ni. Hei, helai maiah chairman pawh a awm a, duh chuan phone-a va zawh nghal theih a ni ang.

Tin, Pu Zaithanzama, MLA zahawm tak khan, ‘duhsak takin hydel project lamah hian tan kan la lo a ni’ a ti a, a pawl khawp mai a. Hydel project-ah hian tan kan han lak dawn kumin covid-19 a lo chhuak hlauh mai a, Tuirini pawh kha a rem vei nen, mahse khami avang khan sum puk, loan lak te kha kan ngam ta lova, kan ti ta lova; kan rilru te pawh hi a inang hle hlawmin ka hria a, helam mi pawh kan inang a. Amaherawhchu, ‘hun harsa zual a liam hunah heng hi chu ti ila’ tiin ngaihtuahna kan seng a, chumi atan chuan Tuirini mw 24 leh Tuivawl mw 24 te DPR pawh zawh tawh a ni a, forest clearance tunah hian kan nghak mek a ni.

Chumi piah lamah chuan, Mat-Sekawi mw 70 lai pe chhuak thei tur leh Kolodyne, 460 mw pechhuak thei tur a hmaa DPR lo siam kha chu a ni a, amaherawhchu hei hian foreign, Burma lam te a chim dawn avangin, kan kalpui hlei thei lo ang a; thil tih nasat viau tawh hnuah hian kan hlauh chham ang tih kan hlau a. Chuvang chuan, mw 150 – 180 inkar velah DPR kha review turin tunah hian CWC kutah kan dah mek a ni.

Tin, ‘tuikhuah te tak te-te’ han tih kha a dik a, te tak te-te te hian fur laiin mw 16-17 vel an pechhuak ve thei a ni; thalah erawh chuan mw 6 bawr vel a ni a, a beitham hle reng a. Chuvang chuan, ‘solar lam hi uar ang’ kan ti a, tunah hian hmun 11 ah kan VC ten phal takin ram min pe a, chu chu tender kan chhuah a, ni 15 kha a tawp ni a ni a, an hawng tawhin ka ring a. Tin, Vankal mw 20 pechhuak thei te pawh hi tunah hian *trial-run* tih mek a ni a. Kan hriat tawh ang khan mw 9-10 vel pechhuakin an sawi a, tunah hi chuan a trial-run kan neih chhung zawng zawng nen a man chanve kan chawi dawn a ni. Hei hi ni 30 atang chauh hian commercial ang chuan a kal dawn niin ka hria a. Hei hi kan hlawhtling dawn niin kan hmu a, a lawmawm khawp a ni. ‘A commission hun kha 2021 kha a ni si a, hei hi engnge a awmzia’ tih te kha a awm a. Covid avangin tumahin hna an thawk thei lova, sorkar pawhin kan thawk thei lova, contractor vai lo kal emaw, a tu emaw pawh kha kan khap a nih kha. Chuvang chuan, khang ang kha chu in dem emaw, han sawi han sawi pawr chi niah ka ngai lem lo a ni.

Tichuan, Pu Rintluanga hian a bial lampang kha a rawn sawi a; kan officer te hian an rawn chhang nghal tuk tuk mai a, kan MLA te hi an ngai pawimawh khawp a ni. Nakinah a rawn chhang dawn a, fiah zawkin. UC hi pek tawh a ni a, ‘sanction pawh dil mek a ni’ tih kha ka ka hriatdan a ni. A dik nge, midang chhanna ka ngaihrawlh deuh ka hre lova.

Tin, Dr. Vanlaltanpuia khan a biala transformer hungna awmluh avanga naupang hliam tuar khaa rawn sawi a, ‘hengte hi ex-gratia pek theih a ni ang em?’ a ti a. *Dan* kan nei a, hetiang civilian-in electric vanga hliam an tuar anih chuan, an hliam nat dan ang zela ex-gratia pek dan kha kan nei a, chutiang chuan pek an ni ang a. Tin, he transformer hi hung loh a nih chuan, ‘naktukah an hung zo vek tur a ni’ tih kha order a ni.

Pu Ngunlianchunga sawi – saw laia electric siam avanga mi-taima thi te kha ex-gratia pek tawh an ni a, a bak hi chu DC & MA lam a ni a, a chhan nghal chi chiah lo ang a. Kha zawng kha ka han chhan theih ni mai sela.

Pu Rintluanga zawhna kha - utilization certificate hi 13th October 2021 khan ministry ah submit tawh a ni a, 2nd installment dil nghal a ni a. Ministry in ‘a thlak han thil tel rawh u’ an ti a, chu chu a concern DC Lawngtlai leh Mamit-ah Ni 15 December, 2021 khan dila thawn tawh an ni a, tun thleng hian a chhanna kan la hmu lova. Ni 21 February, 2023 khan reminder DC Lawngtlai leh Mamit te hi thawn an ni.

PU LALRINTLUANGA SAILO: Pu Speaker, khawngaihin – kha lai min chhanna kha a chiang lo deuhin ka hria a. A chhan chu khulai 132 kV line power grid buaipui mek khu tha takin a kal a. Amaherawhchu, compensation cheng 1,68,122,451 hi power grid khan Forest Deptt-ah a pe tawh a. Khami zulzui khan mimal, khaw pali khan compensation an dil a, kha kha la pek loh a nih avangin ban phun theih a ni lova. Nizan hmasa khan power grid General Manager a lo leng a, ‘hei hi kan harsatna a ni a, engtin nge ni ang? Keini chuan kan pek tur kan pe niin kan hria’ tih lai kha a ni a. Kha kha Power leh Forest Department inkar a nih hmel a. Lallen, Saithlah, Phuldungsei leh Pukzing te kha compensation beisei khuate an ni a. ‘Khami a nih loh chuan, vantlangin thawh an phal lo’ tihlai kha a ni, Pu Speaker.

PU R. LALZIRLIANA, MINISTER: Kha kan thawktute’n an lo hria ang. Power & Electricity tun kan season kal mekah hian cheng nuai 64488.03 kan nei a. Heng atang hian hna tam tak kan thawk a, kan thawh tam tak zinga tlemte chauh han sawilang ila –

2X25 mVA 132/33 kV sub-station Kawmzawl a mi transformer kan va dah hi, he aia lian Mizoram-ah kan nei chuang lova. Hetiang ang pahnih lai hi kan va dah a. Nichina kan ngaihthlak tak ang khan chhim lamin eng an hmuh that pah theih kan beisei a.

Vanneihthlak takin Tlawva Mini-Hydel Project 5 mw lai pechhuak thei tur leh, Kawlbem mw 4 pechhuak thei tur te hi hawn an ni tawh a. Heng hi kan duh ang a ni lova; kan sawi tawh ang khan Tlawva pawh hi khuah belh tura hma lak chhoh mek a ni.

Tin, P&E Department hi kawlphehtha siamchhuaktu chauh kan ni lova, a siam chhuah hnuah khan hna a awm dawn chauh emaw tih tur kha a ni a. A hruipui han zam te, han sem zai te, a line leh transformer enkawl tih ang zawng zawng kha kan hna a ni a. Tin, domestic consumption - house tina thlunluh piahah khan, agricultural land lamah hian hma kan la bawh a. Kut hnawthawktute'n nuam zawk leh hahdam zawka hna an thawh theihna turin ramhnuai an huan lo ramah te eng pek dan kan ngaihtuah a. Tun hun kal mekah pawh hian district hrang hrang 7-a zau 16 lai ah 11 kV feeder tunah hian fit mek a ni a, an thawk mek a ni. Heng bakah hianin SEDP te Plan Works atang tein project hrang hrangte hi thawh thin a ni a, tin, hei thlasik alo thlen dawn te hian kan power hman hi a tam zual thin a, chungah kan chhiat dal tur chuan nasa takin kan thawktute hi an lo in warm-up ve thin a. Chutiang chuan, transformer tam tak thlak a ni a, a thar a tam tak bun thar a ni bawh a ni.

Tin, kan ramri lama kan sipai ten eng tha an neih ve theihna turin theihtawp sorkarin a chhuah a, hemi atana kan Finance Minister, kan Chief Minister ni bawh ina ui nei miah lova min kal tir theihna chhan hi keini chakna ni lovin, kan sorkarin kan force mite a ngaihsak vang a ni. Chuvangin, Chief Minister chungah pawh hian lawmthu kan sawi a ni. Kumina kan BE leh revise hi a inthlau viau mai a, thenkhat te'n hetiangah hian kan officer-te rinhle ngawt te kan han tum thin a. Chutiang nilovin, kan power purchase atana sum kan hman *Other Charges* leh a dang avang hi a ni pakhat a. Hei bakah hian BE a lang lo, major works eng emaw zat kan pawisa neih tam zawk hi khulam atanga lo kal a ni a, khang kha budget-ah telh hman anih thin loh avangin BE-ah khan a lo lang thin zawk a ni.

Power purchase bikah hian Covid lai khan kan dinhmun a chhe deuh a, chutiang anih avang chuan 2020-2022-ah hian leiba hrang hrangte phuhrukna tur state sorkar ina min siam sak avang hian kan lawm viau a. Nidangah chuan, 'kan Finance Minister-in min pe ta lo a lawm maw le', tih kha ka department-ah hian a tam riau a, tun tum chu lawmthu sawina hi a tam ka ti mah mah a ni. Kumin kan budget estimate-ah hian kum kal ta ai khan cheng nuai 18,697 laiin a pung a, department-a thawkte hlawh tur piah lamah heng hi chu a daih ngei dawn a ni tih a chiang sa a. Tin, kumin BE a power purchase leh subsidy-ah sum tam tham tak min pek belh bawh a, a lawmawm kan ti viau mai a; heng hi thil chhinchhiah tlak tak mai niin kan hria.

Minors works hnuaiah pawh hian sum eng emaw zat min pek belh bawh a. Hei erawh hi chu tariff filling-a inter-state leh intra-state transmission atana provision zulzuia dah, helaiah hian an rawn dah loh avangin, 'hei hi hman tura an tih a ni' tih te pawh kan hria a, kan sorkar Finance enkawltute chungah lawmthu kan sawi nawn leh

a. Tin, Central atanga sum dawn tur SMS te pawh hi kan mamawh leh ngei dawn a ni tih kan hria a, henga min pek leh zel bawh dawn avang pawh hian lawmthu kan sawi lawk bawh a ni.

Hei JERC leh ZEDA hi grant in aid-a sum pek thin a ni a, sum hi thawktute awm dan tun dinhmunah chuan an indaih thawkhat turah kan ngai a. *Other Charges* ah hian kan hmanna pawimawh ber chu - power generating station atanga power leina hi a ni ber mai a. Kan mamawh a tam chhoh zel avangin sum pawh pek belh chhoh zel kan ngai a. Mumal taka mipuite mamawh power kan pek theihna tur atan chuan kan mamawh ang ang min pek zel hi a pawimawh a, kan beisei bawh a ni. Tin, power lei zat tur hi han sawi fak hleih theih a ni lova, bill lo kal dan tura pawh sawi fak hleih theih anih loh avangin, kan mamawh zat tura hi kan sawichiang hleithei lova ni. Budget siam hunah hian heti zat bul tanna atana min pe erawh hi chu lawmthu kan sawi a ni.

Major works-a CSS atan hian nuai 732.19 chauh hi a lo lang a, hei hi han en mai chuan, 'P&E Department hian hnathawh an tum lo em maw ni le?' tih mai tur a ni a, chutih rual chuan power siamchhuahna hna te, a hrui zam hna te, sub-station siam hna te kan thawk a ni a. Hengte pawh hi state flagship programme, SEDP atang te, NEC atang te, NECIT atang te hian Pu Speaker, pawisa hi hmuh thin a ni a. Chuvang chuan, Chiang taka dah theih a nih thin loh avang hian RE ah hian a lo lang leh mai thin zawk a ni a, heng centrally sponsored scheme - DDUGJY, IPDS, NERSIT-ah te tunah hian kalpui mek a ni. IPDS atana kan sum hmuh tur erawh hi chu *major works* ah tih lan a ni bik thung a. Hei hi DDE, UGJY leh NERSIT atang tihlan chian a la nih loh avangin a dang hi chu tarlan hleih theih a la ni lo a ni. '*Revamp Distribution Sector Scheme*' kan ti a, hei hi chak taka kalpui mek a ni a, Ministry of Power-in prepaid metering atan hian cheng vaibelchhe 178.92 lai min pe a. Tin, loss tihhnamna atan hian, infrastructure siam nan cheng vaibelchhe 233.82 lai min ruahman sak bawh a. Hengte hi infrastructure awm sa tihchangtlunna tur ni pah fawmin sanction hmuh thuai kan inbeisei a, tender vek tawh a ni. Tin, *Smart Metering* hi pilot project-in Zarkawt lai saw tih a ni a, hei hi February thlaah hian hman theih tura beisei a ni nghe nghe a ni. Chutiang chuan, hydel project lam atang hian power hi tihtham kan siamchhuak lova, keimahni hian; kan han siamchhuah chhun pawh fur laia innghat deuh a nih hlawm avangin, thal lai chuan kawlpheha hi kan state hian kan siam chhuak tam lo hle a ni. Chuvangin, thal laia tih theih ve chi solar lampang kha nichina ka sawi tawh ang khan 20 mw, Vankal-ah tunah *trial run* tih mek a ni. Tin, Keifang daiah 10 mw pechhuak thei tur kuminah ngei hian tan kan tum a. Tin, NABARD sum hmangin Thenzawl-ah 10 mw pechhuak thei tur siam tum a ni bawh a, sum leh pai NABARD atanga hmuh beisei a ni. Tichuan, thal laia tih atan chuan tender kan hawng tawh a, 52 mw lai pechhuak thei tur a ni; a hmun min pek dan chuan. Thil dang dangah hian tam tak tih kan nei a, amaherawh chu kan sawi duhtawh tawh mai ang a, kha lai kha chu.

Art & Culture hi reilote hun kan hmang ang. Art & Culture Department hian kumina kan hman mek hi cheng nuai 1059 a ni a, hemi hnuai hian kan kal chho dawn a. Chapchar Kut kan hma lawkah a awm a, hemi atan hian kan sorkarin cheng nuai 100 lai min dah sak a, min pe leh fel tawh niin ka hria a, a lawmawm khawp mai a. Tuna pawisa kan hmu tawh leh kan hmuh tur, kan hmuh mek atanga kan chhut chuan, hnathawktute hlawhah 64.36% lai a kal a. Chutiang a nih chuan 34% pawh tling lo 33.7% vela kha hnathawhna tur chu a ni mai a, office han enkawl na te a ni.

Lai District auditorium hi cheng nuai 473-in kan sa a. Tin, Art & Culture hian sorkar hriatpuiin NGO library 513 tunah hian kan nei mek a, chumi zinga 132 chu *Grant in Aid* a sak an ni a, heng hi state sorkar leh RRRLF tangduna sak thin a ni. District Museum, Lunglei hi cheng nuai 919 zet senga sak mek a ni a, 80% zawh a ni tawh a ni. Kum 2023-24 BE ah hian nuai 1095.36 kan nei dawn a ni a. Tichuan, Art & Culture Department hnuai hian office establishment hrang hrang hi kan awm ve a, tlem te anga lang, tamtak kan nihna lai a awm ve a. Tribal Reseach Institute te, Mizoram State Museum te, Mizoram State Archive te, Mizoram State Library te, District Library leh District Art & Culture Office, Lunglei te, Archeology Wing leh Institute of Music and Fine Arts Wing te kan awm ve duah a ni. Art & Culture hian kan culture humhimna leh pipute hmun hlui cheibawla enkawl hi kan hna, kan sum hmanna deuh ber a ni a. Heta tana kumin budget-a min dah sak hi kan lawm viau a. Tin, NGO zawng zawng hian tanpui an dil a, kan neih tawh hi kan han pe ve thin a. Hengte hi min hriatpuiin kan CM zahawm tak hian a tul angin kan dil ang te phal taka min pek ve thin avangin SEDP sum hi kan eipui thin a, kan lawm hle a ni.

Tin, Lehkhabu ziaktu hi, Mizote hi lehkhaha ziaak leh chhiar tam hnam kan ni a. Lehkhabu publication atana nuai 10 min han pe reuh thin hi a lawmawm viau a. Amaherawh chu, kan kal zel dan ngaihtuah hian kan thangtharte lehkhaha thiam tak tak, sorkar hna emaw, thildang hna emaw pawh nei chuang lo, mi-lungleng, sum leh pai lama tla chhia, rilru lama hausa hnam kan ni a. Chuvangin, kan sorkar-a, Art & Culture Department in lehkhabu kan lo leisak thinna te hi min pek belh thei se la, nakin zela kan dinhmun hi tun atanga kum 100-ah chuan hriat a ni tawh mang dawn lo, ziaka a awm loh chuan. Chutiang hre tur chuan hnampui apiangin an culture leh pipute sulhnute hi an humhalh nasa thin. Chutiang chuan sum hi min pek belh se kan ti khawp a ni.

Tin, 2022-23 chhung khan central sorkarah NEC project eng emaw zat thehluh a ni a, chung atang chuan state matching share a ngai dawn a. Hengah hian ngai ngei tura kan ngaih zual bik a awm a. Provisional approval kan hmuh tawh – ‘Construction of Tagore Cultural Complex’ tih te, ‘Construction of Aizawl Institute of Music and Fine Arts, Tuivamit’ tih te, ‘Our Heritage, Our Treasure, Vangchhia’ tih te ah hian nuai 2,400 lai a awm a; heng lo pawh hi thehluh tam tak kan nei a. Amaherawh chu heng hi tak tak ram a thleng dawn em tih la hriatloh a ni a, ka sawi lo mai ang a. Chu chu Art & Culture Deptt-a ka sawi theih ni mai se.

Demand 33 - Land Resources, Soil & Water Conservation hi nikumah, tun kan hun hman mekah hian cheng nuai 1980.57 kan hmu a. Hemi hnuai atang hian RKVY leh NABARD kaltlang tein Soil Conservation hian district hrang hrangah hna kan thawk ve a. Tin, 2022-2023 budget-a dah theih nilo, RE a dah leh tur centrally sponsor scheme eng emaw zat RIDF atang te leh NABARD atang te hian kan hmu ve thin a, heng hi BE ah a lo lang dawn a ni.

Tin, kum kal meka kan sum hmuh atang hian Smoke-House 50 lai kan sak sak tawh a, chumi piah lamah tunah hian rubber chingtute tan tiin a khawl - a chemte leh a hnaina tur te, a lo dawhna te leh tuthlawh te, suahdur te, pipe te thil chi hrang hrangte hi kan ngaihtuah sak ve thin a. Tuirial catchment area treatment project sum hi eng emaw zat kan hmu ve a, hei hi soil conservation hnathawh nan hman a ni a, SEDP-family oriented atangin chhungkaw 2300 hnenah kuhva chinna tur sum kan pe a; chhungkua 3317 hnenah hmunphiah chinna tur sum pek a ni bawk a ni. Commerce & Industries Department nena thawk ho hian kuhva hralh harsatna kawngah hma te kan la ho thin a, sut kian pui ngei an tulin kan hria a. Chuti rual chuan kumkhat chhunga kuhva kan ei ral zat hi AMC huam chhungah hian data fel tak neih ni se kan ti a, hemi kawnga kan intodelh theihna tur hian theihtawp kan chhuah ve mek a ni a. Tin, kuhva processing atan hian NEC-ah project kan siam a, vaibelchhe 5 lai vawm luh a ni a, hei hi hmuh kan inbeisei a, NEC nen tunah hian kan indawr mek a ni.

Tin, Automotive Tyre Manufacturing Association (ATMA) hian Rubber Board of India te nena thawhhona NE-MITRA Mizoram leh North East a rubber lama hamthatna turin hmalak chhoh mek zel tunah hian a ni a, nimin maiah khan Rubber Board of India, Executive Director Dr. K.N. Raghavan pawh a lo kal a, a hovin growers meet te niminah Chanmari YMA Hall-ah kan va nei a, a hlimawm viau mai a. Anni hian Manimalayar Rubber Pvt. Ltd. ho hian Republic Veng-ah outlet min rawn hawn sak a, niminah khan Executive Director hian a zuk hawng nghe nghe a. Heta tang hian rubber chingtute mamawh hrang hrang lei theihin a awm dawn a, hmalam panna ropui tak niah kan ngai a ni.

Kumin kan Budget 2023-2024 ah hian kum dang ang lo deuhin kum kal ta budget aiin cheng nuai 86.57 laiin tihblem a ni a, hei hi thawktute pension avang leh vanduaina tawk, chatuan ram min pan san ta te salary kha han paih a ngai lo thei lova, hengte avang pawh hian a ni ang tih kang ring a. Chutih rual chuan department hmalakna tur hrang hrang - RKVY te, NABARD te leh centrally sponsor scheme dangte hmuhna tur, tunah hian engzat chiah nge kan hmuh dawn kan hre lova, kan hmu leh ngei kan ring a, chu chu tun kum budget estimate-ah hian a lo lang hman lo a ni.

Tin, hmalakna tur hrang hrangte pawh hi kan nei ve a, RKVY leh NABARD te hnuai hian Soil Conservation Enhancement kalpui mek a ni a, kum 2023-2024-a NABARD RIDF - Watershed Development Works 2nd instalment pawh hmuh kan

inbeisei a ni. Rubber, kuhva, hmunphiah leh coffee te hi soil-plant crops a ni a, hengte hi hmun tam takah mi tam takin hlawhtlinpui an awm tawh a, amaherawhchu, duh angin lakchhuah theih a ni lova. Oil palm te pawh agriculture crops a ni a, heng kawngte nen tam tak a awm a. A kawng siamna hna hi ‘ruahman ni se’ kan ti a, kuminah hian nuai 600 chuang laiin sengin cement concrete, cement pavement kan ti dawn a ni. Hmachhawp lian tak Tlawng Lui humhalh project kan nei ve a, MEC lamah he project hi thehluh a ni a, Tlawng Lui ti bawlhhlawhtu plastic, leivung leh thil dangte lo dawlna tur *spoil bank* siamna tur kan thehluh mek a ni. Kha kha kham lo takin soil-ah ka react theih ni se.

Tin, hmanni a Pu C. Lalsawivunga, MLA zahawmtak ina min zawh – “Rain-water harvesting hi kum 2 chhungin engzat nge siam a nih” tih kha, amah a lo chhuak leh daih tawh si a, khawi atang emaw chuan a lo ngaithla ve ang chu maw.. (**Speaker:** Chhiat tawhna lamah. Arawn dil thlap a, a haw e.) Awle. Kum 2021-2022 khan hmun 7-ah unit 31 siam a ni a, 2022-2023 khan hmun 9-ah unit 160 ah heng tuizem hi siam tir a ni a, a vaiin 191 lai siam a ni.

Minute 39 ka hmang tawh a, tunah chuan a tawpna atan. Hei hi chu a thui vak lova, amaherawh chu min rawn tibuai anih chuan a thui viau thei bawh a. District Council & Minority Affairs Department hi Pu Speaker, kan engto vak lo em maw ni, MLA pathum chauhin an sawi a. A tawp lamah khan kan Opposition Group Leader khan arawn khar tha khawp a, a hun zawng zawng kha arawn hmang a. Opposition group leader tihah chuan ‘a mawi em aw’ ka ti a. A mawh phurtu ber ka ni a, keimah hi min han bei vak chu ni se la a awm ka ti a. Amaherawhchu Sports Minister, a demand pawh kan la sawiho dawn reng a, a han bei vak mai kha chu - nimin lama amah nen an inhniaa a thiam lo zawk a niha, ngaihdam a dil kha, ‘a ngai lungrun ta lutuk a, phuba arawn la nge ni’ tih te kha ka ngaihdam deuh a ni a.

PU LALDUHOMA : Pu Speaker, chutiang lam a ni lova. Hei hi Sports Department hnuai a ni lova, PMJVK sum hi District Council & Minority Affairs hnuai a ni a. Chuvang chuan, a sawina tur dik tak a ni, hei hi.

PU R. LALZIRLIANA, MINISTER: Pu Speaker, a thawktu kha Sports Department a ni a, khami hnuaihan khan a chhiat leh a that chu an sawi tur a ni a. A pek dan diklo a tih kha chu a duh chuan arawn sawi thei tho ang a. Amaherawhchu, a pek dana chungchangah midang han tikai kher lo khan, keimah hi consultant, a lo ruaitu ka ni a, a mawh a awm chuan ka phur vek tur a ni. Chuvang chuan, keimah hi beihtham lohah min ngai deuh nge ni, tikhan midangah a vawm per daih mai a. A lawmawm viau rualin, han ngaihbel tur khan phuba lakna remchangah a hmang em maw ni aw ka ti deuh a. Kan senior MLA-a ni a, hetiang hi chu a nachang pawh hriaa, mite pawh zirtir zawk tur niah kan lo beisei a; a pawh ka ti khawp mai. Khatiang, House-a mimal intihna hi thleng tawh lo se la. Amah pawh, thu kalhnu a ni a, hman deuhah ban a ni a. Ban a ni maw

kha? (**Speaker:** Aw, ni e.) Ban a ni a, Pu Speaker, khalaiah pawh khan ama lo tawrh hnu a ni a. Kha lam thleng thlenga thil a han sawichhuak duh kha, a lehlamah chuan ka khawngaih angreng khawp mai a.

Tin, District Council chungchang a rawn sawiah khan han react lo theihloh a ni a, amah chauh rawn sawitu kha a ni si a, *direct funding* chungchang kha. Hetiang hi sawina tur a ni ang em? MLA zahawm tak, senior MLA a ni a, Upa a ni a, Group Leader a ni bawk a. Helaiiah hian MKHC inthlan thuchah No. 5-ah hian - '*Political Party te'n a taka tihtheih loh tur zuara mipui bumna ang thil intiam loh ni se*' tih a ni a. Hei hi vote zawna atana intiamna a niin kei chuan ka hria a. 'Keini min thlantlin chuan, direct funding hi kan pe ang che u' tihna hmanrua, a hmawr tawnga kan MLA zahawm tak hian a rawn hmanna niin ka hria a, a pawl ka ti khawp mai a.

PU LALDUHOMA : Pu Speaker, khati zawnga an ngai a nih chuan, an ngai ni mai se la. Hei hi chu kan *stand* a ni a, a rei tawh a. Mara District Council inthlanah pawh khan kan lo aupui daih tawh a, chutianga tuna thuthara ti mai kan ni lo; kan *stand* awmsa ka han sawi nawn a ni mai.

PU R. LALZIRLIANA, MINISTER: Chumi kan sawina chhan chu - helai political party pakhat ina kan duha kan pek a, kan pekloh theih a ni lova. *Sixth Schedule* hnuaiami a ni a, Sixth Schedule hi India Constitution ..(**Pu Lalduhoma:** A dik chiah lo.) Ka sawi dawn a lawm. I duh leh i rawn react dawn nia.

PU LALDUHOMA : A dikchiah lohna chu - Mizoram Sorkar an rawn rawn a ni. 125th Amendment Parliament-in an tih dawn khan an rawn rawn a, tuna kan sorkar pawh an rawn rawn a, *negative comment* pek anih avang khan a harsa ta a. Keini chuan negative comment kan pe dawn lova, *positive comment* kan pe dawn a ni. A pe theitu chu kan ni lova, amaherawhchu, kan ngaihdan a pawimawh a, min rawn dawn a ni. Rawn tawh pawh a ni, tunah hian. Chu chu a ni a; kan *stand* ka han sawi mai a ni.

PU R. LALZIRLIANA, MINISTER: Tichuan, hei hi ministry hmasaah pawh khan ka chelh reng a ni a. Chuvangin, keini Congress party pawh khan 'kan ti ang' kan ti a, kan va zuar a ni. Amaherawhchu keini chauh hi Autonomous District Council nei kan ni lova; State dang - Bodo ramah te, Meghalaya-ah te leh Karbi-ah te an awm a. (**Speaker:** Maharashtra-ah te.) Tripura te. Chungte chu an remtihna lak vek a ngai a ni. Chumi a nih loh chuan Sixth Schedule hi a amend theih mai loh reng reng. Chuvangin, keini ina kan tih theih loh hi vawinah hian inzawrhna atana hetiang tih mai mai hi thil tha lo tak niin ka hria a. A pawl khawpin ka hria a ni.

PU C. NGUNLIANCHUNGA : Pu Speaker, *Point of Information* – Ka han sawi vel awk teh ang, khawngaih. Ka sawi ve lawk teh ang; Please.

Pu Speaker, khalaiah khan, Congress hunah kha kan Chief Minister kal ta Pu Lalthanhawla khan min recommend a, Pu CL Ruala, MP pawh khan min remcommend a, Congress khan state-ah chuan harsatna an nei lova. Mahse vawiin ministry chuan 125th Amendment-ah khan Parliamentary Standing Committee-a din a, chu chuan Mizoram sorkar ngaihndan a rawn rawn a. Council-in *Thunehna-lian* an neihna tura kha vawiin ni sorkar hi chuan a remti lo fai deuh vek a, ‘a theih loh’ tiin a chhang a. Chu zawk chu a nihphung a ni e. State hian a pek theih pheizawng a ni hauh lo. Mahse state a rawn rawn a, state erawh hi chuan a positive, a chhe zawngin, a *pawmlo* zawngin thunehna lian an neihna tur a recommend a ni.

PU R. LALZIRLIANA, MINISTER: Keimahni hian duh eng ang mah ila, midangin an duh ve loh chuan; state pakhat pawhin a duh loh chuan; an lungrual loh chuan an ti dawn chuang lova. Chu chu kan kalphung a ni.

PU B.D. CHAKMA : Pu Speaker, *Point of Order* - Ka hriat danin Meghalaya-ah pawh Chief Minister-in a pawm vek a, Assam-ah pawh Pu Himanta Biswa Sharma pawhin a pawm vek a, Tripura-ah pawh khatih hunlai khan Pu Biplab Kumar Deb khan a pawm vek tawh a ni. Mahse, Mizoram chauh a pawm lo kan ni tih kha ka sawi duh a ni.

PU R. LALZIRLIANA, MINISTER: Pu Speaker, hetiang tawngka ringawta pawm vek tawh, ni vek tawh, hre vek tawh nia insawi hi a ziak an rawn lekkan loh chuan, a document a awmluh chuan, mi bumna mai mai vek a ni. Nakin lawkah kan inthlang dawn a, ‘vote zawna mai mai a ni’ tih hi kan hriat a ngai a ni.

PU C. NGUNLIANCHUNGA : Kha lai kha chu amahin a chhan ang deuh khan, kan la pe thei ang, a document chu. Mizoram sorkar chiah hi a commit thei lo chu a ni.

PU R. LALZIRLIANA, MINISTER: Kum 10 chuang ka chan tawh a ni a. He laia ‘Congress Chief Minister-in a remti’ tih pawh kha, a thuruk chu ka hre vek; mahse hotu hluite phawrh mualpho ka duh lo. Sorkar atanga kan tih zawng zawng kha ...

PU C. NGUNLIANCHUNGA: Pu Speaker, khatih lai khan Parliamentary Standing Committee a la awm lova, Parliament-ah a bill kha a la lut lova.

PU R. LALZIRLIANA, MINISTER: A hretu ka ni; Hengho hian engmah an hre lo. Khu lama kan thawn thlaka kha Pu Nguna te ho hian engmah an hre lo, Pu Speaker.

PU C. NGUNLIANCHUNGA: Khalai kha chu a hresual zawk a ni. A hrechiantute kan awm. Minister kum sawm anih chhung khan comment an rawn dil lo.

PU R. LALZIRLIANA, MINISTER: Pu Speaker, *hre ber* ni awma engkim sawi hi a tisualin ka hria.

SPEAKER : Ngawi rawh aw.

PU C. NGUNLIANCHUNGA: Parliamentary Standing Committee khan tuna a dil zawk an comment duhloh avang khan ...

SPEAKER : Pu Ngun, Pu Zira hi a te a tein, a hre zawkin ka ring tlat mai.

PU C. NGUNLIANCHUNGA: Pu Speaker, khalai a hriat fuh loh kha chu khawngaih takin ...

SPEAKER : A hre zawk ang. A chhan chu kum 10 chuang a enkawl tawh a ni.

PU C. NGUNLIANCHUNGA: Tuna bill-a hi Parliament-ah a lut tawh a. Chutah chuan Committee an din a, chu committee chuan Guwahati-ah meeting an nei a, Mizoram sorkar hnenah pawh a rawn zawt ta a ni.

PU R. LALZIRLIANA, MINISTER: Meeting an neih zawng zawng pawh ka hre vek. Helaiah hian an rawn rawn a, kan Chief Minister ..

PU C. NGUNLIANCHUNGA : Aw, i hre vek. Khamiah khan in commit duh lo a lawm.

SPEAKER : Awle; lo tibuai tawh lo la.

PU R. LALZIRLIANA, MINISTER: Kan Chief Minister tawngkam pawh ka hria, sorkar committee-ah pawh khan ka tel reng. Chuvangin, hotute phawr mualpho hi a tul lo. Chuvangin, *lem kan va der* mai mai a nih kha. Saw lamah Congress khan vote zawn nan kan va hmang mai mai a, anni ho hian an lo awih ve em em a. Kha chauh kha a ni. A ho tak tak a nia.

PU C. NGUNLIANCHUNGA: Pu Speaker, vawiina kan sawi chu -125th Amendment tur Parliament-ah a lut a, chuta tang chuan Parliamentary Standing Committee an din a.

PU R. LALZIRLIANA, MINISTER: Guwahati-ah, Hotel Radisson Blue-ah ...
(*interruption*)

PU LALRINTLUANGA SAILO: Pu Speaker, Minister hian a sawi tur sawi teh se a. An duh tawkin thu an sawi tawh a. Thu hi sawi tir mai rawh.

SPEAKER : A tawk tawh e; a tawk tawh. Khalaiah kha chuan engmah in sawifel dawn chuang lo.

R. LALZIRLIANA MINISTER: Pu Speaker, au rin vak kha a tirah khan ka thei lo tih kha ka sawi tawh a. Ni dang chu ni sela ka au nasa ngawt ang.

A awm ka ti a, tuna budget session phei hi chu, tun bak hi Pu Nguna te ho chu an tel ve tawh lo maithei a. A chhan chu, a bial Tuithlang lam saw an chhe em em tawh mai si a; kan candidate tur hi a feh phei reng mai a, a ngaihawm sa in ka hria a. A tawng-theihna te, dawt leh dawt lem lo pawh, thutak leh tak lem lo pawh rinawm deuha sawi ve thei a ni a, kan inang tlang deuh thual maithei bawk e.

Tichuan, ka han sawi ve tawh ang a. Minute 15 tunah khan a kal a ni. Minute 51 a ni tawh a, darkar khata khung ngei ngei tum ka ni a. Minute 15 a pelh pawhin, darkarah chuan ka khung tih min lo hriatpui dawn nia.

BE hi kuminah chuan District Council & Minority Affairs-ah hian cheng nuai 49,203; hemi hnuaiah hian han en hian, nichina an sawi ang khan, kan duhsak loh vang ni lovin, sum neih chin tawk hi pek loh theih loh a ni a. An budget atanga han thlir hian a thawktute hlawh hi 93% lai a ni a, a tam hle mai a, hnathawhna tur chu a awm vak lo a ni. Tin, ADC te hi *Grant in Aid* a pek thin a ni a, chu chu *salary* leh *non-salary* a then a ni. *Salary* chu an hlawh lam tur kha a ni mai a, *non-salary* chu hna hrang hrang thawh vena tur leh an office inenkawl na tur a ni a; chu pawh chu an ‘indaihlo a ni’ tih kha a Chiang reng a; tunhma atanga hei hi chu lo kal tawh a ni a. Kum kal ta chung khan *Grant for creation of capital assets* hnuaiah hian CSS sum hmuh thin a ni a. CADC-ah chuan *construction of students’ hostel* atan hman a ni a, hei hi NLCPR atanga hmuh a ni.

Tin, *Major works* ah hian CSS atangin cheng nuai 311.85 hmuh a ni bawk a. Hei hi 2021 ami tawh kha a ni a, mahse central-in pawisa an rawn release tlai avangin 2021-2022 budget-ah khan a lang hman lova, revalidate dil a ni a. 2022-2023-ah PMJVK hnathawhna atana he sum hi rawn kal a ni. Autonomous District Council hi an hlawh bakah sum awm hi ‘a tam lo’ tih kan sawi tawh kha. Chung te anih avang chuan, project siam thin a ni a, a concern ministry leh NLCPR ah te, NEC ah te helai sorkar kaltlangin dilpui an ni thin a, chung atang chuan hna an lo thawk ve thin a ni deuh ber mai. Kumin chhunga DC&MA budget punna hi - Salary GIA ah nuai 1373.15 in a pung a ni. Chutih rual chuan nikum revise estimate pawh a pha chiah lova, chuvangin, kumdang ang bawkin additional allocation kan pek leh a ngai dawn a ni.

Nichina kan sawi tawh ang khan, ADC hrang hrang pathum an awm ve a, LADC-ah GIA *salary* atan nuai 19942 pek a ni a, tin, *non-salary* ah nuai 1360.50 pek a ni bawk a. MADC-ah hian GIA *salary*-ah nuai 16,517.86 pek a ni a, tin, *non-salary* ah cheng nuai 1,230.62 a ni. CADC ah GIA *salary* ah hian nuai 10861.61 a ni a, *non-salary* ah cheng nuai 662.98. A vaiin, kan sawi tawh ang khan nuai 50576.29 a ni.

PMJVK kha kan sawi nasa khawp mai a, hei hi sawi hlawh ve tur a ni a, kumdang aiin sum tuna kan hman mek hi a lo kal tam em avangin sawi hlawh awm pawh a niin ka hria a, a lawmawm pawhin ka hria a, hetia han sawikhawm ve hrim hrim hi. Tichuan, ‘perspective plan 2025 thlengin rawn siam rawh u’ an ti a, helai ah hian crore 700 chuang kan siam a; a concerned department hrang hrangte siam turin kan ti a. Chungah te harsatna nei an awm anih chuan ‘kan consultant te in ruai thei ang’ kan ti a, an ni pawhin an rawn ruai a, an lawm viau a ni. Tichuan, Department DPR, Autonomous Distric Council chauh an ni ta lova, Mizoram pumpui hi a huap a. Chuvang chuan, a concerned pawh a zau deuh tak avang khan DPR siam pawh an tam ta viau a. Hei hi state sorkar, kan department-ah a lo lut a, chuta tang chuan State level committee-ah a lut chho a, an niin awm an tih kha Ministry of Minority Affairs-ah an pe thla ve leh a. Chutah chuan PMJVK guideline-in priority sector deptt. a thehluk zinga mi ngei kuminah hian Sports leh Education sector-ah te leh, IT ah te sum kan hmu ta a ni. Chu chu nichin deuha kan han sawi liai liai te pawh kha a ni a, hei hi min pawmsak hmasakah an rawn nei mai a ni.

Tin, *centrally-sponsored scheme* hrim hrim hi kan hria a, a bawhzui tua zir a ni a, tun hma pawhin hetiang hi PWD-ah hlir a kal thin a. Chuvangin, eng emaw quarry an rawn siam hian a chhan lawk thei thin lova, kum 4-5 sanction pek tawh chhunzawm hleitheih loh a awm thin a. Chuvangin, heng hi ti danglam ila, ‘a thawk ve thei te pawh siam ila’ tiin sorkar hmasa khan kan han ngaihtuah chhuak a, chutiang chuan, tunah hian firm hrang hrang din a ni a. Khatiang khan firm tena a hmuna an zu bawhzui loh chuan thil hi hmuh mai mai theih a ni tawh meuh lova. Chuvang chuan, tuna kan firm hrang hrangte pawh hi ‘a hmuna an kal taimak avanga hmu an ni’ ti te pawhin kan hria a a ni. Tichuan, Ministry-ah kan theh thla a, a Ministry chuan a concerned Ministry - DPR project neitute Ministry-ah khan Education a ni emaw, Sports a ni emaw khatiang khan an han theh pheih ve leh a. An niin comment an han siam a, chungte nena inrawn tlanga sanction rawn tih thin a ni.

Kan ngaihthlak tawh ang khan, project 84 tunah hian thawh mek a ni a, project 3 zawh tawh a ni a, tunah hian. Tin, PMJVK hi kan inrin hmain, a lehlahmah central sorkar hi a tha khawp a, sum min rawn pe vak mai a, keini a department enkawltu DC&MA hi department zawng zawnga te ber kan ni awm e; staff ngah lo ber kan ni a, chu chuan vaibelchhe heti zat monitoring hi ti tur kan ni. Chumi atan pawh chuan Adm. cost 2% emaw min pe tur anni a, chu chu min pe bawk silova, IT cell dina khatianga ti zung zung tur a hmunah, district-ah te kala khatianga ti tur kan ni a, vawiin niah hian

chu chu kan ti thei lova. Chuti chungin hnathawh tur tam tak correspondent a lo thleng a, a thawktute hi an indaih lova, an khawngaihthlak em em a. Tunah tak phei chuan kan hotute an awm a, kan DPR te, kan assistance fund te min sawi sak a. pakhat, pakhat pension mai tur anni bawk si a, a thar min rawn pe a. Mahsela a thar hian thil harsa lutuk hi chu amahin a ti thei dawn lova, chuvangin a pension lo zawka kha min lak kir leh sak ula kan duh a ni; thil chinchang hria an awmluh chuan, kan lo inthlahdah avangin sorkar hmasa lamah pawh tunah a lo lang a, vaibelchhe tam tak kan dawn tur kan dawn loh phah a; khatiang khan thil hi a awm ve palh ang tih a hlauhawm a. Vawiin hian assistance fund chungchang mah ni se helaiah hian ka han ngen duh a nih chu.

Tin District Council-ah hian power tam zawk pek sorkar hian kan duh a ni; kan duhsaklo a ni hauh lova. Amaherawhchu tunah hian Mara te, Chakma te leh Lai te - an pathum hian budget-ah hlawh tihpun te pawh an rawn dil a, an rawn siam a, an rawn pass ve vek a, an rawn theh phei a, chu chu ngaihtuah a ni a. Anmahni hi sorkarin kan duhsak lo a ni hauh lova; kan duhsak a, a tun kum buget-ah pawh hian heti zat lai khan a pung a ni a, a punna hi a tam em em a ni. Chutiang anih rual chuan, Constitution Sixth Schedule-ah hian ADC te mawhphurhna para 3-na ah ziaak a ni a. Chungah chuan - North Cachar te, Karbi Anglong Autonomous Council '3A' ang te leh Bodo Territorial Council '3B' ang tein thuneinna sang tak Mizoram ADC te hi pekbelh an ni tawh a, hengte hi thenkhatin, 'Sorkarin an ti duh lova, an duhsak lo che u; chuvangin heng hi an pek belh duh lo che u' an ti a, diklo taka thu veivir te a awm thin a, a paw ka ti khawp mai a. Heng hi mipui rilru dik lova hruaikawina a niin ka hria a.

Hetih rual hian, a nihna dik tak chu - Sixth Scheduled-ah hian Mizoram ADC pathum-te hnena thuneihna pek bak hi Mizoram sorkarin Sixth Schedule-ah hian subject 19 tunah hian kan pe mek a, ADC pathumte hnenah hian; chungte chu 3A leh 3B ah te hian enchian chuan hmuh theih a ni a. Mozoram Sorkar ina subject pakhat hnuai kan dah - Art & Culture hi thensawmin, sixth schedule - para 3B hi Bodo Territorial Land ah hian thu neihna kha keini ina Art & Culture hnuai a kan dah Cultural Affairs te, Library Service te, Museum & Archeology Institution te, Tribal Reseach Institution te hi Mizoram sorkara Art & Culture Department hnuai, department khatah kan dah vek a. Hengte hi anni chuan department 4-5 tea an lo then avangin, thuneihna nei tam ta viau ang khan an inngai a, 'chutiang chu a ni lo e' tih hi vawiin niah hian kan sawi tel duh a ni.

PU C. NGUNLIANCHUNGA: Pu Speaker, zah lovah min ngai lo sela, khawngaih takin kan Minister khan thil kha a hre chiang lo a ni.

Sixth Schedule hnuai a awm kan ni a, Sixth Schedule thuneihna kan nei ve a. Sixth Schedule hnuai ah chuan khatiang khan Art & Culture kha then darh a ni lo. Art & Culture kha kan then darh lova, kan neih saah Art & Culture Department pangngaiin a kal ve mai a ni. Khatah khan Library te chu Art & Culture hnuai ah a awm a. Kan

minister hian a concern hi a hre chiang lo a zawk a ni, Pu Speaker. Khatiang zawnga kan thu neihna sawisaka kha chu a dik lo. Pathian khawngaihna a zarah

PU R. LALZIRLIANA, MINISTER: Ngawi rawh; Sixth schedule hnuaiiah tunah hian subject - department 19 pek a ni tawh a. Hetiang an rawn dilnaah pawh hian midang entawnin, ‘heng hi, heti zat an nei a ni’ an ti a. Chuvangin, heti zat an neihna chhan hi he department pakhat atang hian, department anga chhiarin panga laiah an rawn then a, chu an then zawka chu tunah hian ka rawn sawifiah a ni.

SPEAKER : A tawk e. Pu Ngun, duh tawk tawh rawh. I duh ang anga ngaihthiam loh zawng zawng hrikthlakna tur a ni lo. Duh tawk tawh rawh le.... *(interruption)* Duhtawk tawh rawh; khati em em bik tur a ni lo. Mi thusawi laia vawi sawm dawn din kha a dik bik lo; khatiang em em kha chu a dik lo a nia. House hi zah ve bawk tur). Tin, ‘*Point of Order*’ in ti a, ka ngai thiam che u a. *Point of Order* chu - a thusawi lai meka ‘kan dan leh constitution emaw te nena inkalh a ni’ tih lai kha kan *Point of Order* tih tur a ni. ‘*Point of Clarification*’ in in kal tawh dawn nia, nakinah hriatthiamloh in lo neih chuan. Le, chhonzawm rawh le.

PU R. LALZIRLIANA, MINISTER : Pu Speaker, House hi i vawng zahawm ka ti a, ka lawm ngawt mai. Hetianga a hun lova rawn inrawlh fo te hi intihtheihna chi chu a ni lem lo khawp mai.

Tichuan, heng ka department chante Demand hi he House zahawm tak hian min pass pui turin ka rawn ngen e –

Demand No.	Purpose	Amount (in ₹)
23	Art & Culture	11,95,63,000.00
27	District Council & Minority Affairs	5,05,76,29,000.00
33	Land Resources, Soil & Water Conservation	18,94,00,000.00
39	Power & Electricity	8,31,85,91,000.00
TOTAL		13,68,51,83,000.00

Ka lawm e.

SPEAKER : Awle, tunah chuan kan Minister zahawmtak Pu R. Lalzirliana’n, heng a hnuia a department chan demand-te :-

Demand No.	Purpose	Amount (in ₹)
23	Art & Culture	11,95,63,000.00
27	District Council & Minority Affairs	5,05,76,29,000.00
33	Land Resources, Soil & Water Conservation	18,94,00,000.00
39	Power & Electricity	8,31,85,91,000.00
TOTAL		13,68,51,83,000.00

House ah pass a rawn dil a. Remti apiangin “Remti” ti rawh ule. (**Memberte:** Remti.)

Remti lo kan awm em? Kan awm chuan “Remti lo” ti ula. (*Member remti lo an awm lo.*)

Awle, tunah chuan Minister zahawmtak Pu R. Lalzirliana Demand No. 23, 27, 33 & 39 te, a vaia belhkhawm cheng vaibelchhe 13,68,51,83,000.00 te hi House-in lungrual takin a pass ta a ni. (**Pu R. Lalzirliana, Minister:** Pu Speaker, ka lawm e.)

SPEAKER : Awle, tunah chuan kan Minister zahawmtak Dr. R. Lalthangliana’n kan sawihona te rawn wind up-in, sawifiah ngai a tih te rawn sawifiah sela, a Demand te House-ah pass rawn dil nghal turin ka sawm e.

DR. R. LALTHANGLIANA, MINISTER: Pu Speaker, ka lawm e. Rang deuh hleka sawi ka tum ang a; hei, a lo tlai leh viau tawh a.

Vawiinniah hian kan budget, tun term bika a hnunung ber tur kan sawiho thei hi a lawmawm ka ti a, ka deptt. chan min sawipuitute zawng zawng hnenah lawmthu ka sawi duh a ni. Health hi mi 20 in an sawi a, Higher & Technical Education hi 12 in, tin, Commerce & Industries hi mi 11, ka record danah chuan a ni a. Tin, *Assembly Question* hi tun tumah hian ka chhang tam khawp mai a, chhannaah khan thil tamtak a kal tawh a; tukina Mizoram University Campus chungchang thleng pawh khan. Chuvang chuan, Pu Speaker, House-a repeat ngai lo a awm tho ka ring a. Health hi abik takin i lo chan tawh hrep kha a ni a, deptt. pangngai anga ngaih pariat (8) vel a inthlungkhawm a, chuvang chuan, tlemin a buaithlak deuh a ni. Hei, kan official te pawh an kal tha hle mai a, deptt. dang tana entawntlak tak mai a niin ka hria. Pu Speaker, i remruatna fel tak avangin hei, chaw te kan han ei hlauh a, a rei deuh pawhin tihdan a awm thei turah ngai ila a tha awm e.

Pu Speaker, Covid hian hun rei tak kan khawvel a tibuai kha a ni a. India ram mai ni lo, kan khawvel a tibuai a, Mizoram pawh kan bang bik lova. Chutiang karah chuan vawiinniah hian hun remchang ka han lak zawk duh chu - Covid buaipui laia kan thawhpui zawng zawngte, vawiinnia kan MLA zahawm tak tak, a tua te pawh hian theihtawp kan chhuah tlangin ka hria a ni. Kan fund te leh fund lo te thleng pawhin kan insawr chhuak a, a ropui ka ti a, lawmthu sawina ka nei duh a ni.

Tin, chutih mek lai chuan sorkar deptt. zawng zawng te, kan Kohhran pawl intelkhawm MPHC-a inthlungkhawmte leh inthlungkhawm lo pawl hrang hrangte, kan NGO te leh kan Task Force leh Volunteer bakah thawktu zawng zawng - Health Deptt. chauh pawh ni lo, Zoram mipui min tawngtai saktu zawng zawngte chungah vawiinniah hian lawmthu ka sawi nawn duh a ni. Tun bak hi chu helaiyah a budget ang zawng chuan kan din ka ring tawh lo deuh hlek a, a ropui ka ti a. Pathian-in kan tawngtaina a

ngaithla a, a taka hlawhtlinna min hmuh tir hi sawi lo thei lo niin ka inhria a, ka han tarlang hmasa duh a ni.

Tichuan, Pu Speaker, ka han sawi hmasak duh ber chu - Higher & Technical Education lamah hian rei ve tawh deuh hlek ka lo thawh tawh avangin, heta tang hian sawi tan daih teh ang.

Mizoram-a University Grant Commission hnuaiah hian ‘recognised’ kan tih zirna hmun Higher Education Institution hi 23 tunah hian kan nei mek a. Chung institution zinga 19 te hian NAAC (National Assessment & Accreditation Council) atangin *valid accreditation* tunah hian 19-in kan nei mek a. Tukin zingah khan ka sawi zuai tawh a, thil lawmawm deuh mai chu - India ramah hian Mizoram hi college hrang hrang leh institution an rawn assess-ah hian, tun dinhmunah hian mark kan hmu sang ber a. Kan hriatthiam theihna zawngin - mark 83% hmuin India ramah *pakhatna* kan ni tih hi kan sawi nawn leh duh a ni. Min hnaih bertu chu Chandigarh a ni a, anni hian 60% an hmu a ni. Kan achievement hi tun dinhmunah hian ‘kan chhuang hle a ni’ tih ka sawi duh a.

Tin, chutih lai mek chuan National Education Policy, 2020 leh University Grant Commission te hian heng buaipuina kawngah hian a strict khawp mai a. NAAC accreditation paltlang lo, ‘*accredited institution* lo hi chuan financial assistance an dawng thei lovang’ te pawh a ti a, min karna khawp mai. Chungah chuan kan ti tha thawkhat hlein ka hria a. A lawmawm riauna chu - Kan thenawm State (heti zawng hian sawi ta ila) Manipur-ah hian a hmu sang ber college college chu Ryban College niin, B++ a hmu a, keiniin A+ kan hmuh lai khan. Kan inthlau hle a ni tih kha kan sawi duh hrim hrim a ni. Chuvang chuan, kan dinhmun hi ‘a chhe lo a ni’ tih kan sawi duh a ni.

Tin, sawi hlawh lo ang reng tak, ‘IASE’ kan ti a, hei hi institution pawimawh em em mai a ni a. India ramah hian kum 2-3 kal ta khan hetiang institution B. Ed. leh M. Ed. te, tin, tunah pheih chuan M. Phil. te, Ph. D. (doctorate degree) zirna te pawh kan han hawng ta a. Chutih mek lai chuan harsatna lian tak kan tawh a; tlem lai deuh khan de-recognition tur te pawhin min rawn vau a. Amaherawhchu, vanneithlak takin tun hnuaiah zirtirtu chawl mai tawh tura ngaih, an chawl palh a nih pawhin a thlakna tur npost thar vawiinah hian kan han neih belh leh thei tur te hi a lawmawm ka ti khawp mai. Chuvang chuan, he kan institution hi vawiinah hian a pawimawh hle mai a, kan hriatzau te pawh a thain ka hria a, chu chu ka han tarlang lawk a ni.

Tichuan, sum harsatna karah tun hnuaiah *contract* Professor mi pali, Mizoram Hindi Training College a thawkte regularised kan nei ve nawlh mai a. Chutih mek lai chuan *contract* Asst. Professor mi 64 tawp mai vawikhatah kan regularised bawh a, a ropui ka ti a. A bik takin kan CM, hetiang min ngaihtuahpuina kawngah a chungah pawh lawmthu ka sawi a, kan DP&AR Minister nen. Tin, covid lai, hun harsa leh hun khirha

kan awm lai leh, zirlai tam tak Mizoram pawn atanga a sang bia lo lutte college-ah admit loh theih an ni ta si lova, chuvang chuan harsatna lian tak kan tawk a. Tin, a nghet lo pawh ni se, ‘an tlawmngai thei ang’ tiin 25,000/- hlawhin casual teacher 100 kan la a, vawiin thlengin an la thawk chhonzawm a. Tin, chutih rual chuan ‘casual attendant’ kan ti a, mi 42 bawr vel kan la bawk a, chu chuan kan indaihlohna min phuhruk khawp mai a, a lawmawm hle a. Tin, tun hnaiah kan hon. Chief Minister-in *in-principle* approval minrawn pe a, casual teacher mi 36 n nei leh turah kan inbeisei mek a, financial year tharah hian. Tin, regular post fill up tur 33 nei thei turin tunah hian kan inbuatsaih mek bawk a ni.

Higher & Technical-a thil pawimawh tak mai chu – ‘RUSA’ kan ti a, hei hi an hmang tangkai khawp mai a. RUSA I & II a zo ta a, an zawh dawna RUSA III a piang dawn emaw kan tih chhung hi a rei khawp mai a. Hei, vawiin thleng pawh hian central cabinet-in thutlukna a la siam lova. Thla kalta January thla tawp lama ka zu kal khan, ‘hei hi a kar in ti-awl rei si a,’ kan ti a. India ramah RUSA zirtirtu mi 300 emaw lek awmah Mizoram-in 72 kan chang te hi a ropui ka ti a. An han thawk a, amah erawhchu *central sponsored scheme* anga hlawh la annih avangin, an tawp ta kha kan buai laih laih a. A hnuah ‘engtin nge kan kal zel dan tur’ tiin kan han zawt thin a, mahse, zirtirtu hlawh pek chhonzawm ang zawng hi chuan an kalpui thei dawn lo niin a lang a. Amaherawhchu, RUSA III hi a lo kal chho leh anih chuan leh, an tum dan anga central cabinet ina an ruahmanna hi a tihlawhtling anih chuan tlema *flexible* (pawhfan theih) dawna hriatna kan nei deuh hlek a. Chuvang chuan, college tam tak infrastructure building nei tha lo te, hostel nei tha lo te leh library nei tha lo te - khang kan phuhrukna tur te; tin, chu bakah equipment hmanrua kan leina ang chi te pawh kha, ‘kan dah leng thei awm mang e’ tihna tun hnaiah kan nei mek a ni.

Southern Campus chungchang hi, helaia zawhna kan chhan hnu pawh hian kan sawi zel tho si avangin, kan hriatchian viau ka duh a. Rei tak, chhim lamin hei hi a bik takin an vei a, kan vei a, chumi avang chuan theihtawp chhuahin a tua te pawhin kan buaipui kha a ni a. Hei ‘chhim lam’ han tih hian Lunglei District, Siaha District leh Lawngtlai District chhungah hian college hi 7 a awm a. Lunglei Govt. College, JB College, HATIM (Higher and Technical Institute of Mizoram) hi college a ni bawk a, Govt. Hnathial, Govt. Lawngtlai, Govt. Kamalanagar, Govt. Saiha College, chungho tan pawh chuan a tangkai tur bika kan ngaih mek lain, DPR Mizoram University in a siam hian he Campus hi kan lo hawng a nih ngai chuan, hemi kan MZU a subject awm lem lo ang chi te dah kha a tirah chuan an tum viau mai a. *Entirnan*: International Relation, Peace and Conflict Studies, Women & Gender Studies Commerce, International Trade Business and Finance te leh tunlai khawvela khatiang zir an awma, an chhuah hnu pawha hna han hmuh awlsamna tur chi te pawh khawvelin a mamawh chhoh zel hriain, ngaihtuaha tih chhoh te a ni a.

Tin, chu mai chu a ni lova - a DPR ah hian building sakna tur project chi hrang hrang tam tak a awm a , a tawpkhawk tak takah chuan nawr hi an ngai a ni. Hemi *in-principle* permission min han pek hma pawh hian vawi tam tak nawr thin a ni a, amaherawhchu, vanneihthlak takin eng emaw tiin kum 2020, Janury Ni 17 khan Mizoram University Vice-Chancellor hnenah lehkha a lo kal a, “Proposal for Establishment of Mizoram University Campus Lunglei regarding...” tiin a rawn ziak a. Hetah hian rem an tih thu leh ram erawh chu Mizoram sorkarin ngaihtuhsak tur ang chi khan a rawn ziak lang a. Chumi kal zelah chuan nichina kan ngaihtlak ang khan, a bik takin a bialtu, kan MLA zahawm tak Dr. Vanlaltanpuia pawh a tangkai khawp mai a. Ani hi Pukpui khua a lo ni a, Pukpui ram a lo ni bawk a, hmun min peka hi, an VC te nen theihtawp an chhuah a, tichuan ram hi Land Revenue & Settlement Deptt-in Mizoram University hmingin a pefel thlap tawh a, an tih leh tur hi chu, kan DPR pawma tih mai chu a ni. Amaherawhchu, kan innawr kan innawr a, kan inbia kan inbia a. An sawiah khan thil pakhat a awm a - Covid hian kum hnih zet Mizoram chauh min nuai lova, India ram sorkar laipui pawh post creation te, post ruak fill-up kawngah te nasa takin harsatna an tawh thu min hrilh ta a, tun thla kalta mai khan. Chumi avang chuan, han innawr luh a har deuh hlek a. Amaherawhchu, infrastructure eng emaw, a building leh khang thil pangngai kha chu a kal thei tur ang chuan kan inhriattir a Chuvang chuan Pu Speaker, he chapter hi kan beidawng lova, theihtawp kan chhuah zel ang a, ‘hlawhtlin hun chu a la awm ang’ tih ka beisei tlat a.

Tin, sawlam saw a tul pawh a tul a, tin, chhim lampangah trade activities pawimawh tak tak te kan han nei a, Zochachhuah te, Zorinpui te, Kawrpui chhuah tih te kan han tih tak tak pheii chuan, sawlamah sawn institution, Higher Education-ah University level hi kan neih hrim hrim a pawimawhin ka ring a. Chuvang chuan, neih hun a la awm ang, kan beidawng turah ka ngai lo a ni. Kha kha Higher bikah chuan ni ta mai sela.

Hei, ‘thil lawmawm’ ti ila, lawmawm ziktluak chu a ni lo maithei a, mahse, a danglam ve deuhhlekk a, Health-ah ka han lut lawk ang a.

Pu Speaker, Member zahawmtak pakhat, kan group leader Pu Zodintluanga khan a rawn sawi zuai tawh a. Niminah ZMC-ah thil danglam tak mai a thleng a. ZMC - kan State Referral Hospital, Falkawn-ah hian *conjoined twin* hlawhtling taka zai a nih thu min rawn hrilh a. ‘Conjoined twin’ tih awmzia hi ‘naute phir pianghlim, taksa inzawm emaw, taksa peng leh kawchhung inzawm’ tihna a ni a. Nautete hi February Ni 9 khan an piang a, Lawngtlai District atanga refer niin, February Ni 18 khan ZMC -ah dah luh anni. Heng phirte hi hmeichhia an ni a, an pian hlima an weigh belhkhawm chu kg 4 leh gram 200 a ni. Nautete hi an awm leh an dul a inzawm tlat mai a. Tin, chu mai chu a ni lova, mihring organ a buaithlak lai ber, ‘a delicate lai ber’ te pawh kan ti ang chu thin (liver) kha a inzawm tlat mai a ni. Chutah chuan, nautete hi an dinhmun a thatloh avangin incubate nghal anni a, an rawn dahluh hlim, ‘NICU’ an ti a, naupang ICU-a

dahluh an nih rualin ventilator support pek anni nghal a. Tin, Pu Speaker, doctor team - Dr. John Laldingliana, Surgeon leh a team te an titha khawp mai a, an thiamna thawhkhawma an khawihrawn a ngai ta a. Chutiang chuan, Pediatric Surgeon te, Plastic Surgeon te, General Surgeon te leh Aenesthologist te tangho khan darkar thum chung an zai ta a ni, nimin khan. Tichuan, thin (liver) pakhat intawm annih avangin naute pahnih hi thin (liver) pakhatin a chawm zawh dawn loh avangin naute pakhat zawk chhan nan an thin zai phel a lo ngai ta a ni. A buaithlak khawpin ka ring a. Surgery tihzawh hnu hian NICU-ah dahluh nghal anni a, hetih lai hian, vanduaithlak takin naute critical zawk kha nizan dar 6:30 khan a boral hlauh mai a, naute pakhat zawk erawh chu 'tun dinhmunah chuan a la tha rih e' tih ZMC Director-in min rawn hrilh a. A chin tur zel erawh chu hriat a la ni lo a ni.

Engpawh ni sela, regional news-ah pawh nizan khan an lo chhuah hman a, hei hi a thlalak a ni a; an inzawm dan hi a buaithlak khawp mai a. Hei hi thil thleng khat tak mai, kan Medical College denchhena kan hospital-a an han zai thei hrim hrim hi *significance event* niin ka hria a, House kaltlangin Mizoram mipuite hriat atan pawh kan sawi a nih chu.

Hei baka ka sawi leh duh chu, Pu Speaker, Health Service-a titha leh titha lo tehfung indicator pawimawh em em mai pakhat chu – Infant Mortality Rate (IMR) a ni a. Chuta SRS nikuma tihchhuahin a tarlan dan chuan, India rama nau piang kumkhat hnuai lama thih tlemna ber state-ah Mizoram hi min puang a nih chu! A ropui ka ti khawp mai. 'Kan thi tlem ber; kan survive tha ber, India ramah' tihna a nih chu. A lawmawm khawp mai. Tin, 202-a thilthleng ni tawh mahsela, a hnuah result puan a la awm lo niin ka hria a. NITI-Aayog ina ranking a tihchhuahah Mizoram chu state te zingah a titha ber nihna dinhmun min luah tir a ni. Hei hi thil lawmawm ve tak a niin ka hria a ka han sawinawn anih chu.

Kan sawi tam angreng a, kan sawi thenkhat inang tak takte pawh a awm a, 'Sub-centre ah bungrua kan nei tha lo, kan tlabal e; BP check-na, zunthlum check-na, inbukna te a awm tha taw lo' tihte kha chu, theitawp kan chhuah ve a, tun atanga reiloteah procurement kan han tifel ang a, kan hnianghnar turah kan ngai a ni. Tin, 'NHM hnuai hnthawkte hlauh la lo' tih pawh kha, thlahnih vel an la lo kha, tunah chuan an la deuh vek tawh a; tin, ASHA lawmman pawh 'an la mek e' tih kha kan inhriattir anih chu.

Tichuan, MLA thenkhatte khan an biala x-ray khawl te kha an rawn sawi a. Hei, Pu Lalrinsanga Ralte pawh hian a bial Vairengte a vei em em mai a, a tang thei khawp a. Tin, MLA zahawm tak Pu Nihar Kanti pawh khan a sawi a. 'Indian Public Health Standard' an ti a, IPHC norms hian PHC-a x-ray khawl awm hi a ngiat vak lova, amaherawhchu, mamawh in sawite kha chu kan hre tho a. Chuvang chuan, kan MLA ten in ngaipawimawh baw a, kan pe thei dawn che u in a lang a. A sawi ve lo te bialah pawh khan a nei lo te chu kan pe thei turah kan ngai. **(Pu BD Chakma:** Pu Speaker,

Chawngte CHC tan ambulance kha min pe thei dawn em?) Sawlai saw a kilkhawr nen, in vanduai a, Ambulance kha kum 15-a upa a ni a, tlem chuan a lo chhe deuh tawh a. Engpawhnise, theihtawp kan chhuah dawn nia aw.

Tin, kan MLA thenkhatte tihdan tha deuh chu - in bial chhunga contractor lian deuh te biak thiam chuan, CSR hmang pawh hian nuai ruk bawr vel man eco-ambulance te an leisak mai thin a, khatiangte pawh khan MLA thenkhatte chuan an inphuhruk ve bawk a ni. Awle, kan lo hre dawn nia. (**Pu B.D. Chakma:** Pu Speaker khawngaihin, nikum khan CSR fund atangin ambulance kan dil a, CS hnenah dil tur an tih a ni a, Pi Renu Sharma tunah chuan a awm lova; ama office ah ka va dil a, mahse outcome engmah kan la hmu miah lo a ni.) Keini pawhin kan lo ziak sak dawn cheu nia aw. Ka ziah sak chuan an hmu deuh zel tlat; ka lo hrela a ni. Theihtawp kan chhuah dawn nia. Engpawhnisela, khatianga thil tul ah chuan theihtawp kan chhuah tlang turah ngai ila a tha mai tiraw? Tha deuhin kan ziak dawn nia.

Tichuan, doctor chungchang hi kan sawi nasa khawp mai a. Nimin piahah House-ah Pu Speaker, ka rawn kal loh ni pawh khan sawi a tam deuh niin ka hria a. An han sawi uar tak tak a, Siaha District-a Pu Rokhaw bialah te khan awm lo fai vek ang khan an han sawi a, nichin, chhunah pawh khan, ‘engatinge maw ni le?’ ka han ti deuh a. Harsat hi chu a harsa, tunah hi chuan harsa tak a ni. Amaherawhchu, tuna in dinhmun hi chu Dr. Beipaduasa, MO Ayush kha Chakhei CHC-ah tunah hi chuan a awm zui dawn tih kha lo hre phawt ula. Tin, Tipa PHC-ah khan NHM doctor kha a awm a, a ban tur thu hi sorkar khan kan hre bik si lova. A la bang chiah lova; awm miah lo anga sawi kha chu, hetia in han sawi vak vak takah khan kan lo hre ve a. Engpawhnisela, a lo bang palh anih pawhin....

PU K.T. ROKHAW : Pu Speaker, Chakhei doctor kan neih lai mek kha Tlabung-ah sawn a ni a, a order pawh kan hmu tawh a, a aiawh tur tumah ruat an ni lova. Tin, Tipa doctor kha January thla khan chhuah a tum a, mahse refugee leh damlo kan ngah si avangin, khawtlang hruaitute khan, “engpawhnise thlakhat chu awm hram rawh” tiin an ngen a. Tichuan tun February thla hian a chhuak dawn a, doctor pakhatmah kan nei tawh lo a ni.

DR. R. LALTHANGLIANA, MINISTER: Sorkar thiamloh ang khan a inpuh vak theihloh. NHM doctor te pawh an tangkai thova, ‘min lo zawn teh a, sing 6-7 bawr vel hlawh chuan kan la thei reng a nia’ tiin, min hmuhsak kha kan la mai a ni. Amaherawhchu, min bansan thin a, PG te zirin an chhuak thin a; khatiang hun khaihlak deuh hlek lai kha kan nei ve thin a ni tih kha min hriatsak ka duh a. Engpawhnisela, Chhaolo chungchangah erawh chuan, ‘Siaha District Hospital-a Medical Superintendent leh CMO office atang te in doctor lo zuk depute u la’ kan ti a, a hla lutuk lo bawk a. Tunah hian PHC eng emawzat, saw lampang chauh pawh nilo doctor kan

post theih lohna a awm a, chu chu a chhan chiang taka sawi ka duh a, min lo ngaihthlaksak ula.

A chhan chu - PG specialist zirlai tunah hian mi 25 an awm a, rin ai hian admission an hmu thei riau mai a, chu chuan nasa takin min nghawng ta a. Tin, doctor PG zir 25 bakah hian kum 2019 kan sorkar atanga vawiinni thleng hian doctor pension a chhuak ta hi 22 kan nei a ni; khang nen khan han belh ta ila. Tin, chumi piah lamah chuan, doctor 4 record ah hian kan chan a. Chumi awmzia chu - doctor ruak anga ngaih theih, entirnan PG an zir chuan an awmna kha a ruak ta a, mi 51 kum 2-3 chhunga han neih loh duak khan a lo kal thar lak zung zung harsatna karah harsatna kan tawk ve bawk a. Chuvang chuan, tunhnaiah mi 6 te kan han la a, MPSC ah, chu chuan eng emaw chen chu a phuhruk a. Tunah pawh hian doctor awmlohna khaw eng emaw zat kan nei a ni; kan zep lo. A harsa khawp mai a, khatiang practical harsatna kha kan tawk a ni. Sawlai Siaha district chauh ni lovin, Lawngtlai district ah pawh, Lunglei district ah pawh doctor awmlohna a awm a ni. Tin, Mamit district leh hmun dang dangah PHC-ah te pawh doctor mamawhna lian tak kan nei a ni.

Hei hi, ka sawi zau hlek duh chu - Pu Speaker, doctor hi MBBS an nih chuan tun hma chuan Ayush doctor te, dental doctor te pawh 'doctor tho an ni' tiin NHM hnuaiyah kan la thei mai a. Tunah chuan central lamin 'MBBS zir chhuak lo chu' tih kha a ni ta a, chuvang chuan tunah hian doctor kan hmu hlei thei lo a ni; a buaithlak khawp mai. Mizoram ah hian private hospital eng emaw zat a awm a, a tlangpuiin khawpuiyah kan nei si a. An han zir chhuak a, Health Mission lamah kanhan ruai dawn a, keiniin kan dahna tur kha Lungsen, Chhualung etc. tih velte a lo nih khan khawpui an lo duh zawk si a. Market-ah hian hralh hi an tla lutuk tlat mai a, kan chang zo thin lo lai hi a buaithlak a ni. Tlang deuhin ka sawi a nih chu.

Tin, ZMC pawh hi a buaithlak em em mai a. ZMC recognition hi a la hun lo hrim hrim a, Member thenkhatte khan an hrechiang lo a nih ka ring a; kumin kumtir lam ni turah phei chuan kan ngai a. Inspection an lo kal leh dawn a, uluk takin an han en ang a. Chuvang chuan, a hunah recognition ti tura commission te an lo kal hunah khan a chiang mai turah ngai ila. Hun harsa, hun khaihlahkah kan sawrkar hi a ding a ni.

Tin, chiang deuha ka sawi duh chu – doctor lak kha Health Mission hnuaiyah chuan a theih reng a, lak tur an awm miao loh chuan tihngaihna a awm lova. Tunah pawh hian ZMC-ah hian associate professor kan han la dawn a, department bik zel kha a lo awm a ni, medical college-ah chuan. Rin aiin India ramah hian medical college a tam em em mai a, kan chang thei mang lova, pitar-putar ve tawh tak tak kha kan thlem lungawi vel a, a buaithlak khawp mai. An han awm a, kan thlaler ve bawk si a, Mizoram awmna hi. An han haw leh a, a then chu tha taka (kum 70 pawh) awm chu an awm a. Mahse, rin ai hian market ah hian hmuh tur an vang em em a ni. Chuvang chuan, kan Chief Minister zahawm tak, kan governing society Chairman pawh kanrawn a, a awlsam zawng -

online interview te, ‘Mizoram-a lo kal kher lova interview awlsam dan hi apply ang u’ kan ti a. Chutiang chung pawh chuan a buaithlak; a har khawp mai. Faculty-ah hian pawisa awmlah vang ni lovin, a mihring hmuh hi a har em em a ni, medical bikah hian.

Tunah pawh hian thil lawmawm deuh chu (tukin zingah khan kan ngaithla a,) Aizawl civil hospital-ah cardiology - super speciality doctor tha lutuk mai; pawn lamah chuan nuai hlawh pawhin an sawm ka ring a Mmahse, kan chang hram hram a ni. A har lutuk; cardiology-ah Dr. Loncy deuh chiah kan nei a, mahse, kan neih belh ta a. Tin, kal (nephrology) hi a pawimawh lutuk a, chuta doctor tha tur chu pakhat a rawn zir chhuak nawlh mai a. Kan chang lo ang tih hi kan hlau lutuk a, Aizawl a lo thlen hma khan kan book lawk a, tunah hian kan *engaged* tawp mai a ni. MPSC nen pawh recruitment an tih hian (midang compete tur an awm loh phei chuan) ‘a awlsawm zawnga tih dan min ngaihtuah sak rawh u’ tih chen khan kan indawr a. Chu chu vawiina doctor-te dinhmun a ni a, lak mai tur awm lo lai kha kan buaina a ni. Kha kha member ten an hriatthiam loh chuan, ‘engatinge, min duhsak lo bik em ni’ tih kha a awm duh khawp mai a. Mahse, kha lam kha a ni lova. Tunah hian ZMC-a MBBS zirlai - first batch, 2018 mi 100 dawn lai kumin kum tawp lama an chhuah chuan, lak tur kan ngah tawhin ka ring a, kan harsatna pawh a kiam deuh duakin ka ring a. Chu chu chiang deuha kan hriat ka duh a ni. Kan tlangval - nula te rinai hian an zir chhuak a, kan han dawr a, kan tlawn kual vel a, “ti hian lo thawk phawt ula; Lungsen-ah te, Tuipuibari-ah te; cheng sing 6-7 hlawhin” kan han ti a, kan sawm tlu thei lova; Aizawl ah vel bawk lo chuan kan sawm tlu thei lo a ni. Covid laia volunteer tam tak te ang kha a ni bawk si lova. Chuvangin tlang deuhin, ‘harsatna kan tawk a ni’ tih House hian kan hriatloh chuan sawrkar demna kha a awm thei a. ‘Tu pawh sawrkar se, he harsatna hi an tawng’ tih kha kan hriat tlan a tha a. Hmanni khan hei hian sawi a hlawh em avang khan, sawifiah tulin ka hre deuh a nih chu.

Thil lawmawm ve tak tak Health Department-ah hian a thleng thin a, kan lawm ve khawp mai a. National Health Mission hi India Prime Minister - *flagship programme* a lo ni bawk a. Kum 2022 December thla ral hma khan india ram pumpuih sub-centre 1,50,000 lai Health & Wellness Centre-ah hlankai tumna kha a awm a. India ram pumpui achievement ka hre lova, Mizoram chu kan ti tha viau mai a. March, 2023 ral hma hian sub-centre 313 te upgrade vek hman turin tunah hian hma kan la ta a. Sub-centre chauh a ni lovin, Urban Public Health Centre 8 lai kan upgrade dawn bawk a. Tichuan, 378 te hi Health & Wellness Center-a hlankai, March Ni 31 hma hian kan inbeisei a ni. A lawmawm khawp mai. Tichuan, Health & Wellness Centre 368 hlankai tawh bakah khan, tlem te tunah kan bakah hian min han belh ang a, chu chu kan achieve thei turah kan ngai a ni.

Health & Wellness hian pawimawhna hrang hrang a nei a. Sub-centre te kha, *entirnan* - Health & Wellness a nih chuan, B. Sc (Nursing), M. Sc (Nursing) kan post ta a. Mahse khang ho kha post tawp ni lovin, thla 6 chhung IGNOU-ah training an va nei

phawt a, damdawi an chawh ve na tur te kha, ‘doctor te nau an ni e’ ka ti a, fiamthuinn; khangho khan eng emaw chen chu sub-centre kha an ti changtlungin, thisen test kit te, leh equipment leh hmanrua neuh neuh ang chi te kha hei hian an keng tel bawk a. Chuvang chuan, tun dinhmunah Mizoram hian kan ti tha khawp mai a, ‘kan lawm ve khawp mai’ tih kha ka han sawi duh a ni.

Tin, a dang lebah chuan, IPHL hi ‘Pradhan Mantri’ an ti a, ‘PMJVK’ an ti bawk a, he scheme hnuaiah hian laboratory changtlung zawk neih theihna tura ruahmanna tunah hian a kal mek a. IPHL chu ‘Integrated Public Health Laboratory’ tihna a ni a, Mizoram bik district 10-ah hospital din turin Ministry of Health & Family Welfare-in tunah hian min ruahman sak a, kan lawm khawp mai a. Hei hi thil thar danglam tak a ni dawn a, chubakah chuan Covid Care Block (CCB), ‘covid-care hospital’ te pawh kan ti awm e; PMJVK leh ECRP-2 atang hian district pahnihah (hospital a ni mai ang chu) pakhat ve ve din phalna kan nei thei dawn a. Sum pawh hi a tam tham ang reng riau a, vaibelchhe 23.75 ve ve a ni dawn a. Pakhat champhai-ah (hmun an neih sa avangin champhai hospitalin an chang dawn a) engkim mai a fel vek tawh a, pakhat ZMC-ah a ni a. Hmun a ngai zau a, district hospital tam tak erawh chuan kan chang thei lo tlat, a leng lo a ni. Hetah hian emergency service te, inzaina - surgical lampang te, ICU te kha a keng tel dawn a. Tin, tunlai khawl tha tak tak te kan dah dawn a, covid vanga central sawrkarin fimkhur taka kal a pawimawh a ni tih hriatna atanga heng thil hi lo chhuak a ni’ tih a lang a ni. A lawmawm ang reng khawp mai.

Tichuan, kan Medical College recognition chungchang kha chu ka chhang maiin ka hria a; *final recognition* hi huphurhawm ang reng takin lang mah se la, kan paltlang turah chuan kan beisei a. A hnua thil awm dan tur kha chu - tikhan a *in-kahphuk-chaw* mai a.

ZMC chungchangah hian, *achievement* pui ve deuh deuh kan ngah riau mai a, chungte chu -

1. Academic building hi Mizoram-a single project (buiding) ah chuan ‘a lian tha ber mai awm e’ ka ti a. Kan hon. CM hian, “Union Minister-in hawng zawk se, min rawn tlawh pahin,” te a ti a, hun a la fix chiah lova. Tunah hian vaibelchhe 103 senga kan sak kha kan zo tawh a.
2. Boys & Girls Hostel, students 160 awm theihna vaibelchhe 10 man hi kan zo tawh bawk a, Director chenna tur quarter pawh kan zo tawh a. Tin, tunah hian Boys & Girls Hostel pakhat ve ve, vaibelchhe 10 ve ve (avaiin vaibelchhe 20) tunah hian thui tak kan kalpui tawh bawk a.
3. Intern Hostel, mi 60 leng tur hi vaibelchhe 67000 hmangin tunah hian sak mek a ni bawk a.
4. Civil Hospital ai hian an nei that ka ring deuh a, Paying Cabin an nei tha dawn khawp mai, ZMC hian. Paying Cabin hi 52 kan nei dawn a, hetah hian sum pawh

ruahmanna a kal a, an sa zo tep tawh a, thla leh hi chuan a hawn theih mai awm mang e.

ZMC hian medical department 7 tunah hian kan nei a, clinical department pangngai 14 kan nei baw a. Faculty hi Professor Associate, Professor Demonstrator leh JR te, khang zawng zawng nena belhkhawmin 140 tunah hian kan nei a ni. Kum khata student *in-take* (kan admit theih) hi 100 a ni a. Seat allocation kan tih dan hi - State quota - 70 a ni a, 15% central quota a awm ve a, NRI quota - 15% a ni baw a, khatiang kha admission kalphung chu a ni.

Tukin zingah khan kan Vice-Chairman khan chiang takin a rawn sawi a, ZMC hi kan han sorkar hlim khan ICU a lo tam lo angreng khawp mai a, 13 a awm a. Tunah hian NICU (naupang ICU) neuh neuh nen chuan 50 chuang kan lo nei ta der mai a, khum pawh 140 - 150 inkar vel kan han lak hlim kha chuan a awm a, tunah erawh chuan khum 400-a chhiar theih tur ang thuakin kan nei ta a. Tin, khum 100 dang dah belh leh turin ruahmanna kan peih leh tawh baw a, khum 500 awm theihna tur hospital tunah hian kan peih thawkhat tawh a ni. Pu Speaker, hei hi a ropui ka ti em mai a, khum 500 awm theihna hi tam tak a ni. Civil hospital, Aizawl hi 300 anga ngaih a nih laiin ZMC chu 500 a tling dawn ta hi a lawmawm em mai a, ka han tarlang ve hrim hrim duh a ni.

Tin, heng bakah hian thil tam tak a awm a, nichinah khan kan ngaithla tawh a. Oxygen plant hi ZMC-ah hian *litre per minute* (LPM) 1000 chuang kan nei tawh a, tunah chuan kan hnianghnar khawp mai. Covid awm tan tirh lai kha chuan kan thlaphang a ni; tunah erawh chuan kan hnianghnar ta a, Aizawl Civil Hospital ah pawh hian kan nei tha thawkhat tawh khawp mai a. Tin, oxygen plant hi 'Cancer Hospital' kan tih, Mizoram State Cancer Institute ah kan dah baw a, tin, Kulikawn hospital ah kan dah baw a, hmun thumah tunah hian kan nei a. Tin, District Hospital zawng zawngah oxygen plant kan bun fel vek tawh a ni.

Tin, heng bakah hian thil tam tak ZMC ah sawn a awm a, ka sawi vek tawh lo mai ang a, a neuh neuh kha chu. Nakinah Health Department a thil awmte hi ziakin, a bu ang deuh te pawha siam kan tum tho baw a, ka sawi zel tawh lo mai ang a, tikhan duh taw k mai ang.

Thil pakhat – Member thenkhat khan an sawiin ka hria a. Mizoram-a State Cancer Institute kan neih lai meka saw saw tlawh ve ula ka duh khawp mai. Tuna kan khawl pui ber, nikuma kan Chief Minister-in a hawn pheih kha chu khawl turu tak mai, *computerized* vek a ni a, sawng saw chu Pu Speaker, international level-a an hman a nih ka ring a, India ramah hian hmun tam takah a awm ka ring miah lo. A to a, crore 20 dawn lai a nih ka ring a; USA siam a ni a, a tha khawp mai a; sawng te saw kan han dah thei ta a.

Tin, chubakah, tun hnaiah kan khawl rei tak kan lo hman tawh Dr. Silvera hunlaia neih tawh kha, a lo rei tawh deuh a, a lo tha tawh lova. Chung khawl hlui thlakna te pawh a ni ang chu, Global Therapy - Equinox 80 tunah hian kan commission (ti mai ila) kan bun fel vek tawh a ni. Tin, heng bakah hian ‘brachy-therapy’ an ti a, taksa chhunga cancer hemna khawl ang chi te, tin, linear accelerator leh global therapy te hmanga hem kim theih loh hemna tur kha a ni a, a danglam khawp mai a. Tunlai thil siam dan hi hmanlai nen khan a inang tawh lova, khang te kha kan han nei ve ta zel a. Tin, heng zawng zawng hi kan lo neih tawh sa tih changtlunna angah khan ngai ta ila.

Tin, tun sorkar-a thil danglam tak thleng ta chu – kan sorkar hlim khan kei pawhin ka huphurh khawp mai a, sum te a ngai tam si a. Tin, State sorkar pawhin eng emaw chen ‘commitment’ ti mai ila, kan inzuam ve a ngai a, kan inphal ve pawh a ngai a, mahse khang zawng zawng karah kan paltlang zo ta a. India ramah pawh zahpui awm loh tak, hmarchhak state ah pheih chuan, kan sak zawha kan din chuan a tha ber tura ngaih Pu Speaker, Mizoram State – Super Specialty Cancer & Research Project hi JICA (Japan International Cooperation Agency) nen thil kan ti fel ta hi a lawmawm ka ti a. A nuai hlir, cheng nuai 70,000 a ni. Hei hi Zemabawk tlangah sawn kan tifel thei dawn ta a. Tunhnai lawkah kan Principal Secretary te an zuk kal a, March thla tir khan India sorkar leh JICA hian a final lehkha kha sign turin an ti a, keini pawh kal thlak kan duh ve a, mahse G20 avang hian kan tlai deuh hlek maithei a; chu chu vawinah hian peihfel vek a ni ta hi a lawmawm ka ti a. He hospital hi *200-bedded* anih angin nuclear medicine te, PET scan te, cancer research & training te a keng ang a, tin, ‘capacity building of healthcare personnel’ tih te a a keng tel dawn bawk a. Research tihtheihna tur hmun a ni dawn bawk a, a tha viau dawn niin a lang a. A satu Japanese ho hman deuh khan ka zawt a, ‘engtikah nge in peih theih ang’ ka ti a. Kan ram leilung awmdan, Zemabawk tlang vel saw a rem lo ve deuh bawk a, a landscape te saw tihdanglam a ngai turah ngai ta ila. An sawi dan chuan, “kum 2028 tawp lamah hian commission theih kan beisei” ti khan min chhang a. Kumin kum tawp hian (kan sawrkar leh chuan) a lehpek inthlan dawn hnaihah chuan a hawn theih vel dawn ni ang. Pu Sangte, kan hawng hman vel chiah chiah maithei a ni. Engpawh nise, hei hi kan kutchhuak ve ah ka ngai a, a lawmawm ka ti ve hrim hrim a. Cheng vaibelchhe ₹700 chu telo tak a ni. Nuai ₹70,000/- tihna a ni a. Pu Speaker, chu chu he House hi ka han hriattir ve duh hrim hrim a, a lawmawm ka ti em mai. **(Pu KT Rokhaw:** Khawngaihin, Siaha hospital tana CT scan ‘ka pe ang che u’ I tih kha, engtikah nge min pek theih ang?)

E..., ngawi rawh; ngaihtuahna ka pe ang che u; chuti tawp chuan ka sawi ka ring chiah bik lo; amaherawhchu, a pawimawh zia kha chu ka hriatpui ve che u. Tin, han vui dawn chuan, vuina tur hi a tam khawp a, khawvel hi; district hospital building nei tha berte zinga mi inni a, ka rawn hawn te kha; Lawngtlai pawh a thar. Kan district te chu district thar a ni a, kan la nei reng reng hleinem. Lawmna tur hlir chu a nihloh pawhin, *lawmna* percent kha chu a sang ve tak turah ka ngai deuh a. Engpawh nisela, kan lo hria ang e. Kan lo chhinchhiah ang a, tih theih dan tur kawng remchang kan lo ngaihtuah

pui dawn che u nia. Engpawh nisela House-a commitment siam ngawt theih a ni lova, khatiang khawl thilah kha chuan.

A dang leh ah chuan - hei hi tumanin in sawi lova, mahse sawi hi tul ka ti deuh a, Pu Speaker. Sawlai, Zemabawk tlanga sawn kan sawrkar hnathawh anga sawi theih chiah loh, 'RIPANS' kan ti a; Pu Speaker, nang chuan i hre bel khawpin ka ring a, 'Regional Institute of Paramedical and Nursing Sciences' tihna a ni a. Kum 1995-96 khan NEC hnuaiah a awm a; tichuan, 1st April, 2007 atangin Ministry of Health & Family Welfare hnuaiah a awm leh ta a, development saw a turu khawp mai a. Tin, hetah hian course chi hrang hrang - nursing te, medical technology te, pharmacy zirna te, radio imaging technology te, optometry leh course tam tak a awm a ni. Tin, MLT certificate neih theihna te, health-worker te, MLT-diploma course, D. Pharm te, ophthalmic-technician te, ECG-technician te, x-ray technician te, B. Sc (Nursing), B. Sc (MLT) te, B-Pharm, M-Pharm thlengin Pu Speaker, tunah chuan a zir theih ta a, a chhuak pawh hi an lo tam khawp mai. India ramah hian RIPANS ang hi, hmarchhak-state ah hian Mizoram hi beneficiaries state-ah pawh kan intitatu ve ta riau a. Tin, Govt. of India pawhin min ngai pawimawh a, mi 3291 lai mai sawta tang sawn an han pass chhuak tawh a. Tin, thil lawmawm deuh chu, market-ah hralh an tla a ni. Heta zir chhuak hna hmu lo an tlem khawp mai a, placement hi 100% chu a ni chiah lova, 93% vel a ni. A lawmawm khawp mai.

Hei hi ka sawi lo thei lova. Kan han sawrkar hlim khan project lian tak a kal a, zuk nawrchhuah a har ve khawp mai a. Amaherawh chu kan vannei ve ka ti a, 2019 khan saw mi upgrade-na tur cheng vaibelchhe 480.12 crore kha a ni a, chu chu Ministry of Health khan, (covid awm hma deuh te pawh a lo ni bawk nen) engtin tin emaw a rawn sanction ta a, civil work - construction work-ah vaibelchhe ₹217. 97 a lo kal a. Tin, a hna zawh hun chhung tur te pawh a rawn tuk thlap mai a, '24 months' tih a ni a, tun thla ni 28 hi zawh hun tur a ni a, mahse covid avangin hei, an thei dawn ta lova. Hetah hian guest house unit 10 sak hna hi 97% an zo tawh a, staff-nurse quarter unit 18 te, general hostel block - single room ringawt pawh 168 a awm dawn a. Tin, *100-bedded hospital* tunah sawn an sa mup mup a, keini state hian 100-bedded hospital sak nana vaibelchhe ₹20 kan sen lain, anni chuan budget provision ah vaibelchhe ₹60 an dah a, an sa tha dawn khawp mai a. Tin, resident doctor quarter unit 22 te, academic block atan ringawt pawhin classroom 18 te, laboratory ringawt pawh 32 a keng tel a ni. Tin, indoor sport complex lian deuh mai tunah sawn cheng vaibelchhe 480 sengin an khawih tawh a. Tin, PG department hrang hrang 7 hawn belh a ni dawn a, chu chuan post chi hrang hrang 154 a keng dawn a, a lawmawm ka ti em mai a. Mizoram hi a awmna a ni bawk a, RIPANS hi a chhawr ber turah Pu Speaker kan inngai a, hei hi ka han sawi chak ve hrim hrim a ni.

Thil dang dang chu sawi tur chu ala tam mai a, mahse thenkhat chauh ka han tarlang leh puat puat ang a. Healthcare chungchang kan sawi thin a, a sawiloh theih

lohin ka hria a, kan opposition te pawh khan tha kha in ti hlein ka hria a, kan sawrkar hlim khan. Tin, in ziaikut chungchangh khan, ni e, tun hnaiah tlemin a tlahniam tih te kha chu a dikna lai a awm a, mahse ti zawng hianin ka han sawi ang a - Congress sawrkar laia inziak lut an tam lai ber khan 76,746 a ni a, MNF sawrkar laia inziaklut tam ber lai chuan 1,13,720 a ni, Pu Speaker. Tan kan la kha a sawt khawp mai. Tun hnaiah inziaklut tlema a tlak hniamna chu – eng emaw chen lo inziaklut tawh an awm a, an beidawn vang lampang pawh a niin ka hre lova.

Tin, bill an lak harna chhan pawh kan hriatchian tha ka ti a. State Fund atangin budget-ah vaibelchhe 50-60 bawr vel kan han nei ang a, kha kha chu kawngdang ni sela. Tin, hei bakah hian Asian Development Bank kan dawrna kawngah pawh hian thil lawmawm tak tak a awm bawk a. Nikuma min pek dawn khan kan Chief Minister zahawm tak hi he *kan healthcare* hring chhuaktu a ni bawk a. 2007-08 vela ADB loan tho a healthcare kan lo kalpuina kha an hre reng a, chuta an minute hi ka han chhiar chhuak teh ang; a ngaihthlak kha a nuam ve a. India ram hmun tam takah hian loan vaibelchhe 1000 inpek hi har tak a ni. Mizoram-in vaibelchhe 1000 kan zu dil a, chuta Ministry of Finance in an ziahah chuan, “In view of the healthcare needs being critical at this point of time in Mizoram, as the pandemic is not yet over and also the fact that similar measure has been successful in the state of Mizoram earlier” an han ti kher hi hriat a nuam ve khawp mai a, ‘in ti tha’ an ti ve tlat mai a ni. Khatia kan han kalpuia ADB loan kan lak hmasak chungchang an rawn comment-na a ni a, “therefore, the request of the state govt. could be considered favourably” a ti kauh mai a ni. Kan CM pawh hian a hmu maithei; an ziaik tha lutuk. Chuvang chuan, a lawmawm riau a.

DR. ZR. THIAMSANGA : Pu Speaker, *Point of clarification* - Congress sawrkar kum 10 chhung khan healthcare hnuiaia damlo bill kha engzatnge an pek? Tin, tun MNF sorkar chhung kum 5 chhung khan damlo bill pekchhuah zat kha min hrih thei em?)

DR. R. LALTHANGLIANA, MINISTER: Tun maiah chuan han chhan thut kha a har deuh a. (**Dr. ZR. Thiamsanga:** Hei hi a dik em – ‘Damlo bill an pek zat kum 10 chhung khan cheng 82,82,443 a ni a, tuna MNF kum nga chhung hian 13,14,336,500 a ni’ tih hi?) A lawmawm e.

Tin, Pu Speaker, ka sawi duh chu - kan pek zah kha ka lo inring chiah lova, vaibelchhe 100 chuang zet chu kan lo pe a. Chutih lai mek chuan, kan healthcare hi a tha a ni tih ka sawi duh a. Chhungkaw pakhatin an damlohin kumkhat atan nuai 2 entitlement an nei dawn a. A sema sem ni lo, an damloh chauhin, damlo chhungkuain. Khami an han hria kha, enrolment kan han drive em em hma pawh khan thil tih kha a nuam em em a ni.

Vawiinah pawh Asian Development Bank kan zu bia a. Kan Chief Minister pawh hian a ngaipawimawh em em a, an country director office ah te pawh a kalin ka hria a. Tin, kei pawh vawikhat chu ka zuk kal zawk a. Tin, hmanni lawk khan ADB-a an mithiamte pahnih hetiang lampanga ngaihtuahna hmang bik, ‘consultant’ kan tih ang kha Mizoram-ah an lo kal a, Finance Department leh Health Department te nen pawh thil tam tak an sawiho a. Tunah hian transitional period-ah hian kan awm a ni. Doctor kan lak theih mai loh ah pawh nichina harsatna ka sawi healthcare-ah pawh tunlai tak pawh hi a thaw-i-pik-thlak hun lai takah hian kan awm a. Mahse kawla a eng dawn a ni. Tun atanga rei vak lovah hian kan lawm leh mai ang; a harsa ve ngang a ni. Tih theih hun a awm ang.

ADB te hi an strict em em mai a. Hetia minute fel taka an rawn tih hnu pawh hian thiltih neuh neuh tur a tam em em mai a. Chuvang chuan, khang zawng zawng kha kan hriatthiam hram hram a ngai a. ADB loan kan han tifel a nih chuan hahdam deuhin kan bate hi kan clear ka ring a. Tin, ADB loan kan ti thei chiah lo a nih pawhin, kan tih hma pawhin, State budget-ah felfai takin eng emaw chen dah a nih takah chuan kan in clear chho theih zel ka beisei a ni. A hunlai hian kan han inti vak thin na a, nakinah hei hi chu awmze nei takin kan insukiang thei turah ka beisei a ni.

Hei, infrastructure-ah hi chuan thil a tam khawp a. NABARD-24 hmang khan nuai 940 kan seng a, ‘PHC – 5 leh sub-Centre - 10 kan sa a’ tih te kha a awm a. NABARD-25 hmang hian nuai 2003 kan seng a, PHC - 7 kan sa a, sub-Centre eng emaw zat nen. Tichuan, NABARD-26-ah hian nuai 1957 kan seng a, PHC 4, sub-Centre 8. Tikhan chawl mang lovin kumtin hian hna kan thawk a.

Tin, Article 275 hmangin pawisa kan hmu bawka a. Chubakah chuan, tun Inrinni hian dam tea kan awm anih chuan Lunglei-ah RTPCR a lar lai khan a dahna mumal lova, Tourist Lodge ah kan chei a, kan han ti phawt a. Tunah erawh chuan RTPCR tam tak a dah theih tawh a. Kan Civil Hospital saw feet 70 a sei anih ka ring a, a sei khawp mai a, RTPCR khawl dah dawn ta ila a leng hnem e mem dawn a ni; a chungah chhawng thum a la awm lehngal a. SEDP atangin kan CM in ‘bul tan ang’ a ti a, min pe a. Chumi hnuah vanneihthlak takin NEC atangin pawisa kan han hmu leh teuh mai a, ‘a hnuai ber saw hawng phawt ila, tourist lodge a kan khawl te mikhual tir reng ai chuan’ kan ti a, hawng turin kan in buatsaih mek a ni. Eng pawh nisela, RTPCR kha covid-ah hman ngai tawh lo mahsela, nakinah RTPCR chauh ni lo te pawh. Kan building hmanga pawh hi ‘Integrated Laboratory’ kan ti a, ‘Civil Hospital, Lunglei’ tiin kan dah daih a. Multipurpose deuhin chhim lampang Siaha, Lawngtlai, Chawngte, khang zawng zawng ina kan hman theih turin ruahmanna kan siam a. Tin, a chung chhawng thum vel bawra saw thildang tam tak atan kan hmang tel thei turah kan ngai a, a lawmawm khawp mai. Tichuan, CSR-ah hian kan tluang riau mai a. Hei, Power Finance Corporation Limited atangin Mamit District Hospital kan sa zo tep tawh a, nuai 1793 a ni. Hemi sawi hi chuan bialtu hi a nui deuh char char thinin ka hria, a lawmawm khawp mai. Aspirational

District-in a zar an zo a. Tin, Power Grid Corporation atang vek hian Serchhip tan cheng nuai 2100 tunah hian sum ruahmanna a awm tawh a, kha kha kan kalpui turah ngai ila. Tin, Indian Oil Corporation hian ICU 15-bedded siaman tur min pe a, Makeshift ICU te min pe bawk a. Mi thatna zar hi Health Deptt. hian kan zo nasa khawp mai a.

Tin, chu lo lelah chuan, NECIT hnuaiyah hian Kolasib District Hospital tunah khuan kan sa tan mek a, a kal thui viau tawhin ka ring a; Pu Rintea bialah nuai 2000 project lian tak hmangin Kolasib District Hospital tunah hian kan sa mek a ni. Tin, Civil Hospital, Aizawl Cardiology Department hi expansion tunah hian kan kalpui chho mek a. Tin, ‘HIV (Aids)’ tih aimah khan ‘State Resource Centre’ tiin office hming hi kan dah a, hmanni lawk khan a foundation kan va laid a, nuai 392 sengin MINECO-ah sak a ni. Tin, heng bakah hian ZMC-ah ICU, PICU - naupang ICU te, High Dependency Unit (HDU) te dinna tur a tan hian sum tam tak kan hmu bawk a ni.

Tin, hei, Ministry of Ayush hi an thilphal viau dawn emaw kan ti a, an thil phal tho a; keimahni khan inchinfel ve ngai kan nei thin a. Amaherawhchu, hei Kulikawn-ah sawn 50-bedded Ayush Hospital, nuai 1500 senna tur tunah hian phalna kan hmu tawhah ka ngai a. Hei, kan Power Minister hi a vannei riau dawn a, 10-bedded Ayush Hospital, Saitual-ah in nei dawnin a lang a; tunah hian a sanction kan nghak mek a nih chu. Saitual-a a awm nawlh dan hi; a hmun hma kha a lo remchang a ni ang a. Tin, thil lawmawm deuh chu - District thar pathumah hian kan Deputy CM hi a bial a ni a, Pu Zira a ni bawk a, kei ka ni bawk a. A thar denchhen hian a nih ka ring a, tunhnaiah District Hospital tak tak sakna tur vaibelchhe 17 theuh kha; thutak an sawi ka ring a, a sanction lehkha chu ni chiah lova. ‘Hmu tlukah inngai rawh u’ min tih avangin ka han sawi ve ngawt a nih chu. Kan hmu dawn a ang khawp mai. Kan la nei lo ve bawk si a, keini pathum khan.

Tin, CMO office hi district pathumah tunah hian 4 crore bawr vel theuhin an sa zo deuh vek tawh a, Khawzawl, Saitual leh Hnahthial ah te. Hei hi thil lawmawm ve tak niin kan hria a, Tin, ‘Mizoram Health System Strengthening Project’ kan tih mai World Bank project-ah hian sum kan hmang nasa khawp mai a. A tirah khan World Bank hi an strict khawp mai a, tunah erawh chuan, ‘Mizoram ah hi chuan strict lutuk teh suh u a, flexible deuh teh u; in pawt fan ve deuh teh u. Eng eng emaw chhunkhah nan pawisa kan mamawh em mai; state fund atang a tih theih siloh’ kan ti a, tunah hi chuan kan tha ta viau mai a; chumi hmanga vaibelchhe 280 kha tihlawhtling kan ni a. Hei, kan han hmang chho tan a; nikum atang khan hemi hmang hian - hna tamtak sub-center te, PHC te leh District Hospital thlengin kan thawk chho thei turah beisei ila.

Commerce & Industry hi tawi tein han sawi a tulin ka hria a. Geology & Mining hi Pu Lalrintluanga Sailo khan ‘department lam hlawh lo deuh, pawimawh deuh si’ a ti a, a dik khawp mai a. Pawisa pawh a la lut hnem khawp mai a, an titha khawp mai a. Covid karah pawh 2020-2021 khan nuai 497 lai an thawk chuak tho a. Tin, 2021-2022

khan nuai 632 zet an lalut baw k a. Kumin financial year a la tawp lova, ‘10 crore hi kan tlin mai awm mang e’ an ti a ni. Tlin an tum a ni. Chutaing avang chuan Cabinet meeting hnunung ber khan, ‘thawktu in awm si lo; a bik takin chhim lampang Lunglei-ah zonal office pek in ngai a ni’ an ti hmiah mai a, tumah khan objection kan nei lo. Post 13 keng tel kha kan hlawhtling ta a, a lawmawm khawp mai a. Sawlam panga kan hawng thei anih chuan revenue tam fe alo lut in ka ring a. Vaibelchhe 5 vel lo lut thina kha, 15 hi kan tawng thuai ka ring a. Chuvang chuan, ‘*revenue earning department*’ a nihna hi a hlu em em mai a, kan hotute pawhin an duhsak a. Tin, a department hna pangngai bakah hian heng Super Speciality cancer hospital, nichina ka sawi soil testing leh khang geo-tech survey zawng zawng kha an tih a ngai a. Mimal in lian deuh sa te leh leh sorkar in sa te khan an ko phar a, an buai em emna karah ‘revenue lalut tamtak anni’ tih hi kha House ka han hrilh duh hrim hrim a. Tin chu bakah chuan, Mizoram-a Oil and Gas exploration chungchang te pawh hi an hma tel a. Tunhnaiah company te pawh kan ko chho a, kan sawpui baw k a. Engpawh nise, he Geology & Mining hi a hlu a ni.

Tin, post ruak tamtak hnawhkhah loh te pawh a awm a, kan finance leh DP&AR te pawhin an dinhmun hrethiamin tunah chuan a zualpui te min han pe ve ta a, nakumah chuan kan zia kawkin ka ring a. Nikum September thla khan Hyderabad-ah Mining Ministers’ Meeting kan nei a, Orissa han tihthat zia chu, India ramah hian a filawr lak a, an state mining atanga an pawisa lakluh vaibelchhe 50000 a tling a ni. An Principal Secretary kha a chapo deuh ar ar in ka hria a, ‘keini chu central sorkar kan mamawh vak lo’ te kha a ti kher a; Union Minister awm lai khan; an mamawh lohna chhan chu, ‘kan intodelh khawp mai’ a tihna a ni a. Mining ah chauh khan vaibelchhe 50 an lalut a ni. Mizoram pawh hi kan tih fuh chuan helam hi kan revenue lak luhna tur atan hian a thain ka ring a. Chuvang chuan vawiin niah hian sorkar pawhin a ngai pawimawh hle a ni.

Aizawl City Market-a *foreign lane* kan sak mek te kha chu question-ah khan ka chhang vek tawh a, kan Deputy CM portfolio zawk kha a ni a. A bulah Smart City hnuaiah in lian lutuk nuai 4200 senga sak tur bul an han tan chho te, hmalak a ko hle mai a.

Tin, Lunglei hi an vannei hi ka ti a. Tun Inrinni khan kan va kal a, a foundation kan va laid a. ‘Sobji bazar’ kan tih mai thina kha a hlauhawm lutuk tawh a, thiaha sak that a ngai a. ‘Sum engtin nge kan tih ang’ kan tih laiin vanneihthlak takin NEC atangin nuai 1403.4 min rawn sanction ta a. Lunglei khawpuiah chuan Super Market tha tak kan nei thei dawn a, kan lawm khawp mai. Hei hi Lunglei tana thil tangkai tak a nih kan beisei.

Tin, kan border haat te, kan border trade te hi chu kan kal tluang khawp a. Amaherawh chu Bangladesh Minister hial pawh nikumah a lo kal a, Silsuri-ah helicopter-in kan zuk hruai a. Kawrpuichhuah-ah te kan va kalpui a, ‘thil tih zungzung

a ni dawn e' tia kan beisei mek lai khan Bangladesh (Myanmar ang chu nilo mahsela, harsatna kan hre vek a) chhim lamah buaina a lo awm ve leh a, tlemin a boruakin a zir lo leh hlauh mai a. Tin, Zokhawthar hi tunah hian nuai 1500, 'Special central Assistance to State under Capital Expenditure' tih atang khan hmuh a ni a; Land Custom Station sakna tur te leh infrastructure pawimawh tak tak tihna tur kha a ni dawn a. Hei hian Immigration check post te, animal quarantine station te, plant quarantine station laboratory te, food testing laboratory te kha a huam dawn a.

Dr. Thiamsanga kha a tang khawp mai a, 'khilam pang kha engtin nge ni ang?' a ti a. Chak takin hei chu kan kalpui thei a. Amaherawhchu, Myanmar sorkar mumal loh, 'sipai rorelnaah hi chuan a buaithlak deuh anih hi maw le' tih hi chu a awm a. Engpawhnise, hei hi chu kan chawl lo a, kan kalpui zel e. Tin, border haat - khita Indo-Myanmar border haat pawh a la kal reng a ni. Engpawh nisela, 'khilam pang ralmuang lo karah thil tih zung zung a harsa deuh a ni' tih kha kan sawi ni mai se.

Tin, Pu Speaker, kan integrated check post, ACP-Kawrpuiichhuah, Lunglei District hi kan lawm khawp tawh mai a. Land Port Authority of India hian DPR a siam a, a tirah khan vaibelchhe 200 vel a siam a. Prime Minister atangin Kawrpuiichhuah border trade hi an ngaipawimawh anih ka ring a, an han revised a, an han siam leh ta a. An siam tam khawp a, vaibelchhe 550 vel kha an siam ta a ni; a tam khawp mai a. Chu chu Home Ministry-ah an thehlut tawh a, Home Ministry-in tuna a nghah ber nia lang ta chu - Bangladesh sorkar atanga *official clearance* kha tunah hian a nghak mek niin ka hria a. Bangladesh hi rin ai hian an che muang ve deuh hlek a, keini lam kan chet chak aiin. Amaherawhchu Land Port Authority of India hian tunah hian Kawrpuiichhuah fencing te chu min zawhpui tawh a. Tin, DPR an siam approval kan hmu anih chuan, hna chu a kal tha turah ngai ta ila. Engpawhnise, Kawrpuiichhuah - Integrated Check Post chungchangah hian Thekamugh, Bangladesh side leh Mizoram lam inkalpawhna tur lei thui tak mai dawhna tur erawh chu a hautak hle dawn a. Chung chu tihloh theihloh turah khan an ngai ve tho a, an hre lawk vek tho a, kaltluang turah ngai ta ila.

Pu Speaker, Zorinpui, Lawngtlai District chungchang pawh thil kal reng a. Delhi a kan zu kal pawh khan an chawlhlan bik miah lova. Amaherawhchu, political boruak - Myanmar te, Bangladesh te an thlir tel lo thei lova. Tin, heng border haat - Hnahlan, Zote, Champhai, Vaphai, Pangkhua, Thingsai, Cherhlun bakah khilai phei Pangkhua te pawh hi khulama kal hi chuan ngaihtuahna an la seng reng a. Tin, khawthlang lam pang - Marpara, Silsuri, Tuipuibari, Nunsuri te pawh kha a la kal reng a ni. Amaherawhchu, thil thlir an nei lo thei lova, sorkar ralmuang mang lova han indawr hian a la fuh theih chiah lova, principle chuan 'tha' an ti tlang a, lawmawm khawp e.

Hei, Industry Deptt. bikah hian thil danglam deuh hlek, thil thar a awm a. 'Industry Growth Centre, Luangmual' leh 'Export Promotion Park, Lengte' kan tih maiah hian industry unit te mamawh tui supply-na tur nikum hmasa khan NSE meet

atangin sum kan hmu a, nuai 900 ve ve kan hmu a. Hei tunah hian tui dahna tha tak mai crore 10 deuhthaw ve ve kan nei thei a, kan lawm khawp mai. Tin, Industrial unit awlsam taka an inbun theihna turin Aizawl, Lunglei, Champhai leh Kolasib-ah te Flatted Factory building sa turin tunah hian ruahmanna siam a ni tawh a, DPR hi MSME ministry hian min pawm sak tawh ang a ni a. Amaherawhchu, State sorkar atanga hei hi kan tifel ang a, IGC Luangmual, IIC Luangmual, IIDC Lunglei, IIDC Zote Champhai leh Kolasib atan te min rawn ruahman sak a, kan lawm khawp mai. Tin, hei bakah hian ‘Special Assistance to State for capital investment part-II’ an tih hi PM-Ghati Shakti - kan Industrial Growth Centre hnuai ah Lengte tihchangtlun nan vaibelchhe 20 kan hmu dawn a, amaherawhchu vaibelchhe 5 hi power supply lamah a kal thung ang.

Tin, SEDP hnuai ah Industry trade hrang hrangte tan chhungkua 3266 hnenah 1st instalment pek tawh a ni a, 2nd instalment pe leh thei thuai turah kan inngai a. Tin, Handloom-ah hian hlawhtlinna kan neih ve chu – puan tahtute dawmkanna turin hmun hrang hrang 12-ah *cluster development project* kalpui a ni a, hemi atan hian Ministry of Textile atangin sum hmuhtawh a ni a, heng kan cluster - Khawlzawl, Buanhmun, Tuipui, Tuirial, Lunglei East, Sailam East, Kawnpui, Lungrang, East Lungdar, Sesawng te, khatiang khan sum kan hmu nual a, a lawmawm khawp mai. Tin, Industrial Policy phei chu hmanni a zawhnaah khan ka rawn chhang tawh a, hei pawh hi kuminah chuan peih hman kan inbeisei a.

Sawi dawn chuan sawi tur tam tak a awm awm a, hun ka hmangrei ta khawp mai. Nizan kha dar 10 a ni a, a lawmawm e. Pu Speaker min hrethiam thin a ka lawm khawp mai.

Heng ka department chante demand hi House-a min pass pui turin ka rawn dil e-

Demand No.	Purpose	Amount (in ₹)
21	Higher & Technical Education	2,71,49,16,000.00
24	Health & Family Welfare	7,51,06,54,000.00
40	Commerce & Industries	62,00,66,000.00
TOTAL		10,84,56,36,000.00

Ka lawm e.

SPEAKER : Awle, tunah chuan Minister zahawmtak Dr. R. Lalthangliana'n a Demand te -

Demand No.	Purpose	Amount (in ₹)
21	Higher & Technical Education	2,71,49,16,000.00
24	Health & Family Welfare	7,51,06,54,000.00
40	Commerce & Industries	62,00,66,000.00
TOTAL		10,84,56,36,000.00

House-ah pass a rawn dil a. Remtiin, “Remti” ti rawh ule. (**Memberte:** Remti) Remti lo kan awm em? Remti lo kan awm chuan “Remti lo”, ti ula.
(*Remti lo an awm lova*)

Awle, Minister zahawmtak Dr. R. Lalthangliana Demand chu House--in lungrual takin a pass ta a ni. (**Dr. R. Lalthangliana, Minister:** Pu Speaker, ka lawm e.)

SPEAKER : Awle, vawiina kan business chu kan zo leh ta a, naktuk Ni 24 February, 2023, (Zirtawpni) chawhma dar 10:30 ah kan thukhawm leh dawn nia.

The Sitting is adjourned. (**9:21 PM**)